

T 079

کتابخانه عسکری

عدد ۱۲

جنگ و نیکی و ادب

مؤلف: مشیران سلطنت سید ذوالنارین ارکان حربیه
جذالرزندن دولتو فون در نجرالاج پاشا حضرتقلی



مؤلفی: مهندسخانه بری مایون سلطیه و ثقیه تطبیقاتی
معلی ارکان حربیه قول آغاسی عثمان سنائی

مهندسخانه بری مایون مجلس مہارف عسکرینک تقدیر مخصوصی
مارف ہموہیہ نظارت جلیہ سنک (۲۰) مارت (۳۱۵) تاریخ
و (۲۷) نومرولی رخصتنامہ سیلہ طبع ایدلشدہ

استانبول — (آہ آصادوریان) شرکت مرتبیہ مطبعہ سی —
باب عالی جادہ سی نومرود ۲۰۲

بین - حرب

کریک سون و اداره بی


HARBAK SOUK WA

IDARA CI

GOULACH PASHA

ISTANBUL

1315 'AH



کتابخانهٔ عسکری

عدد ۱۲

—————

حِزْبُکِ سِنِیِّ وَ اِکْبَرِیَّ

—۳۴۰*۳۴—

مترجمی

مهندسخانهٔ بری مایون سفریه
وتعبیه تطبیقاتی معلمی ارکان
حربیه قول آغاسی
عثمان ثنائی

مؤلفی

مشیران سلطنت سنیه دن
و آلمانیا ارکان حربیه
جنرال لرندن دولتلو
ن دروغواچ پاشا حضر تلمری



ناشری

شفق کتبخانه سی مدیری نصرت


.....
مجلس معارف عسکرینک تقدیر مخصوص و معارف همومیه
نظارت جلیله سنک رخصتیه طبع ایدلشدر
.....

استانبول

آ. آصا دوریان) شرکت عربتیه مطبعه سی — باب عالی جاده سی

نومرو ۵۲

۱۳۱۵



آرتین

آصا دوریان

شرکت مرتبه مطبعه سی

استانبول باب عالی جاده سنده

نومرو

۵۲

اثرک طبع و نشریله شاگردانه توزیمی ایچون مکاتب عسکریه نظارت
جليله سنه تقدیم اولنان استدا .

حضور جلیل نظارت پناهیه

دولتو افندم حضرتلری ،

بوندن ایکی اوج سنه اول دولتو فون درغولچ یاشا حضرتلری
«حربك سوق و اداره سی» اسمنده بالخاصه مکاتب عسکریه
شاگردانی و علی العموم ضابطان ایچون فوق العایه نافع اولمق
اوزره پک مهم بر اثر نشر ایتمشلردی . شبهه سز ، بو اثر فوائد
کستر منظور رسامی جناب نظارت پناهیلری اولمشدر . اونک
ایچون کوزلاکنه و اهمیت خارق العاده سنه دائر سوز سویلمه یه
هیچ لزوم کورمیورم . یالکز آلمانجه نسخه سی چیقارچیقمز
فرانسز لساننه و اوتوکی لسانلرک بلکه هپسنه ترجمه ایدلمش
بولنسی اثر مذکورک قیمت عسکریه و ادبیه سی کوسترتر اک
واضح دلیللردندر . سایه معارفوایه حضرت پادشاهیده وزیر
اداره جناب مشیر افخمیلرنده هر سنه بشقه بشقه ترقیات کور-
مکده اولان مکتب حریه شاهانه ایله مهندسخانه بری هاپون
طلبه سنک بسبتون تزید معارف عسکریه لری ایچون ، طبع
و نشر ایدلدکن صکره اثر نفیس مذکودن برر دانه ایدیلرینه

مساعده بیورملرینی رجا واسترحام ایلرم . اولبابده امروفرمان
حضرت من له الامر کدر .

سفریه وتعبیه تطبیقاتی معلی
ارکان حرب قول آغاسی
عثمان ثنایی

۲۷ شباط ۳۱۴

مهندسخانهٔ بری‌ها یون تدقیق مؤلفات قومیسونی طرفندن ویریلان راپور:

محررین عسکریه‌نک برنجیلرندن صاییلان وامثالی نادر
آناریله اک زیاده آلمانیا ایله بزم عسکرلکمزده خدمت ایتمش
اولان شیران کرآمدن دولتلو فوندر غولچ پاشا حضرت‌تلیزنک
(ملت مسلمنه) سندن صکره برنجیلکی احراز ایدن (حربک
سوق واداره‌سی) نام اثر کزیده‌لری شمدی‌یه قدر بر قاج قلم
طرفندن لسانمزده ترجمه‌یه تشبث اولمش ایسه‌ده فضل تقدم ،
اثر مذکوری غایت سلیس وسالم بر صورتده ترجمه‌یه بچورمکه
موفق اولان اذکیای ارکان حربیه‌مزدن قول آغاسی رفعتلو
عثمان ثنایی بک طرفنده قالمشدر ، مومی‌الیهک بوسعی وهمتلری
حقیقهٔ شایان تشکرات عظیمه‌در . اثرک مفید اولدیغنی کوسترمک
ایچون یالکیز مؤثر اصلیمسنگ مسلم انام اولان اقتدارلرینی تسلیم
ومترجمنک غیرت واقعه‌لرینی نذکار ایتمک کفایت ایلر . اوجهتله
کتاب مذکور شایان طبع وتمثیل وهرضابطک برددانه ایدینمسی

الزم اولديغنى ايديلان تدقيقات نتيجه سندن آكلاشلمش اولمغله
اشبو راپور تقديم قلندى .

۱۲ مارت ۳۱۵

مجلس معارف عسكرينك اعلام صورتى:

مشيران سلطنت سنيه دن دواتلوفون درغولچ پاشا حضرت تلىرىنك
آثار مهمه عسكرىه سندن اوله رق مهندس خانه برى همايون معلملرندن
اركان حربيه قول آغاسى رفتهلو عثمان ثنائى بك طرفه دن
لسان تركى به ترجمه ايدلمش اولان (حربك سوق و اداره سى)
نام اثر كزين مجلس عاجزانه مزجه تدقيق ايدلدكده صورت
ترجمه سى هروجه ايله امثالنه فائق و تحسین و آفرينه لایق
كورلمش اولمغله طبع و نشرى و اثر مذکور دن بالاستفاده معارف
عسكرىه سنى براقا قات زیاده تزین ایلمك ایستیان علی العموم
ضابطان و شاکردانه برر دانه سئك اعطاسى بالتذکر تنسیب
قلنمش اولمغله ایجابنك ایفاسى مرهون اراده جلیله داور
افخمیلریدر اولبابده امر و فرمان حضرت من له الامر کدر .

۱۳ مارت ۳۱۵

مکتب حربیہ شاہانہ معلمین میر آلی

عزت‌الو طاهر بك افندی‌به

فون درغولچ پاشا حضرتلری طرفندن: (حربك سوق واداره‌سی) نامیسه یازیلان اثری او یله ظن ایدرم‌که، ایلک اوجکه ذات عالی‌کز اوقو- مشسکزدرد. مشارالیه بزده ایکن ده‌ا بواثری یازمه‌یه باش‌لادیغنی اصحاب کالدن بریسی بنده‌کرم سولیمش ایدی. ذات عالی‌کز ایسه مشارالیه‌ک معاونی اولدیفکزدن اوتری اکثریا آلمانجه ویا فرانسیزجه یازیلان مسوده وائرلینی هیچ کیمسه کورمه‌دن اول سز کوروردیکز، لسانجه سز ترجمه ایدردیکز. ایشته اونک بویله اولدیفنی بك ابو بیلدیکم ایچون یوقاریده اسمی کچن اثری ده هرکسدن اول سزك اوقومش بولمکیز لازم کلیوره، فکرنده‌یم. هم یالکز مشارالیه نزدنده معاون صفتیله قالمکیز دکل، علوم لسانیه و ادبیات عسکریه‌ده‌کی بهره تام‌کزده سزدن بویله بر مطالعه بکامیه بزی مجبور ایدبور.

(حربك سوق واداره‌سی) دنیلان اثر چیقدیغنی زمان شبهه سز آلمان لسانی اوزره چیتمشدی. بن اوصره‌لرده هنوز ارکان حرب صنف‌لرنده‌کی وظیفه‌می بیتورمش ایدم. کرچه مکتبده بر قاج سنه آلمانجه اوقومه‌یه هوس ایدلمش ایسه‌ده نه‌چاره‌که، بوکی جسم اثرلك عباره‌سنی، معناسنی سوکدیره‌جک بر قوتی حائر دکل ایدم. ترجمه‌سی، کوزل آلمانجه اوکرنه. مه‌مش ایدم.

یازیق! بر نفره سلاح فصل قطعاً لازم ایسه بر ضابطه، علی‌الخصوص، بر ارکان حرب ضابطه لسان بیلک، آلمانجه اوکرنمک اونک کی قطعاً لازمدر. کاشی مکتبده کچوردیکم زمانلرک بیوک بر قسمی آلمانجه اوکرنمه‌یه، و او لسانک بحر بیکران معانی‌سنده یوزمه‌یه

حصر ایده ایدم نه کوزل اولوردی! یازیق که، انسان بعض کره یوریدیکی بولک اوته سندمه بریسندمه و چالیرلر ایچنه کیزلنلر چیچکلره ایچنه برزمان، کوز اوچیله اولسون باققدن کندیسینی بردرلو قوروپه منه. کوز بر کره ایلشیمسون! بوقسه، ایلشیدکن صکره بوشنه کچن زمانلرک دقیقه سنی، ساعتی حساب ایتمک ممکن اوله منه.

بزم باشمزدن کچن ده عیناً بویله اولمشدی. معلوم عالیکز: برزمانلر مکتبه علوم ریاضیه بیلنلرمن پرمقله کوستریلوردی. یوزلرجه آرقداش ایچنده بویله بر شرف، پرمقله کوسترلرک شرفی البته بیانه آتیله حق شیلردن دکلدی. طلبه دن بریسنک ذکا و عرفاتی تقدیر ایتمک ایجاب ایدنجه «بونی کوریورمیسکز! جبر، هندسه، ماکنه بیتمشدر! کندیسینی عادتاً ایکی آیقلی بر حساب کتبخانه سیدر!!» سوزلری فاتحه کلام اولیوردی.

شمدی انصاف ایله باقیلورسه؛ شویله برامتیاز آلق ایچون صره لرک برنجیلرنده اوطوران افندیلرک (کلسون هندسه، کیتسون ماکنه!) دیهرک صباح، آقشام علوم ریاضیه اغورینه نفس توکتمش اولملرینه برآز حق ویرمکلرکمز ایجاب ایدر؛ صانورم.

بعضیلری ده: ریاضیه درسلی کبی کرچکدن آچیق بر ذهن، کسکین بر وکر ایستیان درسله زورله حیات صرف ایتمه یه مجبور اولورلردی. یالکز علوم ریاضیه اولسه نه ایسه! فقط ایشک ایچنده شاعرلرک و رساملری کبی قلیچ قوشانلر ایله پکده و بلکه هیچده آلیش ویریشلری اولمیان بعض او یغونسز شیلره دوشکونلرک عادتلی واردی. کوزل بر استیقام شکلی یایمق ایچون آیلرجه زمان چایشیدیممی، کوزل بر طرامه چیزلرک ایچون ینه بونجه زمانلریمی بوش بوشنه اولدردیکمی دوشوندکجه چیلدره جنم کلیور! یا وزنی یوق، معناسی یوق برمنظومه، بر شعر غرا دوشونمک ایچون کیجه تا صباحلره وارنجه یه قدر یتاق کتارنده بر صاغه، بر صوله دونن شعر و قافیه دوشکونلرینه نه دیلم!

كرك شاهرار، كرك مهندسار بو سوزلریمی كندی باغچه‌لرینه
آتمیش برطاش ظن ایتدولر! هر مسلکك یولیسنه اغورلر اولسون،
حق سلامت و برسون! دیمك بورجهزدر. بزم اصل دیمك ایستدیکمز
شودرکه، بر شاهر ماوزر و مارتین تفکریله سلاح اوموزه ایتك، بر
مهندس چفت قول نظامنده بولنان بر طابوری کنیش قول نظامنه
چکورمك خصوصلرنده ایشه فصل یانچی ایسه، مسلک اعتباریله، جدی
برعسکرده بر فزلی تخمیس ایلیمك، ییقلمش بر بنای طبق معمار سنان
کبی یکی باشند یا یق خصوصلرنده ایشه اوپله بیاچیدرا

دیرلرکه، برانسان هرشی ییقلی! دیرزکه، هرشی بیلورم دعواسنده
گزن بر عسکر هرشی ییلیان بر عسکردر! بن هر زمان بو فکردهیم.
وبوفکرله برابر اوله جکم. وظیفه سی اساساً دشمن اوزرینه قلیج صاوور-
مقدن عبارت اولان بر عسکر، بر سپا کوپرسی، علی العاده بر کچید
یا به جق درجه ده معلومات فیه صاحبی اولور. لکن یتمش، سکسان ییک
لیرالق کارکیر کوپرسی قورمق بر عسکرک الذدن کلز. چونکه سونکی
ایله کوسکی آره سنده آشلمسی غیر ممکن بر مسافه، برفرق واردرا!

وظیفه سی اساساً غوغا ایتك، کندیسنه ویریلان بر طاقی، بر بلوکی
ایوجه قوللانمقدن عبارت اولان بر عسکر بر شعرك، بر ادبیات مقاله سنك
قیمت کلامیه سنی بیله جك درجه ده معلومات ادبیه صاحبی اولور. لکن
بر صرف کتابی یازمق، کرسی به چقبوده شعر و ادبیات خواهه لکی
ایتك اونك الذدن کلز؛ کلورسه بیله یاقیشمز. بر عسکر هر شیدن اول
بلنده کی قلیجك حقنی و برمه بی ییلمیدر. بو، اونك ابدی بروظیفه سیدر.
بو قسه بتون مساعیسنی، بتون قوای ذهنیه سنی طوئدینی مسلکك
خارجنده بعض اکر ی بوکری یولره صرف ایدن برعسکر، شیخ سعدینك
دیدیکی کبی:

ترسم نرسی بکعبه ای اعرابی!
این ره که، نومیروی بترکستانست..

سوزینه هدف اولور. لکن جداً عسکر اولان کیمسه دشمن قورشونه هدف اولورده شیخک بو تیغ کلامنه هدف اولما کرچکدن بر عسکر ایله یالاندن بر عسکر آره سنده کی فرق ایشته بودر.

سوز برآز اوزادی. فقط ضرری اولسه کرک! چونکه بعض اوله حاللر کوزه چاربارکه، انسان آرزوسيله دکل، بالضروره اوزون سوزلرک آرقه سنه دوشمه به مجبوریت کورور. مثلاً پکن کون بر ایکی کتاب صاتون آلق ایچون بر کتابچی دکانه واردم. بر ایکی دقیقه صکره سرت یوزلی بر ضابط ایجری کیردی. کتابچی غولج پاشانک (ملت مسئله) سنی غالباً دکانه یکی کتورتش اولملی که، بیوک بر هوس ایله برآز اول بکا دیدیکی کبی اوکا ده: «بکم! شوکتابدن بر دانه آلورمیسکز؟» دیدی. ضابط کتابک اوزرینه صفوقچه برکوز آتدقدن صکره: «آدم سن ده! اوله صاچه شیلرک بکا نه لزومی وار..» دیمسونی!

(ملت مسئله) کبی بر اثری بودرجه تحقیر ایدن ذاته قرشو جواب ویرمک، یاخود ویرمه مک می لازم کلور؛ بر درلو عقلم کسیدره مدی. حاصلی بن اوکا هیچ برشی دیمدم. و دیمکه ده حقم یوق. بالکنز آلدیغی کتابلرک اسملرینی برکوزدن پچورمه به غیرت ایتدم: مکر (ملت مسئله) به صاچه شیلر دیان ذات، (یکی شرقی مجموعه سی، چوبان قیزی، و مجموعه اطائف) کبی کرچک لطافت وجدیتلرینه شاشیله جق اثرلر آلورمش!! برزمانلر، دها مکتیده ایکن، بردفعه عثمانلی تیاتروسنه کیتش ایدم. قیودن کیرر کیرمز، آق صقاللی وسکسانلک طقساناق بریسی کمال نزاکت ایله یانمه کله رک: «افندی اوغلم! ملت مسئله یی تکرار بکا کوندرسه کز بنی چوق سويندیرمش اولورسکز. چونکه اونی برکره جک دها کوزدن پچورمک، طویه طویه اوقومق ایسترم!» دیدی. بو صاریقلی آدمک کیم اولدینغی بن هیچ یلیپوردم. فقط صکره دن آکلاشلدی که، بنی ارکان حرب ضابطلرندن برپسنه بکرتش ایدی.

چکن موسملرک حزین بریادکارینی تشکیل ایدن شو کوچک فقره یی سویلکدن املم شودرکه : بزده سکسانلک ، طقسانلق اختیارلرک (ملت مسئله) بی تقدیر ایلدکاری کوردلیکی کبی یکر میلک اوتوزلق عسکر لرکه ینه عین اثری تحقیر ایلدکاری کوردلور شیلردن ایمش !

(ملت مسئله) بی ترکیه به ذات عالیکز ترجمه ایتمشکزدرکه ، چالیشقان برعسکرک و طمنزه ایده جکی هدیه لرک دها بیوکی یا اولور یا اوله من . بو هدیه کزدن اوتری سز نه درجه بختیار برمنزه چیمش ایسه کز قیلجی کوکلنده طاشیان هر عسکر او بیوک غیرتکزک الی الابد منتدایدیر .

(ملت مسئله) بی شیوه سنه طویلز براسلوب کزین ایله ترکیه به ترجمه ایتک ، یسه او (ملت مسئله) بی آلمان لساننده تألیف ایتک قدر کوجدر . شو سوزمده بیلیورم ، آزاچق مبالغه وار . لکن مبالغه سیله برابر ینه برحقیقت معناسنی جامع اولان سیرلردندر . کرچک بویله در ! زیرا انسان (ملت مسئله) نک برکوره فرانزجه ویا آلمانجه نسخهلرینه برکوز کزدیره جک اولورسه ، او درجه بیوک براترک ترکیه به بودرجه نفیس برشیوه ایله ترجمه اولنه بیلسنده کی قوته حیران اولسه بیله غبطهلر ایدر ! بز (حربک سوق واداره سی) نام اثری ترجمه ایتک ، لسانزجه کچورمک لطفنی ینه سزک قلمکزدن بکرا ایدک . حتی بکا اوپله کلورکه ؛ بوندن غالباً ایکی وبلکه اوچ سنه اول (اقدام) غزته سی مذکور اثرک طرف عالیکزدن ترجمه ایدمک اوزره اولدیغنی بتون عسکرلره بیلدیرمش ، مؤده لمش ابدی .

معلوم عالیکز ؛ (ملت مسئله) عمرم ایچون ، نه درجه فائده لی بر اثر ایسه (حربک سوق واداره سی) ده بالخاصه عسکرلر ایچون اوندن هیچده آشاغی قالمیه جق براهیتی حائزدر . یازیق که ، اهمیتی بو درجه یوکسک و آشکار اولان براتر ، اک صکره بنده کزک المدن ، قریق بر قلمدن کچهرک لسانزجه انتقال ایده جکدر . لکن قصور بنده دکل ؛ بالعکس سزده ، سزک قدر وسزدن زیاده حائزکال و عرفان اولانلرده در .

انصافله دوشونور ایسهك ، شبهه سز تسلیم ایدرزكه ، غولچ پاشا
 حضرتلرینك كرك كندیسی وكرك آثار قلیه سی آلمانلردن صكره اك
 زیاده بزه یقین، بزه دوستدر . ایش بویه ایکن نیجه ضابطلریز وار،
 آلمان لسانتی پك ابو بیلورلر . ذات عالیکزی ردرجه به قدر عذرلی
 كوسترمك المدن كلور . چونكه مكشیده کی وظیفه لركرك پك چوق اولدیغنی
 بیلورم . لکن وظیفه لری سز نکیلر قدر اولمیان اوته کی لسان آشنا
 ضابطلریزك شومهم اثری لسانمه كچورم دكاربته بردرلو تأسف ایتمهك
 المدن کلیور .

آلمان لسانی کی، عسکر اوجاغی دیمكه جداً لایق اولان بیوك بر
 منبع ضیا وكالدن قانه قانه استفاده ایده مدیكمه نه درجه تأثر كوسترسه م
 یری وار! (حربك سوق واداره سی) اك صكره بنم المدن چیقاروق
 تركاشدیكنه ده آجیام دیسه م یالان سولیش اولورم . لکن بوكا قرشو:
 «هیچ یوقدن ایودرو» سوزی بنم ایچون بر سلاح مدافعه یرینه كچرك
 اونكه تسلی بولیورم . اوچ سنه حربیه، اوچ سنه ارکان حربیه صنفلرنده
 علوم عسکریه تحصیل ایله وقت كچوردك . ایکی سنه بر بری آردنجه
 غولچ پاشا حضرتلری کی جهانده امثالی كرك پك آز بولنور برخواجه .
 دن درس اووقودق . لکن یمین ایدرمكه، (حربك سوق واداره سی)
 نام اثردن كوردیكم استفاده اونلرك هپسندن چوقدر . بن شو بیوك
 عجزمله برابر اثر مذكورك هیچ برزمان درجه كالانی تقدیرمه جسارت
 ایده مام . فقط انسانك عجز و نقصانی هیچ اولازسه، فوق العاده برشیئی
 آلتیشلامه به ماع اوله من . اونك ایچون هر صحیفه سی حرب صنعتك
 بر تطبیقات باغچه سی دیمك اولان بو اثره هر زمان حیرتله ایله باقه جم .
 تقدیر ایتمك المدن كلمسه بیله ، حیرت ایتمك اقتدارینی كوسترمك ده بنم
 ایچون بر شرف یرینه كچه بیلور . اوت! بنم ایچون بوكفایت ایدر .

اردوی هایونلرینك تربید شان وسطوته هرکون بر بشقه درلو انعام
 واحسانلرده بولنان سوکیلی پادشاهمن افندمن حضرتلرینك سایه ملوكانه .

لرنده هر شیده اولدیغی کجی، علوم عسکریه یه داثر یازیلان اثرلرده کوندن
کونه تکثر ایتمه یه باشلادی . بتون اسلاملرک نور دیده سلامتی اولان
ذات اقدس حضرت شهریاریلرینه قرشو هر کسک وباخصوص عسکر
قوللرینک اک پارلاق وظیفه سی، اغور شاهانه لرنده جان فدا ایتمک شرف
حال العالی جانہ منت ییلکدر . غوغا یرلرنده سوکیلی پادشاهلرینک نام
اقدس شهریاریلرینی ذکر ایدرک سوینه، سوینه، کوله، کوله جان ویرن
عسکرلرک وقت حضریده کی وظیفه لری منسوب اولدقلری مسلك و صنفک
ترقی شان و معارفنه خدمت ایده ایده ینه فدای جان ایتمکدر .

سایه حضرت پادشاهیده ترجمه ایلدیکم شو بیوک اثر، اردو مزده کی
بتون ضابطانک معلومات عسکریه لرینی اکمال ایده جاک بر خزینه معارف
صره سنه کچسه یری وار .

اثر عاجزانه م ذات عالیکره هدیه ایدلمشدر . لطفاً قبول پیورمکزی
رجا ایدرم .

❦ مدخل ❦

حربه معاملات عسکرینهك جریان ایلدیکی احوال او درجه متنوعدر، که بربرینه تمامیه بکزر ایکی وضعیت بولق ایجه مشکل وبلکه محالدر، دیه بیلورز . شو ایکی وضعیت بولنسه بیله، آنلرک هر بریسنده، حرکاته ریاست ایدهك اولان انسانلرک قطعاً بربرینه بکزمیه جکاری طبیعیدر . بونک ایچون مذکور حرکات عسکرینهك حصوله کتوره جکی وقایعک، بر- برینه مساوی ایکی مثلث کبی یکدیگرینه مطابق اوله بیله جکلربی اصلاً امید ایده میز .

شو اوفاجق مطالعه دن پک ابو آکلایشیلور، که بربرینک عینی اولق اوزره تصور ایلدی کمز ایکی وضعیت عسکریده حربک سوق واداره سی ایچون بربرینه بکزر بعض قانونلر موجود اوله بیلور . لکن ایکی ریاضیه دستوری قوللان دیغمز وقت نصل نتیجه لر بر حقیقمز ایسه، آنلرک تطبیقاتی ده هر زمان عین نتیجه وعین فائده یی ویره مز . شبهه سز موفقیتدن امین اولق ایچون، دیدیکمز قانونلری، زمانک احوال خصوصیه سنه کوره یوریتک لازم کلدیکنی تسلیم ایدرز . فقط بولنیلان زمان ایله قطعاً

متناسب اولان قانونی ، اوتە کیلردن- آیرمق پک زور و کوچ بر شی اولدیغی ده هیچ بروجه ایله انکار ایده میز .

ایشته بونک ایچوندرکه ، حربک سوق واداره سنه لازم اولان قانونلرک اوبله کلیشی کوزل یعنی بسیط بر یولده بیلمسی ، شبهه لی بر قیمت عسکریه دن بشقه هیچ بر معنای مفید اوله مز . لکن موفقیته ک باشلیجه تابع اولدیغی بر چوق شرائط اساسیه واولیه سی منتظم بر صریه قونلماش ایسه ، شودیدی کمز قانونلر تطبیق ایدیه جکری زمان ، آنلره دائر اوکره نیلان ساده و بسیط معلومات بالعکس ، بمض یرامز و مشنوم نتیجه لک ظهور- رینه یاردم ایتمش بولور لر .

کرچک ! او یولده قزانیلان معلومات عسکریه ، مظفریتک حصوله پک چوق تاثیر کوس- ترن قاعده و اساسلرک فضیلت عمومیه سی پک چابوق افراط و مبالغه درجه سنه چیقاره بیلور . آندن بشقه ، معلومات سطحیه ایله ایش باشنه کچن انسانلر ، پک چوق دفعه ، کندی شخصلر نده ده شوکی مبالغه لره دوشمش اولور لر .

مانوره و تعلیم ایله پک آز اشتغال ایده بیلان اردولرده باش قوماندانلق ایتمک درایتی کندی اوزرلرینه یوکلنمک ایستیان ضابطلر پک چوقدر . زیرا ، عملیات و تطبیقات ایشلرینه پک اوقدر کیریشمه مش اولان بونظر یا تجیلر ایش باشنه کلدکاری

زمان هر شیئی کتاب صحیفه لرنده کوردکاری کی قولایجه سینه
 یابه بیلیمش اوله جقلرینی ظن ایدر لر . آنک ایچون ایشته بویله
 آلدانور ، کیدر لر . شو حال ، برباقیمه کوره ، حیرتله شایان
 برحادثه یرینه کچر . لیکن ، هر نه یرینه کچر سه کچسون بو ،
 تعریف و ایضاحی یک قولای اولان بر وقعه دن ، بر حادثه دن
 بشقه برشی دکدر .

نظریاتک عملیات ایله برلکده یوریدیکی یرلرده ایسه هر
 شیئک حقیقتی یک آز وقت ایچنده میدانده چقار . مشکلات ،
 مخاصمات وعدم موفقیات کی شیلر ، انسانده اولجه موجود
 اولمیان تجربه لری حاصل ایدر . بوسایه ده یعنی عملیات ایچنده
 بیودیکی زمان انسان کندی شخصنه ویرمک ایستدیکی بیوک
 بیوک نظر لرک ، اعتمادلرک یواش یواش تنزل ایستدیکنی وعادتا
 بر فورتنه ظهورنده بارومتره نک صفره ایندیکی کی آنلرکده
 صفره یاقلاشدیغنی کورور و اصلاح فکر ایدر .

بعض بیوک عسکری مکتبلرنده ، حرب جسم حقنده
 نظریات درس لری ویرمکدن صرف نظر ایدلمشدر . بو ، یک ابو
 بر اصولدر . چونکه اوسایه ده هرکس تاریخ عسکری مطالعه سی
 ویا برمانوره نک تدقیق ایله اوغراشدینی زمان ایجاب ایدن
 قاعده لری کندی کندینه چیقارمغه آلیشمش اولور .

بونکله برابر ، حرب جسم حقنده ایجه قیصه و مختصر بر

نظريات كتابتك او قودلق احتياجي هر زمان كنديسنى
كو سترمكده در .

ايو بر قوماندان اولق فكريله مطالعه ايتك ايسيتيان كنچ
عسكر، هر يرده كنديسنى يوريدىكى يولك تا اوتنه كي اوجنه كو-
توره جك واسطه لرى بوله مز . يعنى هر يرده عمليات و مانوره
اصوللرى سايه سنده تربيه عسكريه سنى اكال ايدرك املنه ، غايه
مقصدينه ايريشه مز . چونكه او ديديكمز كنچ عسكر، مواقع
عسكريه نك هر بريسنده كنديسندن ياشلى و تجربه لى ضابطلر
ايله صيق صيق كوريشه رك آنلرك فكرينى اوكرنك و كندينك-
كفى آنلره بيلديرمك فرصتى هر زمان الله ايدمه جكدرد .
اكر اويله ياپه بيلمش اولسه ايدى، نه كوزل اولوردى ! زيرا
بو بولده جريان ايدمه جك اولان مبادله افكار ، يواش يواش
حرب صنعتك بتون احكامنه سرايت ايدر و كيده كيده او
ضابط ايچون عملى بر مكتب صره سنه كيرردى .

امين بر قولاغوز اولمزشه ، كندى صنعتنه دائر اصول
و قواعدى كتاب صيفه لرنده اوكرنك ايسيتيان كنچ شاگرد ،
ايلك حمله ده حرب جسيمك سوق و اداره سى ايچون لازم كلان
قواعد اساسيه ينى اوكرنك احتياجه دوشر . چونكه آنك
ايلك اولكه فكرينى، دقنى جلب ايدمه جك شى حرب جسيمدر .
اك صكره ، يچاره ، زمانزده بر آز اسكى شيلردن صايبيلان

بعض اثرلرہ و مثلاً (بولور) ، (ویلایزن) ، (قلالووزویج) و سائر بوکا بکزر بعض بیوک مؤلفلرک کتابلرینہ باش اورہ۔ جقہ۔در۔ آنلری پک اوزون و درین بر یولدہ اوقویہرق کندی صنعتنہ دائر قواعد لازمین اورادن جیقارمغہ چالیشہ۔ جقدر۔ لکن بومطالعہ پک چوق زمان، پک چوق مشکلات ایستدکن بشقہ، آنی یاپہجقلرک یاشلی، باشلی آدملر اولمسیدہ ایجاب ایلر۔

حرب جسیمہ دائر یازیلان بوکی اثرلر، بالخاصہ اردولرک سفر برلک حرکاتیلہ، سوق الجیش یایلمہلرندن بحث ایدرلر۔ و قیلہ پک آز نظر دقتہ آلمش و بلسکہ اونودلمش اولان شو کوزل اصول زمانزدہ بسیتون اہمیت قزانمشدر۔ دیدیکمز حال، باخصوص غرب مملکتلرنندہ کرچکدن پک ابو و مکمل بر تیمور یولی شبیکہ سنک باہلمسنہ تعلق ایدیور۔ زیرا، مکمل بر تیمور یولی شبیکہ سی اردولرک سفر برلکئی اکیال ایتمک، و آنلری ایستدیکمز کی قسملرہ آیردقدن صکرہ حیرت اولنہ جق بر سرعت ایلہ، یرلی یرینہ کوتورمک ایچون اک امین برواسطہدر۔ بتون حکومتلر، شو خصوصدہ سویلنلمز، تعریف ایدلمز برحس رقابت ایلہ چالیشمقدہ و بوکون، یارین بربرینہ تفوق ایتمک ہوسیلہ لازم کلان فداکارانی ایتمکدہدر۔

بیوک قطعاتی پک آز بر زمان ایچندہ اوزاق یرلرہ کوتورہ۔

مك اقتدارىنى كوسترە بىلەك فەكرىنە دوشلدىكى اچچون ھەرىدە
سوقيات عظيمەك اجرا و تداركى مسئلەسى كىرچىكەن پەك مەھم
بىر مسئلە عسكەرىيە سەھنە كىرەشەدۇ . بوسوبلدىكى تىمور يولى
ايشلارنىدە ھەر مەلەكەت مەھنەسەلىرى ويا دھا كوزل و عەمومى بىر
توجىيە ايله ھەر مەلەكەت مەھاملات فەنەسەنە مأمور آدملىرى اك
زىيادە ھەنر و مەھارت كوسترەك مەجبورىنەدە درلر .

بىكى اثر يازان ، مؤلفلردن بىر چوڭى ، ھەربى جەسىمە دائر
نەزىرىيەك ھەيئەت عەمومىيەسىنى ياللىز بويىكەھ فەسلەدە جەم واكەل
ايتەك ھوسنە بىلە دوشمەشەلەردۇ . لىكىن بۇدەرلۇ ھەركەت ايدەنلر ،
بەئىز مەلەكەتلەردە شەمەندوفەرلرەك ، غەربىي اورۇپادەكى كەي ، ھەنوز
بىيوك بىر وظيفە باشنە كچە مەككەرىنى اونۇدۇرلر . اويلە مەلەكەتلەردە
ايسە اردۇرلرەك طوپلانمە ويايلىمە ھەركەتنى بىر آزدەھ يواش و آغىر
اولۇر . لىكىن بۇ ھەركەت اوتە كىلەردن زىيادە بىسەيىط و آچىق بىر
يولەدە جەريان ايدۇر . آندەن بىشەقە دىدىكىمىز اثر صاحىبلىرى ،
شەمەندوفەرلرەك مەسادە يەلەندە استەمەلىي ، غەربىي اورۇپادە بىلە
ھەنوز ھېچ بىر اھمىيەت عظيمە كەسب ايدەمەش اولدىغىنى اونۇر-
دىورلر .

بىز يازدىغىمىز اثرەدە ، بالخاصە ، اولجە يايلىمەش اولان قواي
جەسىمەك مەسادە و ھەركەت عەمومىيەسىنى كوسترن بۇ قەسمە يەنى
مەھارە مەيدانلەرنە دائر بىھت ايدەكەز . چۈنكى ، آنەك ھەقىقەتە

اکثریاء، یک آژ معلومات ویرلیدیکی کوریورز . لیکن دوشو- نیلورسه ، فن حرب جسیمک شمدییه قدر ، اک اساسلی واک مهم قسمی میدان محاربهری تشکیل ایتدیکی کبی شمدن صکره- ده ینه آنلر تشکیل ایده جکاردر . قطعاک سفربراک حرکانی ، واصل یتشدیریه جکری کبی ایشلر ، خصوصی اثرلر یازمق ایچون خصوصی بررزمین اوله-یلورلر . بز اثرمزده اوکبی شیلره دائر یالکز حرکانک-سوق واداره سنجه قطعاً بیلنمسی لازم کلان جهتلردن بحث ایده جکز .

بوکبی بخلرله عائد کتابلرک ذاتاً یک اوزون سورن فصللری بی-بتون اوزاتماق ایچون سویلیه جکمز قاعده لری مطرد بر مسلک ایچنده کوسترمک یعنی اوزون اوزادییه بسط و بیان ایتمکدن واز کچر ایسهک بزه ، فن حرب جسیم نظریانی اوزرینه بر فهرس باقمقن بشقه برشی قالمیه جقدر . لیکن حقیقت حالده ، شو خصوص تعقیب ایدیلان فیکره دهالویریشلی ، دهال موافق کلور . زیرا ، اصل املمز ، کنج عسکرلری فن حرب جسیم حقنده کوزل ودرین بر طالعیه یاپه ییله جک بر حاله ، برکاله کتور- مکدر . اوندن بشقه بز بو وجه ایله حرکت ایتدیگمز ایچون یازدیغمز اثری ایستیلان-شکله قویغمه موفق اولیورز . یعنی اثرمز ، بر سنه ایچنده ، عسکری مکته بلرنده اوقونان عسکری اثرلر یک قیصه و محدود اولمق مناسبتیه ، کنج عسکرلره حرب

جسټم حقنډه ايجاب ايدن اڪمڪمل معلوماتي ويره بيله جك پر
حاله كيرمش اوليور .

شبهه يوق ! علوم عسكريه ده هنوز پك ابلري كيتمه مش
اولان شاكر دك، ايلك او كجه بعض قواعد اساسيه يي ، ايمان
شرطلري كي، شويله حرفي حرفه بلله مسي لازمدر . كرجه،
بوديديكمز قاعده لرك سلامت مطلقه سي آنك ايجون يكنظرده
شبهه لي صابيله بيلور . لکن آنلردن اصل مقصد ، آنك ذهننه
بردفمه يرلشهر ك ايلروده نوسيع فكر ومطالعه سنه ياردم ايتكم
اولسنه بناءً، مذكور قاعده لرك ايلك او كجه اوكره نلملري هيچ
برياكلش يوله دلالت ايتمش اوليه جني پك طيعيدر . بالعكس ،
كنج طلبه نك يابه جني ، يوریده جكي مطالعه ، صكره دن او
سويديكمز قاعده لرك هانكي احوال خصوصيه ده قسماً ويا
بستون محافظه قيمت ايده بيله جكلرخي آكلامغه ياردم ايده جكدرد .

حرب ايشلرنده تجربه كورمش اولانلره كلجه ، بوكتاب
آنلر ايجون عادتا برخطره يرينه كجه جكدرد ظن ايدرم . (قلا-
ووزويج) كمال عدالت ايله سويليور ، كه بتون مشكلات حربك
اك قاريشيق زمانلرنده اولجه اوكره نلمش اولان قاعده لره
صداقت كوسترمكدن عبارتدر . بوكا موفق اولمق ايجون ايسه ،
هرشيدن اول، ايجاب ايدن زماده واقعه لري برر برخطره
كتورمك وبونك ايجون ده آره صره آنلري بر كوزدن كچور-

مک، تکرار ایلمک لازمدر. اوله اولجه، قیصه بر حرب جسم کتابی، بوشلراچون هیچ شبهه یوق، که برخیلی جلدلردن مرکب آثار حکمیة عسکریه دن زیاده ایشه یارار، فائده بخش اولور.

شویازدیغم کتاب کی اثر لر یازیلورکن، اکثریا درجی عادت یرینه کچمش اولان بعض ماده لری و مثلاً دشمنه دائر معلومات ایدنمک، امر وراپور کوندرمک و سائر بو کی شیلری یازمقدن صرف نظر ایلدم.

کرچک، بزم ایستدیکمز شی حربده قطعات عسکریه بی قوللانق ایچون لازم کلان مختلف قاعده لری بریره طوبلاقدور. بونقطه نظر دن تعقیب اولنه جق اصول، ایکنجی بر اثرک مو-ضوعنی تشکیل ایده جک و اثر مذکور بالخاصه بر اردو ایله قوماندان آره سنده موجود مناسبات عمومیه اجرایی تأثیر ایلمیان هر شیئی جامع بولنه جقدر. ایشک بودیدیکمز کی ایکی به آریلیشی، قاعده لر ایله آنلرک تطبیقی آره سنده کوریلان ظاهری اختلافلردن قورتلغنی تأمین ایلر.

بو وجه ایله مثلاً، فن حربه دائر یازیلان بر نظریات کتله بنده تعرضک موجب اوله جنی محسناتی پک آچیق بر معنا ایله مدح و ثنا ایتک و بالعکس شو و شو کی حاللرده مدافعه نک فلان اردو ایچون قبول ایدیله جک اک ابو بر اصول حرب تشکیل ایلدیکنی کوسترمک ممکن اوله جقدر.

اگر صنعت حربك شو ايكي قسمنى يعنى حربك سوق
 واداره سيله اردونك طرز استعمالنى بر آرده يازمق ايسته نلمش
 اولسه ايدى ، اوزمان بر دستور حالنه كيرن هر افاده يه بتون
 مستثنا جهتلر يخد ، برر ، برر سوقق لازم كله جك ايدى . فقط
 شودر لو حركت ايدلديكنه كوره حاصل اوله جق بعض مبهم و مشكوك
 معنالر او قويا نلر نظر نده فنا فا تاثير لرك ظهورينه ياردم ايدر .
 بونك همچون خصوصى بر ائرده « اردولرك سوق واداره سى ،
 حقه نده سوز سويلمك و قواعد موضوعه ايله ، دستور حالنه كيرن
 بعض افاده لرى « حربك سوق واداره سى » نامنده كى آيرى بر
 ائرده يازمق ده ا كوزل و عملى بر اصول اولور فكر نده يز .

بونكه برابر بعض اوافق تفك استثنالرك وجودينه لزوم
 كورلديكنى ده انكار ايدمه يز . اشته بوندن اوترى ، (سفر پلانى)
 حقه نده لازم كلان افاده لرمزى برنجى اثره درج ايلمك كدن
 چك نميوز . گرچه (سفر پلانى) اوزرينه سويلنه جك سوزلر
 « حربك سوق واداره سى » ناميله يازيلان بر ائردن زياده « اردولرك
 سوق واداره سى » ناميله يازيله جق اثره درج ايدمك ده ا ياقيشيق
 آلور . چونكه (سفر پلانى) بحثى اردولرك سوق الجيش ييلمه
 لرينه بك زياده باغلى بر بحثدر . اويله اولمقله برابر ، شو بحثك
 اس الحركات ، خطوط الحركات و طرق نقليات ايله اولان ارتباطى ده
 هيچ بر زمان انكار ايديله جك شـ يلردن دكلدر . آنك همچون
 بو مختلف ماده لرى يكد يكر ندن آيرمق اصلا ممكن اوله مزدى .

برنجی فصل

حربك حیات ملل اوزرنده کی وظیفه سی

حال حاضرده بتون مدنی حکومتلرک بر طاقم خصوصی
دائرلری، نظارتلری اولدقدن بشقه، هربری دیگريله مناسبات
سیاسیه سی منتظم بریولده جریان ایتدیره بیلیمک ایچون یک
دیگری نژنده بعض پولتیقه مأمورلری یعنی سفیرلر، مصلحت
کذارلر، شهیدرلر و بونک کی مملکتک پولتیقه سنه و دیلنه واقف
آدملر بولندیرمقده در. شو سویلدی کمز مأمورلرک اک برنجی
وظیفه سی، حکومتلر آره سنده وقوعه کله جک اختلافات جسیمه یی
صلحاً بولنه قویق ایچون علی العجله بر چاره تدارک ایلمکدر.
فقط اويله بر کرکینلک حاصل اولنجه، آنی بر طرف ایلمک
خصوصنه نه قدر چالیشلرینه ینه هیچ بر زمان هرایکی جهته ک
آرزوسنه کوره ایشه بر نتیجه ویرمک ممکن اوله مز. چونکه
همه حال بعض نقطه لر ظهور ایدر، که آنلری محافظه دن واز
چکمک، آنلره اهمیت ویرمه مک حکومتک شان و عظمتنه بیوک
بیوک نقیصه لر ویرر و بلیکده حیات ملل اوزرنده بیوک بیوک
یاره لرک حصوله واسطه اولور. شو دیدیکمز حاللر، بو کونکی
کون، اک چوق حکومت مستقله و مجتمعه تشکیلی باندیه اجرای

نفوذ ایدن قومیت و ملیت افکار یله ظهوره گلکده در . اولکی زمانلرده ایسه ، املاک موجوده نك حقوقه ضرر و زیان ویر- مکسزین ، بوکی حکومتلرک وضع و تأسیسی ممکن اوله مزیدی . لکن او دیدیکمز حاللرک بشقه طرز ایله ظهوری ده قابلدن : مثلاً بعض مسئلهلر وار ، که اوراده بر دولتک حکم غالبانه سی ، بر ملتک حسد و یارقاتی اورته یه دوشورده آنلره جدی بر نظر اهمیت ویریلورسه ، او زمان بتون دیپلوماسی حیللری ، بتون پولتیقه سونکیلری خلافتده اولمق اوزره مسائل مذکورده یی صلحاً تسویه ایتک ایچون بر واسطه ، بر چاره بولمق همان همان محال حکمنه کیر .

بو آندن اعتباراً قلیجه ، سونکی به مراجعت ایتک ، سلاح طاور ائق یعنی صلحاً بر طرف ایده مدیکمز شیلری حرب ایله تسویه ایتک لزومنه احتیاج صحیح کوریلور .

اوله ایسه حرب دنیلان شی پولتیقه نك اوزامه سندن بویلی بوینه دوام ایتمه سندن بشقه برشی دکلدنر . یالکز مقصده وارمق ایچون قوللانیلان واسطه لر ، بر برندن فرقلی اولمق لازم کلور .

حکم اصوانه مراجعت ایله حربک یر یوزندن قالدیرلمسنه اجراسی غیر ممکن بر حاله کتورلمسنه دائر بعض تکلیفلر ایدلدی لکن بو تکلیفلر کوزل بر نتیجه ویرمدی . زیرا ، حکم دینیلار

قوة صلحيه، كندی قرارینی هر ایکی جهتیه همه حال قبول
و تصدیق ایتدیرمکدن عاجزدر.

حکومتلر آره سنده صلحك محافظه سی ایچون اك ابو چاره
متین وقوی بر تشکیلات عسکریه مالک اولمقدیر.

کرچك! ضعیف بر حکومتیه نسبتله، قوی بر حکومتیه هجوم
ایده جك دشمن پك آز بولنور. اوندن بشقه اردولرك عدد
واقتمداری آرتدجه آنلرك بر بریله مصادمه سندن حصوله کله جك
نتیجه لرده او درجه مشئوم اولور؛ ایلک اوکجه اعلان حرب
ایدن طرفك یوکلنه چکی مسئولیت یوکی ده اودرجه بیوک اولور؛
ایشك ایچندن بقای صیرمق خصوصی ده اودرجه زور والیم
اولور.

شو حاله نظراً، کندیلرندن قوتلی. و بیوک قومشولر آره -
سنده صیقیشه رق عسکرلکجه ضعیف اولان حکومتلر هر زمان
بر حرب تهلیکه سی، بر جنك شراره سی کی تصور اولنه بیلورلر.
یعنی حرب غائله سی چیقسه، چیقسه اك زیاده آنلرك یوزندن
چیقمش اولور. اوندن بشقه، بولتیقه ویا قوه مالیه جه موجود
بعض سبیلردن اوتری قوای عسکریه سنك سطوت و شانی
ایچون لازم کلان سعی و املده قصور ایدن بیوک حکومتلرك
شو کیدیشی ینه بر حرب تهلیکه سی یرینه کچه بیلور.

ینه بونك کی، چوروك براداره، ضعیف بر حکومت انده

قالان ملتلك افكار عموميه سى ده شويله برتهلكك نك ظهورينه ،
آتش آلمسنه بك اعلا واسطه اولور . چونكه ديديكمنز حكومتلر
اهالينك افكار متهيجه سنى ضبط ايدجك قوته مالك اولمقلى
ايچون غليانه كلش اولان بوكي انسانلر ، قينه لر دن زياده ، بر
حربك ظهورينه ياردم ايتمش بولنورلر .

اك ابوتشكيلات عسكريه ، برسفر ك وقوعى زماننده مملكتمك
مادى ومعنوى بتون منابعى ، بتون وارداتى ميدانه چيقارته رق
آتش آلان حربك بر آن اول سونمسنه ، كوزل بر نتيجه ايله
نهایت بولمش اولمسنه خدمت ايليان تشكيلات عسكريه در . بيوك
بر ثروت ، بيوك بر قوت باشنده ، يعنى هرشى يابهيلمك اقتدارى
وار ايكن بيله ينه موجود واسطه لك يالكنز بر قسمنى اورته يه
قويه رق آنك ايله مدافعه اولمق جائز دكلدر . تشكيلات
عسكريه نك احوال مخصوصه سيله تفرعات سائره سى ، اك چوق
مملكتمك اداره داخلينه سنه كورم دكيشور . بونكله برابر آنك
اشكال عموميه سى ، ملل مختلفه آره سنده حكم سورن اك ابو
بر اصوله نظراً تعيين ايدلمش بولنور .

اوندن بشقه جمعيات بشريه ايچنده حصوله كلان ترقيات
مدنيه نك تشكيلات عسكريه اوزرنده اجراى تعديلات واصل-
حات ايلمسى ده بك طبيعى برشيدر .

حال حاضرده ، بر چوق حكومتلك تشكيلات عسكريه ده

اصول موضوعی (قادرو) دیدکاری اصولدر . یعنی شو اصوله کوره سلاح طاشیمغه اقتداری اولان انسانلردن بر قسمی دائمی قطعات عسکریه نزدنده قاور . بو دائمی قطعه لر ، عین زمانده ملتک بتون الی سلاح طونان ارککلری ایچون بر (قادرو) ، بر عسکر مکتبی دیگدرکه ، حرب ظهورنده اولجه تعلیم و تربیه کورنلر تکرار اورایه کیرر و اووجه ایله سفر برلکی تمام اولان اردولر محاربه اجرا ایدرلر .

عساکر مایه اصولنی قبول ایدرک بر خطوه دهسا ایلریه طوغری یوریش اولان ملتک زمانزده پک آذرر . چونکه بو قییل ملتک پک جزئی تعلیم کورمش اوافق تفک بمض قطعات عسکریه سندن بشقه ، الده بر آز اول سویلدیگمز (قادرو) اصول تشکیلدن اثر بیله یوقدر . بو درلو بر تشکیلات عسکریه اراضینک طبیعت حال و تشکلی ، خارجدن هر هانکی بر هجومه غیر مساعد و یا خود اها ایسی جزئی ، امتدادی پک آز اولان بر مملکت ایچون بلکه قبول ایدیله جک بر اصولدر .

عسکر یازمق اصولنه کلنجه بونوع تشکیلات عسکریه پک مستثنایر لرده قوللانیلور . و یواش یواش بسبتون یر یوزندن فالقمق اوزره بولنیور .

ایکنجی فصل

شمیدی حربلرک طبیعت خصوصیه سی

زمانمزدہ حرب دنیا لان شی صورت عمومیه ده کندی شکل طبیعی سنده یعنی اقوامک بر مصادمه خونریزانه سی شکلنده ظهور ایدر، که بو صدمه ده ایکی طرفدن هر بریسی، یا خصمک همه حال اطاعتی و یا خود ممکن ایسه محو و پریشانی استحصاله جالیشور .

قطعات جسمیه ساده مانوره یا پدرمق، آنلره دشمنی تهدید ایلرک موضعلری طوتدرمق، و یا خود عصر حاضرک بدایتنده کلان بیوک بر عسکر محررینک دیدیکی کبی، یا لکر مانوره قوتیلر یعنی محاربه ایتیمکسزین مظفریت قزاقق، شمیدی زمان ایچون قبول ایدیلرک اصلولاردن دکلدر . ناپولیونک سفرلرندن استحصال ایدیلان تجربه کوستریور، که بو یولده بر اصول حرب ایکی خصمدن بری، هر نه اولورسه اولسون، بتون وارینی یوغینی صرف ایتیمک و صوک درجه اوغراشمیه قرار ویردیکی زمان بتون شدتی، بتون تأثیرینی غائب ایدر . حقیقی بر محاربه ویرلدکجه، آرتق زمانمزدہ اسلحه جارحه مصادمه لری وقوعه کلیه جکدر . ینر بو کونکی سفرلرده مخاصم

حکومتلرک بتون قوتلرینی صرف ایتمکسزین ، قرشوده کی دشمنی
تخریبه اوغراشمق سزین ، حربه طوتیشسه جقلرینی و بو حربده
بالعکس ، وسائطک یالکز بر قسمنی اورته چیقارم جقلرینی قبول
ایتمک ، خیال ایچنه یوزمک قییلندن اولور . [*]

شویله بر اصول ، کندیسنبجه اختلاف حاصل اولان مسئله پک
جزئی بر اهمیتی حائز اولدینی زمان بلکه قابل اجرادر . بونک ایچون
اصول مذکورک شمدیکی زمان سفر لرلنده آرتق شایان استفاده بر اصول
اولدیغنه حکم ایلمک لازم کلور . فقط اگر مستثنا قییلندن و یا بر بریله
مخاصم ور قیب اولان حکومتلردن بریسنک قبول ایلدیکی یاکلش

[*] بوراده استثنا تشکیل ایدن بعض خصوصی حاللری اونوتماق ،
ظا طردن چیقارماق لازم کلور . مثلاً ضعیف بر حکومت کندیسندن
یوک اولان قورمشولردن بریسنک حقوقنی اضرار ایلش بولنه جفی زمان ،
یسترکندی کورکورینه املارینه اطاعت ایتسون ، ایستر بشقه برسبدن
وتری اولسون ، مغلوب حکومتک ایستدکلرینی رد ایله آتی اک صکره
ملاح باشنه کتوره رک قوت استعمالی سایه سنده مسائل مختلفه مک حلنه
بجور ایلر . بوکبی حربلر ، حرب اولمقدن زیاده اوافق تفک اجرات
سکریه در . وبلکه عادی برر دوئلودن عبارت اولدینی ایچون بزم
تایمزده داخل دکلدر . بز بوندن بشقه ، مستملکات سفر لرلندن ده بحث
تمیه جکز . چونکه بو حربلردن هر بریسنک ، جاری اولدینی مملکت و دشمنک
حوالیله برر وضعیت مخصوصه بی واردر . آنک ایچون حرب جسم
قنده سویلدیکمز قاعده لرک بونلره تطبیق و یا عدم تطبیق اکثری
الرده معناسز و حکمسز برشیدر .

یرتدیردن اوتری اویله برسفر میدانه چیقارسه هر ایکی طرفک
حسیات ملیه سی غلیان ایدر . حال بوکه ، شو جوشقوناق ایش
باشنده کیلرک ، قوای ملیه دن پک آز بر قسک هزیمتیه نتیجه حرنی
قزانش اولمیرینه مساعده ویرمز . بالعکس افکار عمومیه ، حربه
طوتشمش اولان قوای ملیه ک ایلک آند ده تقویه ایدلمش
اولسنه آنلری اجبار ایدر . لکن خصم طرفی ده یینه بویله
حرکت ایتمش اوله جنی ایچون هر ایکی جهت یواش ، یواش
ایلک ویریلان قرارک عکسنه اوله رق بتون قوای ملیه سی برنجی
خطه سوق ایتمش بولنولر .

برچوق حالدرده قوه سیاسییه ایله ملیت افکاری متحدالمال
بر قوه مجبره صره سنه کیردیکی زماندن بری مملکتلر طبق
ناموسی غائب ایتمکن ایسه حیاتی غائب ایتمکه راضی اولان
انسانلره بکزه مک باشلامشلدور .

بوندن شو چیقار که ، هر ایکی جهتک الده موجود بتون
قوای مادیه ومعنویه سی اورتیه قویق ، لکن ، حربک عمومی
نتیجه سی سلاح قوتیه حاصل ایتمک فکرینه بنهء قوای مذ -
کورده یی صوک حده قدر صرف ایتماک وبالعکس آزچوق اهمیتی
حائز بیوک قطعات ایله منفرد محاربه لر ویرمکن عبارت اولان
برنوع مانوره مسلکینی قبول ایتمک خصوصی ایلروده کی سفرلر
ایچون برقاعده صره سنده کوسترمک ایستیانلر پک چوق یا کاش

اولیورلر . کرچه ، بوفکرده اولانلر يك چوقدر . لیکن آنلر حربك شمديکی زمانده حائز اولدینی طبیعتی بيلمک و طایبق ایستمیورلر .

بواصول ، بالکمز قطعياً مهارتسز وتنبیل اولان بردشمن قرشوسنده آز چوق موفائیت گوره بیلور . مدنیت بشریه نك بردوزی به دوام ایلیان بونجه ترقیانی سایه سنده بالکمز دوکوشمک ، یغما ایتک و مملکت قزاقق هوسلریله یاییلان حربلر یر یوزندن قاقمه یه باشلادینی و ملتدرده هر نوع سفرلره تحمل ایده جک صورنده مدنیت کسوه سنه برونديکی زمانلردن بری ایکی خصمندن هر بری ممکن اولدینی قدر آز بر وقت ایچنده صلحک جریان ایده بیله جکی شرائط ممکنه یی خصمنه یعنی دشمن اولان ملته قبول ایتدیرمکه مجبوردر . لیکن نرم شو دیدیکمز شی آنجق ایکی طرفدن بریسی کندی مقاومتک هیچ بر وجهله نائل مظفریت اوله میه جغه دائر بتون امیدلرینی غائب ایتمش بولندی زمان جاری اوله بیلور . آنک ایچون عقد صالح یرینه مغلوبک بـبتون محو و پریشان ایدلمسی فکرلریسه دوشلديکفی کوربورز . افکار ملیه اصولی پولتیقه عالمنک بر آمر ذوالجلالی اولدجه وضعیت اصلا دیکشه میه جک و بوندن اوتری حربده کندی طبیعت مطلقه سنی محافظه ایلمش بولنه جقدر .

لکن دشمنی مغلوب ویا پریشان ایتک سوزلردن خصمک

بتون عسکر لرینی بلا استئنا محاربه دن خارج برافق ویا قتل
 عام ایتک معناسی آکلا شلمسون . چونکه بو معنا بیوک بر
 حقسنزله دلالت ایدر . علی الاصول یالکز بر قسمک پریشان
 ویا تخریب ایدلمش اولسی هیئت عمومیه نظرند اویله بر تأثیر
 کوسترکه، بوندن اوتری بتون مظفریت امللری سونه چکی کبی
 ینه اوسایه ده حربدن صرف نظر ایدلمک لزومی آشکار اوله جقدر .
 چونکه سلاح قوتیله آچیلش اولان یارملره بر آز وقت
 صکره اخلاق نقطه نظرندن حصوله کلان یارملرده علاوه
 اولنور؛ هیئت عمومیه ده پک بیوک بر انحطاط اثری کورلمکه
 باشلار . طبیعت انسانیه ده قوه اخلاقیه نیک حکمی ، سلاح
 چاتیلرینک ییقلمسندن حصوله کلن پریشانلق آثارینی بسبتون
 اکمال ایده جک نفوذی جاممدر .

آلک ایچون بز ، دشمنی مغلوب ایتمکدن بحث ایلدیکمز
 وقت بوندن ، محاصم قوتلردن بر قسمی محو و پریشان ایدرک
 او وجه ایله خصمیزی شمدن صکره برامل مظفریت بکلمکدن
 واز کچورغش اوله جغمیزی آکلاملی بز . یوق ، اکر دشمنی محو
 و پریشان ایتمکدن بحث ایدیور ایسه ک اوزمان آتی معناً وماده
 اویله برحاله کتورمک ایستدورز، که او، موقناً اولسون بزم ایله
 حربه دوام ایده بیلیمکدن عاجز قالدیغنی حس ایلش بولنسون:
 ایشه دشمنی محو و پریشان ایلیمک سوزینک معنای قیسی ده
 بو سولیدیکمز معنادن عبارتدر .

اوچنجی فصل

شمیدیکی زمان حربنک طبیعت اساسیه سی

کندیمزده نه کی علل غائیة تصورایدیورایسهک اونده ده عین
اسبابک وجودینی مطلق فرض ایده جکمز دشمن ، بر آره یه
جمع ایدلمش اولان بتون قوتلریله قرشوده کینک باشنه اک کسیدر مه
یومروقلر اینسیدیره بیلمک ایچون بتون قطعات عسکر به سنی بر
اردو تشکیل ایده جک صورتده جمع وتحشید ایلده جکدر .

بتون قوه مجتمعه نك بر آرده پك آز قابل استعمال اوله -
بیلمسی محذورینه بناء اردوی برینک مختلف پارچه لره و قوللاره
آیرلمسینه لزوم کوریلان مملکتلرده شو دیدیکمز قوللارک بر
چوغی یننه برلکده چالیشمه یه ، برلکده غوغا ایتمهک مجبوریت
کوره جکلردر ،

بونک ایچون، هر یرده و هر زمان مصادمه قطعیهک اجراسنه
مخصوص و قوای ملیه دن مرکب اولوق اوزره بیوک بر قسم
عسکره تصادف ایدیلده جکدر که ، بز اوکا دشمنک (اردوی
صلیسی) نامنی ویره جکز. خصمک درجه مقاومتنی کوس-ترن،
آنک قوتلی و یا ضعیف اولدیغنی اورته یه چیقاران اشته بواردودر .

شورایه قدر سویلدکلر مزدن آشاغیده کی نتیجه چیقار :

اردوی اصلی بردفمه بوزلدقدن صکره آنک خارچنده و آندن کوچک اولمق اوزره اوننده بری ده ترك اولنان بعض قوللارک مظفریت امیدلری کیتدکجه آزالور . واحتمال ، که اونلر صورت عمومیهده مقاومت کوسستمک فیکرندن وازکچهرک شو وجه ایله بز ، یالکیز بو ایلك موفقیت اساسیهی قزائمش اولمقله بتون مساعیمزی ، بتون آمایزی اکمال ایتمش اوله بیلورز . بونک او -

زربنه آراتق بتون قوتلر مز ، بتون فداکارلغمز ایله یوری یه -

جکمز ایلك هدف دشمنک اردوی اسلیسی اولدیفی کندی کندیبه میدان چیقار .

اوت ، شمیدیکی حربلرک ایلك سوق الجیش قاعدهسی بو سویلدیکمزدن عبارتدر . اهمیتلری جزئی بر نیجه وقوعات وتشبثاتک اکثریا مصادمه قطعیه زمانسندن اول ظهور ایتمش اولمسی بونک قیمتته اصلا خلل کتوره مز . احتمال ، که یولاری ستر ایدن بعض حدود قلعهلری ، جسیم قطعاتک بر آنده یاباق ایستیلان یورویشلرینه آز چوق سکتیه ویرمش اوله جقلردر .

بونک ایچون مصادمه قطعیه یه باشلامه دن اول اونلره هجوم ایتک و حاکم اولمق لازم کله جکدر . هر ایکی طرفدن ایلری یه بعض قوللر ، واک چوق سواری قوللری کوندریلرک خصمک تجمع حرکاتنه سکتیه ویرمک ایچون بعض تشبثلر پایله بیله جکدر .

بوندن اوتری ایسه ، ایلک حاضرلق محاربه‌لری باش کوستره -
جکدر .

لکن شومفرد حرکات ائناسنده هیچ رخصوصی ومستقل
هدف تمقیب ایدلمیه جکدر . چونکه حرکات مذکورەنک کرک
اجرا ابدلکاری مقصد و کرک استیحصالی مطلوب اولان نتیجه
بوکا مانعدر . بالعکس ، دیدیکمز حرکات مصادمه قطعیه دن اول
و آکا مربوط اوله جق ر طرزده سریع بر صورتده پایلور .
وعادتا ایلک شمشکلر ، کلسی یقین اولان بر فورتنهک ظهورینه
اشارت اولدینی کبی آلرده قانلی بر مصادمهک اجزای اولیه -
سندن صایلورلر .

دشمنک اردوی اصلینی ، غلوب ایتک ایچون الکابوچاره ،
اک امین واسطه ، آکا فائق اوله جق صورتده بیوک قوتلر جمع
ایلمکدر . زیرا هیچ بر کیمسه ، کندی اردوسنک باشنه کچن
سردارک دشمن اردوسی سردارندن دها درایتلی و یاخود خصم
اردوسنی تشکیل ایدن عسکرلرک حسارتجه اونه کیلر دن آشاغی
اولدینی ایشه باشلامه دن اول ، بر حکم صحیح ایله قبول و تصدیق
ایده مز .

بو یولده بر قناعت موجود اوله یلور . چونکه عملیات جهتی
نظر دفته آنورسه ، اوزمان سفر بر حاله کیرن اردولرک حل
ایده جکلری مسائل حریبه اوزرنده قناعت فکرینکده آزچوق

اجرای تأثیر ایده‌جکی طبیعی‌در. حتی اکثریا واقع اولور، که شو قناعت بحثی مثلا، تعقیب ایدیه‌جک مسئله‌نک حلی ایچون شویله ویا شویله بر یول طوتمق لازم کلدیکی زمان مسئله‌نک حلنه تأثیر ایدن اوتنه‌کی ماده‌لردن زیاده غالب‌الاحکام اولور. عملیاتجه بویله‌در، فقط نظریاته‌کلنجه ایش بسبتون بشقه‌اشور. چونکه نظریاتده عسکری مسئله‌لرینک تدقیقات فیه‌سی ایچون، عکسی قطعاً وصراحتاً کوسترلدکجه، دائماً هر ایکی جهت عسکرلرینک عین قیمت وعین قوتی حائز اولدیفی فرض ایتک لازمدر. بو فرضیات قبول ایدلدیکی کبی مظفرینک اک امین واک پارلاق نشانه‌سی، اک کوزل سوق الجیش و تعیییه ترتیبانی ایله برلکده عددجه موجود اولان تفوقدن عبارت بولنه‌جغه‌ده اینانملیدر. بز بو سویلدیگمز شیردن حرب حاضرک ایکنجی برقاعده عمومیه‌سی استحصال ایده‌بیله‌جکز، که اوده: زمان قطعی ایچون بتون قوتلرک الده بولمسی مطلق انزم و بلکه شرط اعظمدر زیرا، اوله‌بیلورکه، محاربه‌نک طالع و نتیجه‌سی یالکز بر طابورک وجودینه احتیاج کوسترر. یعنی ایش باشنده بر طابور عسکر ده موجود اولسه، مصادمه‌نک کوزل بر نتیجه، پارلاق بر مظفریت ایله نهایت بولمسی اغلب احتمالدر.

شو قاعده‌نی بردفعه بلکه‌دکدن صکره، قسم کلیدن اوتیه، بری‌یه کوندریله‌جک اولان بتون مفرزه‌لر، بتون اقسام عسکریه

باشلی باشنه برر خطایه دلالت ایدرلر. یوک مرفقیترلر کوچکلر-
 یخیده برابر کوتوردکلری ایچون اهمیتلری جزئی اولان تهلمکه-
 لردن پک اوقدر صاقمه به لزوم یوقدر. یعنی بوبله اوافق تفک
 تهلمکه لره هیچ اهمیت ویرلمه مش اولسه، حتی او جهتدن بعض
 تلفات وقوعه کلسه بیله قسم کلینک اک اوافق بر پارچه سنی
 آرماق ایچون اصلا فتور ایتمه مک ده اوله بیلور.

لکن نه قدر چالیشسه ینه بوقاعده بی شویله حرفی حرفنه
 تطبیق ایلمک هیچ کیمسه به قسمت اولیه جقدر. مصادمه
 قطعیه نك وقوعه کله چکی کون وساعتی پک نادراً دقیقه سی،
 دقیقه سنه تعیین ایدم بیله جکز. ووندن اوتری اکثریا، درجه
 اهمیتلری ایکنجی صره ده قالان بتون تشبیلر مزی غیر معین
 برزمان ایچون صرف ایتمکدن کیرو طوره میه جغز.

بونکله برابر، بزی هدف اصلی به کوتورن خط مستقیمک
 خارجنده هرزمان، سوق الجیشجه بعض پک مهم نقطه لر بولنه-
 جقدرکه، اگر بز آنلری دشمنه براقور واو وجه ایله یورویشمزه
 دوام ایدر ایسه ک دشمن، او سایه ده اردوی اصلیمزک حرکتی
 اوزرینه آز چوق اهمیتلی بر تأثیر کوسه تره رک مصادمه قطعیه
 زمانده سربست برحاله بولمنسه مانع اوله بیلور.

بونک ایچون دیدیکمز نقطه لره بعض خصوصی مفرزه لر
 کوندرمکه و آنلری فصل اولورسه اولسون الدن چیقارماغه .

مجبورز. اوليه ايسه ، بر آز اول سويلديكمزى ينه تکرار ايدرك
 ديرزکه، نه قدر سعي اولنورسه اولنسون، اردوی اصلیدن بعض
 مفرزه لرك اوتيه بری به کوندرله مسنه چاره بولاق ممکن اوله -
 ميه جقدر. یعنی قطعات عسکریه دن بعضیلری، همه حل، بزجه
 و دشمنجه مهم اولان بر طاقم سوق الجیش نقطه لرینه سوق
 ایديله جکدر. شو قدر وار که، قسم کلی بونلری یا مصادمه قطعيه
 کونی ينه کندي يانه کتورده جک ويا بويله يایمق ممکن
 اوله مدیني زمان، طولایسیله محاربه نك کوزل بر نتیجه یه وصولنی
 تأمین و تسهیل ایده جک صورتده افراز ایلمايدر.

قطعات مذکور نك شو طولایسیله يابه جقلری خدمته
 موفق اوله بيلمه لری ایچون الك ابو واسطه آنلره، مصادمه برندن
 ایچه اوزاقده اولان و کندیلرندن بيوك بعض دشمن قوللری
 اشغال ایتمک وظیفه سی ویرلميدر. بونکله برابر، هیچ شبهه
 ایدلسون که، مصادمه قطعيه اوزرینه اصلا تأثیری کورلميه جک
 صورتده بعض مفرزه لرك اوتيه، بری به کوندرلمسی کي خطالر
 هیچ بر زمان اکسیک اولميه جقدر.

بيوك قطعات عسکریه بر یرده اجتماع ایلدکجه بوندن،
 قطعات مذکوره ایچون برچوق احتیاجلر، برچوق یورغینلقلر
 حصوله کله جکی طبیعیدر. اکر شو سويلديكمز حالاره اولجه
 کشف ایدلمه مش بعض وقوعات مشئومه و مثلاً بعض علل

ساریه ده یوکلنورسه او زمان وضعیت عمومی به سببتون کسب مشکلات ایدر .

قطعات عسکریه يك طوخی بردن مسكون محللرده اسـكان ایتدرمك قابل اوله مدینی کبی تعیش واداره مسئله سی ده ایجه فنا و مشکل بروضعته کیرمش بولنور .

اوندن بشقه ، یالکز بر یرده اجتماع ایتمش اولان بودرجه بیوک وجسیم قطعاتك یورویش باعه لری ده يك زور بر شیدر . حال بوکه ، قطعات مذکوره شویله یالکز بر نقطه اوزرینه طویلانه جق یرده بربرندن آز چوق فرقلی و اوزاق نقطه لرده اجتماع ایتمش اولسه لر ، آلرک یورویش وضعیتنه کیرمه لری اوزمان بودرجه مشکلاتی موجب اولمزدی .

کرچك ! قطعات عسکریه ایکی ویا دهها زیاده نقطه لردن حرکت ایتدکاری زمان اونلره ، یالکز بر نقطه دن یورویشه باشلامش اولمیرینه نظراً بر خـیلی مهم وکوزل یولار ویرمك ممکندر . یورویش ائناسنده بر یرده کیجه لمك ایچون موله ویرـ دکن صکره ایرتسی کون تکرار بوله کیرلدکجه بعض مشکلاته اوغرامق طبعیدر .

بوندن بشقه ، یالکز بر یول اوزرنده (۳۰ : ۴۰) بيك کیشیدن زیاده عسکر یوروتمه مك لازم اولدیغنی خاطر دن چیقارـ مامق ایجاب ایلر . زیرا (۴۰) بيك کیشیدن زیاده بر قوت ایله

یالکز بر یول اوزرنده حرکت ابدلیکی زمان بر کونده قوه مذکوره نك كاملاً مصادمه یه اشتراك ایتسی ممکن اوله مز .

حقیقت ! اگر بر یول اوزرنده یوریان قطعات جسیمه نك قوه عمومیه سی ، (۴۰) بیک کیشیدن زیاده اولورسه قول نهایتنده کی جزء تاملرک ، آنجق کیجه قراکلی باصدقن صبره مصادمه یرینه یشمسی ممکن اوله بیلور . ایشته بو سبدن اوتری ده بیوک قطعانك بعض کره پارچه لره آیرلمه سی لزومی تحقق ایلر . و هر نه قدر بز قطعات جسیمه نك طویلی بولنمه سی احتیاجی بر قاعده کلیه صره سنده کوستریور ایسه کده بو افاده - مزله اولرک هر زمان و هر یرده یالکز بر یول اوزرنده یوریه - لرخی ، یالکز بر یرده قونمه لرینی دیمک ایستمیوروز .

بالعکس بز دیمک ایستمیوروزکه ، قطعات مذکوره زمان قطعیده هپسی بر یره طوبیلا به بیله جک و یا خود هیچ اولمزسه ، هپسی محاربه یه اشتراك ایدم بیله جک صورتده یوریمه لی و اوطور - مه لیدر . آنک ایچون شمیدیکی عسکرلک صنعتی : بیوک قطعانك هیئت عمومیه سنده جمع و تفریق عملیاتنك بالناوبه دوام و تبدل ایتمه سندن عبارتدر ، دیه بیلوروز .

باش قوماندان اولان ذات ، صورت عمومیه ده ، الی آلتنده کی قطعات عسکریه یی ، طاغلق یشاتمق ، طویلی محاربه ایتدیرمک اصولنه واقف اولمیدر . چونکه بو اصول اردویه

اك الويريشلى كلديكى كې، آنى اك ابو بر صورتده بىلمكده كافىدر . لکن شو ديدکرمزى بىلمکله برابر، باش قوماندان، لزوم کورلديكى زمان بتون قطعات عسکريه سنى طوپلايه بىلمک ايجون ايجاب ايدن تدبيرلرى ياپميه ده بوزجلىدر . بحث مذکوره دائر قواعد کليه سويلمک ممکن اوله مز . چونکه وضعيت عموميه ديكشده کجه او خصوصده اجراسى لازم کلان سعى عمومى ده بسبتون بشقه برطور، بشقه برشکل آلمش بولنه جقدر . [*] .

صيق وييتدشک قوناقلرده ايجه زمان قالمش اولمقله برابر پک زياته مشقت چکماک سزىن کندی قطعات جسيمه سنى حرکت قطيه آننده الى آتنده بولنديره بيله جک اولان باش قوماندان، عسکرى طاغتمق و طوپالامق صنعتنده اک مهارتلى بر قوماندان يرينه کچه جکدر .

[*] ١٨ تشرين ثانی ١٨٦٧ سنه سنده ماره شال مولنکه نك هفته لق عسکرى غزته سنده نشر ايتديكى بند مخصوص . — بو مسئله نك حله دائر ناپوليونك برسوزى واردرکه، اهميت عظيمه سنه بناء بروجه آتى نقل ايدىورز : باش قوماندان اولان ذات کونده براقا کرم دشمنك جبهه دن، صاغ ويا صول جناح استقامت دن ظهور ايدم جکنى دوشونه رك اوکا کوره کندی اردوسنه لازم کلان ترتيباتى ويرمک ايجون کندی کندیسنه بعض سؤالر ، صوره جقدر . اگر بو سؤاللر جواب ويرمکده مشكلاته اوغراسه ، او زمان يايلان ترتيبات عسکريه ده بر خطابه دوشديکنى آکلاملى وهان آنى تحيجه چالشمليدر .

زمانه زده مختلف مملکتلر آره سنده کر چکدن حیرت اولنه .
 جق بر ترقی کوسترن بین الملل مناسبات ایله تجارت معاملاتی
 هر نصل اولورسه اولسون ، ظهور ایده جک وقوعاتک عکسی
 ضربه سندن متأثر کورینورلر . اونک ایچون اگر حال سفری
 ایجه بر زمان اوزامش بولورسه ، او ، کندیلکنندن بر قوه
 مخربه ، بر آلت مده شه برینه کچرکه ، اکثری حالارده حکومتلرک
 مناسبات عمومیه سنده پک فنا وقطعی تأثیرلر کوسترمش اوله جقدر .
 بوندن آکلاشیلورکه ، زمان حاضر اصول حربنه کوره
 جریان ایده جک بر سفرده وقوعات بر برینی تمقیباً یعنی بلافاصله
 ظهور ایدوب کیده جکدر . حاصلی بویله بر سفر ائناسنده
 اسکیدن اولدینی کبی ، بیوک بر توقف زمانی کورایه جک و بو
 خصوص یالکز ، دشمنلردن بریسی ، خصمک هجومی کیرویه
 پوسکورتمش ایکن ، کندی نوبتده آکا هجوم ایده جک قوتی
 حائز دکل ایسه ایشته یالکز اوزمان ، فقط ینه بر مستننا قبیلندن ،
 ظهور ایده جکدر .

بو حادثه ایکنجی پلونه محاربه سندن صکره عثمانلی ، روس
 حربنده وقوعه کلمشدر . حقیقت ! مذکور محاربه نی متعاقب
 درت آیدن زیاده یمنی پلونه نک سه قوطی آنه قدر بر توقف
 کورلمشدر . لکن بو سفرده بر برینه قرشو حرکت آیدن قوتلر

آره سنده کی نسبت سزلک ، حقیقهٔ پک حیره شایان بر درجه ده ایدی . عثمانلیلر موفقیت قزاندقدن صکره ، دشمنلرینی کیرویه بوسکورتک و یا خود ر هجومه کچمک خصوصی دوشونه میه جک صورتده عدداً پک ضعیف بر حالدیه بولنیورلردی .

شو مثال کرچه ، بر آز اول سوبلدیکمز قاعده ایچون بر استثنای تشکیل ایدیور؛ لکن بولک اصل سبی شودر که: ترکار ایلک زمانلرده دها نصلسه یا کلش حرکتلرده بولمشلردی .

اولیه ایسه ، بو حال استثنایی ، نرم قاعده مزی چوروتمکدن زیاده اوکا نازه بر حیات و برمش اولدینی کندنی کندینه میدانه چیقار . کچمش عصرلرک سفرلرنده وقوعنی کوردیکمز بونجه توقفلره ، بونجه اوزون فاصله لره کلنجه ، اونلره دائر نافله یرم سوز سوبیلتمکدن چکینورز . زیرا اوکی فاصله لری ، بوندن صکره بردها کورمک بزه نصیب اولیه جقدر .

اوت ! اسکی زمانلرده اوکی فاصله لر وقوعه کلوردی . چونکه دشمن اولان جهتلرک هر بریسی بعضاً اولوردی که ، حربیه عادانا نفرت ایدیورلردی . چونکه تعقیب ایدیه جک حرکات عمومیه ایچون قطعی و آجیق برهدف کوسترمک اکثر با الارندن کلیوردی . چونکه اسکی زمان حربلرنده قیش موسمی کلنجه حرکات عسکریه تعطیل ایدیه لرک ، قیش اردوگاهلرینه

چكلمك خصوصى بر برینه دشمن اولان اردولر اچون غلبه سی
ناقابل بر عادت حکمنه کیرمشدی .

شمیدیکی زمانلرده اردولر ، بر دفعه سفر بر حالنه کچدکن
صکره آنلرک اداره سی اچون ایدیلان مصارف او درجه
بیوکدرکه ، حکومت حاضره بو مصرف یوکنی آزالتق فیکرینه
بنساء حدود بوینده کی قوماندانلرینه اردولرک بردوزی یه محاربه
ایله مشغول اولملرینی امر واصرار ایده جکلردر .

مخاصملردن هانکیسی ایجه بر زمان حرب غائله سنه طیانه -
بیلورسه ، بو خصوصدن اک چوق استفاده ایده جک طرف
اوطرف اولور . بر حکومت ، بشقه بر حکومتک عسکرلکچه
تشکیل ایدلمش اولان قوتلرینی کاملاً محو ایتسون... اراضیسنک
بیوک بر پارچه سنی تحت اشغاله آلسوندده اک صکره بو اشغالاک
کندیسنه یوکلته جکی مصرف یوکنه طیانه میهرق نهایت مغلوب
جهتک آز چوق فائده لی بر مصالحه نکلیفی قبوله مجبوریت
کورمسون، بو، نظریاتجه اصلاً ممکنسنز برشی دکلدور .

بالعکس ، بر حقیقتندرکه ، نیجه کیمنسه لر نافله یره اوکا
ایناتق ، اعتقاد ایتک ایستمیورلر . خصمک باشلوجه
اردوسنی محو ایده بیلیمک خصوصى ، اعلان حرب ایدلدیکی
زمان تعقیب ایلدی کمز مقصدک مکماًلماً حاصل اولمسه سنه بر دلیل

قطعی دکلدر . بوفکرده بولناتلر ، پک چوق یا کلدقلرینه امین اولسونلر .

وسقی پک زیاده مملکتلر ، ومثلاً ، روسیه ایمپراطورلنی ملیت اعتباریلہ یک جنس ، کثافتی جزئی ، معیشتی علی العادہ یعنی بین الملل مناسباتک کسلمہ سیلہ پک اوقدر زحمت چکمیہ جک ر اہالی بہ مالک اولدیغندن ، ایشہتہ بونک کی مملکتلر اوزون سفرلرہ بیلہ یک زیاده مشنوم وتہلکہلی نتیجہلرہ اوغرامزلر . یکن مدینتلی صـوک درجہ بہ کلان ، مملکتلری پک چـوق اسع اولمیان ، اہالیسی پک زیاده کثیف لیکن اجناس مختلفہینی حاوی بولنـان حکومتلر او کی اوزون سـفرلرہ پک چـوق زحمت چکر وپک چـوق تہلکہلی نتیجہلرہ تصادفی ایدرلر . وخصوص ، اک چوق ، کندی اہالیسی نہ کندی محصـولی لہ ادارہ ایدہ میان مملکتلرہ ، خارجہ مراجعت ایتک لزومی ورتلجہ دہا زیاده کسب اہمیت ایلر . حال بوک ، اعلان ترب وقوعہ کلدیکی زمان ، خارجدن امتعہ واشـیا کتورتک سئلہسی آرتق منتظماً تعقیب ایدیلہ مز ویاخود بونک بسبتون زدی آرہ سی کسلور .

بولتیقہ وھیئت اجتماعیک نک وضعیتی دہ شو بحث ایلدیکمز سئلہ دہ اک بیوک واک مہم برتائیر حصولہ کتورور . اگر حرب دکتہ اوغرایان مملکت یالکز کنیش اووہلرہ ساکن وپک

آز غلبه لك اولان چفتجی مقوله سی بر اهالی طرفندن اشغال ایدلمش بولنورسه ، حکومت ، صورت عمومیه ده کندی قرارینی ویرنجیه قدر سربست بر حالده قالور . چونکه اکثر زمانلر بوجفتجی اهالی ، عقد صالح ایدلدیکنی کورمک ایچون حاصل اولان طویغولرینی تروج ایتدیره جک وسائطه مالک دکلدرلر .

لکن بیولک شهرلرده صنایع تجارت ایله اشتغال ایدن واساسا زانکین بر خلق ایله مسکون اولان مملکتلرده ایش بسبتون بشقه بریولده جریان ایدر . چونکه صنعت و تجارت عالمنده آپ آنسزین وقوعه کله جک برسکونت او دیدیکمز خلقت بتون وارینی یوغنی ضایع ایتدیرمکه واسطه اوله بیلور . اونک ایچون اگر بوکی مملکتلرک اردوسی ده ایلک زمانلرده بعض مغلوبیتاره اوغرامش اولورسه ، بوزنکین اهالی بر آن اول باریشبق اولمق خصوصنده ایجاب ایدن تأثیری کوس-ترمکدن بر دم خالی قالمیه جق وحتی بویولده کندی آرزوسنی تروج ایتدیرمکه ده موفق اوله جقدر . زیرا حکومتی تضدیق اتمک ، مصالحه بی قبول ایتدیرمک آنک النده در . حاصلی بر چوق نقطه نظر دن بوکی زنکین اهالینک حکومتلر اوزرنده کی تأثیری یک چوقدر .

یالکز اهالینسی بر برینه مساوی وهان ینه بر برینه مشابه اوله جق ص-ورنده تشکیل و ترکیب ایدلمش اولان حکومتلرده اعلان حرب ایتمکدن طولانی بسلدیکمز ایکنجی درجه مقاصد

وايسه-تئليكى كې عقد صالح ايتىك خصه-وصلرى برنجى مقصد
 حصوله كلكدن يعنى دشمنك اردوى اصليسى مغلوب ايدلدىكدن
 صكره برچوق مشكلاته اوغرامقسنزن حل اولنه بيلور .

بوقيلدن اك بارلاق بر مثال وجوده كتورن سفر ، پروسيا
 حكومتىك آوستريالير عاينه آچش اولدينى (۱۸۶۶) سفيريدر .
 حقيقت ! اوزمان يالكز (كونيكرهچ) ميدان محاربه-سنىك
 قزانامش اولمىله بتون سفره نهايت ويريله بيلمىشدر .

لكن بربريله حرب ايدن ايكي مملكت همان يكدىكرينه
 بىكز بر وضعيتده بولدىقلى زمان بيله ايشلىرك ينه بشقه
 بر طرزده جريان ايتمى پك اعلا واقع اوله بيلور . بو حقيقت ،
 (۱۸۷۰) فرانسه ، آلمانيا سفرنده تماميله وقوعه كلىشدر .
 فرانسه-يك عسكرجه تشكىل ايدلمش اولان بتون قوتلىرى
 سفرك ايلك اوچ آنى ظرفنده همان محو اوله درجه لرينه كلىش
 بولنىوردى . لكن فرانسلرى عقد صلحه مجبور ايدى بيلمىك
 ايجون ينه بويله اوچ آى كچدىكدن صكره آنجق بر پارچه موفقيت
 حاصل اوله بيلمىشدى .

اكر بربريله غوغا ايتىك اوزره بولنان حكومتلر كرك مليت
 و كرك اصول اداره نقطه نظرندن يكدىكرندن فرقلى ايسه لر ،
 دشمن قوتلرينىك محومنى متعاقب همان عقد صلح ايدى بيلمىك

مسئله سنك يعنى اردونك محويله بركلده مصـالحه نك ظهورى،
بك نادراً كوريله جك خاللردندر .

نابوليون (۱۸۱۲) ده روسيه عليه آچدينى سفيرده مغلوب
اولمش ايسه، بوحال، روس اردولرينى تخريب ايده مامش اولمهـ
سندن ايلرى كله برشى دكلدر. بالهكس روس اردولرينه مغلوب
دوشمى وحتى امپراطورلنك پايتختى اولان موسقووه شهرينك
ضبط ايدلمش بولمى بيله روسيه حكومتى عقد صلحه مجبور
ايمكه غير كافى كورينوردى . چونكه ممالكى بك واسع وببوك
براقليم اولدقدن بشقه، اوراده اسكان ايدن ملت كرچك متين
وقوى برفكر ايله يشادلمش بولديغيچون آنى قطعى برصورتده
محو ايمك ايجه مشكل بروظيفه ايدى .

شمال و جنوب حكومتلى آره سنده ظهوره كلان آمريكا
سفر عظيمنده مظفريت، هان صوك زمانلره كلنجيه قدر شمال
اردولرينه صداقت كوسترمكدن بدم بوش قالمدى . واك صكره
جنوب اردولرى يواش يواش سقوط ايمكه باشـلاديلر . بونك
سببى ايسه بك بسط برشيدر. چونكه جنوب حكومتلى مصـ
لحه يي قبوله مجبور اوله جق صورتده شمال حكومتـلريله شمال
اهالىسى اوزرنده بيوك برتضييق كوسترمكدن عاجز بولنيورلر
ايدى .

ايسته بوندن طولاييدرکه، خصمك اردوى اصليسى محو

و پریشان ایتدکن صکره، برچوق حالارده، مصالحه نامه‌ی امضا ایتک ایچون دشمنی تضیق ایلیمک لزومی حس ایدیله جکدر . شو خصوص بعض حالاره کوره ، احتمال که ، برنجیسه ندن دها سرت دها چتین بر صورتده حل ایدلمش بولنه جقدر . اونک ایچون حرب ایتیمکه قرار ویرله جکی زمان حربدن صکره نه وجا ایله حرکت اولنه جغه نه ، عقد صالح جهتی نه صورتله حل ایدلمش بولنه جغه دایر دها اولدن واینجهدن اینجه دوشونمک لازم کله جکدر .

محاربه میداننده مظفریت قزاندقن صکره هر شیدن اول کندی قوتلرمزک تشکیلاتی، مغلوب اولان ملت افرادینی حربیه دوام ایتک آرزوسندن زیاده باریشمق فکرینه دوشوره جک وجه ایله حرب فلاکتلرینی اک چوق خصم طوراغنه آتمغه مساعدده ایدرمی، یوقسه ایتزمی؟ ایشته بوخصوصی ایجه کسکین برکوز ایله کورمک، تدقیق ایلیمک مجبوریتده یز :

بوقصور (۱۸۱۲) بفرنده برنجی ناپولیون طرفندن فصلسه ارتکاب ایدلمشدی. کرچک! اوزمان فرانسه قوای عسکریه سنک تشکیلاتی، یورویش حالته کیرمش اولان بیوک اردویی، روس اردولرینی پریشان ایلله جک صورتده بردوزییه کیرودن کلان جسم قطعات ایلله تعقیب ایتدیرمک واردوی مذکور دشمن طوراغنه یابلدجه دشمن برکره دها بویرلرک ضبطنه

قالقه ميه جق وجه ايله اورالريني ديديكمز قطعات عسكريه نك
تحت اشغالنده بولندرمق ايجون ابراطوره مساعده ايدجك
درجه ده مكمل والوريشلي دكاري .

يوقسه اكر ابراطور ، شو ديديكمز يولده مكمل
بر اردويه ، مكمل بر تشكيلايه مالك اولسه ايدى شهه-ز
هم كندى مقصدينه ايرر، همده روسلرى عقد صاحبه مجبور
ايلردى . دشمنى بويله بر مجبوريتيه آتمق ايجون قوللايه جق
واسطه لر ، ضبط اولنان مملكت ايله اوراده يشايان اهاينك
طبيعت و اخلاقه كوره ديكشور .

احتمال كه ، بومملكتك يالكز پايتختى ضبط ايتك و يا خود
احتمال كه ، (۱۸۷۷) ، (۱۸۲۸) و (۱۸۲۹) سفرلرنده
اولديني كبي يالكز پايتختى تهديد ايلمك صورتيله عقد مصالحه
ممكن اوله جقدر . اولدن بشقه ينه احتمال كه ، بو خصوصده
بيوك ليمانلرى ، بيوك تجارت مركزلرينى ، اك مهم نقليه يوللاريني ،
عسكر قابريقه لريني ، مستحكم موقعلرى و الحاصل اردو و ملك
حياتى ايجون الزم اولان هر شئي ضبط ايلمك ايجاب ايدجكدر .
حتى ينه احتمال كه ، اراضينك مهم بر پارچه سنى و يا خود ضبط
اولنان بوازاينك همپسنى اشغال ايتك لزومى ده حس ايديله جكدر .
بعض كره لر ايسه ، بومملكتك حاصلاتى اهاينك ، ادا ، مستف

یتشمدیکی زمان آبلوقه اصولارینه مراجعت اولنه رق دشمن
او سابهده عقد صاحبه مجبور ایتدیرله جکدر .

مظفریت استحصال ایتدکدن صکره عقد صالح ایچون ،
دشمن حکومتلرک قولالانه جقلری شو مختلف اصوله نظراً بر
حال حاضر سفرینک اطواری ، کچمش زمان سفرلرینه نسبتله
بیتون بشقه برصفتده ، بشقه برشکلده نمایان اوله جقدر . اک
قوی امل ، اک متین تشبث ممکن اولدینی درجهده کندی قوای
عسکریه مزى محافظه ایتدکدن عبارت بولنه جق و بوامل احتیاطکارانه
دیگر زمانلردن زیاده اساسلی ولزوملی کوريله جکدر . ایلروده کی
سفرلرده کسکین وشدتلی بر تجربه کوسترمکدن ایسه سورکلی
بر غیرت اظهارینه مستعد اولمق دهامهم بر مسئله شکلنه
کیره جکدر .

فرانسه ، آلمانیا سفرینک هرایکی دورنده شمدی سویلدی کمز
ایکی درلو غیرتک بر برندن قطعاً فرقلی اولان بو طبیعتی آلمانلره
بتون صراحتیه برانکده عیان و بیان اولمشدی . ایلک دورده
هجوم طرفنک بیوک برشدت ایله ایلرویه کیتدیکنی ، دشمنی آدم
عقللی بر مغلوب ایدنجیه قدر . مصادمه دن مصادمه یه ، ظفردن
ظفره قوشدیغنی کوریوورز . ایکنجی دورده ایسه یتنه بو هجوم
طرفنک ، الدن قاچیردیغنی تکرار کیریوه آلمق ایچون صوک درجه

چالیشان بر دشمنه قرشو ، ضبط ایدیلان یرلری مدافعه ایله
مشغول بولندیغنی کوربیورز .

دشمنی عقد صلحه مجبور ایده بیلیمک ایچون بوندن صکره ،
غالب اولان جهتک یعنی آلمان اردولرینک صحرا محاربه لرنده
یکی یکی مظفریتلر استحصالنه بر لزوم قالمامشدی ؛ یالکیز بو
مقصده ایرمک ایچون ، بتون ایکنجی دور انناسنده محاصره
ایدلمش بولنان یانجنی ضبط ایلیمک ایجاب ایدردی .

بونک ایچون اکبر بز ، شمدیکی زمان حربنک اوصاف معینه
وخصوصیه سنه بر نظر عمومی کزدیرر ایسه ک آنلرک آشاغیده کی
ماده لر دن عبارت اولدیغنی آکلارز :

الد . موجود اولان قوتلرک هپنی خط حربه سوق ایتمک
واولردن بر مظفریتی متعاقب ممکن اولدیغنی قدر سرعت ایله
فائده لی بر مصالحه عقد ایدیله بیله جک صورتده مساعی طلب
ایلمک لازمدر .

حربک ایلک زمانلرندن اعتباراً ملتک بتون قوای موجود-
ده سنی همه حال حاضرده بولندرمق ایجاب ایلر .

هیچ برتوقف زمانی براقق سزین ، حربی شویله بردوزییه
تعقیب ایلیمک ، خصمک مقاومت منتظمه سی قطعی میدان محاربه-
لرنده بسبتون قیرلمش اولنجه یه قدر آنی کمال شدت ایله ایلری
سورمک و یالکیز او انساده یعنی مصالحه یه قرار ویریله جکی

صره ده اردوبی بر پارچه اسکی حالنه ، اسکی انتظامنه قویمغه
 مساعد بر صورتده خفیف محاربلر یایمق لازم کلور .
 طبیعیدرکه ، شوصوک دوردده ، اولجه حربک ظهورینه
 واسطه اولان پولتیقه تکرار میدانه چیقهرق مصالحهیه قرار
 ویرمک ایچون تک باشنه اوغراشوب طوره جقدور .

دردجی فصل

حربك اشكال اصليه

هجوم و مدافعه، اصولا حربك اشكال اصليه سی تعبیر اولور. وودن طولانی ایکی خصم دن هانگیسی ایلری کچمه، دشمن اوزرینه یوریه و آنی مغلوب ایدرک نووجهله تشبثات سیاسی سندن واز کچورتمه قرار ویررسه اوطرف مه اجین، حال بوکه، کندی اوزرینه پایه ایجق تعرضی کیرویه آمدن بشقه برشی دوش و نمایان طرفه مدافعه اسمی ویریلور.

اوله اولنجه، یالکز کندیسینی مدافعه چالیشان طرف هیچ بروقت بر نتیجه دن زیاده یعنی کندی هزمتنه مایع اولمقدن بشقه برشی استحصال ایده میه کدر. بونجه ایسه آچقدن آچغه منفی بر نتیجه در. آک ایچون اصول مدافعه، دشمنی مغلوب ایتمکدن عبارت اولان هدف اصلی به وصول ایچون کافی درجده متین وقوی بر اصول حرب دکدر. بودن طولانی اصول مذکور سوئر، اک صکره ینه مقابل تعرضه کچمک لازم کلدیکنی توصیه ایدیورلر. حتی بو قدرله ده قالمیورلر؛ بالعکس

۱۵ | حرب ۳۰

۵۵

بر زمان اولورکه ، اوراده بر نتیجه استحصال ایده بيلمك ايچون چارناچار مدافعه دن وازچكهرك اصول حرب تعرضنيك قبول ايدلمه سنه متحداً قرار و برمهيه لزوم كوربورلر . والحاصل مدافعه دنيلان اصول حرب ، دشمن حكومتلرك ط-وتديني مسلك اوزريده اكثرياك آز وقت اجراي تاثير ايدمه يله جك وبر سفرك اولندن صوكنه قدر اصول مذكورك تطبيق ايدليكني كورمك يك مستمنا واقع اوله جقدر .

بونك اوزرينه يالكلز كندى ضعيفلاكنه جداً قناعت حاصل ايدن ، اوبلاي عظيمه جداً محكوم اولان طرف دشمن اردوسنه بسبتون مغلوب دوشمه مكي كنديسي ايچون بختيارلق صايديني زمانلرده او وجه ايله حركته قرار ويرمش بوله جقدر .

ايش بويه اولنج ، آرتق هنگام سفرده هر متعرض قرشو- سنده ، بر مدافع تصور ايتك لزومنه هيچده حاجت قالمديني آشكار اولور . بالعكس ، مخاصملردن ايكي سي ده همان عين قوت ومكنتي حائر اولدقدن بشقه هر ايكي سمنك اردو وملمته اولان امنيتي ده مساوي بولنديني زمان آنلرك ايكي سي بر آنده تعرضه كچمش اوله جقلريني قبول ايتك ضروريدر . بونك ايچون شو ديديكمز حالده ايكي تعرض اردوسنك قرشو قرشويه كلديكي كوريله جك وبوخصوص آنلردن بريسي ايلك صدمه لرك حاصل ايتديكي نتيجه لر اوزرينه كندى نفوذ وشدتنك قيلديغني حس

ایلدیکی بر زمانه قدر دوام ایده جکدر . لکن او آندن اعتباراً
 کندی امللرینک برر برر سوندیکنی کورن جهت چارناچار
 تعرضدن مدافعهیه کچمهیه قرار ویره جکدر . اکثریا دشمنلردن
 بریمی ، دهها چابوق طاورانهرق وسائط سفریه سنی تدارک
 خصوصنده بیوک بر درایت کوسترمش اوله جغندن طولایی
 خصم قرشوسنه بکلانمده درجه ده بیوک قوتلر چیقارمبیله جک
 وشووجه ایله مذکور دشمنی مدافعهده قائمده مجبور ایلیه جکدر .
 (۱۸۷۰) سفرنده فرانسلرک باشندن طبقی شویله بر حال کچمش
 ایدی . لکن شمدی ، بلکه هر یرده قومشو حکومتلرک
 تشکیلات واحوال عسکر به سنی میدانه چیقارمق ایچون اودرجه
 اعتنا ایدیلور و بر کون بهمه حال ایش باشنه کچه جک اردولرک
 سفر برلکلری حقنده لازم کلان زمان اودرجه اینجه حساب
 اولنورکه ، بوسویدیکمز باصقینلرک یواش یواش آزاله رق اک
 صکره بسبتون قالقه جقلری طبعیدر .

هاجین طرفلکده آردصره مدافعهده قالدینی کوریه جکدر .
 از جمله تعرض جهتی قوای عسکر به سنی طویلی بر حاله کتورمک
 و اووجه ایله خصمک قفاسنه ده کسکین و آجی بر یومروق
 ایندیرمک لازم کلدیکی زمان مدافعه اصولنه مراجعت ایده جکدر .
 ال آلتنده زیاده جه بر قوت بولندیره بیلیمک فکرینه بنساء دیکر
 بر نقطهده پالکز اوافق تفک بعض قطعات عسکر به قوالانق

ایستدیکي زمان اوراده ینه بویله جه مدافعه اصولنه مراجعت ایلله جکدر .

بتون بوسویلدکار مزدن شو چیقارکه، حربك ايکي شکلندن مدافعه اصولی، اك آز اهییتی حائر اولان وحدذاننده موجود اولمیان بر اصولدر . بونکله برابر ، شمدي به قدر برلکده گلش برلکده بیومش اولان شو ايکي اصولك ايکيسنی ده قبول ایتك وحقی ايکيسنده مساوی بر قیمت ويرمك خصوصنه بزه مساعده ويريله جکدر، فکرنده یم . چونکه بودیدیکمز کبی حرکت ایدلديکنه یعنی تعرض و مدافعه تعبیرلرینی ابقا ایتدکدن صکره اونلره مساوی بر قیمت ويرلديکنه کوره هر بریسنك اجرا ایده جکی وظیفه ايله بولنه جنی احوال عمومیه نی صراحة کوسترمك ممکن اوله جکدر . حاصلی ديمك ایسترز، که بواصول حرکت سایه سنده بزکرك تعرض و کرك مدافعه نك تابع اولدینی شرائط ايله هر بریسنك طالعه دائر ده کوزل و ده اچیق بر فکر استحصال ایتش بولنه جغز . یالکز شونی خاطر دن چیقار ماملیدر که، بزم ويردیکمز معنایه آوره (هاجین) هر یرده و هر زمان دکل بالعمکس اکثریا تعرض ايله ایش کورن طرف، (مدافعین) ایسه مقصد اصلیبی دشمنی کیرویه بوسکور نمکدن عبارت اولان طرفدر .

مخاصم لردن بریسنك دائما تعرض ، اوته کینك دائما مدافعه اصولنده حرب ایتش اولمسی فکری قبول ایديله جک بر فکر

دکدر. بوندن بشقه اردولرک تقسیم وظائف و اعمالی خصوصاً لریله
 اشتغال ایدن نظریات کتابلری (سوق الجیش) و (تعبیه) نامنده
 اساساً ایکی بیوک قسمه آیرلمش بولایورلر. صورت عمومیه ده
 سوق الجیش دیمک، قطعات جسیمه بی محاربه قطعه اجرا
 ایدیلجهک یرلره قدر کورتوره بیلیمک ایچون لازم کلان اک مهم
 ترتیبات و اک کوزل تشبثانی کوسترن علم دیمکدر. تعبیه ایسه
 بالعکس، یالنکز محاربه ده دائر اولان ترتیبات عمومیه بی کوسترن
 برعلمدر.

سوق الجیش و تعبیه بی بشقه درلو تعریف ایدیلرده واردر.
 از جمله سوق الجیشه اردولرک سوق و اداره سنی، تعبیه ده
 قطعات عسکریه نک سوق و اداره سنی سیدلیرن برر نظریات
 کتابیدر، دیورلر.

شو ایکی تعبیری ایضاح ایتمک ایچون شمعی به قدر یک
 چوق تعریفلر ایدلدی، یک چوق معنالر ویرلدی. لکن او تعریفلر،
 او معنالر اکثر احوالده یک واضح اولیه جق صورتده ترتیب
 ایدلمش کی کورینورلر. چونکه مذکور تعبیرلرک ایکسی
 آره سنه قطعی و مکمل برحدود فویق اصلاً ممکن دکدر.

(قلاوزویچ) تعبیه بی تعریف ایدرکن: «تعبیه، قطعات
 عسکریه بی محاربه ده استعمال ایتمک صنعتیدر.» دیور. سوق
 الجیشی تعریف ایدرکن ده: «سوق الجیش، حربک هیئت عمومیه سنی

کوزل بر نتیجه به ایصال ایده جک طرزده مختلف محاربه لری بر مقصده خدمت ایتدیرمک صنعتیدر. ، دیور [°]. بو خصوص بر آز اول سویلدکلر منزله همان یقه یقه به توافق ایلیور. حال بوکه، ایوجه بر دوشونیلورسه مذکور تعریفلرده کوریلان اختلاف تعیه وسوق الجیش قبلرینک درجه شمول ووسعتی ایودن ایویه آکلامش اولمقلغمز ایچون بزه ایجه فائده لی برشی اولدیغی میدان چقار. آندن بشقه، بوتقسیم کیفیتی هم عملی همده فائده لی بر مسئله در. یعنی بز اوسایه ده، یالکیز بر کله قولالانهرق حرکات عسکریمک هسانکی جنسندن بحث ایدلمش

[°] براردو، برقاج کونلک مسافه قطع ایده جک وجه ایله ایلرولمش اولدیغی زمان بیله، یالکیز بوسبیدن طولانی، آنک مطاق بر تعرض حرکتی بائمق اوزره بولندیغنه حکم ایدیه میه جکئی خاطر دن جیقارما ایدر. ایلری به طوغری یاپیلان یورویشدن مقصد، بعض کره، مطاق، منفی بر مقصد اوله بیلور. کندی خصمنی بکامکه قرار ویرن مدافعه جهتی ایشته بووجه ایله کندیشجه پک موافق اولمیان براراضیده خصمنی بکامکدن واز کچمک اک صکره ده فائده لی بریره قدر ایلرولمه به موفق اولور. ویاخود، بعض نقطه لری سوق الجیش و تعیه جه ستر ایتمکله قرار ویردیکی زمان آنلردن پک اوزاق بولنماق مقصد یکانه سیله ینه سویلدیکمز کی ایجه برمسافه ایلرولمه یه ده مجبوریت کورور. مخاصم حکومتلردن هانکیسنک مدافعه ده قاله جغنی وهانکیسنک تعرضه کچه جکئی قطعاً بیلک ایچون مذکور حکومتلرک هرحال وطورینی بربریه مقایسه ایتمک لزومی واردر.

اولدیفنی آکلامش و یاخود آکلاتمش اوله جغز . دیدیکمز تقسیم خصوصنک برفائدهسی دها وارکه، اوده حربک هیئت عمومیه سنه دائر نظریاتی دها قولای برطرزده اوکرنمکه واسطه اولیشندن عبارتدره . بونک اوزرینه کرچه برخیلی برلرده سوق الجیش اصولاربنک تعبیه اصولاربنه قاریشمش اولدیفنی کوریلورسده ینه تعبیه وسوق الجیشی فنلرینی آیری آیری فصللرده کوسترمک عادتیی ترک ایتمه ملیدر .

ایش بوبله اوانیجه، حرب ایچون اساساً درت بیوک شکل حاصل اولورکه : برنجیسی تعرض سوق الجیش ، ایکنجیسی تعرض تعبیه وی ، اوچنجیسی مدافعه سوق الجیشی، دردنجیسی مدافعه تعبیه ویدر . بوندن اوتریده سائر بعض ترکیبات مختلفه دها حصوله کله جک و آنلردن هر بریسنک برر ، برر تدقیقی لزومی آشکار اوله جقدر .

از جمله بو تعرض اردوسی، موضوع بحث اولان بردارالحربه کیردیکی زمان اوراده خصمنه راست کلدیکی کبی آلمک اوزرینه هجومه قیام ایدرکه ، شو حال تعرض سوق الجیشی ایله تعرض تعبیه وینک برلشدیکنه یک اعلا بر مثال اولور . دیگر جهتدن تعرض سوق الجیشی نك برمدافعه تعبیه وی ایله تعقیب ایتدیرلمش اولمسیده واقعدر . مثلاً دشمنه قاوشدقدن صکره محاربه یرنده هجوم ایتک خصوصی آنک کیفنه براقیلورسه ، او زمان

ایشته بو سویلدیگمز حال وقوعه گلش اولور .

شمدی اويله بر خصمك بولنديفی وضعیتی تریف ایتك لازم کلنجه اوکا، مدافعه سوق الجیشی داخندنه، تعرض تعبیه وی حرکاتيله مشغول بر خصم ديمك پك مناسب دوشه چکی طبیعیدره بو دشمن هیچ شبهه یوق که، مخاصم قطعات کندی خذاسنه یا قلاشمش اوله جنفی بر زمانه قدر حال سکونده قالور ؛ آندن صکره بردن بره تعرضه کچر و محاربه ایتمکه باشلار .

اكر بر حکومت كرك سوق الجیش و كرك مدافعه نقطه نظاردن حال تدافعیده بولنمیه قرار و برمش ایسه، او حکومتك بر عطات مطلقه دوشمش اولدیغنه حکم ایدم بیلورز . چونکه بودیدیکمز وجه ایله حرکت اولندیغنه کوره دشمن اردولری پك سربست بر یوله حرکت ایدرك آز وقت ایچنده هدف اصلیلری اوکنه گلش بولنورلر . آنك ایچون هم سوق الجیش و هم تعبیه جه اصول حرب تدافعی بی قبول ایدن براردو ، یالکز محاربه یرلرنده خصم قطعاتی کیرویه پوسکورتمش اولقله اکتفایه قناعت ایتمش براردو اوله بیلور .

• حرب جسم نظریاتی ، نام اثرنده (ویلایزدن) ، تصویری ممکن اولان بتون تتابج عملیه بی میدان جیماره حق وجه ایله پك طویلی برجدول ترتیب ایلمشدر . بز بوجدول سایه سنده سوق الجیش و تعبیه فلرینه نسبتاً تعرض و مدافعه اصوللرینك

بربريله قاريشمه سي و براشمه سي حالده ، ظهوره كله جك يني مظفريت و مغلويت زمانلرنده استحصاال ايديله جك نتيجه لري كويا آكلامني اوله جغز [*].

حرب اوزرينه تحريات نظريه اجرا ايدلديكي زمان فلان و فلان اصول قوللانديغنه كوره سويله نتيجه لر چيجه جقدر ؛ ديه بر اينده دها باشلامزدن اول ، حصوله كله جك نتيجه لري سويامك كي محذورلره دوشمك طبيعيدير ، آلك ايجون (ويلليزنه) ك ترتيب اتمش اولديني جدولي كوك بوزندن اينمش برنسخه كبرا يرينه قويتمقدن چكنمه لي يز .

چونكه سويلديكم كي ، يابلمزسه ، اوت كرچكدن بيوك بر سهوات ايله برنجه خطالري ، برنجه اميدسزلكلري يومتق و نهايت اوفلاكت ايجنده بوغلامق تهلكه سي واردر . يعني ديمك ايسنديكمز شودر كه ، اكر (ويلليزنه) ك بايديني جدوله كوره جكمز احوال و نتايجي هيچ بر زمان ديكشمز برر حقيقت نابته يرينه قوميه آلبشور ايسه ك صكره كنديمزي ياكلش ياكلش ، اعتمادلره سوق ايتمدن بر درلو آلمش اوله يز .

حربده اكثر يا ، وقوعات اوزرينه بيوك تاثيرلر اجرا ايدن تصادفي حاللر و بعض كوچك ، بيوك عارضه لر ظهور ايدر .

[*] قرشوده كي صحيفه يه مراجعت اولنسون .

<p>(۴) تعرض سوق الجیشی وتعرض تعبیه وی.</p> <p>حسبكم محو و بریشان اولمسی و اراضینک اله چورلسی.</p>	<p>(۳) تعرض سوق الجیشی ومدافعه تعبیه وی.</p> <p>صورت عمومی ده مظفریت استحصا ایدله جاک ر خالده بولندور. لکن خدم اردوسی حره دوام اتک اقتدارینی حائر اولدینی ایچون بوندن بر نتیجه قطعه چیقا. ربله من.</p>	<p>(۲) مدافعه سوق الجیشی وتعرض تعبیه وی.</p> <p>میدان محاربه اوزرنده مظفریت؛ لکن سفرک هیت عمومی سه دنه داتر نتایج قطعه حاصل اید. میه جاک بر مظفریت.</p>	<p>(۱) مدافعه سوق الجیشی ومدافعه تعبیه وی.</p> <p>قطعیاً غیر معین بر حال.</p>	<p>اشکال اصلیه موجوده تدبیر ل:</p> <p>(۱) قزالمش بر محاربه نظراً.</p>	<p>باشلانمش اولان تشبثاته دوام ایماکدن بر زمان موقت ایچون صرف نظر اولدور.</p>	<p>سوق البلیشه مساعد بر موضع طوفانه رقیب سوک بر بوزغ، لغه و دشمنکدن احتراز ایدلش بوله. بیلور.</p>	<p>تکرار تعرض تعبیه وی به چکمک و کربله رجعت.</p>	<p>قوتلرک محو و بریشان ایدلش اولمسه برابر اواضینک الدن چیقمسی.</p>	<p>(۲) غائب ایدلش بر محاربه نظراً.</p>
---	--	---	---	---	---	---	--	--	--

بونکله برابر ، اولجه کمال دقت ایله اوکره نلمش واونلره کوره حرکتیه قرار ویرلمش اولان حسابلر نه قدر یا کلاش قورلمش ایسه ، بو سویلدی کمز حاللارک اوقدر زیاده بیومسی ویاخود کوچولمسی بک طبیعیدر . حربده هیچ برشی اوزرینه مطلق بویله دراه سوزنی قولالانق جائز دکلدیر . زیرا تردد و امنیت سزلاک بیه ، اکثر زمانلرده ، حربک برغنصریدر .

بیوک فره دریق ، (براغ) شهری اوکنده کی محاصره قولنی ستر ایتمک هوسیه باشلا یوبده اک صکره (قولین) میدان محاربه - سیله نهایت بولان یورویشنه باشلا دینی زمان سوق الجیشجه حال تدافعیده بولنیوردی . لیکن محاربه یرینه کلدیکی کبی همان مدافعه دن تعرضه کچهرک او وجه ایله حرکتیه لزوم کورمش ایدی . (ویلایزه) ک جدولنه کوره مشارالیه بو وضعیتده ایکن محاربه بی غائب ایتدکدن صکره یالکز رجعت ایتمک بلیه سینه دوشمه مکه چالیشه جقدی . لیکن فره دریق بک چوق ضایعات ویرمش وعلی الخصوص پیاده سی محاربه یرنده اودرجه محو وپریشان اولمشدی که ، سوق الجیشجه رجعت ایلمک لزومی ده کندی کندیسنه میدانه چیه رق بو وجه ایله بتون تشبثات عسکریه بک بشقه برزنکه ، بشقه برشکه کیرمش بولنیوردی . هر شیتک خلافتده اولق اوزره ، یوقاریده کی جدول اک بللی باشلی نتیجه لرک یعنی خصمک محو وپریشان اولمسی ، ارا-

ضيسنك ضبط ايدلمسى كېي شيلرك آنجق تەمرىز سوق الجىشى
ايلا تەمرىز تەبىئە وينك اتفاق سەيەسەندە قزانامش بولنەجنى
كوسترمكە خدمت ايلر . حالوكة ، مدافعة سوق الجىشى وتەبىئە-
وينك برلشمسە كورە ، هرشى يولنەدە كيتسە بيلە ، غير معين
بروضعيت استحصال ايتمكدن بشقە برنتيجە قزانامش اولەمىەجنى
ينە مذكور جدولدن اوكرەنبورز .

تەمرىز ومدافعةدن هربريسنك فائده ومحدورلرني كوسترن
اثرلري اوزون اوزادىيە مطالعە ايتمك ، اكثريا آنلري اوقويانلر
زندانە وباش قوماندان اولان ذات كندى اردوسى ايجون تەمرىز
ريا مدافعةدن بريسىنى قبول ايتمككە حردر . ، كېي ياكلش بر
فكر ك حصولە ياردم ايدر .

حالبوكة ، آلرك ظن ايتكلىرى شو فكر ، بلكە هيچ بر
زمان واقع اولمىەجقدرد . اكثر زمانلردە اردونك ياپەجنى
وظيفەسى ايكي اصولدن يەنى تەمرىز ومدافعةدن برىنى قبول
ايتمش اولان حكومتك ويردجى امرە كورە تەبين ايدلمش
برلەجقدرد . بر دفعە ديمش ايدك ؛ يەنە تەكرار ايدرزكە : حرب
دنيلان نى يولايە نتيجه سەندن وآنك اوزايوب كيتمە سەندن
بشقە برشى دكلدر . بولك ايجون يولايەجە طوتيان يول
تەمرىز ويا تدافى برىول اولمىى حالنە كورە تەمرىز سوق الجىشى
وياخود مدافعة سوق الجىشى اصوللرندن برىنى قبول ايديلور .

پولتيقه نك تعرض ومدافعه دن بر يسنه ميل ايتمش اولمسنه كلانجه
اوده هر ملتك تاريخچه تعرضي ويانداغي بر يول تعقيب ايتمش
بولمسندن ايلرو كليور .

اسكي زمانلرده يونان و ايران اقوامنك مسلك وتاريخي بزم
ايچون بوراده ، اك كوزل بر مثال وجوده كتورر . يعنى بز
شو ايكي ملت بيننده ظهور ايدن سفرلره بر كوز كردرديكمز
وقت مسلك سوق الجيشي نك مسلك تاريخه نظراً دكشمكده
اولديغنه بك اعلا كسب وقوف ايدرز .

بر ملتكه ، انقلابات سياسييه وتاريخيه سنده بر دور سكونه
وبلكه بر حال تدنييه آرتق يوز سورمكه باشلار ؛ اويله بر ملتك
پولتيقه جه مسلك تعرضيدن واز كچه رك يال كزنفسنى قورومق ايچون
حرب ايتمكه مجبور اوله جنى بك طبيعيدر . بونك ايچون او
ديديكمز ملت بر هجومه اوغرامش بولنه جغنه قطعياً امين
اولديغندن اوترى مدافعه سوق الجيشيده قالور ؛ وبو ايسه اك
صكره مدافعه تعبه وينك حصوله ياردم ايدمك بر حال اولور .
اكر حكومت وملتلردن بعضيسى ، بالمكس كمال شيدتله
يوريمك وایلری كيتمك هوسنه دوشمش بولنورسه ، اك چوق
مثبت هدفلره واصل اولمق ايسديهك وبوندن اوترى قوللا-
نه جنى پولتيقه ، تعرضي بر پولتيقه دن عبارت اوله جقدرد . بوكي
اقوامك كيميى قومشو حكومتلره منازع فيه قالان بعض حدود

ولایتلرینی یا قالا مق، کیم یسی مقتدر بر اجنبی تبعه سندن بعضیسی
 کندی عنصر مایسنه قانق والحاصل کیم یسی ده ینه قومشو بر
 حکومتک منافع تجاریه نامنه آجیلان یولاری قیامق موسیله
 کلیدلش اولدینی قبولری آحق فکرینه دوشه جکدر . بتون
 شو دیدکلر من ایسه ، آنجق تعرض سوق الجیشی واسطه سیله
 میدانه کله بیله جکدر . زیرا اکر بز قوللر منی چاپراز ایدرک
 او یله بوشنه بکلر طورور ایسه ک هیچ شبهه یوق که ، دشمن بزم
 ایستدکلر منی کتور ویده کندی الیه آغزیمزه طیقمش اولمیه .
 جقدر . لکن هر کیم که ، تعرض سوق الجیشی بی قبول ایده جک ،
 تعرض تعبییه وی اصولی ده قبوله مجبوریت کوره جکدر . زیرا
 دشمن ایله چاریدشه جنی بر صروده توقف ایتک آنک ایچون
 ممکن اوله میه جقدر . هیچ شبهه یوق که ، بونک خارجنده بعض
 مستثننا حاللرده وقوعه کله جکدر . مثلاً تعرض سوق الجیشی به
 کوره حرکت ایدن براردو ، بعضاً دشمن ایچون او درجه مهم
 بر طاقم یرلره ، بعض نقطه لره تصادف ایلرکه ، اونلرک ضبط
 واشغالی بتون ماتک بر صدمه فلاکت آلتنده ازیلمش اولمسی
 انتاج ایلر . شو حاله نظرآ ، دیدیکمز اردو ، دیدیکمز ملت ، او
 آندن اعتبارآ بزم اوزریمزه آتلمیه مجبور اوله جقدر . بونک
 ایچون وظیفه لرده ، چاره سز ، بر تبدل وقوعه کله جک
 یعنی تعرض سوق الجیشی به مدافعه تعبییه وی خلف اوله جقدر .

لیکن بودرلو حالار، اکثر با یک نادرأ وقوعه کله جک حالاردر.
 مدافعه سوق الجیشی نك تعرض تعبیه وی ایله برلش-دیگنی
 کورمک ایسه دهاکوچ، دهانادر برمسئلهدر. حقیقت! هیچ بر
 کیمسه، هیچ بر وقت کوکل رضاسیله مدافعه سوق الجیشیده
 قالمه یی ایستمش اولیه جقدر. اگر شو حالده قالنورسه، بونک
 یا کندی ضعیفله کمزه امین اولدیغمزدن و یا خود کندی اردومزک
 خصم اردولرینه نسبتاً، حرکات عسکریه و مانوره یه اولان
 قابلیتجه، یک چوق کیر و بولندیغنه اعتماد ایدیشیمزدن ایلری
 کلدیکنه قناعت ایتلی یز. فقط شو ایکی حالاک ایکیسی ده یکدن
 تعرض تعبیه وینک اورته یه چیقارلمسنه خدمت ایده جک طبیعتی
 حائز دکلدر. بونکله برابر، هرشیدن اول بزم املمز، مقصدمن
 مستثنا تشکیل ایدن حالاری بولمق دکل، بالعکس، قاعده نه ایسه
 آنی آرایوب میدانه چیقارمقدر. بوراده قاعده اولان شودرکه:
 « تعرض سوق الجیشی یه تعرض تعبیه وی خلف اولملی، وینه
 آنک کبی مدافعه سوق الجیشی ده مدافعه تعبیه وی ایله نهایت
 بولمسیدر. »

شو نقطه نظردن مخاصم حکومتلرک تشکیلات عسکریه سی
 بیوک برتأثیر، مهم بروظیفه اجرا ایدر. ایکی خصمدن هانکیسی
 دها بشین حاضر اولمش ایسه، بوندن استفاده ایچون اک اول
 وکال شدتله میدانه آتیه جق اودر. بالعکس، اردوسنک

سفر برلکی، دشمنک سفر برلکندن ایجه زمان صکره اکال
ایدلمش اوله جغنه قناعت ایدن طرف، ایسترا ایستمز وهیج
اولمزسه موقتاً حال تدافعیده قالمیه مجبوریت کوره جکدر .
حتی بودرجه کیرو قالمش اولان بر حکومت، بمضاً، ایلری کیتمه یی
خاطرینه بیله کتورمه یه جسارت ایده میه جکدر .

اوله ایسه آچیقدن آچیه سویلملی بزه، ایکی طرفدن هر
بریسنک وظیفه سنی تعیین ایده جکشی، احوال و شرائط حاضره-
دن بشقه هیج برشی دکلدرد. بو حاله نظراً مخاصمیندن هر بریسی
کندی حصه سینه دوشن وظیفه نه ایسه، چاره سز، آنی قبوله
مجبور اوله جکدر . او آندن اعتباراً مدافعه و تعرض اصولارندن
هانکیسی ده کارلی، ده کارلی بر اصول اولدیغنه دائر یابیلان
منازعه لک بسبتون عبث اولدیغی میدانه چیه جکدر . الکابوسی
مذکور اصولاردن هر بریسنک طبیعت و احوال خصوصیه سینه
دائر بر فکر صحیح ایدنمکدر .

بشنجی فصل

تعرض []

۱ — تعرض سوق الجیشی

بر آز یوقاریده سویلدیگمز کبی تعرض سوق الجیشی نک
اساس قبولی بر کره مثبت بر هدف اوزرینه سوق ایدیلان
پولتیقه افکارینه ، ثانیاً شو مقصده واره ییلمک ایچون ایجاب
ایلیان قونک وجودینه ثالثاً دشمنه تفوق ایدلمش اولمسی حقنده کی
قناعت وجدانه تابعدر .

[*] ییانبجی برلساندن اودونج آلنان شو تعبیری بز اولدینی کبی
قبول ایدیورز . آلمانجه ده کی قرشولغنه کوره تبیر مذکور دها کنیش
بر معنای افاده ایدر . کرچک تعرض دنیلدیکی زمان اوپله یالکز
باشنه پاییلور بر تعرض حرکتی آکلاشلش اولمز . بالعکس ، دشمن
قوللرینی محو ایتک اوزره پاییلان حرکتک هپسی برلکده آکلاشیلور .
نته کیم مدافعه دنیلدیکی زمان ینه بوبله دشمنه قرشو طور مق ایچون
پاییلان حرکتک یالکز بر پارچه سی دکل ، بلکه هپسی آکلاشلش اولور .
فرانسزجه ده شو ایکی فکری دها کوزل بر بولده آیر مق ممکندر .
یعنی تعرض ومدافعه تعبیرلری فرانسزجه ده ، حرکات عمومیه نک هپسنه .
هجوم ومقابله تعبیرلری ایسه آنلرک برر پارچه سنه دینور .

بودیدیمکز اوج شرطك وجودی آ کلاشدینی کبی باش
 قوماندان ویا اردونك سرداری اولان ذات ، کچ قالمقسنزین
 وعکس بر حال ظهور ایتمه دن اول، کندیسنجه فائده لی کوریلان
 هر شیدن استفاده یه چالیشه جقدر .

اوله ایسه تعرض سوق الجیشی نك عناصر حیاتیه سی
 حرکتیه قابلیت ، سرعت و باصقبن دنیلان شیلردن عبارت
 اولور . بر آ ز اول سوبیلیمش ایدككه، تعرض سوق الجیشی نك
 هنفی خصمك اردوی اصلیمسیدر . بوندن طولانی حرکات
 عسکرینه نك ایلک زمانلری ایچون یاییله جق پروغرام خصم
 اردوسنك طوتدینی یرده آنسزین بر یولده ظهور ایتك خصوص-
 صنه شامل اوله جقدر . زیرا بودرلو یاییلورسه، هم بر آن اول
 دشمن اردوسنه بتیشمك ، هم ده آن بزجه اك کوزل واک
 مناسب شرطلر ایچنده بر محاربه یی قبوله مجبور ایتك قابلدور .
 اوله ایسه ایلری یوریمك، دشمنه طوغری یر قزائمق حرب
 ایچون اك برنجی، اك لزوملی بر اصول اولدیفنسه فکر آ قناعت
 ایدرك بو صورتله ایش باشنه کچه جك اولان بر انسان بتون
 فعالیت ذهنیه سنی صرف ایتیه، بعض بیوک ودهشتلی قرارلر
 ویرمه یه حاصلی اوطوردینی یرده خصم اردوسنی بکلایانه کوره
 دها تدبیرلی طاورانه یه مجبوردر .

ایکی طرفدن هانکیسی اك چالیشقان، هانکیسی اك حیله باز

اولورسه اصولاً او طرف هاجمین طرفنی تشکیل ایده جکدر .
 بیوک مانوره لر ائناسنده بیله تعرض خصوصتک قطعات عسکریه
 قوماندانلری اوزرنده کوستردیکی تاثیری فرق ایتک پک اعلا
 نمکندر . شبه یوق که ، یالکز هجوم ایتک فکرینی طاشیمق سعادتی
 انساک طبیعتنده پک بارلاق بر تاثیر حصوله کتورد .

هاجمین طرفی کندی خصمنه قاوشمق و آتی بر آن اول
 تپه لک ایستر . آرزو و اراده سی مکمل اولان برکیمه بتون
 ذکاسنی ، بتون فعالیت ذهنیه سی صرف ایدر وشو ساییده
 آله جق ترتیباتک ایوسنی بولمیه موفق اولور . عین زمانده
 آنک ارتکاب ایده جکی خطا و قصورک برر برر آزالمیه یوز
 طوتار . زیرا بودرلو حرکت ایدن برانسان ، وارلمسی لازم کلان
 هدفی تمامیه کندی قرشوسنده کوردور و آدن صکره اولسه
 اولسه یالکز وسائط و بوللرک اتخابنده ر آز آلدامش اوله بیلور .
 تعرض سوق الجیشیده فعالیت و سرعت حرکت خاصه لری
 ایلرولمکده اولان قطعاتک بر آن اول طویل امتس اولمسی تسهیل
 ایدر . ایلری به توجیه ایدیلا یوریشلردن هم بریمی ، قطعات
 جسیمه عسکریه دها چابوق بر زمانده و بر نقطه یاننده برلشه جک
 صورتده بر استقامت آله بیله جک و بو حال ایسه ، کوچک جزء
 تام قوماندانلری هدف الحراکک کندی اوکلرنده ظهور ایتدیکنی
 کوردکجه دها زیاده قولایلنی موجب اوله جکدر . شبه یوق که ،

بوجزو تام قوماندانلرينك ال برلكيله حركتى آنجق دشمن موضع قرشوسنه كلديكى زمان كندى هدفلرني اوكرمه بيله جك اولان مدافعه جزء تام قوماندانلرينك كنه نسبه' ده قولاى وساده بريولده جريان ايدر .

حتى تعرض اصولك طبيعى ايجابندن اوله رق بتون قواى عسكريه نك تاليف حركاتى كر چكدن اينانلميه جق بر قولايلاق ايجنده ظهوره كله جك وبو حال بتون فلسفه سوق الجيشينك اساسى، قابل اولديغى درجه ده بيوك قوتلرله ايستيلان بر نقطه ده كورونمك لازم كلديكى زمان بسبتون بشفه بر اهميت، بشقه بر قيمت آلمش بولنه جقدر .

برده اكر بر نقطه اوزرنده بيله تعرضك موفقيت حاصل ايتنديكى كوريلورسه ، اكثريا تعرض طرفك بسبتون غلبه ايتمش اولمى كى حالار وقوعه كله جكدر .

حقيقت ! خصمك طوتديغى موضعلرك هپسى برلكده بر جسم عضوى تشكيل ايده جكندن طولاي، آنك مثلا يالماكز بر بارچه سنك محو بوپريشان اولمى اوتكى يارچه لرك بربريله اولان تماس وارتباطنى ده بوزمهيه كفايت ايده جكدر .

بونقطه نظردن هاجمين طرفك ديكر برواسطهيه مراجعت يعنى باصقين اصوليله حركت ايده جكنى ده سويلملى يز . چونكه باصقين هجوملرى ، قطعى مصادمه لرك ياييله جنى نقطه ني ميدانه

چيقارلر . شه سزا مدافعه جهتي بتون احتالاري ، بتون شرطلري نظر دفته آلاجه سويلديكمز نقطه نك هانكي نقطه اوله جغني كشف ايده بيله جك اقتداره مالك اولور . بونكه برابر اكثري زمانلر، ايشك نفرعائنده برچوق خطالره دوشولديكي ده كوريله جكدور . بونك ايچون احوالك طبيعت عموميه سي بيله هجوم حقنده انتخاب ايديله جك نقطه اوزرنده مدافعين جهتي ، هجوم قوللريني كيرويه بوسه كورته ميه جك قدر هنوز تداركاتي اكال ايمه مش برصورتده يقالامق ايچون هاجمين طرفته ايجه اميدلر ويرمه كمه مساعد اوله جقدر .

كرچه اهميتلري بك آشكار اولان سوق الجيش حركاني باشه چيقارمق ايچون ايجه زمانه احتياج وار؛ وبوندن طولايي مدافعه جهتي هر فصله يامش اولديني قصورلري تصحيح ايده بيلورسه ده تعرض سوق الجيشي ياپان طرف كبي آنك ده بيوك بيوك مسافهلر قطع ايمه لزوم كوره جكني اونوتماملي بز. آنك ايچون ديه بيلورزكه: تعرض سوق الجيشي حركاني نه قدر چوق زمانه محتاج اولورسه اولسون ، مدافعه جهتنك اوزماندن بالاسه تفاده اولجه ياپيلان قصورلري تعمير و تصحيح ايلمك خصوصنده كوره جكي ايشلر اكثريا محدود و بلكه عقيم بر حالده [قاله جقدر . مثلا اكر بو ديديكمز مدافعه جهتي ايلك زمانلرده يعني قوتلريني طوبلاديني صروده ياكلش بر كيدش طوتمش

ایسه، بوخصوصده یاپیلان خطائی بک زور تعمیر ایده بیه جکدر.
زیرا سلاح اوموزه ایتیش اولان قطعیات جسمیه عسکریه
دامه تخته سنده کی آچازلر کی عین سهوات ایله بر یردن بشقه
بریره نقل اولنه مزلر .

تعرضک الک بیوک فائده لرندن بری و بلکه باشلیجه سی اردونک
هر زمان، تبدیل مکان ایتیش اوله بیلمسیدر . بتون مناقشه لره ،
مؤاخذه لره قرشو بودیدیکمز تبدیل مکان خصوصی حد ذاتنده
بک ایو و کوزل برشیدر . تعرضک ایجاب ایتدیردیک تبدیل
مکان مسئله سی قطعیات عسکریه نک مادی ، معنوی هر حالنده
کوزل کوزل تأثیرلر کوسترر . بر باقیمه ، شو دیدیکمزک
ایکنجه درجه بر اهمیتی حائز اولدینی ظن ایدیلور . لیکن بعض
حالارده ییقلمش بوزلمش بر اردویه جان ویرمک لازم کلدیکی
زمان الک چوق خصوص مذکورک اجرای تأثر ایده جکی
دوش و نلدکجه حائز اولدینی اهمیتک قانجهی درجه لک بر اهمیت
اولدینی کندی کندیینه میدانه چیقار .

شو دیدیکمز به بتون ایناتق ایچون یالکز بر موضع
مستحکم اوکنده ایجه بر زمان قالمش و صکره زمرد کی چایلر
وزنکین ترلارلی حاوی صحرالره طوغری تکرار یورویشه
باشلامش اولان بر اردونک حالی دوش و نلک یتیشور . بومثال
(میچ) قصبه سنی برقاج آی آبلوقه ایتدکن صکره، یورویشلرنده

سربست قالان آلمانلرک باشندن نمايله کچميش ایدی .

خلاصه ، بزم فکریمزه کوره ، تعرضک هیئت عمومیه سی فائده دن بشقه بر شیئی جامع دکدر . لکن تعرض ایچون بک زیاده عسکر لازم کلدیکفی ده اصلا اونونماملی بز . چونکه آنک طبیعت اساسیه سی ، ممکن اوله بیلدیکی نسبتده چوق عسکر قوللانمقدن عبارتدر . شو حاله کوره ، مادام که ، تعرضک طبیعت اساسیه سی بر چوق عسکرک مطلق استعمال ایدلمش اولمسنی ایستور؛ اوله ایسه دیه بیلورزکه ، آنک حاصل ایده جکی محاربه ، دیدیکمز عسکرلری نه درجه یورار و قیارسه یورویشلرده عین حالی اجرا ایدرلر . حتی بر حرب ائناسنده یورویشلرک حصوله کتوردیکی ضایعات محاربه لرک ویردیکی تلفاتدن زیاده در . یولده هیچ بر وجه ایله توقف اتمیه رک دوامی قابل اولمسنه کوره تعرض ، هدف الحركاته ایریشنجهیه قدر بر دوزییه تزاید ایلیان بر حرکت اولدینی ایچون قطعات عسکریه نک طوبلانمسی ، نازه عسکرلرک کتورلمه سی و هر شیئک بر انتظامه صوقلمه سی خصوصنده لازم کلان زمانلر بولمیه جقدر . نته کیم ، انضباط عسکریمی حیرتله شایان بر حالده ایکن ، پروسیا خاصه قولی (سن پرپوا) ایله (سدان) میدان محاربه لری آره سنده یاپدینی بر قاچ کونلک یورویش ائناسنده بووجه ایله (۶:۵) بیک کیشی غائب اتمش ایدی .

قاعدهٔ عمومی صرہ سنده سویانہ بیلورکھ : ہاجین طرفنک قطع ایلدیکی اراضی بردشمن مملکتیدر . بونک ایچون تعرض اردوسی ہر زمان بر امنیت قطعہ ایچندہ یوریتمکہ مجبوریت واردر [*] . بوندن طولای ایسہ ایلریدہ ویریلہ جک قطعی محالہ بہلرہ اشتراکی ممکن اولہ میہ جق صورتدہ بعض قطعات عسکر یہ نیک کیورلردہ بر اقلہ می لازم کلہ جکدر .

یالکز بوقدر اولسہ ینہ باس یوق ! لیکن بوندن بسقہ اکثری زمانلردہ اردونک بتون اعاشہ وادارہ سنی تأمین ایلان نقایہ خطارینی ومواصلہ یولارینی دہ قورومق لزومی آشکار اولہ جقدر .

شہہ یوق کہ . بو تعرض اردوسی ، ایلرولدیجہ بتون مالزمہٴ سفر یہ سنی یتیشدیرن وطن اوجاغندن اوزاق دوشمش اولور . مدینتیری پک ایلریہ وارمش ، بر نیجہ یولار وشمندو فرلرلہ طونانلمش اولان مملکتلردہ اردونک احتیاجات سفر یہ سنی بر دوزیہ یتیشدیرمک خصوصی بر درجہ

[*] کرچہ تعرض اولنان خصم طوراغندہ اہالینک بعضیی استیلا طرفنک منسوب اولدینی ملت افرادندن یعنی برجنسندن ایسہ او زمان بو مجبوریت ایچہ بر درجہ قدر آزالمش بولنور . لیکن خصوص مذکور بر حال استثنائیدن ، بر تصادفدن بشقہ برشی دکدر . آنک ایچون تعرضک طبیعت اساسیہ سنہ اولان تأثیری ہم بر تأثیر اولہ من .

قدر کسب سهولت ایدر. لکن شمندوفرلر نه قدر چوق اولورسه اولسون، ینه حرکات عسکر به ده کی قولایلغه مقابل آنلرک تعرض حقنده بشقه درلو برتائیرلری دها واردر.

حقیقت! انسان کندی مملکتینده کی شمندوفرلری ایشلتدیکی کبی دشمن طور اغانده کی شمندوفرلری ده عین سهولت وامنیت ایله ایشلتمش اوله مز. بوندن بشقه، استیلا اردوسنک کیرولرده براقش اوله جنی مفرزه لری آنک آرقه سندن سوق ایتمش اوله بیلیمک ایچونده بوسو ویلدی کمز تیمور یولارندن حقیله فائده کوریه مز. حال بوکه، رجعت ایتمکده اولان براردو، کیرولرده براقش اولدینی مفرزه لری رجعت ایدرکن برربرر طویلایه رق اووجه ایله کیده جکی یره کیده بیلور.

اهمیتیمز نظریله باقیله میان بعض مواقع مستحکمه نك محاسبه صرملری ایچونده ایجه قوت صرف ایتمک لازم کله جکدر. طبیعت انسانیه ده سعی متمادی اولماق انسانلق ایجاباتندندر. بونک ایچون برایشه باشلاقدن صکره انسان یواش یواش کیوشمه یه یوز طوتار. فقط ینه کیوشمکده اولدینی آکلایه مز. علی الخصوص طوتیلان ایش اولدجه کوزل بر یولده جریان ایدیورسه، فنا بر یولده جریان ایتمش اولمسنه کوره طبیعت انسانیه دها بیوک برکیوشکلک ایچنده قیرلمیه باشلار. چونکه انسان اکثریا قزاندیغه مغرور اولور. مغرور اولدجه ایسه

غائب ایدر . والحاصل بر تعرض لایسقطع ایلرولیوب کیده جک اولورسه شو حال دیگر حکومتلرک کبر وحسدلرینی جلب ایده جک ، اورته لقمه یکیدن یکی به غائله لر باش کوستره جک و بوندن اوتری پولتیقه نك وضعیت عمومیه سی هاجین ایچون غیر مساعد بر حاله کله جکدر [۴] .

على الخصوص حکومتلردن بریسی قوت ایله ، سـلاح ایله میـدانه چیقهرق اووجه ایله حرکتیه باشـلامش اولورسه ، سوبلدیکمز وضعیت بسبتون فنا برشـکله کیرمش بولنه جقدر . احتمالکه هاجین طرفی کندیسنی بر نقطه یه قدر حمایه ایتک ایستیان فقط کندی ضرر وزیانلرینه اوله رق آنک بسبتون کسب قوت ایتسنه راضی اولمیان متفق حکومتلردن بعضیلرینی الدن چیقارمق تهـلاکـسنه بیله دوشمش اوله جقدر .

تعرض سوق الجیشینک دیگر مهم برخاصه سی دهـا وارکه ، اوده خصم اردوسیله یوز یوزه کلان ومحاربه لر ویرمکه مشغول اولان باش طرف یاخود برنجی خط اردوسی ، حال سـفـری یه کیرن قطعات جسمیه یه نسبه اولدجه آز بر قوتدن واکثریا

[۴] قریم سفرنده آوسـتـریا حکومتنک تحریکاتی ، صوک عثمانلی ، روس حربنده انکاتره نك حرکاتی مسلح اولدقلری حالده بیله بر سفرنده بعض حکومتلرک یاپه جقلری مداخله نك هاجین اوزرنده نصل بر تاثیر کوستره جکینی پک اعلا اثبات ایدیور .

مذکور قطعانك درنده بر، بعضاًده يالكز سكزده برندن عبارت
 قالدينى ايجون بتون قوه سفرينهك طالعى باش طرفدهكى قطعانك
 مظفريت ويا مغلوبيتلرينه كوره يارلاق ويا سونوك بر حالده
 ظهور ايدهجكى طيعيدر . تعرضه كچن اردولر، ايلك بهارده
 يكي دوشمش قارلر نصل اريورسه ، اونلرده اويلهجه ارير،
 كيدرلر .

(۱۸۱۲) سفرنده بوناپارط (نيهمن) صوينى (۴۴۲) بيك
 كشيلك بر اردو ايله كچمش ايدى . لکن اوج آي صكره
 (موسقووه) يه كلديكى زمان مشارالېك الى آلتندهكى اردونك
 يكوئى يالكز (۹۵) بيك كيشيدن عبارت بوانيووردى . شو حاله
 نظراً فرانسه اردوسنك شده بريسى قالمش ايدى ديمك اولور .
 شو شده برقولك ، انسانى رجعتده بسبتون محو وپريشان
 اوله درجهسنه كلمهسى ايسه . بتون موسقووه سفرينك غائب
 ايدلمسنى واك صكره بوناپارط نامنك تاريخده اشغال ايلديكى
 قانلى وشانلى صحيفه لرك برر ، ايكيشر يرتلمسنى موجب اولمش
 ايدى !

(۱۸۱۰) تاريخنده اسپانيا سفرينك جارى اولدينى شرائط
 واحوال عموميه به كنجه سفر مذكورك بوسويلايكميزدن زياده
 عبرت ويرهك برمثال تشكيل ايلديكى تصديقه مجبورز .
 ايلك بهارده جيچكلر ير يوزينه رونق ويرمكه باشالاديني

زمان چيچك گهي (۴۰۰) بيك فرانسز عسكري (پبره نه)
 سلسله سنی آشهرق اسپانيا صحرالرينه برر برر دو كيلوردی .
 بوديديكمز عسکرلر ، بردقيقه بيله ايلرو کيتمه دن کيرو طور -
 مديلر . برخيلي ظفرلر ، موفقيتلر قزانديلر . لکن اک صکره
 ماره شال (ماسه نا) بتون سفرك برنتيجه قطعيه ويرمش اوله جني
 يره يعنی (ليزبون) جـسـوارنده کی (طوره س ودراس) خطوط
 استحکاميه سی اوکنه يالکز (۴۵) بيك کيشيلک بر اردو ايله
 کله بيلمش ایدی . نه فائده سی وارکه ، فرانسز اردوسنک بودرجه
 ضعيف دوشمسی نتيجه قطعيه نک ظهورينه مانع اوله رق کوزل
 بر موفقيت ايله نهايته ايرمسی پک زياده محتمل اولان بيوک بر
 حربک الدن چيقمسنه ياردم ايتمش ایدی . بونک اوزرينه سفرك
 باشليجه نتيجه سی طبيعي برنتيجه ديمک اولان رجعت حرکته
 منجر اولمش واو آندن اعتباراً بخت سيماه ، اسپانيا شبه جزيره -
 سنده کی فرانسز عسکرلرينه قرشو اکشی بريوز کوستره رک
 آنلری فرانسه ايجرولرينه قدر سوروب کوتورمشد .

(۱۸۲۹) سنه سی ايلک بهارنده ماره شال (ديهه بيچ)
 روسيه حکومتک بالقان شبه جزيره سی فتوحانی ايجون کنديسنه
 ويرمش اولدینی (۱۶۰) بيك کشيلک بر اردويه قوماندا ايدبور -
 دی . حال بوکه مشاراليه (ادرنه) قرشوسنه کلديکی زمان الی
 آلتنده يالکز (۲۰) بيك کشيدن عبارت برقوت بولنيوردی .

شمېدی اکر بوروس قوماندانی برآز دها یوړوېشنه دوام ایتمش
اولېدی، مولټکهکڼک حسابلرینه کوره، چتالجه اوکڼه
آنجق (۱۰) بیک کیشیلک بر قوت ایله کلمش اوله بيله جکدی.
اوت! مشارائیک او آنده عقد صلح ایچون صرف
ایلدیکی مهارت سیاحیه سی مولټکهکڼک دوشونديکی یوله عظیم
بر فلاکتک باش کوسترمسنه مانع اولمشدی. (۱۸۷۸) ده کی
سفرینه، عین وجهه ایله جریان ایلمش ایدی. کرچک
طونه یی آنلامش اولان (۴۶۰) بیک کیشیلک بر اردودن
یالکز (۱۰۰) بیک کیشیلک بر قوت چتالجه اوکڼه
کله بيلمش ایدی. حال بوکه، شو دیدیکمز قوتک یاریسی اولدجه
فنا برخسته لغه طوتلمش اولان خسته نفرلردن ترکب ایدردی.
آلمانلر بيله، (۱۸۷۰) ده فرانسه حدودینی کچمش اولدقلری
زمان (۳۷۲) بیک کیشیلک بیوک بر اردویه مالک ایکن، یالکز
بر یحق آی سورمش اولان بر سفردن صکره آنجق (۱۷۱)
بیک کیشیدن عبارت بر قوت ایله پارس اوکلرینه کله بيلمشلر.
دی. کرچه بوسفرده آلمانلرک بوش یره صرف ایتمش اولدقلری
زمان وقوت پک جزئی برشی ایدی. بونکله برابر کیرویه قالان
قوت مؤخرآ بر هزیمته اوغرامش اولسه ایدی او زمان ینه
ایشلر بسبتون بشقه بر صورت، بشقه بررنک آلمش اوله جقدی.
تعرض سوق الجیشیده کوریلان شو تناقص کیفیتنی اجتنابی

غير ممکن بر حادثه يرينه قويغه البت حقمن واردر . بونك
 ايجون بر حرب تعرضيده وباخصوص تعرض اردوسنك تعقيب
 ايده چكي مسافه بيوك اولورسه، ديديكمن حادثه نك نظر دقته
 آلمسي قطعياً ايجاب ايلمكده در . بو محذوري قالديرمق ايجون،
 بر چاره وارسه، اوده باش طرفده حركت ايدن اردويني بلا
 فاصله احتياط عسكرلريله تعقيب ايتديرم بيلمك خصوصنده كرك
 سوق الجيش و كرك اداره ملكه نقطه نظرندن يابلمسي لازم
 كلان هر درلو ترتيباتي ياقدر . قلاووزويچك سوزينه كوره
 ديديكمن احتياط عسكرلري باشده كي اردونك كيرو طرفنده
 بولنان بولك اوزرنده هر زمان موجود اوله جق صورتده سوق
 ايدلمليدر .

اكر شو خصوصاً نظر دقته آنور وهيج خاطر دن
 چيقارلمز لسه هر درلو تعرض پلانك سوق و اداره سي ايجون
 لازم كلان امين براس الحركات الده ايتك ممكن اوله جفته قناعت
 كتور مليدر . قوللانيلان وسائط، اك صكره كي هدف، يعنى، بر
 مصالحه عتد ايتك مسئله سنى تأمين ايده جك درجه ده قوتلى
 اولميجه اك عالمانه واك بابا يكيته سنه يانيلان تعرض سوق الجيشي
 نهايت برهزيمته اوغراق تهلكه سنه دوشه جكدرد . بو حادثه اك
 چوق بيوك قوماندانلرك و از جمله (آنيبال) دن اون ايكنجي
 (شارل) و برنجى ناپوليونه قدر كلوب كچي بيوك جنراللر

طالبان نښات ایتځکه در. حقیقت! شوا سملرځی سویل ټیګمز قوماندانلر ایله آره یرده کچنلرک بلکه هډی، یوقاریده کی مسئله اوزرینه برچوق خطالره دوشدنکری ایچون الک صکره کنډیلری ده او خطالر، او قصورلر سائقه سیله کرچندن پک دهشتلی فورتنه لره او غرامش لردر. کرچه او مزیتده جنرالنرک هر بریسی بردهای عسکریدر. لکن اویله بردهاکه، دوشوندنکریفی کاملاً میدانه قومق ایچون وسائط فعلیه لری مطلق درجه کفایه ده اولماق اونلرک شانیه متناسب دوشن بر خاصه طبیعیه در. بوندن طولایی، بر زمان کلورکه، آنلر صوک بر مغلوبیت آجیسیله اولجه قزانش اولدقلری پارلاق سفرلری، بیوک بیوک فتوحاتی برآنده غائب ایدرک برآنده محو وپریشان اولورلر.

اگر بر تعرضک صوک زمانه کلنجیه قدر نه صورتله ایلرو- لیدیکی ایودن ایویه برکوزدن کچورر ایسهک، اولجه مدافعین جهته بیوک برتفوقی حائز اولان اصول مذکورک، بر نقطه یه، نقطه غایه کلدیکی زمان بالعکس، مدافعه اردوسندن پک ضعیف برحالده قالدیغنی کوریرز. کرچک! تعرض جهتنک کرک قوت وکرک شدتجه، ضعیف دوشمه سی، تعرض و مدافعه اردولربنک صوک چارپیشه جقلری بریر دیمک اولان شو نقطه غایه ده کوچ حال ایله تأمین ظفر و موفقیته کفایت ایتسه بیله آندن صکره

مذکور تعرض اردوسندن بشقه هیچ بر مظفریت بکلمه یه حقمرز اولیه جقدر .

تعرض اردوسنك سرداری اولان ذات، نقطه غایه یه کلندیکی زمانی طوغری وکوزل تقدیر ایدرك آندن مستفید اوله جق صورتده آچیق کوز و آچیق فکری بر آدم اولمیدر . مثلاً روس اردوسی باش قوماندانی (دیه بیج) عقد صالح ایتدرمک ویا تعرضدن کوزل بر مدافعه یه کچه بيلمک خصوصنده لازم کلان فاصله یی قزانق ایچون ، تعقیب ایلدیکی سفردده نقطه غایه یه کلدیکی زمانی بالتقدیر خصم طرفنی مصالحه یه جلب ایدنجه یه قدر آندن حقیله استفاده ایلمش ایدی .


اگر تعرض اردوسی پك آز بروقت ایچنده، یعنی کندیمی ایچون استدیکی کبی بر مصالحه ترتینه کافی اوله جق درجه ده کوزل نتیجه لر استحصال ایتزدن اول نقطه غایه یه وارمش بولنورسه ، شو حالدن او قدر فنا بر عکس ضربه حصوله کله . جکدرکه ، آنک تعرض اردوسی اوزرنده کوستره جکی تأثیر عظیمی بر مدافعه حربنده دهشتلی بر هزیمت بیله کوسترمش اوله میه جقدر .

لکن تعرض ، یالکز باشده کی اردوبی لاینقطع تزید ایده . جک صورتده وسائط وقوای موجوده طلب ایتمکه اکتفا

ایتمز، بالعکس تعرض اردوسنك بعض خصوصى مزىائی ده بولمق لازم كلور .

بك چوبك ومتحرك اولمق خاصه سى ، بر تعرض حربنك باشلیجه عنصرلرندن بریسی بولندیغندن ، شبهه سز قطعات عسكریه نك حد ذاتنده متحرك واستعماله الوری شلی اولملری ایجاب ایده جکدر . بوسویدلیکمز مزیتلر ایسه، آنجق تعلیم و تربیه عسکریه سى یولنده جربن ایتش اولان بر اردوده بولابه بیله جکدر. تعرضی بر سفرده اردونك بعض مختلف اقسامی اکثریا کندیلک لرنندن حرکت ایتکه لزوم کوره جکلردر . بو حاله نظراً مذکور اردوده بر خیلی تجربه کورمش قوماندانلرک، بر خیلی تربیه لی ضابطلرک وجودی شرطدر . تعرضی سفرلر، قطعات عسکریه اوزرنده بعضاً اودرجه بیوک محذورلر حصوله کتوردرلرکه، بولرله یالکز انضباط عسکریسی یولنده اولان قطعات عسکریه جواب ویره جک و مقابله ایده بیله جکلردر . کنجلر و عجمیلردن مرکب اردولر ایله باشلانمش اولان بر تعرض سوق الجیشی ، دشمن عسکری اولردن فنا اولدقچه، مظفریت قزاقق احتمالندن بك اوزاق بولنه جقدر . مایس اردولرینه کلنجه آنلرک تعرضی بر سفرله بلکه هیچ بر مناسبتلری اوله مز. چونکه یالکز برایلری یوروش حرکتی ، آنلری تپه دن طرنا- غه قدر یعنی بسبتون محو و پریشان ایتکه بك اعلا کفایت

ایده جکدر . بونک ایچون هر تعرض سوق الجیشینک تمل طاشی
مکمل و متعدد اردولره مالک اولماقدن عبارت بولنه جقدر .



۲ — تعرض تعبیه وی

تعرض تعبیه ویده قطعات عسکریه نك طبیعت و عددجه
اولان اهمیتلری تعرض سوق الجیشیده کی اهمیتلرندن بشقه درلو
اولدینی ایچون بوراده وضعیت عمومیه نك ده فرقلی اولمسی پك
طبیعیدر . استحقاکلرک ، بعض مهم کچیدلرک ، بوغازلرک ،
کوپریلرک ، مدافعه حالنه قونلمش موضملرک ضبط واشغاللی
تعرض تعبیه ویده کی قطعات عسکریه نك باشلیجه وظیفه لریدر .
آنک ایچون مذکور قطعه - انک اوصاف جمیله یه مالک اولملری
مطلق لازمدر . چونکه اطوار و اوصافی اورته حاللی و یاخود
پك آشغی بولنان قطعات عسکریه نك اوکی ایشلری باشه
جیقارمش اولملری ممکنسزدر .

دشمن آشنک حصوله کتوردیکی دهشتلی تاثیرلره قولاق
وبرمیه رک ایلری یه طوغری یوریمکدن اصلا چکنمیان ، اوصاف
واخلاقی یولنده اولان یالکز بر طابور ، خصم طرفندن شدتله
مدافعه ایدیلان طار بر کوپری نی ضبط ایتمک ایچون پك اعلا

کفایت ایده بیلور . حال بوکه ، تعلیم و تربیه سی هیچ حکمنده اولان دیگر اون طابور دیدیکمز کوپریه قرشو هیچ برایش کوره میه جکله و کورسه لر ، بیه نتیجه سز برایش کوره جکله امثالیه مسبق بر حقیقتدر . کرچک (لیرمن) میدان محاربه سی بزم ایچون شو خصوصده ایسه تدیکمز دن چوق مثاللر ویرمه مقتدردر . جنرال (ورددر) ک پک اوزون اولان محاربه خطی تعلیم و تربیه سی یولنده قطعات عسکره دن مرکب (۴۰) بیک کیشیلک بر جمعیت ایله بلکه مغلوب ایتدیرلمش اوله جقدی . حال بوکه ، تعلیم و تربیه سی کیوشک اخلاق و اطوار عسکریه سی اورته بر درجده ده بولنان (۱۲۰) بیک کیشیلک قوجه بر یغین عسکر اوراده هیچ بر نتیجه استحصاال ایده مه مش ، هیچ برایش کوره مه مش ایدی [*] .

[*] بز بونکله جنرال (ورددر) ک طومش اولدینی موضعی مؤاخذه ایتک ایستیمورز . بالعکس مشارالیهک انتخاب ایلدیکی موضع فن حربک بعض قواعدینه موافق اولماقله برابر وضعیت حاضره ایله پک زیاده متناسب بر موضع ایدی . فی الحقیقه جنرال (ورددر) ک طوتدینی موضعه بعض خطالر وار ایدی . از جمله (۳۰) کیلومتره ک ، بر جهه (۴۲) بیک کیشیدن مرکب براردو ایچون پک بیوک بر جهه صاییلور . لکن جنرال (ورددر) کندی قرشو سنده کی دشمنی پک اعلاطانیوردی . واکر بو دشمنک بعض چویرمه حرکتلر یاپه ییلکده کی اقتدارینی رفع ایتش اولسیدی ، کندیسنک عددجه اولان تفوق عظیمدن هیچ بر فائده کوره میه جکنی ده پک اعلا بیلوردی . بالعکس طوتیلان خطک هر نقطه سنده پک او قدر قوللانیلی

صورت عمومیه ده بر تعرض تعبیه وی حرکتی ایچون ،
 تعرض سوق الجیشیده اولدینی کبی ینه عددجه دشمنه فائق
 بولمق لازم کله جکدر . میدان محاربه ده کی قوه عمومیه به نظراً
 کرچه بوتفوق عددی خصوصی، دائماً لزومی برشی دکلسه ده
 نتیجه قطعیه استحصال ایدیله جک یرلرده شرط مذکورک بهمه
 حال بولمنسی ایجاب ایلر .

تعرض سوق الجیشی ایچون سوبلمش اولدیغمزی بوراده
 ینه تکرار ایده جکز . یعنی سرعت حرکت ، انتظام و ارتباط
 عسکری کبی شیر قطعی محاربه نک وقوعه کله جکی نقطه اوزرنده
 قطعاًک بر آن اول طوبالانش اولمنسی تسهیل ایدرلر .

بونک ایچون تعرض تعبیه وی محاربه لری ده قطعات عسکریه
 قوماندانلرینک بتون قوای ذهنیه لرینی اورته یه قویهرق کمال
 سربستی ایله حرکت ایلملرینه مساعد محاربه لردر .
 حقیقت! تعرض تعبیه ویده مذکور قوماندانلر، کندی

اولیان خصم قطعاتی طوردرمق ایچون نسبتاً ضعیف بر مقاومت
 کوسـترمک مسئله نک حلنه کفایت ایلدیکندن طولانی (وردر) ک
 انتخابی دیدیکمز کبی پک اعلا انتخاب ایدی . پرنس (فردریق شارل)
 (اورلئان) محاربه سندن مقدم، (لووار) اردوسنه قرشوینه عیناً بویله جه
 حرکت ایتش ایدی . بو ایکی مثال فن حربک هر قاعده سنی تطبیق
 ایلک عملیاتنده خصم قطعاًک احوال و اوصاف عمومیه سنی نظر دفته
 آلمده کی فائده بی کوسـترر .

ماهیت عسکریه لرینی کوسترمک، اقران و امثال بیننده تمیز ایلیمک خصوصیلرنده بر چوق فرصتله نائل اوله جقلردر . قطعات عسکریه اوزرنده اولان تاثیرینه کلنجه، تعرض تعبیه وی، بولرده ده خصم قوتلرینه تفوق حسسیاتی او باندیره رق بر آن اول تهلیکه محللارینه کیتملرینه چوق یاردم ایده جکدر . کرچک، اک صوک عسکره وارنجهیه قدر نفرلردن هر بریسی، کندی قوماندانلرینک دشمن اوزرینه هجومه قرار ویرمش اولسی خصوصنک قیمت و عددجه دشمنه فائق اولملرندن ایلری کلدیکنه اینانور و آئی اولیه بیلور .

تعرض تعبیه وی، مقصد عمومی بی، تعرض سوق الجیشیدن دها آچیق برلسان ایله کوستر .

تعرض تعبیه ویده، هر کس مقصد و هدفی کورور . بو حال ایسه محاربه یرلرنده بعض قطعاتک یا کلش یولاره صابهرق هدفدن اوزاق دوشمک تهلیکه سنی پک زیاده آزالتیور .

تعرض تعبیه ویده باصقین حرکیتی، تعرض سوق الجیشیده اولمادیغندن زیاده مهم و پک شدتلی بر حرکتدر . زیرا دشمن بوراده، اولجه یامش اولدینی خطالری تصحیح ایتک ایچون مدافعه سوق الجیشیده کی کبی برچوق زماه مالک دکدر .

تعرض تعبیه ویده ینه مختلف یرلردن دشمن موضعه یا قلاشمق، آلمک یا لکز بر جناحنی و یا خود ایکسی بردن چویر-

مك، مدافعه طرفك بردن بره خط رجعتی اوزرینه دوشمك و بونك كبی سائر بمض شیلر كمال سربستی ایله یاپیله بیلورلر .

تعرض تعبیه وینك الك مهمم واك جدی فائده لرندن بریسیده، حرکات عمومیه نك الك صكره بر نقطه اوزرینه طویلانیسنی، آتشلرك ینه یالکز او نقطه اطرافه برلشمسنى تأمین ایلمكدن عبارتدر . سلا حارك وعلى الخصوص شمديكى طويلرك بيوك منزلارى، هجوم قطعى یا اشتراك ایتیهرك یعنی هجوم قوللرینك حتى اىجه اوزاق برمه سافه كیروسنده طوران بعض قطعانك ایده- جكلى آتش سایه سنده محاربه نك قزانامسینه پك چوق یاردم ایده بیللملرینه مساعددر . والحاصل تعرض تعبیه وى، محاربه قطعیه ویرلك الك زیاده مناسب اولان یرلری، الك ایو نقطه لری انتخاب ایتك فائده سنى ده حاویدر. بوندن طولانی انتخاب ایدیلان شو نقطه اوزرنده بر موفقیت قطعیه است-تحصال اولنه جنى وقت ینه تعرض سوق الجیشیدن زیاده تعرض تعبیه وینك مظفریتى ده چوق تأمین ایدلمش صاییلور .

مدافعه سوق الجیشیده قالان طرف ایچون ینه بویله در . یعنی مدافعه تعبیه ویده، مدافینك وضعیتی اولیه بر جسم تشکیل ایدرکه، آلك اعضاسندن بریسی قیرلدىنى آنده مغلوبیت آجیلری هریره سیرایت ایدر و جسم مذکور یواش یواش بوزلمغه یوز طونار . فى الحقیقه، یالکز بر جناحك هزیمتى، تعرض قطعانك

اورایه هجوم و مظفریتتری، دیدیکمز مدافعه تعبیه وی مصادمه- سنک اکثریا، بسبتون محو و پریشان اولمسنه دلالت ایدر . اوندن بشقه، مدافعه قطعانی، اشغال ایتدکاری موضعک یالکز درنده بر قسمی الدن چیقدینی بر زمانده بیله اکثریا رجعت ایتمک قالدشورلر. حال بوکه، هجوم قوللارینک درنده اوچی کیروییه پوسکورتلمش ایکن ، اک صکره بر تعرض تعبیه وینک یالکز درنده بر قوت ایله مظفریت قزانیدینی کورلمکده در .

(۱۸) آغستوس (۱۸۷۰) ده وقوعه کلان (غراولوت) و (سن پریوا) محاربه لرنده شو حال دیدیکمز کبی عینیه ظهور ایلمشدر . دشمنک محاربه خطی اوزرنده مصادمه وقوعه کلان بره طوغری اوزایوب کیدن یولی ، بوجرای طبیعی ، تعرض ایدن قوللارک همبریمی طرفندن کوریلور . آک ایچون تعرض محاربه لرنده بتون و سائطک ، بتون مساعینک بر آده اجرای تاثیر ایلملری هپ ایلرییه طوغری یورویشک نتیجه سیدر . حصوله کلان موفقیتک قوه معنویه اوزرنده کوستره جکی تاثیر ایسه ، دشمنک کوکسینه ایندیرلمکده اولان قانلی سونکیلرک، قیرلمش دیچیکلرک بسبتون قوت آلمسنه یاردم ایده جکدر .

بونجه کوزلاکلار یاننده تعرض تعبیه وینک ضعیف نقطه- لری یعنی بعض اوافق تفک محذورلری اولدیغنی انکار ایتک نه المزدن ونه دیلمزدن کلور . ایلك محذور ، ایلرییه طوغری

یاپیلان یورویش-شك بعض وقتلر ضعیف دوشمش اولمسه-ندن نشأت ایدیور. حقیقت! هجوم طرفی، دشمن خطنه کله دن اول، یورویش-دن طولایی حصوله کلان یورغینلق تأثیریه قوتلرندن بر قسمی غائب ایدر. اکرم هجوم ایدن قوه عسکریه ایجه اوزون ویورجی بر یورویش یابدقن صکره پک متین ومستحکم براراضیده خصم قطعاتنه راست ککش ایسه، بوضایعات خصوصی، اوزمان پک زیاده بیومک تهلاکه-سینه دوشر. خصوص مذکور، (۱۶) آغستوس (۱۸۷۰) ده (ایشوارچ قون) فرقه-سنده کی لوالردن برینک تمامیه باشندن کچمشدی. فی الحقیقه، دیدیکم تاریخده مذکور لوانک بر چوق عسکرلری یورغینلق سببیه دشمن قطعاتنه هیچ بر مقاومت کوستر مکمزین دشمن انه دوشوب خراب اولملردی.

تعرض تعبیه-وینک پک چوق ضعیف دوشمسی موجب اولان سببلردن بری ده ایلرویه طوغری یوریدکجه هجوم قطعا-تنک بلکه بسبتون آتش کسمکه مجبوریت کورملیدر.

حقیقت! هجوم قولاری ایجه برزمان دشمن عسکرلرینه آتش ایتیمکمزین آنلرک آتش-لرینه هدف اولق واو وجه ایله ایلری-یه کیتیمک مجبوریت-ده قالدورلر. اوندن بشقه تعرض قطعاتی، ایلری-یه طوغری یوریدکلری زمان راست کلدکلری اوافق تفک زمین عارضه-لرندن استفاده ایتمه-مکده اکثریا

مجبور در لر . اشته بوايكي سبب دشمن موضعنه صوقيلنجيه
 قدر هجوم قولارينك مدافعه ده كي عسكرلره نسبتاً بك چوق
 ضايعات ويرملريني موجب اولان اك باشليجه سبيلردندر .
 اكثرثيا تعرض طرفنك دشمن تلفاتيله بر موازنت حاصل ايد .
 بيلمسي آنجق مدافعه موضعنه صوقلمغه باشلاديني زمان وقوعه
 كله بيله جكدردر . في الحقيقه بو آندن اعتباراً ، هجوم طرفي رجعت
 ايتمهك يوز طوتمق اوزره بولسان مدافعين اينچنده كنديسـنـك
 اوغراديني ضايعـانـدن بك چوق زياده تلفات وقوعه كتورهـ .
 جكدردر .

تعرض تعبيه وي بي ضعيف دوشورن بر سبب دهـا واركه ،
 اوده اصول مذكورك زمان مسئله سنه بك چوق باغلي قالمسيدر .
 قاعده ، باشلانيلان بر تعرض محاربه سنك بر كونده باشه چيقارلمسي
 لازمدر . نتيجه سز وغير معين بر حالده قالان بر ميدان محاربهـ .
 سي ، كوش باتمق اوزره اولديني بر صره ده ، اكثرثيا مدافعين
 ايچون قزانلمش ، متعرضين ايچون بالـمـكـس غائب ايداش بر
 مصادمه يرينه كچر . اكر (غراولوت) ، (سن بريوا) ميدان
 محاربه سي بر قيش كوني اجرا ايدلمش اولسيدي ، اك بيوك
 احتمالره نظراً فرانسزلرك اوراده مظفر اولملري لازم كلهـ .
 جكددي . بك ار كندن باشلايان كيجه قراكلني (سن ماري) اوـ .
 شن (ضبط ايدلدكـدن صكره هجومك دوام ايدوب كيتمـسـنهـ .

مانع اوله جق و بوندن اوتري ماره شال (بازدن) تهلهکيه دوشن کندی جناحني، خاصه عسکرلريني کاملاً اورايه سوق ايدرک، ايستديکي کبي تقويه ايتمک ايچون ايستديکندن فضله زمانه مالک اولمش بولنه جقدي .

برچوق عسکري محررلري، تعرض طرفنک، مطلق حرکت ايتمک مجبوريتنده بولنسي وسيله ايدينه رک، مدافعين جهتندن زياده خطالره دوشمکه معروض قالدیغني و بوندن مدافعه طرفنک استفاده ايدميه جکني تعرض ايچون برمحذور کبي کوسه ترمک ايستيورلر . لکن ار محررلر، بوراده بر موازنت اولديغني کوره-ميورلر . زيرا تعرض جهتي ده، مدافعين طرفنک ابلک وضعيتده يامش اولديغني خطالردن استفاده ايدر و حتی بتون هجوم پلاقي احتمال که، مذکور خطالره کوره قورمغه چاليشور . باش قوماندانلغه ويا سردار اکر ملکه عائد اولان بتون مشاغلک بتون مساعينک اک باشليجه لردن بريسي، يالکز دشمن جهتنده ياپيلان خطالري، درعقب کورمک دکل، بالعمکس کورمکه برابر، درعقب آنلردن مستفيد اولمغه چالشمقدور . بوکا موفق اولمق ايچون بر شرط لازم : او ايسه، تعرض جهتنده ياپيله جق ترتيباتک پک عاقلانه بريولده ياپلمش وقوای عسکريه نك ينه اووجه ايله تقسيم ايدلمش اولمسي شرطيدر .

بر آز يوقا ريده سويلديکمز کبي، قطعات عسکريه دن بکلانلان

مساعی و اقدامات عظیمه تعرض ایچون هیچ بروقت ضعیف بر نقطه یعنی بر محذور تشکیل ایده من . یالکز حرکات عسکریده ذاتاً موجود اولان مشکلاتی بر درجه دها یوکسکتمش اولور . قطعات عسکرینهك حرکتیه صالح ویک الیریشلی اولمری، بیوک برتهلمککک قوه معنویهلری اوزرنده کوسترهجکی تأثیره مقاومت ایده بیلهجک برحاله بولملری شرط اعظمدر . اوندن بشقه بو قطعاتک باشلری اوجنده بیوک ، کوچک هر نوع رتبه دن بر چوق ضابطلر ، بر چوق تجربه لی قوماندانلرک بولمسی ده لازمدر .

شبهه یوقکه، بتون سوبلدکلریمزی برر، برر تطبیق واکمال ایتک ایچون وقت صلحهده یک چوق اوغراشمق ، یک چوق حاضرلق کورمک ایجاب ایلر. عددجه دشمنه تفوق ایدلسه بیله، کوزل تربیه کورمش ، کوزل یتشمش اردولره مالک اولدجه تعرض تعبیه وی، تعرض سوق الجیشیدن زیاده تهلمککله دوشمک استعدادینی حائزدر .

بونک ایچون، تعرضه کچمکه قرار ویرمزدن اول، تعرضده موفق اولمق ایچون هر نه لازم ایسه ، آنلری برر برر کوزدن کچورمک، برر برر طارتمق لازم کله جکدر . اگر دیدکلریمزک هیچ اولمزسه ، بیوک بر قسمی نظر دفته آلمیه جق اولورسه،

او زمان موفقیت استحصال ایتمکده پک زیاده مشکلات چکیله-
 جکنه اینانملیدر .

خلاصه، بر تعرض حرکتی باشه چیقارمق ایچون قوماندان
 اولان ذانک عسکرلر قرشوسه-نده کی وضعیتی، مدافعه ده قالمش
 اولسی حالته نظراً ، دها جدی ودها سرت اولق لازم کله-
 جکنی ده اونوتما ملی یز .

آلتنجی فصل

مدافعه

۱ — مدافعه سوق الجیشی

مدافعه سوق الجیشی تعبیرندن ، بر اردو اشغال ایلدیکی موضعلرده خصم عسکرینی و آنک هجوم حرکاتی کمال سکونت ایله بکلیه رک عطالت ایچنده قالمق کبی بر معنا چیقارلمسون ! شویله بر حال پک نادر و پک مستثنا زمانلرده وقوعه کله بیلور . و بودرلو یاپلدیغنه کوره ایسه ، مدافعین جهتی بلکه هیچ بر زمان ایستدیکی نتیجهیی استحصال ایده میه جکدر . هیئت عمومی سی نقطه نظرندن مدافعه سوق الجیشی اصلا بر حرکت سزلک ، بر عطالت محکوم دکدر .

مدافعه سوق الجیشی بر اصول حرکتدرکه ، مدافعین او سایه ده ، خصم اردوسی هر نزدن کلورسه کلسون ، اشغال ایلدیکی موضعده آنک حرکانی طوردرر و کربده بولنان سائر قطمانه ، مصادمه برینه کلنجهیه قدر ایجاب ایدن زمانی قزاندرمش اولور . تاریخ عسکریده بخاصم حکومتلردن اکثریا ضعیف اولان جهتک مدافعه سوق الجیشی اصولنده حرکت ایلدیکی

کوریلور . کرچک؛ اصول مذکورک خصوصی فائده لری یوقدر .
 لکن هیچ اولمزسه، مصادمه قطعیته نک کچ قالمسینه خدمت
 ایده بیلور .

ایکنجی برمدافعه سوق الجیشی اصولی وارکه، مدافعین شو
 اصوله نظراً، مهاجمین اوکندن چکیله، چکیله اکره مملکتک
 ایجروسینه قدر صوقیلور . بو درلو حرکت ایتمه نک، باشلیجه
 فائده سی بر چوق زمان قزاقق و او سابه ده خصم اردوسی
 مصادمه قطعی اولمزدن اول ، ظهور ایده جک اسباب طبعیه
 وسیاسیه تأثیرله ایجه پریشان برحاله کتورمکدر . مدافعین جهتی
 شو دیدیکمز کبی حرکت ایلدیکی زمان، اکثریا تعرض اردو-
 سندن دها قوتلی برحاله کیره بیلور . چونکه دائماً کندی مملکتته،
 کندی منابع ثروتنه طوغری چکیلور . واوندن بشقه، ایلک
 دورلرده حاضر اولمیان برخیلی قطعات ایله ده برلشمش اولور .
 لکن اصول مذکورک تطبیق و اجراسی آنجق کبرویه چکلدکجه
 قطع اولنان مسافه، تعرض اردوسنده ظهوری بکلنیلان بتون
 فـالـقلـر ظهور ایده جک درجه ده بیوک اولمق شرطیله جائز
 کوريله بیلور . برده شوکا دقت ایتملیدر که ، مدافعین کبرویه
 چکلیمکه باشـلادینی آنده دها اراضینک اک بللی باشـلی
 قسـملـری نی تعرض اردوسینه ویرمکدن پک، زیاده چکنمکه
 مجبوردر . زیرا دیدیکمز اراضی قسـملـری نک دشمن انه ترک

ایده‌اش اولسی حدذاتنده سـ فرك طالع ونتیجه سـ نه بك قطعی
تأثیر لر کوستره بیلور .

مدافعه سـ سوق الجیشینک اوچنچی بر اصولی دهـا وارکـه ،
اوده : خصم اردوسی کندی حاضرلق حرکاتنی یانجـه یه قدر
کمال سکونتله بکلمک واوندن صکره ، آنک قصورلرینی ، ضعیف
نقطه لرینی برر ، برر میدانـه قویه رق همان بتون قوای عسکریه
ایله اوزرینه یوکلنمک اصولیدر [*] .

علی العاده بر نظارله باقلدیغنه کوره ، مدافعه سـ سوق الجیشی
اصولی اک مؤثر وحتى نمونه اوله جق درجه ده اک کوزل بر اصول
ایمش کبی ظن اولنور . لیکن بو توجه کوسترلیدیکی زمان ، اولجه
سویلدیکمز کبی ، مدافعه سوق الجیشینک اصل معناسی کندی
اسمندن آکلاشـیلان معنا دکل ، بالعکس ، اصول مذکورک
تعرض سوق الجیشی یه تابع وبلکه اوکا معاون بر اصول اولدینی
مسئله سی خاطر دن چیقاریلور . یوقسـه مدافعه سـ سوق الجیشی
حدذاتنده بر اصول قطعی دکل وهیچ بر زمان اوله مز . چونکه
بوراده بر مدافعه دن زیاده هجوم وقتنک کلمسـنی بکلیان بر تعرض
دیمک ایستیلور .

[*] جنرال بلومه ، یازدینی (سوق الجیش) کتاتبنده شو اوچ درلو
مدافعه سوق الجیشی اصوللرینه : مدافعه موضعیه ، مدافعه رجعیه ،
ومدافعه تعرضیه اسملرینی ویرمشدور .

هر مدافعه سوق الجیشینک اساسی، تعرض قوتلرینی چوغار،
 چوغار، کندی قوتلرینی آزار، آزار قیردیرمق شرطیله ایلک
 اولجه ایکی طرف آره‌سنده موجود اولان مسـاوا سـزلـقـده بر
 موازنت حصـوله کـتـورمک فـکـرینی حـائـزدر. بـو فـکـره قـوت
 ویرن شی، یوقاریده سـویـلـدیـکمـز کـبی، یـورـویشـلر و حـرکـتـلـرک
 تعرضه نسبتاً مدافعه‌ده برآز اهمیت سز قالمسی و بالعکس آنلر تعرض
 اردولرینک قیرلمسینه الکچوق تأثیرایدن سبیلردن بری اولمسی در.
 بونک ایچون تعلیم و تربیه‌سی یولنده اولمیان قطعات عسکریه ایله
 مدافعه‌ده قالمق بر تعرض سـوق الجیشی حـرکتی یـاـمـقـدن دـها
 تهـلـکـه سـزدر، دیه بیلوروز. مدافعه سوق الجیشی حرکاتی تسهیل
 و یا تقویه ایدن بوندن بشقه سائر بعض شیلر دها وارددر. از جمله
 ایلک صره‌ده سویلیه بیلوروزکه، مدافعه سوق الجیشی طوغریدن
 طوغری به آنجق منفی هدفلر تعقیب ایدر. بوکبی هدفلره وصول
 ایسه، مثبت هدفلره واصل اولمقدن پک قولایددر. زیرا مذکور
 هدفلر همه حال حرکت ایتک وایلرو یوریمک خصـصـه و صـلـرینی
 طلب ایدرلر. بوندن اوتری هیچ شبهه یوقکه، مدافعه‌ده،
 قالانلره نسبتاً ایلری طوغری یوریـمـان قـطـعـلـر دـها بیوک
 عارضه‌لره، دها بیوک تهـلـکـه لره تصادف ایتش اوله جقلردر.
 اکر هاجمین طرفی، کندی ترتیباتی آلورکن، بعض بیوک
 خطالره دوشر و بونک ایچون تعرضنده مغلوب اولورسه، شو

مغلوبیت ، مدافعین جهتی ایچون بر موفقیت یرینه کچه جکدر .
 تعرض جهتی بیله دیکی مملکتلرده ایلرولدکجه اکثریا ، کندی
 قوئلرینک بر آن اول توکنمش اولدیفنی کورورکه ، حال مذکور
 مدافعینک ذاتاً ایستدیکی برشیدر . (قلاووزویچ) بویله زمانلرده
 مدافعین ایچون « اکدیکنی ییجر » سوزنی قولانیور .

حق هاجین طرفی ، بعض ترتیبات خصوصیه آلمنی اونودر
 ویا نافله یره زمان غائب ایتمش اولورسه ، بوندن بیله مدافعین
 جهتی ایچون ایجه فائده لر حاصل اوله جقدر . اوندن بشقه معین
 برزمانده قطعی برهزیمته اوغرامامش بولمسی ده مدافعین ایچون
 بر موفقیت یرینه کچه بیله جکدر . شو حال مثلاً ، (قریم) سفرینک
 بدایتده ، عثمانیلر ایچون واقع اولدیفنی کبی ، مقدر حکومتلرک
 انفاق سببیه حرکات عسکریده بشقه برطور کورلیدیکی زمان
 اکثریتله وقوعه کلور .

زمان ، الک چوق مدافعه جهتنک متفقیدر . چونکه تعرض
 حرکاتی الک شدتلی بر یولده ایلرییه سوردلکری زمان بیله
 نتیجه حرب ، ایجه اوزون وقتلردن صکره حصوله کله جکی ایچون
 ینه ، اکثریا برسکتهیه اوغرامق تهلهکسی واردر [*] .

[*] عکس حال ، یالکز دشمن حکومتلرک مالک اولدقلمی مالزمه
 سفریه بیننده بیوک برنسبتسزک بولندیفی زمان وقوعه کاور . نته کیم
 آمریقا سفرلرنده اوپله اولمش ایدی . مدافعه سوق الجیشی اصولنک ،

مدافعین یالکز برشی دوشونور، یالکز برشیئه طمع ایدرکه، اوده مالک اولدیفنی الدن چیقارماقدرد. هاجمین ایسه بالعکس، یر قزاقی، فتح ایتک ایستر. حربده شو دیدیکمز آرزولردن برنجیمی، ایکنجیسنه نظراً دها قولای حصـوله کلور. رده مدافعه سـوق الجیشی بی قبول ایدن طرف، هاجمینک یاپدینی کبی، اولجه حاضرلامش واعلادن اعلایه طـانیش اولدینی بر دارالحرکاتی براقوبده کنندیسـنجه معلوم اولمیان بر اراضی به کیتمک احتیاجنه دوشمیجکدر.

مدافعه، تعرضدن زیاده بعض بیلنمدک سـبیلردن اوتری حصـوله کله جک مانعمر و عارضه لردن مصوندر. اوندن بشـقه هیچ شه یوق که، مدافعین، تعرض جهتنـدن زیاده حرب ایدیلان یرلرک احوالنه وانفدر. زیرا مدافعین قطعاتی، بویرلری نقطه سی، نقطه سنه بیلورلر واونلری ایستدکاری کبی اشغال ایدرلر. حال بوکه تعرض قطع اتی، شو بیلمدکاری یرلره طـوغری اکثرباشه لی خطرهلرله یوریمکه مجبور اولورلر. بونک ایچون مدافعه جهتنک، دیدیکمز یرلرده، یابه جنی حرکات

موفقیت حاصل ایتمی ایچون اک باشلیجه شرطلردن بریسی باشلانیلان حربی ایچیه بر زمان اوزاته بیلمکدر. اگر بویله یابه بیلورسه، حربی استدیکی کبی اوزاتمی الدن کلورسه، مدافعینک اکصکره موفقیت حاصل ایده جکنه ایناعلیدر.

عسکریه ، تعرض قطعاتنك اوغرایه جنی مشكلات قدر مشكلات
 كورمیه جكدړ . برده مدافعه اردوسی ، دارالحركات اوزرنده
 موجود اولان شمندوفر خطلرندن پك چوق استفادة ایدہ -
 بیله جك بر اقداری حائز ایكن ، تعرض اردوسی اواققداره مالك
 اولمیه جقدر . زیرا تعرض اردوسی دشمن طویراغنده راست
 كله جكي شمندوفر خطلرینك اكثریا بوزوق واستعماله غیر صالح
 بر حالده اولدیغنی كوره جك وبوندن طولایی اولردن ایستدیكى
 كبی فائده كوره میه جكدړ .

حاصلی مدافعه جهتی ، مملكتك ایچروسه سنده کی موانع
 طبیعیه دن ومثلا نهرلر ، طواغیر ، كچیدلر ، اورمانلر ، چولار
 وبطابقلر كبی مانعلردن پك چوق استفادة ایدہ بیله جكدړ .
 حال بوكه ، تعرض اردوسی اوکا قاووشمق ایچون ایلک اوکجه بو
 دیدیکمز مانعلری آتلامغه ، وآنلری برر ، برر كچمكه مجبور
 اوله جقدر . مدافعه جهتی ینه ، مستحکم یرلردن ، قلعه لردن ،
 خصمی طویردرمق ویا پارچه لره آیرمق ایچون یاییلان
 استحکاملردن ده پك چوق فائده كوره جكدړ . نتیجه اوله رق
 دیرزكه ، مدافعه ده قالان اردو كندی مملكتنده ، بالعكس تعرضه
 كچن اردو ایسه ، دشمن مملكتنده بولنه جقدر . شو حقیقت
 بللی اولنجه ، مدافعه اردوسی اهالیدن پك چوق معاونت
 كوره جك ، بالخاصه ، دشمنه دائر معلومات ایدنك ، وكندی

اردوسی بسلامك خصوصلرنده اوناردن پك چوق شی استفاده ایده جکدر. اوندن بشقه ، دارالحرکاتی تشکیل ایدن اراضیده کی ملکیه و اداره مأمورلرندن برخیلی فائده لر کوره جکدر. کرچک بو ملکیه مأمورلری ، قطعات عسکریه نك بربرده کیجه لمسی ، و یا خود بریردن دیگر یره کیتمسی خصوصلرنده اردونك حس ایلدیکی ضایعاتی اکمال و تعمیر ایلماک کبی ایشلرده پك بیوک معاونتلا ایده بیلور .

دها عمومی برنظاردن سهویله بیلورزکه ، مدافعه اردوسی خلقک کندی یانی باشنده بولمسنه ، اهالینک بر آنده ایش باشنه کچه بیلمسنه پك چوق استناد ایده بیلور. حال بوکه ، تعرض اردوسی ، بر خطوه ایلری کیتدکجه کندی مملکت و ملتدن بر خطوه دها اوزاغه کیتمش اولور. بزبونکله دیماک ایستمیورزکه ، هرکس آياقلانوبده سلاح باشنه کچه جکدر . بالعکس بز ، یالاکز وطن پرور برملتک تعرض اردوسنه قرشو ایراث ایده جکی بیك درلو مشکلات ايله کندی مدافعه ملیه سی نقطه نظرندن کوره . جکی خدمتلی سویلماک ایستیورز [*] .

[*] تعرض بلاسنه اوغرایان برمملکتده بتون اهالی حکومتک دوشه جکی فلاکتی دوشونمکده مشترک اولدیغی و آنک ایچون پك چوق فداکارلق ایده جکنی فرض ایدیورز. اگر بویله اولسه ، دشمن اردو- سنک کرک حرکات عسکریه و کرک احاشه و اداره جه ، مدافعه اردوسندن زیاده سهولت کوه جکی طبیعیدره .

مدافعه‌ده قالان براردو ، کندی وطنی تهديد ايليان مخا -
 طره‌نك كيتدكجه بيوديكنی كورور . بوندن طولايی، الدن كلان
 قوتی صرف ایتمهك صوك درجه چالشمغه مجبور اولور. كرچك،
 بهض زمانلرده بك یقیندن كوریلان تهلكه‌لر، برملتك مقاومه
 اولان استمدادینی ایشیدلمك بردرجه‌ده بیوتمكه، بك بوكسكاره
 چیقارمغه واسطه اوله‌بیلور . (۱۸۰۸ : ۱۸۱۲) ده اسپانیا ،
 (۱۸۱۳) ده آلمانیا ، سدان هزیمتدن صكره (۱۸۷۰) ده
 فرانسه ملتلی عیناً شو دیدیکمز کبی حرکت ایتشلردی .

لكن هاجین طرفی بوفائده‌یه مالك اوله‌میه‌جقدر . زیرا ،
 اونك ملتی ، راست كلنه‌جك تهلكه‌لری بك یقیندن كوره‌مدیکی
 واكثریا دشمن طوبراغنده ایلرولندلیکی ایچون کندیسنی بلكه
 دائماً مظفرانه حرکت ایدیور صانه‌جقدر . ایشه بونك ایچون
 افكار ملیه‌نك ، وطن برورانه حسیاتك ، برتعرض اردوسنه

(۱۸۱۶) سفرنده پروسیا و ساقسونیا قطعات عسکریه‌سی زنکین
 برملکت ایچروسنده آجلقندن اولیورلردی . حال‌بوکه، دشمن طرفی هیچ
 برشیدن محروم قالمیوردی . (۱۸۷۰-۱۸۷۱) سفرینك نصف اخیرنده
 فرانسر عسکرلری فوق‌العاده صفوق کونلرده قصبه‌لرک اکثریا سو-
 قاقلرنده یاتوب قالمغه مجبوریت کورمشلردی . چونکه اونلری زنکین
 اهالی یانه اسکان ایتدیره‌میله‌جك اقتدار یوق ایدی . حال‌بوکه، ینه
 شومسکون محللری اشغال‌ایدن آلمانلر، او صاحب‌لرله برانکده اوطورمقی
 و برسفرده یمک خصوصلرنده هیچ برمشکلاته اوغرامامشلردی .

ایده چکی معاونت لر، نه قدر شرفلی اولسه ینه اکسیک اوله جقدر. باخصوص برعکس حالک، بر فلاکتک ظهورینه دلالت ایده جک بعض اشارات اولیه، کورونمکه باشلادیغی زمان، تهلکه بی بتون اولاد وطنه حس ایتدیرمک ایچیه مشکل بر شیددر. زیرا دیدیکمز اشـارتلری هرکس آنلایه مز، اونلری یالکز پک تجربیلی و پک اوزون کورن کوزلر تفریق ایده بیـلور. بونک ایچون اشارات مذکوره کورونمکه باشلادیغی آندن اعتباراً، همان حربک صـوک کونلرینه کلش اولان هاجمین، اکـچـوق صیقینتی به اوغرادینی بر زمانده سوکیلی مملکتستدن هیچ بر معاونت کورمه مک بختسزلغنه دوچار اولور. نته کیم ایتالیاده (آنیبال)ک باشنه کلان فلاکت بوجنسدن بر فلاکت ایدی.

بتون شودیدیکمز فائده لرسایه سنده مدافعه جهتی، تعرضدن زیاده سربست و کنیش کنیش حرکت ایده بیـلور. یعنی استناد و حمایه سندن امین اولدینی بر ملت یانی باشنده ایکن، خصمک هر درلو باصقینلرینه چاره بولمق آنک ایچون پک زور برشی دکـلـدر. اوندن بشقه مثلاً اکثر وقت، مملکت ایچروسنده بسلمک ممکن اولدینی ایچون مدافعه جهتی، ایلك اوکجه تعرض اردوسـنه قرشو طور مقی خصوصنده استناد ایلدیکی بر استقامتی آپ آنسزین دکشديره رک یان بر موصنده خصم اردوسـنه مقابله ایده بیله جکدر. بوجه ایله که، تعرض اردوسی، اکـصـکره او

زمانه قدر ایلرولدیکی و اوزرنده بتون ترتیبات عسکر به سنی
آلش اولدینی خط الحركاتی بردن بره ترك ایتمه به مجبوریت
کوره جکدر. یالکز بو تبدیل استقامت و ترتیبات مسئله سی ،
حد ذاتنه ده ، پک چوق مشـکلاتی موجب اولان بر
مسئله در . لیکن اوندن بشقه ، تعرض اردوسی ، حرکت
ایلدیکی مملکتی بیامدیکی و بالعکس مدافعه جهتی آنک
هر بر نقطه سنی بیلدیکی ایچون ایلک اوکجه طوتیلان استقامتک
اویله بردن بره دیکشدرلش اولسی ، برچوق تهله لک لک ، برخیلی
خطـالک ظهورینه سبب ویره جکدر. بو خصوص هیچ شبهه
یوقکه ، ذاتاً پک ایو اولمیان ایلک وضعیتی بسبتون مشکل و قنمرلی
بر حاله دوشورمش اوله جقدر.

تعرض اردوسنک بردوزی به ایلرولسی ، اعاشه خصوصلرینک
کیتدکجه مشکلاته اوغرامسنی ایجاب ایدر. بونک ایچون اکثریا ،
مملکتک بتون منابع ثروتندن استفاده ایتک املیله ، هاجمین
طرفی ، دهـا کنیش بر منطقه ده ایلرولک ایچون اردویی بعض
پارچه لره آیرمغه لزوم کوره جکدر . لیکن مدافعه اردوسی ،
خصمک شو دیدیکمز یولده پارچه لره آیرلدیغنی کورنجه ، بتون
قوتیله ، مذکور پارچه لردن بریسی اوزرینه یوکنه لک ، اوته کیلری
یتیشمزدن اول ، آنک ایشنی بتورمکه فرصت بوله جقدر. اکر
بو ایلک ایش ، بر موفقیت ایله نتیجه لیش ایسه ینه عین قوت ،

لكن بو دفعه مظفریت قزاقمش اولان قوت ، ايله خصمك
برايكنجي، براوجنچي والي آخري بونك كې اوتەكى قسملرينى ده
برر برر اورمق ممكن اوله جقدر. بو قبيلدن اك پارلاق بر مثال
(۱۸۱۴) سنه سنده شباطك (۱۰) تاريخندن (۱۴) ينه قدر
ناپوليونك (سيليزيا) اردوسنه قرشو يامش اولديني حركتدر .
كذلك ىدى سنه سفرلرينك ايلك دورلرنده بيوك فردريق
مدافعه حربنده اصول مذكورى دهـا بيوك بر مقياسـده
قولانمش ايدى .

مدافعه اردوسى ، بر مصادمه قطعيده مغلوب دوشدكجه ،
مقناطيسك بر تيمور پارچه سنه اولان تاثيرى كې اوده هرزمان
هاجمين اوزرنده بر قوه جاذبه اثرى كوستره جقدر . حقيقت !
تعرض اردوسى ، مدافعى ، كوكل آرزوسنه كوره ايودن ايويه
بر تپه ملك، جاتى صيقان . بونجه شيلره بر خاتمه ويرمك ايجون
دائما اونكله برلشمك ايستر . بناء عليه ، هاجمين طرفك ، مدافعه
اردوسى هرزده موضع آلمش وهرزده يرلشمش ايسه اورايه
كیده جكنى بر صورت عموميه ده قبول ايتك لازم كلور . ايسته
يالكز بو سببدن اوترى بيله مدافعينك وضعيتى ايجيه فائده لى
بر وضعيت اوله جنى ميدانه چيقار .

اكر هاجمين طرفى ، بتون بر دارالحركاته حاكم اولان
ومدافعه اردوسيله اشغال ايديلان ، بر موضعه هيچده اهميت

ویرمکسزین یوریمک ایسترسه مدافعه جهتی یالکز اوافاجق
بر حرکتله آنی ینه کندی اوزرینه چکمه موفق اولور .

(۱۸۷۷) سنه سی یاز موسمنده ، خصمک صاغ جناحنی
تهدید ایلیه جک وجه ایله طونده کی ترک اردوسنک اوفاق تفک
حرکاتی یعنی عثمان پاشا حاضر تلیرنک دشمن اردوسنک صاغ جناحنه
دوشه جک صورتده یادینی تعرض یوروشی ، روسیه لینک بالقان
سلسله سی اوزرنده یامق ایستدیکی کچید حرکتلرندن واز کچمش
اولسنی ایجاب ایلمش ایدی .

اگر هاجمین ، مدافعه اردوسنه اهمیت ویرمه یه تنزل ایتیمه رک
شویله بابایکیتجه سنه بر یوروش ایله مذکور اردو یانندن کچمه یه
قالقیشورسه مدافعین جهتی هر زمان ، خصمک یانلرندن بریسنی
تهدید ایلان بر تعرض حرکتی سایه سمنده آنی طور دیرمه یه
موفق اوله جقدر . (۱۸۰۶) سنه سی تشرین اولنده ، (شارن
هورست) پروسیا اردوسی ایچون بویله بر حرکت ، بویله بر اصول
تکلیف ایلمش ایدی . لکن مشارالیه تکلیفی قبول ایدلمه مشدی .
حال بوکه ، (۱۸۱۳) سنه سی مایسنده مشارالیه طرفندن ،
(لوچن) ده وقوعه کلان ینه او تکلیف عینله قبول ایدلمش
وبوندن اوتری ایچه بیوک بر موفقیت حاصل اولمش ایدی .

(۱۸۷۱) کانون نانسنده ، جنرال (وردی) ینه مذکور

اصول سایه‌سنده (ویلار سکسل) موفقیتی اکتساب ایلمش
ایدی .

مدافعه سوق الجیشی ، علی الخصوص ، اراضی ملیه
ایچنده یاییلان حرکات عسکریه ائناسنده پک چوق سربست
بولمق خاصه سنی جامعدر . تعرض سوق الجیشی یه عاند
شرائط اساسیه دن بریسی ، اولجه سویلدی کمز کبی ، بتون حاضر-
لقلرک ، بتون تدارکات سفریه نك خصم اردوسندن اول اکمال
ایلمش اولمسی لزومیدر . بو شرطک اجرا وتطبیق ایسه ،
اردونك انتظامنه ، سفر برلکک برمسلك مطردا وزره جریانه ،
پک زنکین فابریقه لر ودبویلرک وجودینه ، متعدد وسائط نقلیه ،
والخاصه ل اهلینک طبیعت و اخلاقه ، مملکتک تشکلات
جغرافیه سنه تابعدر . اوندن بشقه اصول مذکورک اجراسی ،
بر چوق مصرفلرک یابلمسینی ده موجب اولور . بر مملکت شو
دیدی کمز شرطلرک هپسینی بر آره یه طوپلامق ایچون پک چوق
مشکلات چکه جکدر .

حقیقت! بعض اولورکه ، بتون سویلدی کمز شرطلری وقت
حضرده ایکن ده یولنه قویمق ، اردونك احتیاجات سفریه سنی
بر آن اول حاضرلامق ایچون جیدی بر صورتده چالشمق
مجاور حکومتلرک ، بیوک ملتلیک نظر حسدینی جلب ایدروبوندن
اوتری حکومت بیوک بیوک تهلیکه لره دوشر .

حال بونک ، شو تهلکه مدافعه سوق الجیشی ده قالان طرف
ایچون یوقدر. زیرا، حال تدافعی بی قبول ایدن طرف ، اکثریا
کندیسی ایچون بیوک بر ضرر و زیان موجب اوله جق وجه ایله
تعرض جهتنک بر از ایلرولمسنه اهمیت ویرمه یویرر . لکن
برشرط ایله که، اعلان حرب ایدلمش اوله جنی زمان مدافعه جهتی
باللی باشلی یوللاری و موضعلری ، دشمندن اول طوتمق ممکن
اوله بیلسون .

تعرض بحثی مطالعه ایدرکن سویلمش ایدک که، حال تدافعیده
قالان بر اردو ، سائر حکومتلره استناد ایلماک خصوصنده ،
تعرض جهتمدن زیاده امیدلر بسلیه بیلور. شمیدیکی زمانده اوروپا
بر حال موازنت ایچنده یشایور. هر حکومت بالخاصه ، کندی
منافع ملیه سی ایچ-اباتندن اوله رق او موازنته رعایت ایتمه یه
مجبوردر.

بونک ایچون، حکومتلردن بریسنک محو و پریشان اولمسيله
دیدیکمز موازنتک بوزلمغه یوز طوتدیغنی کوردکری زمان ،
اونلر غالب جهتنک اوکنه حقیقه رق آنی طور دیرمه یه چالیشه-
جقلردر . (۱۸۶۶) سفرینه طوغریدن طوغری یه بر اشتراکی
اولمیان حکومتلر ، آوستریا دولتی جان چکیشمه یه باش-لادیغنی
زمان، آنجق اوچنچی ناپولیوننک پک ملایم و کیوشک پولتیقه-
سیله ایشه قاریشمق ایستدیله . (۱۸۷۱) ده ایسه پک فنا

مغلوبیتلر کچورمیش اولان ییچاره فرانسه لهنده هیچ بر نمایش
هیچ بر توسطده بولمیدیلر . دیدیکمز خصوصلرک بویله جریان
ایتمسمنه باشلیجه تأثیر ایدن سبیلر واردر . ازجهله مظفر اولان
جهت ، خصمی علیه قزاندینی تفوق سیاسی وعسکریدن پک
حکیمانه بر یولده استفاده ایلدیه بیلیمش ایدی .

مدافعه سوق الجیشینی قبول ایتمک اوزره ویریلان قرار ،
بر طرز عمومیده ، کیوشک وضعیف بولمق حسیات جاساتی جامعدر .
حقیقت ! ایشه قرار ویرمک ایچون اک بیوک تأثیر کوسترن شی
آنچق بو سویلدی کمز حسیات اوله جقدر . اوندن بشقه بر آز
یوقاریده کچدیکی کی بالکتر مدافعه اولمق شرطیله هیچ بر مسئله نک
قطعاً فصل ایدلمش اوله میه جغنی اصلاً اونوتـاملی بز . مدافعه
سوق الجیشیده قزانیه جق اک بیوک فائده ، ایجه تضییقلره دوشن
مخاصم طرفک اک صکره قبول ایدم جکی مصالحه دن عبارتدر .

بیوک فردریقک استحصال ایلدیکی مصالحه ، بو چشمید
مصالحه لردن بریسیدر . مشارالیهک اویله بر مصالحه قزانسمنه
اک جوق تأثیر کوسـترن شی ایشه ، بولتیقه وضعیتک بردن بره
دیکشمش اولمسی ایدی . اوندن بشقه کندی زماننده قوللانیلان
مصادمه قواعدی ، محاربه اصولی ده بیوک فره دریقه ایجه یاردم
ایلمش ایدی .

آمریقه ـ سفرلرنده جنوب حکومتلری کندیلرندن بیوک

اولان بردشمنی یورمق، کیوشتمک ایستدیلر. لیکن و طنداشلق
حسیاتسک کندیلرینه ویرمش اولدینی بونجه امیدسز غیرتله،
بک ماهر جنراللر واسطه سیله قوماندا ایدیلان بونجه کوزل
اردولره رغماً ینه موفقیت قزانه مدیلر.

حاصلی هرکیم که، ایشک صوکنده تعرضه کچمک ایچون
مدافعه بی ترک ایده میه جک بر حالدہ بولنور، اوله اولان جهت،
بر طرز عمومیده، کندی زوانی کندیسی آرامش کی تصور
اولنه یلور.

مدافعه سوق الجیشیده قالان جهت اکثر احوالده،
اراضیسسک بیوک بر پارچه سنی تعرض اردوسنه ترک ایتمه
واو اندن اعتباراً مذکور اراضی پارچه سسک بتون منابع
ثروتندن واز کچمه به مجبوریث کوره جکدر. صحیح! مدافعه
سوق الجیشیده ایکن، هیچ بر وقت، حدود بونی اراضیسندن،
اورانک ثروت و سامانندن، ایستلدیکی کی استفاده ایتمک قابل
اولیه جقدر.

حاصلی دیمک ایسترزه، مدافعه جهتی، دشمن النہ کچن
اراضی بی تکرار اله کچور مدکجه اورانک هیچ بر کوزلاکندن
استفاده ایده میه جکدر. لیکن، بر کره دشمن النہ کچن اراضی بی
تکرار ضبط ایتمک مجبوریتنده بولنه جنی زمان مدافعه سوق الجیشی
ینه بک مشکل بر طاقم حالارم تصادف ایده جکدر.

مدافعهٔ سوق الجیشیدن هیچ بر وقت آیرلیان و دشمنی
 بکلمکدن عسارت بر حرکت مزلاک ایچنده بیودکجه بیویان
 وضعیف بولمق، حسیانی اردونک قوهٔ معنویه سنده پک مدهش
 یاره لر آچار. حال بوکه، هاجمین طرفنده، عسکرک بردوزی یه
 تبدیل مکان ایتمسی، بر دوزی یه موفقیّت قزاعسی کبی شیلر،
 بالعکس قوهٔ معنویه نک کوندن کونه پارلامسنه خدمت ایدن شیلر-
 دندر. کرچه، هاجمین طرفک بیوک برخطا ایچنده ایلرولدیکی
 آکلاشلدینی زمان مدافعهٔ سوق الجیشی اردوسی بردن بره
 آنک اوززینه دوشه یک بعض مؤثر باصقینلر یایه بیله جکئی براز
 اول کوسترمش ایدک. اوت، بوبله یایمق پک اعلا ممکندر؛ لکن
 اصلا قولای برشی دکدر. چونکه وضعیت، آنک ایستدیکی کبی
 مطلق پروسسزو آچیق بر تابلو شکلنده نمایان اوله مز. هجوم
 طرفی یالکز بر نقطه ده دکل، عین زمانده، برچوق نقطه ده خصم
 اردوسیله تماس حاصل ایده جکدر. اکثر احوالده مدافعه جهتنک
 ایلک اوکجه هجومه طوتیه جق اولان قطعات عسکریه سی هر
 یرده و هر زمان تهلمکئی دها یقیندن کورمش اوله جقلردر.
 بونک ایچون (قلاووزوچ) ک دیدیکی کبی مدافعهٔ سوق الجیشدنک
 هر نقطه سنده پک فنا بر تضییقه، پک فنا بر قرارسزله
 دوشیله جکدر. بو قرارسزلق ایسه، پک نافله یره برطاقم سلاح
 باشنه حرکتلرینه، بوشی بوشنه پورغینقلره سبب ویره جکدرکه؛

عسکر اولنلرک^۱ بیهوده شیلر اولدیفنی حس ایتدیجه قوه معنویه ده کرچکدن فنا تأثیرلر حصوله کله جکدر. یالکز بک امین و تجربه لی بر نظر صاحبی اولان قوماندانلر ، شو دیدیکمز احوال مشکله ایچنده هانکی استقامتده یوریمک لازم کلدیکنی بردن بره آکلامش اوله جقلردر.

برده هجوم طرفنک ، یابه جنی قصورلردن استفاده ایتک آنجق بک سریع بعض موفقیتلر سایه سنده ممکن اوله بیله جکدر. بو موفقیتلری استحصال ایتک ایسه ، تعبیه جه دشمن علیه نه کرچکدن بیوک بر تفوق حاصل ایتش اولمقله ممکندر . شو نقطه نظردن مدافعه سوق الجیشینک موجب اولدینی منافعینه محدود وینه بر سوری شرطلره تابع بولنور.

اوندن بشقه ، بو مدافعه سوق الجیشی ، حرکت حالنده کی بر دشمن اردوسنک هر زمان ، کیرولریله اولان طرق اتصالیه بی تهدید ایلیه بیلیمک خصوصنده کی محذور عظیمی نه قدر چالیشمش اولسه ینه بر طرف ایتش اوله میه جقدر. بونک ایچون مدافعه جهتی یالکز کندی طرق اتصالیه سنی محافظه ایتک فکریله اکثریا بعض بک فائده لی موضعلری ترک ایتیه لزوم کوره جکدر.

اک صکره نظر دقتیزی شویله بر نقطه یه ده کتوره بیلورزکه ، مدافعه سوق الجیشی اکثریا وبک اوزون بر زمان ایچون قطعات عسکرینه نک تبدیل مکان ایتلرینه مانع اوله جقدر . لکن

مکان واقلم دیکشندرمک کبی عسکر اوزرنده فوق العاده
کوزل تاثیرلری کوریلان بر شیدن محروم قالدیجه قطعات
عسکریه اکثریا ساری خسته اقلره طوتلمش بولنورلر .
اوندن بشقه ، یالکز بر یرده اوطورمه نك بیوک بر محذوری
وارکه، اوده عسکرک قوه معنویه سنده پک فنا تاثیرلرک حصوله
کلسیدر .

.....

۲ — مدافعه تعبیهوی

مدافعه سوق الجیشیه دائر سویلمش اولدیغمز خصوصی
و عمومی شرطلردن اکثریسی مدافعه تعبیهوی یه ده تطبیق
اولنورلر. لکن اولنردن بعضیلری اجرا ایده جکلری تاثیر،
آز، چوق فرقلی بر طرزده اجرا ایدرلر.

مدافعه تعبیهوینک موجب اولدینی باشلیجه فائده، نقصان
بر یولده اجرا ایدیلان بر هجومده قطعات عسکریه نك دشمن
موضعلری قرشوسنده قیریلوب دوکلدرینی کورمک تهلهکه -
سنک عدم ظهورینه یاردم ایلمسیدر. یعنی عسکر قوتلی بر
مدافعه موضعنده قالدینی ایچون آچیقدن آچیغه مذکور موضعه
قرشو هجوم حرکتی یاپان قطعات عسکریه کبی پک زیاده
قیرلمش، دوکلش اولمز.

على الخصوص، تعرض اجرا ايدن جنراللر، مسكرن محلالره قرشو ياييلان محاربه لرده بك سهولت ايله مغلوب اولورلر . چونكه اولنر بو كي يرلرده صرف ايديلان قوت و امل ايله غير متناسب قيمتي حائز اولان بر هدفك ضبطي ايجون حدندن زياده قوت صرف ايتمكدن بر درلو كنديلرني طوته ميورلر . حتى شو هجوملرده موفقيت قزانلسه بيله ينه شمديكي سلاحلرك معلوم اولان تهلكه سنه قرشومذكور موفقيت بك بهالي بر موفقيت اوله جقدر .

زمانمزده تعرض تعبيه وينك ، بالخاصه مشؤم اولان طبيعتي اكثر هجوم حر كترلرينك (پروس) واري مظفر يتلرله نتيجه نمسندن عبارتدر . آتشك مهلك تاثيرلري قرشوسنده ، هجوم قوللري بعضاً كله جك كه ، ياري ياري يه بر نسبتده ضايعاته اوغرا مش بولنه جقدر . كرچك ، مدافعين جهتمنده كي آتش لايينقطع بر طرزده جريان ايده بيلوركن ، تعرض طرفي ايلري يورويشه باشلا ديفي آندن اعتباراً ايكيده برده آتش كسمك مجبور يتنه دوشه جقدر . برده اراضينك موجب اولديني استناد خصوصي ، مدافعه سوق الجيشيده حس ايدلمديكندن زياده مدافعه تعبيه ويده محسوسدر . مدافعين ، هجوم قوللرني كندى آتشي آلنده يوريمك ايجون اكثر يا ، عارضه لي يرلري انتخاب ايدر . وبونلري بعضاً استحكام عملياتي ايله بسبتون قوتلي برحاله كتورر .

والحاصل ، مدافعهٔ تمبیه‌وی ، قطعات عسکریه‌نک مستور و طوتیلان موضعلرک دشمن نظرندن مخفی قلمسی کې ایکی مهم فائده یی جامعدر . لکن هاجمین طرفی بالعکس مدافعین طرفندن کوره‌لدیکی حالد و آب آشکاره یوریمکه مجبوردر . حتی اکثر زمانده ، هاجمینک یوری‌یه‌جکی بیوک‌یولار بللی اولدینی ایچون مدافعه‌یه جهتی باصقین ایتک فرصتلرینده بعضاً الله ایده‌بیله‌جکدر . لکن بر دفعه ، قطعات عسکریه ایودن ایویه یرلشدکن صکره آنلری حرکتسزلشدن چیقاروبده برایلری بیرویش ایله دشمن علیهنه باصقین حرکتی یایمق کې ایشلر اويله ظن ایدلدیکی قدر قولای ایشلر دکلدر . آنک ایچون دشمن طرفندن یایله‌جق بر خطای بولوبده هان اوزرینه آتلمق خصوصنده مدافعه جهتنک ایچه فائده‌لر کوره‌جکده دائر سو- یلدیکمز شی ، پک ابو برشی اولمله برابر پک نادر وقوعه کلور شیلردندر . زیرا براردو ، قبلانک یابدینی کې عادتا فکرسرعتنده بر صیچرایش ایله کندی آوی اوزرینه آتلمق و آنی هان یقالامق استعدادینی حائز دکلدر !

فرصت زمانی کشف ایتک ، قرار ویرمک ، امرلر یازمق و قطعات عسکریه‌ینی حرکت حالته قریمق ایچون ایچه وقت لازمدر . اوت! بتون شو دیدکرمزی برر ، برر یایمق ایچون زمان ایستر . بو زمان ایسه ، بزجه فائده‌لی ، قرشو طرف

ایچ-ون بالعکس ضررلی اولان وضعیتک دیکشمسنه و خصمک ایلرولمسنه یتیشه جک درجه ده چوق بر زمان اولور .

قطعات عسکریه بردفعه یرلی یرینه یرلشدکن صکره آنلری یورویش حالنه قویق ، علی الخصوص کندی جبهه لرینک خار-جنده بر استقامته طوغری یوریمک کرچکن پک بیوک وپک زور برشیدر. اگر اویله اولمسه ایدی، اکثریتله آز برمسافه قطع ایتمک مجبوریتنده بولنان مدافعه جهتی، هاجین چوبرمه حرکتی یایمزدن اول یعنی دهها سریع برزمانده جبهه دکشیدرمک خصوصی اکمال ایده بیلوردی. برخیلی جهتلردن هجومه اوضرائلدیغنی، جبهه دن اشغال ایدلیکنی، جناخلردن بر ویا هر ایکسسنک چورلمش اولدیغنی وخط رجعتک کسلمش بولندیغنی کورمک مدافعه تعبیه وینک هر زمان بیون بوکه جکی برتهلکه عظمیه در. کرچک مدافعه تعبیه وی ایچ-ون بویله زمانلرده مقابل هجوملر ايله تهلیکه دن قورتلمق، مدافعه سوق الجیشیده مقابل تعرض ايله تهلیکه دن قورتلمش اولمقدن دهها کوجدر. زیرا مدافعه تعبیه-ویده اشغال ایدیلان اراضی پک محدود اولدقدن بشقه بتون قوتلرک بر آنده مقابل هجوم یابه بیللماری ایچون ایجاب ایدن زمانده پک آز برشیدر. علی الخصوص هیچ برزمان عین قوتلری برکره خصمک برقطعه عسکریه سی، برکره اوتکی قطعه عسکر-یه سی علیه سوق ایتمک یعنی مدافعه تعبیه وی ایچون داخلی

خطوط الحركات قوللائق ممكن اوله ميه جقدر .
 زیرا، مختلف دشمن قوللاری بربردن آیران مسافه او
 قدر کوچکدرکه، بو مسافه اوزرنده حرکت ایده جک مدافعه
 قطعاتی یالکز ایکی خصم آره سنده قالمق دکل، ایکی آتش
 آره سنده دوشمک بلاسنه معروض بولنه جقدر .

میدان محاربه اوزرنده تعیه جه اک بسیط واک ساده بلانمش
 اولان اصوللارک خارجنده بر اصول یعنی دشمن هجومی کیرویه
 پوشکدرتدکن صکره جبهه ایلروسنه آیلهرق مقابل هجوم
 حرکتلری یایمق ایچون قطعات عسکرینه نک استعمالنه حاکم
 اولمق، دشمنه تفوق ایتک ایسترنه کیم ناپولیون آنجق بو
 سایه ده اودیدیکمز مقابل هجوملری یاپه بیلیمشدی. مشارالیهک
 (اوسترایچ) میدان محاربه سنده کی مقابل هجوملری بو چشید
 هجوملرک اک یارلاق مثاللارندن بریسیدر. لکن او کی مثاللارک
 پک نادر اولدیغنی ده اونوتماغلی یز .

مدافعین آشاغیده سویلیه جکمز اصول سایه سنده هاجمین
 علیه نه بعض باصقینلر یاپه بیله جکدر: قطعی مصادمه نک باشلامق
 اوزره اولدینی زمان یعنی تعرض جهتی بتون هجوم ترتیباتی
 آلوده هجوم قوللاری ایچون قطعی براسقامت کوسترمش اوله-
 جنی زمان مدافعین هیچ بکلنمک براسقامتدن، بشقه بر یردن
 حقیقه بیلور. اوحالده هاجمین طرفی هجوم ایتک ایچون، چاره سز،

جبهه دكيشديرمكه لزوم كوره جك وبو سببدن اوترى ايسه ،
تعرض اردوسنده بر چوق فناقلر، بر خيلي ياكلش-ناقلر باش
كوستره جكدور .

مدافعه ده كي عسكرك حركتسزلكي، مدافعه تعميه وي ايچون
ايجه بيوك بر محذور صايلور. لكن بر باقيمه كوره ، مذكور
حركتسزلكدن باشلي باشنه بر فائده حاصل اولوركه ، اوده
مدافميندن يك او قدر اهليت و متانت بكهده مك، قوماندانلرندن
بيوك براقندار عملي ايستمه مك خصوصلرندن عبارتدر. اولدجه
شدتلي بر هجوم حركتي يانغه كفایت ايتيان عسكرو قوماندانلر
ايله اكثريا مظفر يتله نتيجه نور مدافعه لري باشه چيقارمق ممكن
اولديني تاريخده كي امثالندن آكلاشيلور . بونك سببي ايسه ،
مدافعه و تعرض ايشلري ييننده كرچكدن يك اساسلي و يك مهم
بر فرقك موجود بولنمسيدير. آنك ايچون اكر مدافعه و تعرضدن
بريسفي انتخاب ايتمكده انسان سربست قالدورسه قيمت عسكريه سي
وسطي اولان قطعات ايله ايش باشنه كچمك لازم كلديكي زمان
مدافعه يي قبول ايتمك اك خيري بر حركت صايلور. چونكه
سلامت عموميه اكثريا بو وجهله حركت ايدرك تامين ايديله-
بيلور .



یدجی فصل

تعرض ومدافعه نك بالمناوبه استعمال

تعرض ومدافعه نك مناوبه ایله استعمالنه دائر قواعد صحیحه وضع ایتمک اصلاً قولای بر شی دکلدر. بالعکس بو ایکی شکلک طبیعت اساسیه لرینی کمال دقتله مقایسه ایتمک واردو ایچون اک الویریشلی اولان هانکیسی ایسه، وقت لازمنده آکا قرار ویرمک اوو وجه ایله بر آن اول هدف اوزرینه یوریمک ایجاب ایده جکدر.

تعرض ومدافعه نك بریسنندن اوتنه کینه کچمک خصوصنده ان مناسب زمانی بولمق ایچون سردار اولان ذاتک پک آچیق کوز وسرعت انتقال صاحبی اولمسی شرطدر. اوت، سردار اکرم، بر قاج وجه ایله اردونک نبضنه باقمق اصولنه واقف اولمیدرکه، آندن نه کبی شیرل ایستیه بیله جکفی آکلامش اولسون.

سوق الجیش حرکاتی ایچنده تعرضدن مدافعه یه کچمک لزومی، آنجق، تعرضک ینسه تعرض اردوسی اوزرنده کوسه تردیکی تأثیرات مهلمکه دشمنه قرشو موجود اولان تفوقک ضیاعنه سبب ویره جک صورتده حس ایدلمه یه باشلادینی زمان وقوعه

کله جکدر. ذاتاً تعرضده بتون ایشلرک نقطه غرضی ویا اک ایو
بر تعبیر ایله تعرضک سبب قبولی مذکور تفوقدن عبارت
اولدینی ایچون آنک ضیاعیله برلکده همان مدافعهیه کچمک
لزومی تحقق ایلر. کرجک، شو ایلك تفوقدن ممکن اوله بیلدیکی
قدر استناده اتمک فیکریله بردوزییه ایلرییه کیتمکده اصرار
ایدیلورسه و بو حرکت اک صکره بعض احوال مجبره اوکنده
چوکه رک تعرضدن مدافعهیه کچمک مجبوری قلعیه حاصل
اولورسه، او زمان بیوک بر قباحث ارتکاب ایدلمش اوله جقدر.
شو دیدیکمز حالک بر نتیجه سی اولق اوزره اردونک قوه
مادیه و معنویه سنده ایچ، بر ضایعات حس ایدلمش بولورسه
اووقت هیچ شبهه یوقکه، اجرا ایدیلان قباحث بسبتون دهشتلی
بر قباحث یرینه کچردی.

زیرا قوه مادیه و معنویه نك تنزل ایتسی، تعرض اردوسی
لایق اولدینی توقف نقطه سنک بر قاچ درجه آشغی و کبر و سنده
براقهیه خدمت ایلر. تعرضدن مدافعهیه کچمک ایچون اک مناسب
اولان زمانی اصل باش قوماندان انتخاب ایتلیدر. یعنی مشارالیه
بویله برشی یاپه جنی زمان، آنی زورله یا ماملی، بالعکس تعرضدن
مدافعهیه کچمکده کی فائده نی بالتقدیر کندی ایستکیله تعرضدن
واز کچمش اولمیلیدر.

تعبیه حرکانی ایچنده تعرضدن مدافعهیه کچمک خصوصی

عين شرائط وقواعده كوره اجرا ايديلور. بك ايلريه
 كوتوريلان بر هجوم حركتي اكثر زمان، مشوم بر نتيجه نك،
 عكسي بر ضربه نك ظهوريله نهايت بولور. زيرا، ميدان محاربه ده،
 وقوعات عسكريه سوق الجيش حركتنده اولمديغندن زياده
 بر سرعت ايله يكديكبرني تعقيب ايدرلر. وبر كره يقوش آشاغي
 ايتيمكه، ديك وسرد بر ميل اوزرنده قائمه باشلادقدن صكره
 آراتق ديكش طوتدرمق ايجه كوچ اولور.

لكن تعبيه حركتنده هجومدن مدافعه به كچمك خصوصي،
 سوق الجيشده عيني كچيد حركتلرندن ده قولاى بر صورته
 اجرا ايديلور. تعبيهده هجومدن مدافعه به كچمك ايچون اك مناسب
 اولان زمانى بولمق اكثرته زور برشى دكلدر. تعبيه حركتاني اجرا
 ايديلوركن سردار اولان ذات، كندى اردوسنى كوز اوكنده
 بولنديره بيلدكدن بشقه مصادمه ايديله جك يك هيئت عموميه سنى ده
 نظر تفتيشنده بولنديره بيلور. برده اويله زمانلرده باش قوماندان
 هجوم قولارينك ايلروليه بيله جكلى حدود منطقه سنى ده كوردور
 واوكانظر آ مذكور قطعاني، صكره دن بر فلاكت ظهور ايتيمه جك
 صورتده، سوق واداره به چاليشور.

هجوم قولارينك اك صكره كيده بيله جكلى خط، صورت
 عموميه ده، خصمك مدافعه خطيله برلشور. لكن خط مذكورى
 بر آز ده تفصيلاتيله سويلمك لازم كلورسه، دشمن خط

مدافعه سنك ايجروس-سنده واقع كويلر ، چفلكلر ، بايرلر
 واورمانجقلر كې مدافعه حالته قونلمش بر خېلى نقطه-لرك ده
 آنكله مش-ترك اولديغى سويلملى يز. هجوم طرفى شو ديدىكمز
 يرلرى ضبط ايتدكدن صكره ، دها ايلرى كېتمك-دن چكىنهرك
 بالعكس اورالرده ايودن ايويه برلشمك ايجون موقتاً حال تدافعيده
 قالميه مجبوردر.

اكر آرمده كى مسافه لرك پك-بيوكلې و قطعات عسكريه نك
 آنلرى قطع ايتمك خصوص-سنده اوغرايه جنى مش-كلاتك پك
 زياده لكى سبيله، تعرضدن مدافعه يه چكلمش ايسه، بو حال، اولجه
 آلان ترتيباتك ياكلش بر يولده آلمش اولديغنه اشارتدر .
 بر باقيمه كوره ايشه-باش-لامزدن اول، بحث مذكور ايجون
 اك طوغرى بر يولده حساب ياقمق خصوصى ده پك زور
 برشيدر. كرجك، ديدىكمز كې يابه بيلمك ايجون اكثرياكندى
 كيزلى آرزولر مزله پك قولاي بر صورتده اويوشه بيلان افكار
 مخصوصه مزى ايودن ايويه بر تفتيش ايلمك يولنى بيلملى يز .
 فقط نصل اولسه، ينه بوندن بعض خطالر، بعض خيالار ميدانه
 چيجه جقدر. (۱۸۱۲) سفرنده (ايسمولنسك) دن صكره توقف
 ايدوبده حال تدافعى يه كچمه مش اولمسندن طولايي اكثر محررلر
 برنجى نابوليونى مؤاخذه ايلديلر . چونكه مشاراليه، فرانسه
 اردوسى نه قدر بيوك اولورسه اولسون ، ينه اردونك سوق

واداره سی ایچون آلمان ترتیبات آنک ایلری به طوغری یوروش
یامسنه مساعده ایتدیکنی پک اعلا بیلوردی .

شمدی نابولیون کبی داهی یرادیلان بر عسکر ، بویله بر
قصور یابارسه عجباً دیگر عسکر لر نه یامز لر ؟

زمین عارضه لرندن ویا قوتلی بر موضعک سوق الجیش
وتعییه جه حاصل ایتدیکی منابعدن استفاده ایلمک فکریله
تعرضدن مدافعه یه کچمک خصوصی پک نادراً حصول مقصده
کفایت ایلیه جکدر . زیرا هجوم طرفک او زمانه قدر هجوم
ایتمسی ، مدافعه جهنتک ایسه بالعکس مدافعه ده قالمسی ایجاب
ایدن احوال تبدیل وظیفه یه قرار ویرلدیکی یعنی تعرضدن
مدافعه یه کچیله جکی صره ده بیله ینه کندی تأثیرلرنی کوسرت-
مکدن بر دم کیرو قالمز لر . کرجک ، بزه مقابله ایتمکده عجزنی
اعتراف ایلمش ، کندی ضعیفلکنی طائیش اولان مدافعنک
یکدن بزم آرزولری مزه کوره حرکت ایتمسی وباخصوص قوتلی
ومتین بر موضع اوکنده بولندیغی زمان مدافعه دن تعرضه کچمسی
اوله قولای قولای بایله حق ایشلردن دکلدیر . حتی بونی
تصور ایتمک بیله جائز اوله مز .

تعرض سوق الجیشینک ، ایجاب ایلدیکی بعض مهلتک هجوملر ،
تعرض جهنتک بعضاً مدافعه یه کچمسی ایجاب ایتدیرو لر .
بووجه ایله حرکت ایتدیکنه نظراً هاجین طرفی کندی

استناد قوتلرینی یاننه کتورمک ایچون وقت ، یاخود ، خصم اردوسنی تعرضی محاربه لر ویرمه یه مجبور ایتمک ایچون فرصت بولمش اوله جقدر . اوت ، ینه بو وجه ایله حرکت ایدلدیکنه نظراً ، خصم طرفی تعرضاً یابه جنی محاربه لرده ایجه ضایعاته اوغرامش بولنه جنی ایچون بدایت سفردده اولدینی کبی هر ایکی اردونک قوای موجوده سی بیننده کی نسبت یکی باشدن تأسیس ایدلمش بولنه جقدر .

بو حال اکثریاء ، بز دشمن عسکرینی بر یرده صیقیشدیرمش اولدیغمز زمان شو تضییقدن قورتلمق ایچون خصم قطعائی ، نه اولورسه اولسون ، بر محاربه ویرمه یه مجبوریت کوردکلری صروده ویا بز دشمن اردوسنک اس الحركات ایله اولان طرق اتصالیه سنک اک مهملرینی اشغال ایلدیگمز انشاده وقوعه کلور . لکن شو دیدیگمز احتمالار ، شو کوزل فرصت لر پک نادراً اله کچرلر . نظری بر مطالعه انشاسنده آنلری خاطر دن چیقارمق ایو برشی دکلدرد . بونکله برابر ، عملیاینده آنلر اوزرینه قطعاً استناد ایلماک ده اوله من .

تعرض ومدافعه نك مناوبه استعمالی بعض کره لرده عین زمانده وقوعه کله جک یعنی بر آنده هم تعرض وهم اصول حرب تدافعی یه کوره حرب ایدلمک لزومی کوزیله جکدر . مثلاً بر اردونک مصادمة قطعیه یه اشتراك ایتیه جک اولان بعض اقسام

عسکریه سی قوتجه از بر مقداردن ترکیب ایده جگکری کبی اونلره ویريله جک تعلیمات یالکز دشمنی اشغال ایتک واکر دشمن کندیلرندن بیوک قوتله اوزرلرینه یوریورسه، کیویه چکلمکدن عبارت اوله جقدر . [(۱۸۱۳) ایلک ۲-ارنده متفق اردولری تعرض ایله مدافعه دن مرکب اولان شو اصول مضاعفدن پک اعلا استفاده ایلمش-لردی . یعنی مذکور اردولر، ناپولیونک باشلیجه قوتنه راست کلدکلیری یرده ناپولیون آنلری تعقیبدن اوصاتجه قدر کیرو چکلمه یه وبالعکس، قطعات مفروضیه قوماندا ایدن فرانسه جنراللرینی هیزده راست کلورلرسه آنلراوزرینه کمال شدتله هجوم ایتمه یه قرار ویردیله . یالکز بر کره (بوهمیا) اردوسی، (۲۶ و ۲۷) آغستوس کونلرنده ، شو سویلدیکمز قاعده نک ترسنه حرکت ایتمش، لکن اک صکره (درسد) محال ره سی غائب ایدرک بوحرکتک جزاسنی کورمش ایدی . شمال اردوسی ایله (سیلیزیا) اردوس-نه کلنجه اونلر تمامیه مذکور قاعده ره رعایت ایتمش اولدقلرچون (دنهویچ)، (غروسبه رن) و(قاجباخ) مصادمه لرینی قزائمشلردی . لکن اووجه ایله حرکت ایده بیلیمک ایچونده پک آچیق کوز، پک سرعت قرار وانتقال صاحبی اولوق لازم کلور . (بلوهر) شو دیدیکمز خصوصده اک ایلری کینمش، اک زیاده شرف قزائمش ایدی . کرچک ، مشارالیه ایکی دفعه ناپولیونی (سیلیزیا) ایچرولرینه قدر کنندی

آرقه سنجه سور و ککش و آنک کمال شدتله ایستدیکي مصادمه لرك و قوعنه میدان ویرمه مشدی . بالعکس امپراطور ایکی دفعه نك ایکسینده ده طورمه یه مجبوریت کوردی . چونکه اردوی اصلینک (بوهیمیا) دن (درسد) اوزرینه ایلری یوروشی مشارالیهک او طرفه یوز چورمه سنی ایجاب ایدیوردی . اک صکرده بونا پارط نافله یره کمندی اردوسنک قوتلریفی سوی استعمال ایتمکدن بشقه بر نتیجه قزانه مامشدی .

مدافعه دن تعرضه کچمک ایچون اک مناسب اولان زمانی بولمقدکی مشکلات، اک چوق دشمن اردوسنه دائر قطعی معلومات آلنه مامسی و آلمان معلوماتک اکثراً قاریشیق اولمسی کبی شیردن ایلری کلیور . بزم قوتلریمیزک بردن بره بیومسی ، بالعکس خصم قوتلرینک یکدن کوچلمسی کبی ساده و بسیط حالارک تأثیریه همان تعرضه کچمش اولمق خصوصلری نادراً اله کچه جکدر .

مدافعه نك خاصه طبعیه سی الله اولانی غائب ایتمهک ، تعرضک ایسه دائماً قزانه قدن عبارت اولمسی حالنه کوره تعرضک بیله هر زمان قوت استعمالنه مجبوریت کوره جکی آ کلاشیلور . سردار اولان کیمسه طبقی تجربه لی برایش آدمنه بکزه یور . یعنی . شارالیه کوزل نتیجه لر حاصل اولمیه جغنی بیلدیکي وقت نافله بره قوت صرف ایتمکدن و بالعکس ، کوزل نتیجه لر قازا .

نیله جغه عقل ایردیردیکی زمان ایسه ینه بوش یره قوت اسیر-
 که مکدن چکنمهیه مجبوردر . اوت ، باش قوماندان شو ایکی
 قاعده یی یولیه تطبیق ایتک اصولی بیلورسه قوتلری زمان
 و مسافه ایله متناسب اوله جق بر طرزده صرف ایدر . واک
 صکره موفقیت قزائش اولور . هر نقطه یه مساوی قوتده عسکر
 یایمق ، هر برده مساوی برمتانت کوسترمک فکرینی تجویز ایدن
 جنرال ، پک عقاسمز ، پک دومنسز بر جنرالدر . بالعکس الده کی
 قوتلری حسن استعمال ایدن ، اهمیتسز نقطه لرده اهمیتسز عسکر لر
 قوللانان بر جنرال ایسه دیگر بر نقطه اوزرنده ده کمال شدتله
 حرکت ایتیه و خصم اردوسنه تفوق ایلیه جک صورتده ایش
 کورمه یه موفق اولورکه ، هممزک ایستدیکی نتیجه اشته بونتیجه در .

سکزنجی فصل

حرکات

۱ — قواعد عمومیہ

دارالحرب اوزرنده ظهور ایدہ جک وقایعندن بعضیلرینک دائما حرکات منفردہ حصولہ کتوردکلری کوریلہ جکدر : بو دیدیکمز حرکتلردن هر بریسی کندیسندن اول و صکرہ کی حرکتہ منسوب اولمقدن زیادہ کندی جنسندن اولان حرکتلرہ دها زیادہ مربوط قالہ جقدر . اوت، مذکور حرکتلردہ مقصد عسکری، پک خصوصی برهدف اوزرینہ میل ایدرک او هدف الدہ ایدیلنجہ یہ قدر دیگر هدفلر یا بستون اونودلش و یا خود آنلرہ ایکنجی درجہ دن براہمیت ویرلش اولہ جقدر . دیدیکمز هدف برکرہ الدہ ایدلدکدن صکرہ ایسہ تعقیب اولنان حرکت عسکریہ دہ برکیوشکلک و بلکہ آز چوق اوزون سورر برمولہ زمانی باش کوسترہ جک بعدہ اولکدیسندن دها مستعجل بر یورویش، دها پارلاق بر فکر ایلہ یکی هدفلر اوزرینہ یوریمہ باشلانیلہ جقدر .

بویغین یغین ایشلرک، بو باشلی باشنہ حرکتلرک هر بریسی

برخی یورویشلری، برخی یایلمه‌لری حاوی اولور و بناءً علیه اونلره حرکات عسکریه نامی ویریلور. ایشته بوجه ایله در، که فرانسمز-آلمان سفرینه داتر یازیلان تاریخ حربده بری (سار) استقامتمنده دیکری (موزل) اوزرینه، اوتنه‌کی ده (میچ) اوکنده یاپیلان حرکتلرک هر بریسنه آری، آری برحرکات عسکریه نظریله باقیلدور. اويله ایسه، حرکات ویا وقوعات عسکریه مختلفه یغینلرندن هر بریسی دشمنه حاکم اولمق فکر اساسیله یکدیگرینه برلشورلر. بونسکه برابر، حرکات مذکوره هر حالده بربرندن آز چوق فرقلیدرلر.

بوکی حرکات عسکریه‌دن هر بریسی عین موسمده، عین شرائط ایله وعین دشمن اردوسی علیه‌نه سوق ایدلمش اولدقلری زمان آنلردن برچوغی آره‌سنده بشقه‌درلو برارتباط، برارتباط اتفاقکارانه موجود اوله‌جقدور. بناءً علیه شو یولده برارتباط ایله بربرینه باغلاشمش اولان مذکور حرکات عسکریه اوتنه‌کیلرندن پک‌زیاده فرق ایده‌جکلردر. زیرا اوتنه‌کیلری دیدیکمز حرکات، بشقه دشمنلر علیه‌ننه و بشقه شرطاره‌کوره، بشقه زمانلر و بشقه یرلرده بشقه درلو اصول حربلر ایله اجرا ایدلمش بولنه‌جقلر. در. سویلدیکمز حرکاتک هیئت عمومیه‌سی، حربک پک معین و بسببلی بر دورینی تشکیل ایدن (سفر) نامی آئتمنده ذکر ایدیلورسه پک ایو برشی اولور، ظن ایدرم.

بو سفر تعبیری اسکی زمانلرده آنجق موسملره تطبیق
ایدیایوردی. نته کیم اسکی تاریخلره کوز کزدردیکمز وقت
اکثریا (قیش سفری)، (یاز سفری) کبی سوزلره تصادف
ایلرز. لکن اردولرک عددی کیده کیده آرتمة-ده، ودار-
الحربلرک وسعت وامتدادلری ایسه-ینه کیده کیده بیومکده
اولدینی ایچون شمدی جغرافیا نقطه نظرندن حصوله کلان
فرقلری ده علاوه ایتمک لزومی آشکار اولمشدر. ایشته بوندن
طولای درکه فرانسه- آلمان سفرینه دائر یازیلان تاریخ حربده
(لووار) سفری، فرانسه-نک شمالنده کی سفر، فرانسه-نک
شرقنده کی سفر نامیله برقاچ سفره تصادف ایدیورز. عملیات
نقطه نظرندن باقیلورسه، بوسولدییکمز تقسیماتک عسکرلک صنعقی
اوزرینه هیچ برفائده سی یوقدر.

لیکن تقسیمات مذکوره کچمش وقوعانی ایودن ایویه آکلامق،
وکه جکده کیلری ده-ینه ایودن ایویه دوشونمک ایچون بزم ایجه
ایشمزه یارار. مستثنا قیلندن اولمق اوزره بر حرب، یالکز
برسفرایله نهایت بوله بیلور. بونک ایچون اوپله بر حربیه هم سفر،
هم حرب نامی ویرلمکده هیچ بر بئس یوقدر. (۱۸۶۶) ده کی
بو همیا حربی (سفری) بو بایده ایو بر مثال اولور.

بر آز یوقاریده سویلمش ایدک که، شمدیکی زمان حربینه
دائر اصول وقواعدک طبیعت اصلیه سی بیله وقایعک بردوزییه

جریان ایده بیلیمش اولمسی طلب ایدر. لیکن بتون بر حربه، بتون بر سفره نسبتاً بو سوزی حرفی حرفه قبول ایتک لازم کلز. چونکه هیچ بر قطعه عسکریه استراحت ایتمکسزین، اویقو اوبومقسزین، کیجه کوندوز یوریمیه و محاربیه ایتیمیه مقدر دکلدرد. هر فصل اولورسه اولسون آره یرده اویقو واستراحت زمانلری براقق لازم کله جکدر. لیکن بر منفرد حرکت یاپلدیغی زمان ایشلرک هیچ اولمزسه بر نقطهیه قدر فاصله سز دوام ایتمش اولمسی ایجاب ایلر. حقیقت! شویله بر حرکت یاپلدیغی زمان دشمن طرفی آز بر وقت ایچنده مقصد نه دیمک اولدیغی آکلار و آره یرده ویریلجهک فاصله لردن بالاستفاده مقصد مذکوره ممانعت ایچون الدن هر نه کلورسه آنی یانغه چالیشور. یالکیز بر کوندن عبارت وفتسز بر موله زمانی، علی الخصوص تعرض جهتی ایچون پک فنا حاللرک ظهورینه واسطه اوله بیلور. اکر (۱۵) آغستوس (۱۸۷۰) کونی برنجی وایکنجی آلمان اردولری اقامت حالنده قالمش اولسه لردی، (بازهن)ک معهود فلاکتدن قورتلیمش اولمسی اغلب احتمال ایدی. مشارالیهک اویله بر فلاکتیه اوغرامش بولمسی ایسه الکچوق کندی قطعات عسکریه سنی حرکت ایتدرمک ایچون بو (۱۵) آغستوس کوندن جداً استفاده ایده مه مش اولسندن ایلری کلشدی. مدافعه ده قالان بر اردو ایچون ایشک حد ذاتنده بعض

فاصله‌لری اولمق بک طبیعی بر شیدر . چونکه بوراده خصم جهتک حرکتنه انتظار ایلامک لزومی واردر . لکن شوقاصله‌لر ، مدافعین ایچون اکثریا زمان قزانمق فیکرله ایشلری بویسه سوروکلوب کوتورمکدن عبارت اولان مقصدک ، جریانه برمانع دیمک دکدر .

فقط اکر یالکز بر وعین حرکتک جریانی انناسنده تشبثات عسکرینهک هیچ اولمزهسه امکان داخلنده بر فاصله‌یه اوغرامه‌مسیچون عسکرک محتاج بولنه جنی هر شیئ اک بیوک بر دقتله حاضر ایتش اولمق لازم کلور .

کرچک ، بویله بر زمانده ، باشلانیلان حرکتک دوام‌ایده‌جکی بتون مدت انناسنده ارزاق وجیخانه‌کی مالزمه سفریه‌نک اکمال وتجدیدینی ممکن اوله‌بیلدیکی قدر کوزل اصولاره کوره تنظیم ایتک ایجاب ایلر . بونک ایچونده لازم کلان شرطلردن بریسی آرده‌کی مسافه‌لرک بر یورویشده آلنه‌میه‌جق درجه‌ده بیوک اولمالریدر .

کرچه ، تاریخ عسکریده ، بربری آردنجه بش ویا آتی کونلک یورویشدن زیاده بر مسافه قطع ایتکه لزوم کوسترن حرکات عسکرینهک ، مقصد وهدف اصلی هیچ بر تعدیلاته اوغرامقسزین ، اجرا ایدلیدیکی کورمک ایجه نادراً تصادف ایديله‌جک شیلردندر . عسکریورویشه دوام ایده‌میه‌جک صورتده

یورغون دوشمش اولدینی ایچون بر حرکت اورطه سنده طور مق
هیچ شبهه یوق که ، مذکور حرکتك هدفی، نتیجه سی اوزرنده
بر تأثیر کوستره جك احوال مضره دندر . چونکه دشمن جهتی
شو سویلدی کمز توقفی کورنجه، بری طرفك اوستندن کله میه جکی
بر ایشه کیریشدی کنی آکلار و بوندن اوتری کندی عسکرینك
امنیت شخصییه وقوه معنویه سی آرتش اولور .

اگر قطع ایدیله جك مسافه لر ، کرچکدن پك بیوک ایشه ،
او زمان ایشك اك ایوسی یا حرکاتك آرقه سی کسمك و یا خود
ایشه باشلامزدن اول خصم طرفندن کورلمیه جك وجه ايله
هدفه ایجه یناشمق لازمدر .

اوت، شو دیدیکمز یاپیلور و قطعات عسکرینه نك هپسی
برنفسده، بر کیدیشده هدفه یتیشه جك وجه ايله یقین بر منطقه یه
ککش بولنورسه او زمان بوراده ارزاق و مهمات عسکریه جمع
ایتدکدن بشقه ایلری کیتمک و تصادف ایدیله جك موانع
طبیعیه یی برر برر آنلامق ایچون ایجاب ایدن وسائط و طرق
هپسی کذلک حاضر ایتمک لازم کلور. [°] والک صوک تدارکات

[°] ۱۸۰۹ پورتکیز سفرنده ماره شال (سوات) ك ۳۰ آلمان
میلندن (۲۲۵ کیلومتره) عبارت بر طولاشمه یامسی ، فضله بر یول
قطع ایتسی (آشاغی مینو) اوزرنده بر کچید نقطه سی بولمق ضرورتنه
باء واقع اولمشدی . مشارالیه ایشه کیریشمزدن اول بر آز دقتمز

اکال ایدیلنجه بر دقیقه ضایع ایتکسزین همان یوروشه باشلامق
ایجاب ایدر. شبهه سزدرکه، ایلری یه طوغری یورونیلدیکی ائزاده
سویلدیکمز منطقه اوزرنده کی بتون خطوط اتصالیه نك الدن
چیقمامسینه صولك درجه ده چالشمه یه مجبورز. چونکه منطقه
مذکوره یاپیله حق حرکات عسکریه نك تملاری برنده در. بناء علیه
عسکرلک صنعتنده اس الحركات نه دیمک اولدیغنی بر آز ایضاح
ایتمک لزومی آشکار اولور.

۲ — اس الحركات

بر زمانلر اس الحركات دنیلدیکی زمان بوندن کوزلجه تعیین
ایدلمش بر جغرافیا خطی آکلاشیلوردی که، آنک الدن چیقمامسی
ایچون بعض ترتیبات خصوصیه آنور و مثلاً سر کوپری
استحکاملری، مستحکم اردوگاهلر و قلعه لر کی نساثر بعض شیلر
یاپیلوردی. اکثریا بر سفرك بتون عملیات، بتون حرکاتی
بر مدت صکره وریله جیک سفر ایچون متین بر اس الحركات

حرکت ایلدیکی ایچون اک صکره شویولده کی عمانک جزاسنی کورمشدی.
کرچک، فرانسر اردوسی، پورتکیز اها لیس کنیدیسنه خصوصت کورستر.
میه جک وبوندن اوتری کچیدلر و کوپرلر نخریب ایدلیه جک دیه کنیدیسله
برابر بر کوپریمی طاقی آلتی ایستاماشدی.

حاضر لامقدن بشقه بر هدفه مالك اولمزدی. یعنی شودیدیکمز
 عملیات یالکز اس الحركات اولان یرلرک تأمین اسنقبه‌الی یولنه
 حصر ایدیلوردی. اوت، بو ایلك سفر اثنا سنده یالکز بعض
 قلعه‌لر، بعض مستحکم موقعلر ضبط ایتمکه قناعت کوستریلوردی.
 مذکور قلعه‌لردن بکلنیلان مقصد ایسه بر مدت صکره یعنی
 ایکنجی سفر تعقیب اولنه جنی زمان آنلر واسطه‌سیله دشمن
 مملکتنه کیره ییلمک ایدی. بوندن آکلاشیلورکه، اس الحركات
 مختلف نقاط اصلیه‌سی یئنده پک کوزل برطاقم خطوط اتصالیه
 اولدقدن بشقه مذکور نقطه‌لرک ایلربنده و کیربنده ینه اولدجقه
 کوزل یوللاردن متشکل بر یول شبکه‌سی بولنوردی. بناء علیه
 تعبیرک ینه اسکی معناسنه کوره اک کوزل اس الحركات، باشلیجه
 کچید نقطه‌لری هر ایکی ساحله حاکم قلعه‌لر ایله مدافعه ایدیلان
 ویوزلمسی ممکن اولان بر صو مجراسندن عبارتدی. کذلک کوزل
 بر عسکر یولی ایله بربرینه مربوط و مواقع مستحکمه‌دن مرکب
 اولان خطرلده عین خدمتی کوره بیلورلردی.

بو اس الحركات بونجه، مستحکم موقعلرله ستر ایدلمش
 برچوق مغازه‌لر تاسیس ایدیلوردی که، مذکور مغازه‌لرده ینه‌جک
 وکیله‌جک شیلرله بتون بر سفر ایچون کفایت ایده‌جک درجه‌ده
 جبجخانه و سائر طوپانلوردی. اوندن بشقه ینه اس الحركات
 بونجه بعض فابریقه‌لر تاسیس اولنوردی که، او سایه‌ده هم

بوزلش اولان مالزومه سفریه تعمیرایدیلور، همده ایجاب ایتدیکی
 زمان یکیلری یاپیلوردی. كذلك اس الحركات اوزرنده طوبجی
 بارقلری، کوپرچی وقافله طاقلری جمع ایتدیرلدیکی کبی یکی
 قرعه نفرلرینه مخصوص دبویلرده تأسیس اولنوردی. حاصلی،
 سه تن ضایعاتی، بتون یورغلغنی متعاقب اس الحركاتك
 دانی بر امنیت ایچنده قالمسی تأمین ایچون کیروده کی اردونك
 قسم اعظمی ینه آنك اوته سنه بریسنه طاغیدلش بولنوردی.

اگر بو اردو دشمن مملکتی ایچرولرینه طوغری یورویه-
 جك اولسه، مؤخرآ آنك هر درلوماالزومه سفریه سنی یتشدیرمك
 ومنطقه الحركاته قومشویکی براس الحركات یعنی متوسط براس الحركات
 وجوده کتورمك ایچون برنجی اس الحركات اوزرنده یاپلمسی
 لازم کلان ترتیبانك هپسی یاپیلوردی. کرچه بو ایکنجی
 اس الحركات برنجیسی قدر مکمل برطرزده تأسیس ایدیه مردی،
 لکن هر حالده اردونك بر قاج کونلك احتیاجنی بر طرف
 ایده جك مالزومه سفریه مالک اولسی لازم کلوردی.

اجراآت عسکریه لری بزه نه قدر جراتکارانه کوریلورسه،
 کوریلسون! بتون بیوک قوماندانلر ایوبر اس الحركاته مالک اولمق
 خصوصنه کرچکدن بک بیوک اهمیت ویرمشلردر. ایرانلیلر اوزرینه
 قزاندیغی ایلک، ظفریتلرندن صکره حاصل ایلدیکی موفقیتدن لایقيله
 استفاده ایتمک ایچون اسکندر هیچ شبهه یوق که، آنلرک بوزوق اردوسنی

خطوه بخطوه نفیت ایتک ایستوردی. لکن (غرانیکوس) محاربه سندن صکره اولدینی کبی (ایسیوس) مظفریتدن صکره ینه مشارالیهک آق دکر کنارلری بونجه یایلدیغنی و ماکدونیا ایله اولان اتصالاتی کرچکدن ابو بر یولده تأمین ایتک بعض لیمانلر ضبط ایتک خصوصنده ایجه اوزون زمانلر کچوردیکنی کوریورز. حتی مشارالیه آسیا ایچرولرینه کیرمزدن اول مصرک فتح واستیلاسنی بیله آئیده کی سفراچون مطلق الزم عد ایلوردی. اوفاجق ماکدونیا قطعه سندن ایجه اوزاق دوشدیکنی زمان بیوک اسکندر آسیایه کیررکیرمز کندی اس الحركاتی دیکشدردی. و آنی یکی باشند دکرک شرق کنارنده تأسیس ایلدی.

برنجی ناپولیون ده بتون اجراءات سفریه سی ایچون کوزل ومعین بر اس الحركات حاضر لاق خصوصنده هیچ بر شیدن کیرو طورمزدی. مشارالیهک (۱۸۱۳) آلمانیا سفریچون بو باده آلدینی ترتیبات یک زیاده شایان دقتدر. اوت، ناپولیون، کجن قیش موسمنده، (ویستول) خطنی، صکره (اوده ر) خطنی الدن چیقاردقن صکره (الب) نه رینی یکی باشند بر اس الحركات یرینه قویمش ایدی. ایلک اوکجه دارالحربک پروسیه و پولونیا مواقع مستحکمه سنده برافش اولدینی قوتلی محافظ مفرزه لرله ایودن ایویه بر ارتباط حاصل ایتک ایچون سو بلدی کمز نهرک جنوب مجراسندن باشلایه رق کرچکدن

يك بيوك بر تعرض حركتى يامق ايستيوردى . مشاراليه اس الحركات يرندة قولالانق فـكـريله اك زياده (ماغـده بورغ) و (هامبورغ) موقعلرينه و (الب) نهرينك شمال قسمنه اهميت ويريوردى . ايشته بونك ايجوندره ، پرنس (اوژنه) روسيه دن كتوريلان اردونك اقسام باقيه سـيله (برلين) يولى اوزرنده و (ماغده بورغ) ك بر آز ايلروسنده مهلك بر موضع طوتمسنى امر ايلمش ايدى .

سفر ك ايكنجى قسمنده امپراطور احوال مجبره نك تأثيريله چاره سز قبوله مجبور اولدينى مدافعه ايجون (الب) نهرينك وسط جهتلرى اس الحركات اولقى اوزره انتخاب ايلدى . شو اس الحركات اوزرنده برلشمك ايجون ، مشاراليه ك صرف ايلدىكى مهارت عسكرينه ي ايدون ايويه آكلامق بزجه اك بيوك منافعى تأمين ايدە جك شيلردندر .

فى الحقيقه ، ناپوليون (الب) نهرى اوزرنده (ماغده بورغ) (ويتن برغ) ، (طورغار) كې يالكر اوچ موقع مستحكمه مالك ايدى . أزوقت ايجنده (هامبورغ) و (درسد) موقعلرينده برر موقع مستحكم حالنه قودى . بوايكى قصبه دن برنجيسى هيچ بر معاونت كورمكسزىن ايجه اوزون بر زمان دشمن عسـكرينه مقابله ايدە جك صورتده متين استحكاملر ايله تقويه و تجهيز ايدلدى .

(درسد) قصبه سى ده كذلاك ايجه كوزل طابيه لر واستحكاملر

ایله طونادلدی. ایمپراطور نصل اولورسه اولسون، مذکور اس
الحركات اوزرنده ایچه بر زمان قالدیهلجهکفی ظن ایدییوردی،
حق (الب) نهری ساحلارندهکی مستحکم موقعلره ایکی دانه ده
علاوه ایتک بیهلایستیوردی. کرچک مشارالیه (پلاوئن) قنالک
(الب) نهریله برلشدیکی نقطه یی تحکیم ایتک وینه (الب) نهریله
(هاول) ملتقاسنده بعض استحقاکلر پادیرمق فکرینه دوشمش
ایدی .

لکن شو دیدیکمز پلان فصلسه باشه چیقاریلهمدی. بودرلو
حرکت ایلدیکینه کوره ناپولیون (مکلنبورغ)، (سیلیزیا) و (بوهمیا)
ایچرولرندن کچن بیوک بر قوس دائره ایله کندیسنی تضییق
ایتمکده اولان متفقین اردولرینه مقابل تعرضلر ایله هجوم ایده-
بیلیمک ایچون ایلرویه طوغری یوروش یایمهیه باشلادیفی زمان
آراق اس الحركات تأمین غائله سندن قورتلشمش اوله جغنی امید
ایلیوردی .

مشارالیه (الب) نهری اوزرندهکی ،واقع مستحکمه دن هر
درلو مالزومه سفره طوپلادی . حاصلی قطعی واوزون بر سفر
تعقیب ایده بیلیمک ایچون بیهجک، کیهجک نقطه نظرندن عسکره
هرنه لازم ایسه آنلرک هپسین برر، برر حاضر ایتدی .

لکن اونوتاملی زک، اس الحركات شو دیدیکمز وجه ایله
ترتیب وتنظیم اولنسی ایچون ایجاب ایدن زمان بوناپارطک اولجه

فصل سه عقد ایتش بولندینی اوزون بر متارگه سبیلله میدانه
کلمش ایدی.

وقوعات یومیه، دائماً لازم کلان فاصله لری، ایجاب ایدن
آره بقلری حصوله کتوره مز. زنکین بر منطقه، هر نوع طرق
اتصالیه ایله مجهز اولان زنکین بردار الحركات شو دیدیکمز
خصوصده پک چوق فائده سی کوریلان شرطلر دندر.

غرب مملکتلرنده اولدینی کبی پک صیق شمندوفر شیکه-
لرینک وجودی، بر مملکتک اک اوزاق یرلرندن احتیاجات سفریه،
قوای امدادیه کتورتمک و سیله در. آنک ایچون بویله مملکتلرده
معین بر منطقه نك اس الحركات یرینه کچمسی آرتق ایچه زماندن بری
حکمدن ساقط اولمش برشیدر. یعنی شمیدیکی زمان سفرلرنده بر مملکت
باشدن باشه بر اس الحركات دیمکدر. حتی دشمن کندی شمندو-
فرلرینی قطعاً تخریب ایتش اولمداقچه، دشمن طویراغنده کی
تیور یوللرندن ده استفاده ایتک ممکن اولدینی ایچون حدود
بوی اراضیسنک بیله آرتق بر مانع یرینه کچمسی چوقدن بری
کچمش، حکمدن دوشمش بر مسئله در. شیمیدیکی زمان سفرلری
بالعکس، محترک بر اس الحركات اوزرینه استناد ایدرلر. اونک
ایچون زمانمز حر بلرنده کورلمه دک بر سرعت، ایشیدلمه دک بر
شدت کوسترمک ممکن اولور.

دلیله، اثباته حاجب یوق! متحرک بر اس الحركات مالک اولان

بر اردونك بولندينى وضعيت نه قدر ايو بر وضعيت اولدينى
 كندى كندينه كوريلور. بونك ايچون تعرض جهتي دارالحركتك
 ايلك نقطه سندن اوتكه اوجنه قدر هر طرفي شمندوفر ايله
 طوناتميه واولرى پك ايو بر صورتده ايشلمتميه دائر هر نه
 يامق لازم ايسه آنلك هپسنى حاضرلاميه مجبوردر. اگر اويله
 يامز يعنى شمندوفر تشكيلاتى نقطه نظرندن ايجاب ايدن بتون
 ترتيبانى اجراده بر قصور ايتمش ايسه، مدافعه جهتي بومساحمه دن،
 بو قصوردن پك چابوق وپك چوق استفاده ايدم جكدرد.

مدافعين جهتنه كلنجه اوراسى ده، دشمنه ترك ايدملك مجبو-
 ريتى حاصل اوله جق يرلرده، شمندوفرلرى، هاجميك ايجه بر
 زمان ايشينه كليه جك صورتده بوزمه يه چاليشه جقدرد.
 مدافعين شو ديديكمز وظيفه يى يا بعض مواقع مستحكمه
 سايه سنده وياخود شمندوفرلرى سد ايليان بعض قلعه لر ايله
 اجرا ايدم بيلمش اوله جقدرد.

اس الحركات ايو بر اس الحركات اوله بيلمك ايچون واسع
 بولمق شرطدر. بالعكس اگر امتدادى جزئى بر خطدن وبله
 يالكز بر نقطه دن عبارت اولورسه آنلره استناد ايدن اردوين
 بولندينى يردن خارجه آتمق پك قولاي برشى اولور. هر حاله
 اس الحركات اردونك بتون قوتيله متناسب اولمليدر. بر قاچ يوز
 بيك كيشيدن تركب ايدن بر اردو، يالكز بر ويا ايكي مستحكم

موقعه استناد ایلدیکي زمان کوزل بر اس الحركاته استناد ایتش صایله مزه. هر شهیدن صرف نظر بو درجه بیوک اردولرک یالکز اعاشه سیچون بر خیلی فابریقه لره، مغازه لره لزوم واردر. اوندن بشقه دیدیکمز اردولری یشانه بیلیمک ایچون ایجه بیوک مسافه. لرده بولنمق لازم کلور. پک طار، پک محدود یرلره استناد ایلدیکي زمان بتون حرکات عسکریه سکتیه اوغرامش بولنور. دکر آشوری یاپیلان اجراءات عسکریه نك مشکلات اساسیه سی اک چوق اشته بویه یالکز پک محدود لیانلره استناد ایدلمش اولمقدن ایلری کلیور.

اس الحركات بر تیمور یولی شبیکه سندن تشکیل ایدلمش اولدینی زمانلر بیوک بر اردو، یالکز بر خطه استناداً ایش کورمک خصوصنده ایجه مشکلات چکه جکدر. اگر مذکور اردونک بر آزدها کنشجه نفس آلمسی، بر آزدها سربست حرکت ایتسی آرزو ایدیلورسه اس الحركات اوزرنده خط الحركاته موازی بر چوق یوللرک دها بولنسی لازمدر.

بر اس الحركاتک شکلی خط مستقیم اولمق فائده لی بر شی دکدر. و اگر اس الحركات، دارالحربی ایکی کناری بوخنده قو- شائش اولورسه او زمان شو وضعیت کرچک، اک ابو بر وضعیت اولور.

علی الخصوص شو ایکی کنار، شو ایکی خط زاویه قائمه

تشکیل ایده جگ وجه ایله بربرینه یا قلاشمش اولدقلری زمان
 اس الحركات اعلا دن اعلايه بر شكه، بر وضعيته مالك اولمش
 بولنور. چونكه ديديكمز زاويه نك ايجروسنده حرکت ایدن
 اردو، بر برندن قطعياً فرقلی اولان ايکی استقامتک
 ايکيسنه ده استناد ايده بيله جکدر. بو درلو اس الحركاته
 کونیه واری اس الحركات نامی ویریلور. (۱۸۰۶) سفرنده
 برنجی ناپولیون یوریشه باشلامش اولدینی (مابن) خطندن
 بشقه کندی صولی استقامتجه کیدن (رین) خطنی ده
 بر اس الحركات یرینه قويدینی زمان، شیمدی سويلدیکمز جنسندن
 بر اس الحركات وجوده کتورمک ایستمش ایدی.

اک ابو وضعیت کیرو جهت لرده بر ویا بر قاج تیمور یولی
 خطنه مالك اولقی وایلری کیدلدیکی زمان دار الحربی عرضاً
 وبویدن بویه قطع ایلان دیکر بر شمندوفر خطنه راست کلمک
 خصوصنده مشکلات چکلمیه جکنه امین بولنقدرد. لکن شو
 ديدیکمز فائده لرك هپسی بر آره یه طوپلامق ايجون دار الحربک
 تشکل سیاسی و مدنیسی فوق العاده مستثنا و او یغون بر حالد
 اولقی لازمدرد.

اجراآت عسکریه اثناسنده، اس الحركاتک دیکشمه سی وحتی
 بو دیکشمه خصوصی وقوعه کلدکدن صکره کندی مملکتتمزک

تیمور یولی شبیکه لرندن استفاده ایتمک ممکن اولسه بيله ينه پك چوق مشكلاته سبیب ویردجکدر .

شمديکي بيوك اردولرک کيرولرنده اکثريا بيوك برقاريشقلى ظهوره کلمک طبيعیدر . چونکه دیدیکمز يرلرده کی مأمورین عین زمانده پك قاریشیق وپك چوق مسـئله لری حل ایتمک مجبوریتنده قالورلر . اوندن بشقه عسکرک بیه جکی وکیه جکی کبی شیرینی ، بو جسم یغینلری بر شمندوفر دن اوته کی شمندوفره نقل ایتمک صبرسز بر قوماندانک آرزو ایتدیکندن زیاده وقت وزمانه احتیاج کوسترر .

بوندن آکلاشـیلورکه ، یوروش حالنده بولنان اردونک کیدیشـنه کوره اس الحركاتی یواش یواش ایلری کوتورمک ، علی العاده بر وجه ایله دیکشـدرمک دها قولایدر . وشو دیدیکمز کبی یاپلدینی زمان آرتق اولجه موجود اولان اتصال یوللری اوزاتمق وایلرولیان قطعات عسـکریه نک اشغال ایلدیکی شمندوفرلری یکیدن ایشاتمکدن بشقه برشیده لزوم قالمز . یالکز اک چوق نظر دقتی جلب ایدمـجک ، حل ایدیله جک بر مسـئله قالورکه ، اوده اردونک بتون مالزمه سفریه سی شمندوفرلر واسطه سیله یکی نقطه لره کوتورمکدر .

بر اس الحركاتی ایلری کوتورمک ایستـیله جکی زمان ، دار الحرب هیچ اولمزسه یالکز بر جهتدن دکر کنارینه استناد

ایلدیجه اردوی بری ایله دونما یکدیگر بنه متناظر آ پک بیوک خدمتار یابه بیله جکدر.

ژاپونلر، چین استیلا سنده بزم ایچون بو خصوصده لازم کلان اک ایو بر متال وجوده کتورمشلردر . حقیقت ! ژاپونیا لیلر غوغانک ایلاک سببی ، ایلاک هدف ظهوری اولان (قوره) شبه جزیره سندن ایشه باشلادیلر . بوراده مظفریت قزاندقن صکره (بالو) حدودینی آتلادیلر . واو آندن اعتباراً اردویی (قوره) لیمانلردن یعنی قرهیه چیقمش اولدینی لیمانلردن آیران مسافه ایجه مهم بر مسافه ایدی .

بونک اوزریته ژاپونیا دونماسی ایکنجی بر اردو ایله چین عسکری لیمانلردن (پور آرتور) پیشگاهنده کوردی . ودر حال آنی ضبط ایلدی . بر آز وقت صکره ایسه ، ینه مذکور دونما (وای - های - وای) موقعی ده اله کچوردی . ایشه بو ایکی موضع، اردوی برینک توسیع فتوحاتنه اک چوق یارایان ایکی مهم نقطه، ایکی دیرسک نقطه می رینه کچمشدی .

یالکز وضعیتلری ایجابندن اوله رق مذکور ایکی نقطه (یه چیلی) کور فزی حوضه سنه اوت ، شو بیوک حوضه یه بیله حاکم اولیورلردی . چونکه ساحلک هر نقطه سندن ارزاق ، جیخانه وقوای امدادیه کتورمک پک اعلا ممکن اولمش ایدی . اگر هاجین بو ایکی لیمان قرشوسنه پک ارکندن چیقمش

اولسه لردی ، چینلیلر او زمان مذکور لیمانلری دشمن الندن
آلماق ایچون اورایه بر قاج اردو کوندره بیله جک کردی . بالعکس اگر
هاجین دیدیکمز لیمانلر اوکنده پک کچ ظهور ایتیش اولسه لر
ایدی او زمان مقصدینه ایرمش بوله میه جقدی .

اسکی زمانلرده اسکندر ده شو اصولی قوالانمش ، لکن
پک بیوک بره قیاسده قوالانمشدی . کرچک ، مشارالیه کرک
هندستانه کیدرکن و کرک اورادن دوزرکن کندی بری اردوسی
(نیارق) فیلسنه استناد ایتدیرمش ایدی .

حاصلی هر زمانک بیوک قوماندانلری یاپه جقلری حرکات
عسکریه نی فوق العاده امین و پک قوی بر اس الحرکانه ربط
ایلماک ایچون صوک درجه چالیشمشلر وبو خصوصه کرچکدن
پک بیوک اهمیت ویرمشلردر .

(۱۸۱۳) ده نابولیونک (بلوهر) ی تعقیب ایلدیکی انشاده
ایکی دفعه (سیلیزیا)یه کلدیکنی و تکرار (ساقسونیا)یه دوندیکنی
کورپورز . مشارالیه بویله یامیشدی . چونکه (بوهمیا) دن کلان
متفقین اردوسی (الب) ایله (درسد)ی تهدید ایلوردی .

فقط ینسه بعض احوال چیقہ بیلورکه ، اوراده بر اردویی
سوقه مأمور اولان کوزلر دائما ایلرویہ باقیه و بالعکس موقت
بر زمان ایچون کیرولره باققدن واز کچمه یه مجبور اولورلر . شو
دیدیکمز حاللر ایسه الک چوق مثلاً بز تعقیب ایلدیکنمز هدفه

ایره جکمز زمان، اکر ترک ای دیلان اس الحركاته مقابل ایلریده کی
تشبثاتمژک استنادینه یارار یکی بر اس الحركات الیه ایدم بیلور
ایسه ایشته او وقت ظهور ایدر. جنرال (شرمان) ک (آتا-
لانتا) دن (صاواناخ) و واورادن صکره جنوبی و شمالی (قارولین)
آره سندن کچم رک (غولدشوروی) و (رالایغ) و دک اولان سفری
پک پارلاق بر موفقیت ایله نهایت بولمش و دیدیکمز جنس-
دن بر حرکت فوق العاده در.

لکن مشارالیه دشمن قطعات عسکریه سندن بسبتون بوش
اولان یرلردن کچدیکنی و بویرلرده اردونک اعاشه سینه دائر
لازم کلان هر شیئی تدارک ایتک ممکن اولمش بولندیغنی ده
سویلمی بز. اوندن بشقه جنرال (شرمان) دکزکنارلرینه یتشمش
اوله چنی زمان دیگر بر اس الحركات بوله جغنه ده امین ایدی.
بوکی بر حرکت کیریشمک ایچون ایلک اوکجه مذکور حرکتی
پک بیوک بر دقت ایله حاضر لامق لازم در. ثانیاً ایش باشنه
کچه جک اولان ذاتک، فکر و قرارنده ثابت اولمش و دشمن
اوزرینه تفوق ایتش بولمسی ده شرط اعظمدر. [*]

بتون شو کوزلم فائده لر ایله برابر ینسه بر اس الحركات
بسبتون ترک ایدلمش اوله چنی زمان آتی ترک ایدنلر دائماً مجهول

[*] تالانتادن حرکت ایلدیکی زمان (شرمان) کندی نقلیه عربده
لرنده یکریمی کونلکدن زیاده بیه جک بولندیر یوردی.

بر تهلیکه اوزرینه صچرامش اوله جققدردر . بوکبی تشبثلرده
 عسکرك چوقاغی يك بیوك تاثیر لر کوسه ترر . هر حاله قوه
 عمومیه مملکتک ثروت وسامانی وبونلرک منابعی ایله متناسب
 اولمایدرد . (شرمان) جنوبی (قارولین) و (ژه اورژی) کبی اهایلیسی
 جزئی اولان مملکتلر ایچنده (۶۵) بیك کیشیلک براردوباشنده
 بولنیوردی . شویله بر اردو ایسه دیدیکمز مملکتلر ایچون ایچه
 بیوک ومهم بر اردو صاییلوردی .

زمانزده اردولرک قوه عمومیه سی ملیونلری کچمکده اولدینی
 ایچون اس الحرکانه کیدن طرق اتصالیه نی بسبتون ترک ایتمک
 يك چوق مشکلاتی موجب اوله جقدردر . یالکز اگر بیوک بر
 محاربه دن اول ، ابو بر هجوم استقامتی الله ایتمک ایچون طرق
 مذکورہ ترک ایدلمش بولنورسه او زمان يك چوق مشکلات
 چکلمیه جکدرد . نته کیم (۱۸) اغستوس (۱۸۷۰) ده آلمانلر
 (سن بریوا — لامونتان) ده بویله جه یامشلردی .

کرچک ، آلمانلر بو محاربه نی قزاندقلری کبی بسبتون سربست
 بر حاله کلدیلر واولجه ترک ایدیلاں طرق اتصالیه نی تکرار اله
 کچوردیلر . هانکی احوال خصوصیه ده وهانکی درجه یه قدر
 اس الحرکاتی ترک ایلمک ممکن اوله جغنی آکلامق ایچون امین
 وسریع بر نظر صاحبی اولمق لازمدردر . چونکه اگر غیرمساعد
 وترسنه بر حال ظهورایدردسه بوندن بعض يك مشثوم واغورسز

نتیجه لرك چيغه جفى طبيعيدر . نتـهـكـيم (۱۷۹۳) كانون اولنده
 (لوار) ك شمالنه طوغرى يورويش ياپان (وانده) بيوك اردو -
 سنك باشنه او ديديكمز بلالر ، اغورسنز نتيجه لر برر برر كلكش
 ايدى . لكن هر شينه رغماً ، اس الحركاتلرى ترك ايلمك قور -
 قوسيله سوداي مظفريتلى برر درلو انكله طاقيلان جنراللر
 كرچك پك نادراً بيوك نتيجه لر قزانمش اوله جققلدر . دائماً
 اس الحركاتلرينك تشكيلات وتأميناتى دوشونن جنراللر ، اكثرياً
 ايش ايچون اك الويريشلى اولان زمانى غائب ايدرلر و آندن
 هيچ بر فائده كورمزلر . كرچه كندى ايستكيه كندى اس
 الحركاتى ترك ايلمك ايجه زور بر شيدر . لكن بو خصوص
 دشمن تاثيريله آب آلسزين وقوعه كلك لازم كلورسه او
 زمان چكيله جك مشكلات اوندن يوز كره ده شيدتلى اوله -
 جقدر .

برده ، اس الحركاتنـدن كسامش اردولر ، دنيلديكى زمان
 بز بو تعبيرى صرف هندسه جه بر تعبير فنى يرينه قويمايلىز .
 چونكه بزي اس الحركاتمزه برلشديرن يوللردن بمضيسى اوزرنده
 هر هانكى بر دشمن قطعه عسكريه سنك كورونمسي كرچكدن
 اويله ظن ايدلديكى كبي مدهش بر خصوص دكلدر . وبتون اس
 الحركاتمز شوندن اوترى بتون بتون الدن چيقمش اوله مز .
 يالتمز اكر بعض دشمن قطعات عسكريه سى اردومزك تامين

اداره سینه دائر آلمان ترتیبات عمومیه پی الله ایتمش اوله جنی
 زمان جدی تهلیک لک زه پوری طبعیدر .
 اگر بر اردو، کرک ایلر یلکجه بعض یکی یکی استناد نقطه-
 لری و کرک حرکات عسکریه اجرا ایلدیکی مملکت ایچروسنده
 کندی اعاشه سی تأمینه کافی بر چوق ثروت و سامان منابی
 بولمش اوله جغندن طولانی ایچمه بر زمان ایچون اس الحركاتی
 ترک ایدمه بیلورسه، بردشمن مفرزه سنک او آنه قدر تعقیب ایدیلان
 خط اتصال اوزرنده کورونمسنه دائر ایشیدیله جک حوادث
 مذکور اردونک تأخیر حرکانه هیچ بر تأثیر کوسترمه من .
 واردو قوماندانی بوندن اوتری اصلا فتور کتورمه ملی، بالعکس
 بردوزی یه ایشنه باقوب یولنه دوام ایتمه لیدر. اردونک طورمسی
 و قوماندانک تلاش ایتمی ایچون دشمن قطع سنک بک بیوک
 بر قوتی حائز اولمسی شرطدر . یوقسه اوافق تفک دشمن
 قطعات عسکریه سنک کیروده کی یول اوزرنده ویا آلمک صاغ
 وصول جه تلمرنده باش کوسترمسیله برابر همان توقف ایتمک بیوک
 بر اردونک شانندن دکلدر.

(۱۸۰۶) سنه سی تشرین اولنده برنجی ناپولیون (وایمار)
 دوقه سنک بر پروسیا فرقه سیله (توره نر) اورمانلری ایچنندن
 کچه رک (مابن ورین) اوزرنده کی اس الحركات یولارینه طوغری
 ایلر یلمکده اولدیغنی ایشندیکی زمان، بر دقیقه بیله کیرو دونمک

خصوصی دوشونمه مشدی. مشارالیه دوقك شو ایلری به حرکتی اسکی حربلرک قواعد نظریه سینه تمایله موافق بر حرکت ایدی. کرچک، اوزمانلر، محاربه ایدن عسکرلرک عددندن زیاده هندسه اشکالنه یمنی حرب نظریاتنک اشکال هندسیه کبی حرفی حرفه تطبیق ایدلمش اولمسنه اهمیت ویریلوردی.

(۱۸۱۳) سنه سی آغستوس آینده ناپولیون (الب) اوزرنده یکیدن تشکیلات و ترتیبات عسکریه سنی اکمال ایلمش اولدینی زمان آوستریالیلرک بو همیادن اعتباراً (باروت) واسطه سیله آلمانیاک جان اوینه قدر کیره بیلملری فکری، ینسه مشارالیهک اوافاجق بر اندیشه سنی بیله موجب اوله مدی. بالعکس (۱۶) آغستوس تاریخنده (سن سیر) ه کوندربلان بر مکتوبده: «بن درسده والباله اولان اتصالاتک کسلمش اولمسندن چکنیورم. یوقسه، فرانسه ایله موجود اولان اتصالاتی ایستدکاری کبی کسسولر؛ اونک ضرری یوق:» سوزلری ناپولیونک آغزندن چیقمش سوزلردر.

کرچک، اگر آوستریالیلر بزم بر آز یوقاریده سویلدی کمز وجه ایله بر یورویش نایمه یه کیریشمش اولسه لردی، ناپولیون اولنره قرشو: «اغورلر اولسون، دوستلرم! دیمه یه حاضر لاشم و بوکا بویه جه قرار ویرمش ایدی.

اوستریالیلر هیچ شبهه یوق که، شو حرکتلریله (فراقونی)،

(توره نژ) و (هس) ایچرولرنده فرانسمز اردوسنی تقویه ایچون کوندریلان بعض نقلیات سفریه و مالزمه حربیه راست کله رک اونلری یقالار ویا بسبتون تخریب ایده بیلورلردی. لکن هیج بر زمان (درسد) موقع مسـتـحکمـنـک الدن چیقمش اولسی کبی ایمپراطورک وضعیتی کرچکدن تهلیکلی برحاله کتوره جک مهم بر هدفه، مهم بر مقصده نائل اوله میه جقلردی.

۳ — خطوط الحركات ، خطوط اتصاليه ،

هدف الحركات وخطوط رجعيه

اس الحركات اوزرينه اولان مطالعه منری بیتوردکن صکره بالطبع خطوط الحركات وخطوط اتصاليه اوزرينه ده بر ایکی سوز سویلمه یه مجبورز. خطوط الحركات ، بر اردونک اس- الحركاتدن هدفه کیدنجیه قدر تعقیب ایلدیکی یولار ویا جاده- لردن تشکل ایدر. خطوط اتصاليه بالعکس اردونک اوزون ویا قیصه ایجه بر زمان بیه جک، کییه جک و آتہ جق کبی هر درلو مالزمه سفربه سنی نقل ایتدی کمز شمندوفر خطلرندن دکر وقره یوللرندن ترکیب ایدر. بونک ایچون کیم که، اس الحركاتی بسبتون ترک ایتمش اولور، عین زمانده خطوط اتصاليه حقنده یایمی

لازم کلان هر درلو شیلردن آزاده قالمش بولنور؛ دیمکدر .
 (فرناند قورتس) مکسیقا طور اغنه کیردکن صکره کمیلرینی
 یاقدینی زمان، پک آز مسکون اولان شو یبانجی مملکت ایچنده
 ساحله کیدن طرق اتصالیه یی کندی اوفاق مفرزه سیله الدن
 چیقارماق ممکن اوله میه جغنه هیچ شبهه سز قناعت حاصل ایتمش
 ایدی . لکن بو درلو یاقدینی ایچون مشارالیه ایکی غائله نك
 ایکسینی ده بردن اوزرندن آتمش بولنیوردی .

دیگر جهتدن هر درلو مالزمه سفریه ایله طوب طولو اولان
 بر اس الحركات، اردو یی کندیسنه ربط ایدن یولار امنیت ایچنده
 بولندجه هیچ بر فائده یی موجب اوله مز. اردو نه قدر بیوک
 وکیولره اولان احتیاج نه قدر چوق اولورسه خطوط اتصالیه
 ده اوقدر زیاده و مکمل اولمیدر لر . قوای عسکر به نك شاشیله -
 جق بر بولده آرتمی طرق اتصالیه نك ده قیمت و اهمیتنی اودرجه
 آرتمشدرکه، بعض مؤلفر سوق الجیش علمنی تعریف ایدرکن
 «سوق الجیش طرق اتصالیه یه دائر بیان معلومات ایدن بر نظریات
 کتابیدر» دیمه یه جسارت ایدیور لر .

کرچه بو تعریف پک اکسیک، پک طار بر معنایی حاویدر .
 لکن . (ویلیزمن) کبی بعض عسکر محرر لر یی ده آنی او یله جه
 قوللانیور لر .

اکیو اتصال یولارینی جاده لر، بیوک یولار تشکیل ایدر لر .

شبهه يوق که، دشمن بودیدیکمز يولاره صارقندیلق ایدر، اونلره حاکم اولور و بلکه بعض قسملرینی بوزار. لکن اونلری بسبتون بزم المزدن آلتی پک مستننا، پک نادر واقع اوله بیلور. زیرا، اگر بو يولاردن بریمی قبادلش اولورسه، دیگر بریمی آچیق بولنه جقدر. و بناءً علیه آنک واسطه سیله، جزئی بر طولاشمه دن صکره، اصل جاده یه وارمق پک اعلا ممکندر. بر اردو بیوک يولاری، طرق اتصالیه یرینه قوللاندیجه ایلك استقامتی تمذیل ویا تبدیل ایتک لازم کلدیکی زمان اک آز مشکلاته اوغرار.

یازیق که، عربهلر ویوک حیوانلری آنجق پک یواش یواش یورور و نسبة اهمیتلری آز بعض یوکلر طاشیه بیلورلر. یاغور و قار اونلرک یورویشلرینه بشقه درلو بر تاثیر اجرا ایدر. اک ایو یاپلمش بریول، برشوسه ایلری یه وکیرویه ایشلیان قافله لردن اوتری اک صکره بوزیلور؛ فنا بر حاله کیرر. طاغ و کچی يولاری ایسه بلکه بتون بر قیدش موسمی باشند نه سائته قدر بوزوق و قبالی بر حاله قالور.

شو صوک زمانلرده طرق اتصالیه اوزرنده ایشلیان قافله لردن اک ایو بر صورتده استفاده ایتک ایچون بر قاچ درلو واسطه لره مراجعت ایدلمشدر. از جمله شرقی اوروپاده کورلدیکی کچی آغاچ رایلر اوزرینه قوتلی بارکیرلر ایله چکیلور عربهلر، تراموایلر قوللاندلمش و بخار ماکنه لرله تحریک ایدیلور تره نلر

ایجاد اولمشهدرد. لکن شو دیدیکمز وسائط نقلیه آنجق بیوک یوللرده بر ایش کوره بیلورلر. یوقسه هیچ بر زمان باتیقه لرده، کچی یوللارنده قولالانیله مزلر. واصلایین الملل تجارت انناسنده قولالانیلان وسائط نقلیه سرعتنی حائز اوله مزلر.

طرق اتصالیه سی یالکز جاده لردن عبارت اولان پک جسیم بر اردو، یاپیله جق حرکات انناسنده بعض اوافق نفک سگته لره اوغرایه جق وزمان حاضر سفرلرینه کوره آغیر بر اردو یرینه کچه جکدر.

شرقه آناطولی و بالقان شبه جزیره سنده یاپیسلان بتون سفرلر شو دیدیکمز ال پارلاق برر مثال اولورلر. بونک اوپله اولدیغنه بسبتون اینانق ایچون اکثریا مذکور سفرلرده ارزاق ومهمات حربیه نک اردونک کیروسندن کلان استرلر، بارکیرلر ودوله لر ایله نقل ایدلدیکنی بر کره دوشونمک الویرر. مملکتک عادتیه کوره اوکوزلره طاقیلی بولنان عربهلرک کوره جکلری ایش ایسه آنجق دوز یرلره و اووه لره منحصردر.

نهر یوللری، قنالر و بالذات بیوک نهرلر اک کوزل طرق اتصالیه دن صاییلورلر. صو واسطه سیله نقلیات عسکریه هم پک اوجوز، پک قولای هم ده پک بیوک بر مقیاسده اجرا ایدینور. شمدیکی زمانلرده از جمله (الب) اوزرنده اولدینی کبی بیوک ماثونه لر بخار ایله سوق ایدلدیکی ایچون نهر یوللرینک حاصلات

نقلیه سی اسکی وقتلرک یالکز کورهک ویلکن ایله یاسیلان ،
 سوقیاتنه نظراً پک زیاده ایلرولمش بولنیور. حتی اسکی زمانلرده
 بیله دارالحرکافی ایکی یه بولن وسطی (الب) خطنک الده بولنسی
 بیوک فره دریقک بو همیا وساقسونیا سفرلرنده خصملرینه غلبه
 چالمسی ایچون اک چوق اجرای تأثیر ایدن شیلردن بریدر.

لیکن شو دیدیکمز نهر یوللرینک دائمًا قیمت اصلیه لرینی
 آزالنان بر شی وارکه، اوده ایچه سرت کیدن بر قیث موسمی
 آنلری طوکدردینی زمان استفاده ایتک ممکن اولهمیه جنی کبی
 اولر اوزرنده تبدیل استقامت ایتکده ممکنمز اوله جقدرد .
 بونک ایچون اگر حرکات عسکریه ده آنمزین بر بشقه رنک ،
 بر بشقه چهره ظهور ایدرسه نهر یوللرینک ده بو
 کون یارین الدن چیقمسسی ، حکمز قالمسی پک طبیعی
 بر شیدر.

اردوایله اوکا لازم اولان هرچشید قوای عسکریه نک جلب
 ایدلیدیکی منابع آره سنده طرق اتصالیه یرینه کچن هرهانکی بردکز
 بر آزاو سویلیدیکمز ایکی محذوردن ایکنجیسی ده جامع دکلدرد .
 چونکه دکز بردفعه بستیون شماله یقین دکزلردن بری دکلسه ،
 بوز طوتمز . برکرده وسائط نقلیه نک سوقی ایچون یالکز بر
 بول ، ثابت وغیر متحول بریول تشکیل ایتمز. بالعکس اینستیلان
 استقامته یوز چویرمک ، او طرفه طوغری یوریمک ممکنذر .

لكن اوندن ايسئديكمز كې استفاده ايتك، دشمن دكر اوزرنده
 بزه ضرر ويره بيله چكى مدتجه اوكا قرشو قويه بيلمك ايچ-ون
 يالكز بر شرط لازمدر : اوده سوقيات عسكريه بر ليمايه ويا محدود
 بر ايكي لي-مايه استناد ايتمه ملي . بالعكس بر چوق بي-وك ليمايله
 مستند اولمليدر. چونكه اكر ايلك زمانلرده دها ليمايلرك بيوك
 بر قسمنى الدن چيقارر و ايشمىز كوچمىز يالكز بر ليمايه ويا ديديكمىز
 كې اهميتلىرى جزئى برقاج ليمايه قالورسه او وقت خصم دونمىسى
 ليمايك قپوسئنده بزم وسائط نقليه مئى بلكر وانلىرى برره برر
 محو وپريشان ايلر .

كذلك ، كئدى منطقه مئى كنارنده واقع بعض ليمايلرك
 قيش موسملرنده بوز يارچه لرى واره صره ظهور ايدى جك
 فورتنه دن طولايى قبادلش اولما مئى ده نظر دقتدن اوزاق
 طوتماملى بى . چونكه اكر مذكور ليمايلرك قبولرى ديديكمىز
 وسائط ايله قبادلش اولورسه وبزده اوكا هيچ اهميت ويره مش
 بولنور ايسه ك بالطبع اتصالات بحريه ده آره صره كسلمش
 اوله جقدر .

بزه كوره اك ايو اتصالات شمن دوفر خطايدر . چونكه
 تيمور يوللرى نه صفوق ونه صيجاق ط-انور ، نه روز كارلئنده
 اوزون اوزادى به وقت ايسترلر . لكن هر كوزلك بر قصورى
 اولدنى كې آنلرك ده بعض قص-ورلى وار . از جمله بر آندى

نقل ایدیه جک یوکارک وزنی، ثقلی اعتباریله اونلر صو یوللرینه
 نظراً برآز آشاغی قالورلر . اوندن بشقه نهر یوللری نصل
 باش قوماندانک ایستدیکی طرفه تبدیل استقامتدن عاجز ایسه
 اونلر ایچ-ون ینه عین وجه ایله تبدیل استقامت ایدمه مک
 محدودی واردر . لکن ضربده علی العموم تیمور یول شبیکلری
 نهر یوللرندن زیاده وصیقدر . بونک ایچ-ون اردو هر زرده
 آنمزین برتبدیل استقامت ایدمه جک اولورسه اوراده عرضانی
 بر تیمور یولی ، بر التصاق خطی بوله جغنه و اوندن استفاده ایدمه
 جکنه امنیت کوستره بیلور . یازیق که ، دشمن ایستدیکی زمان
 شمندوفر خطلرینی میاه جاریه دن زیاده قولایلق ایله تخریب
 ایلمک اقتدارینی حائزدر . و علی الخصوص تیمور یول شبیکه سی
 ایچه کنیش و طاغلق ایسه اونلری صیق ، صیق نظارت آلتنده
 بولندرمق شرطیله ینه هپسینی بردن خصم تج-اوزندن ، خصم
 تهلمک سندن قورتارمق اصلاً ممکن اوله میه جقدر .

شمندوفرلر ، طرق اتصاله نیک حساس و بیک نازکارینی
 تشکیل ایدرلر . بوندن اوتری اونلرک بر ایولکی ده-وارکه ،
 اوده بزا ایستدیکمز قدر کندیلرندن استفاده ایدمه بیلدیکمز حالده
 دشمنک اونلردن استفاده سنی منع ایتیش اوله بیلیمکله کمزدر .
 بیوک صو بحرالرینی طیق-امق و قوللانلمز بر حاله کتورمک
 ممکنمزدر . شو خصوص بیوک جاده لر ایچوند ده براز کوچ ،

لكن تيور يوللرى ايجون بك قولايذر .

عزيزت نقطه لرى ساحله بولنورده خصم قطعاتك ينه اك
چوق مذكور نقطه لرده شمندوفر خطنه ياقلاشمى ممكن
اوله بيلان يرلرده خصمك موقتاً استفاده سنى منع ايده بيلمك
ايجون واغون ولوقوموتيف كې وساائطك هپسى بردن مملكت
ايجرولرينه سورمك لازمدر .

حقيقت ! شويله ياييلورسه دشمن بتون وساائط نقليه سى ،
اردوسنك مالزته سفره و حربيه سنده حصر ايدلمش اولدينى
برزمانده واپورلر ايله ساحله واغون ولوقوموتيف چيقارمه يه
وبوسايله ده خصم شمندوفرلرندن فائده كورمه يه وقت
بوله ميه جقدر .

گرچه بوخصوص محال برشى دكلدر . لكن دشمن ديديكمز
شمندوفرلردن استفاده ايده بيلمك ايجون ساحله چيقاره بيله جكي
برمقدار وساائط محرکې اورايه کتورنجه يه قدر گرچکن بك
زياده مشكلات چکه جکدر . اوته كى خطله يعنى ساحلن اوزاق
اولانلره كلنجه اونلر اوزرنده آيلرله قطع مواصلات ايده .
بيلمك ايجون يالکز بعض انشات صنعتيه يي ومثلاً کوپرى وتونل
کې شيلرى برهوا ايتک الويرر .

شو بولنديغمز شمندوفرلر خصوصى ، بزي اکثراطن
اولندينى كې خطوط الحركات ايله طريق اتصاليه نك عين شيلر

اولدیفنی سـویلیمیه مجبور ایدیور . گرچک ، تیمـور یوللری
 پک مشکلات ایله خطوط الحركات وظیفه سنی کوره بیلورلر .
 زیرا شمندوفر اوزرنده ایکن دشمن مملکتی ایچرولرینه کیرمک ،
 اطراقی ضبط ایلمک ممکن اوله مز .

گرچه بونک بعض مستثنایری وار . لکن اونلر پک نادر
 اولدیفنیچون بوراده سویلنمکه دکرلری یوقدر . طرق نهریه نک
 خطوط الحركات خدمتی کورمسی ینه پک نادراً واقع اولان
 شیرلدندر . بونک ایچـون طرق اتصالیه نقطه نظرندن اک
 کوزل فائده لری حصوله کتورن شوایکی جنس خطک ایکیسی ده
 پک مستثنا زمانلرده خطوط الحركات وظیفه سنی کورورلر
 ویاخود اصلاً بویله برایشده قوللانلمش اوله مزلر .

بعض حاللر وارکه ، اوراده خطوط الحركات اساساً طرق
 اتصالیه دن آیرلمش بولنور . (۱۸۷۰) تشرین ثانیسنده ایکنجی
 آلمان اردوسی (لووار) اوزرینه یوروش یایمیه باشـلادی
 زمان (تروییس) ایله (سانس) و (نهمورس) دن کچهرک (ژو-
 آنویل) دن (پتیویهر) ه کیدن یولی خط الحركات اصلی انتخاب
 ایلمش ایدی . لکن عربیه ایله قطع ایدیه جک مسافه نک چوق
 اولدیفنیچون بویولی اوزون اوزادییه تعقیب ایتک لازم کلزدی .
 بناءً علیه (شومون) ، (شانیلیون - سور - سن) ، (طونتر) ،
 (ژوآنی) ، (موردهت) ، (مونتاژیس) و (ژووبزی) دن کچهرک

(اورلئان) ه کیدن (ژوآنویل) تیمور یولی ترجیح ایدلدی .
 آره صرهدده (پارس)ك برآز ایلروسنده (لانی) موقعنده نهایت
 بولان شمندوفر خطندن استفاده اولندی . شوحاله نظراً خط
 اتصالات ، خط الحركاتدن ایجه اوزاق بولنیوردی . بعض کره لر
 دشمن قطعات عسکریه سنك ، براردونك خطوط الحركاتنی کیرودن
 کسمش اولمسنده پك اوقدر بر بآس کوریه مز . چونکه اردو
 ایلرولدیجه مذکور خطلك هیچ بر اهمیتی قالمز . لکن بر شرط
 ایله قالمزکه ، خطوط الحركات مذکوره عین زمانده طرق اتصالیه
 خدمتی ده کورمیه مجبور اولسونلر ؛ یعنی عین زمانده هم
 خطوط الحركات وهم طرق اتصالیه اولسونلر .

کرچك ، طرق اتصالیه ایله خطوط الحركات اکثریا بر برینه
 یاقاریشیورلر ویاخود موازی ویقین اولورلر . بوجه ایله دشمن
 اولردن بریسی کسمش اولسه اوته کی ده عین بلایه دوشمش
 بولنور .

هر شیدن اول طرق اتصالیه یی کوزل باقق ، کوزل محافظه
 ایتك ایستر . اولرنه قدر اوزون اولورسه شبهه یوق ، که اولنری
 ایو بر حالده طوتمق و محافظه ایتك اوقدر زور اولور . حاصلی
 اولنر تهلهکلی بر وضعیتده قالدیجه دشمن اولنری اوقدر زیاده
 قولای الدهایدرد و عسکرك تقویه سی ، اعاشه واداره سی ده بالعکس
 ده اوقدر کوچ اولور . پك اوزون خطوط الحركات اوزرنده

ایلمری به کیدلدیکی زمان مذکور خطر، ینه عین نسبتده اوزون
 اتصال یولارینه احتیاج کوستردکاریچون دائماً بیوک بیوک مشکلاته
 اوغرامق طبیعیدر . اکثریا بویله پک اوزون اولان خطوط
 الحركاتك تأثیر ذاتیـلمری بتون برسفرک الدن کیتمسنی موجب
 اولور . (ماسهنا) بك (ایزبون) اوزرینه یوروشی، ناپولیونك
 موسقووه سفری ویاخود (۱۷۴۴) سنه سنده فرهدریقك بوهمیایه
 قرشو حرکتی بوقبیلدن برر سفر ایدی . بش ویا آتی کونلك
 یوروشدن زیاده مسافهینی حاوی اولان بر اتصال یولی اوزون
 بر یول کې تلقی ایدیله بیلور . شو حالده هیچ اولمزسه اردونك
 ارزاق وجبخانه سیچون یکی براس الحركات وجوده کتوریلورسه
 پک ایو برشی یاپلمش اوله جقدر . نته کیم (۱۸۷۰) کانون اولنده
 آلمان ایکنجی اردوسی (لووار) . کلور کلز اوپله براس الحركات
 یاپمیه تشبث ایلمش ایدی .

اس الحركات نه قدر کوچك وطار اولورسه ، طرق اتصالـ
 لیه نك كسلمش اولمق تهلكهسی او درجه زیاده اوله جقهـدر .
 كرجك اس الحركات نه قدر قیصه اولورسه خطوط الحركاتك
 برلشـدکاری نقطهده یعنی هدف جوارنده کی زاویه او درجه
 کوچك برزاویه اولور .

لكن هیچ شبهه یوقكه، برزاویه حاده، وسعی جزئی اولان
 برزمین منطقه سنی برزاویه منفرجه یه نسبتاً دهها آز اورته بیلـهـ

جکدر . آنک ایچون شویله بر منطقہ نی صاغدن صولدن چویر-
 مک، پک قولای بر شیدر . بر برینه پک یقین اولان خطوط
 الحركات کذلک ایچمه قولای وچابوق بر حرکتله قطع ایدلمش
 اوله بیلورلر . اسکی وقتلرده عسکرلک نظریاتجیلری اردونک
 تأمین حاکمچون خطوط الحركات آره سنده بیوک زاویه لر
 اولمسی ایستیرلردی . لکن پک هندسه جه بر فکرندن عبارت
 اولان شو نظریات، سطحی بر نظریاتدر . اصل دوشونیه جک
 شی، اردونک کیرولرنده نقلیات عسکرینه نک هیچ بر وجه ایله
 سکتیه اوغرامه مسیدر .

کمیلرک حرکتله مساعد وپک چوق کنیش بر نهر، ایچرو-
 سنده شمیدیکی حرب سیفینه لری قوللانلق شرطیله ، پک او-
 زون اولسه بیله ینه اک ایو بر مواصله یولی تشکیل ایده بیلور .
 شو بحث اوزرینه اهانینک آز ویا چوق اولسنک، استیلااردو-
 سیله اهالی بیننده کی وضعیتک، واهالیسده کی حسیات جنکوران-
 نکده پک چوق تأثیرلری واردر . اونکله برابر ، قطعات
 عسکرینه نک قوه عمومیه سی ده ینه بیوک بیوک تأثیرلر کوسترد .
 اک مهم شی، اردونک قوه عمومیه سی، اشغال ویا استیلا ایدیل-
 جک زمین منطقه سیله متناسب می، دکل، ایشته اوراسنی بیلمکدن
 عبارتدر .

برنجی نابولیونه دائر یازدینی اثر نفیسنده قونت (یورق)

شو خصوصده پك نافع بر موازنه يامشدر . حقيقت ! مشاراليه
 بزه ديوركه ، ناپوليون حربيه باش-لادقدن اوچ بچق آي صكره
 موسقويه كيرمش ايدى . وكيروس-سند (نيه من) صوينه قدر
 (۱۱۵) آلمان ميلندن يعنى همان (۸۶۲) كيلومتره دن عبارت بر
 اتصال يولى وار ايدى . ايمپراطورك يوريمش واشغال ايتمش
 اولدينى مسافه نك هېسى (۴۳۰۰) ميل مربنده ، اردوسنك
 بتون قونى ايسه آنجق (۲۱۳) بيك كيشيدن عبارت ايدى .
 اعلان حربدن اوچ بچق آي صكره آلمانلر كندى قوتلرينك
 قسم كلايسى ايله حدودك (۴۵) ميل اوتنه-سند يعنى همان (۳۳۷)
 كيلومتره اوزاقده پارس اوكنده بولنيورلردى . آلمانلر ك يوريمش
 واشغال ايلمش اولدقلى مسافه نك هېسى (۱۳۰۰) ميل
 مربنده ، قوه عموميه لرى ايسه (۴۲۵) كيشيدن عبارت ايدى .
 شو حسابدن پك ابو آكلاشيلوركه ، (۷۰) حربنده آلمانلر
 ناپوليوندن زياده كندى دارالحركاتلرينه حاكم بولنيورلردى .
 كرچك ، بوراده آلمانلر ك طرق اتصاليه-سنة طوغرى يوريمك
 دوشونلميه جك ، خاطره گليه جك درجده زور بر شى ايدى .
 واكر اونلر ك كيروزلرنده بعض فنا-شيلرك ظهور ايتمش ومثلا
 بعض دشمن عسكترلرينك طرق اتصاليه-دن بر قسمنى ضبط
 ايلمش اولدينى فرض ايدر ايسه ك ينه (۱۸۱۲) موسقويه
 حربنده فرانسز اردوسنك ضياعنه سبب اولان مهلك نتيجه لر

قدر مضر نتیجه لر حصوله کله میه جکدی .

اونک ایچون دیمک ایستیورز: اگر براردونک اس الحركات
ایله اولان طرق اتصالیه سنی ایودن ایویه برتأمین ایلمک آرزو
ایدیلورسه هر شیدن اول دارالحركة حاکم اولق واکر قوای
عسکریه نك دائما محاربه دن چکنمیه جک برحاله قالمسی ایستیلور-
سه ینه آنلرک طرق اتصالیه سنی کرچکدن بیوک بر امنیت ایچمه
آلق لازم کلور . اک چوق دوشونیه جک شی یالکز خطرلردن
هر بریسنک وضعیت وامتدادی و برلشیدکاری یرده حصوله
کله جک زاویه نك مقداری بزم ایستدیکمز کبی اولمقدن عبارت
دکلدر . بالعکس آنکله برابر قوای عسکریه نك اشغال ایدیه جک
منطقه ایله متناسب اولمسی و آندن بشقه مذکور منطقه نك هر
یرینه حاکم بولمسی ده شرط اعظمدر .

براس الحركات، برجهه الحركات دیکشدرلمسند نه درجه-
مشکلات اولدیغنی ایودن ایویه آکلامق ایچون هر قول
اردونک، هر فرقه نك کیرولرنده برایلری، برکیوکیدن قافله لرک
جسامتی دوشونمک یتیشور . کرچک ، هر هانکی بر جبهه یی
اشغال ایتمش اولان براردونک اقسام عسکریه سنی بردن بره
دیکشدرمک قدر مشکلاتی، قاریشقلنی موجب اولان هیچ بر
شی یوقدر .

اکثر زمانلر کرک یازی وکرک تلغراف ایله دیدیکمز اقسام

عسکری بی، قطعات محاربه به ربط ایلمک ممکن اوله جقدر .
 بونک ایچون آنلر، کندیلرینی هدف حرکته کوتورن طرق
 اتصالیه بی آرتق تعقیب ایدمه جه اولدقلری زمان، کیده جکلری
 برلره کینمک خصوصه ده بیهلرک زیاده شاشیره جقلر و حتی
 بوللرینی بوله میه جقلردر. حاصلی برجهه الحركات ویا براس الحركات
 دیکشدرلدیکی زمان اکثریا اوده بریده کندی جزء ناملرینی
 بولمق ایچون سرسریانه کزینور قافلر وسوریلره تصادف
 ایدیلر جکدر .

شویله برتبدل وقوعه کلدیکی زمان هر دلوشه کلادن
 چکنمک ایچون الایو چاره، یواش یواش اسکی انصاق یوللرینی
 براتق و کیتدکجه بونلرک یکیلرینی تشکیل ایلمکدر . لکن بو
 اصوله مراجعت ایدمه بیلیمک ایچون ده اسکیسنه کوره وضعیتی
 عرضانی بریکی اس الحركات بولمق و بولنسه بیهلر آتی ایستدیکمز
 کی تجهیز و تشکیل ایتک خصوصه ده ایجه زمان حکمک لازمدر.
 کرچک؛ طرق اتصالیه دن بریسنی دیکشدرمک ظن ایدلدیکی
 قدر قولای برشی دکلدر. یالکز بدایه قوللانديغمز اس الحركات
 کونیه واری برشکلی حاوی اولور ویا خود اس الحركات خدمتی
 کورن اراضی اردونک اطرافنده بریارم دائره تشکیل ایتمش
 بولنورسه اوزمان طرق اتصالیه دن بریسنی دیکشدرمک قولای
 اولور . بو قیلدن بر اس الحركات قوللانمک فائده سنی ده ایلر

آكلامق ايجون طرق اتصاليه يي ايستنيان طرفه چويرم كده كي
قولايلى دوشونك يتيشور .

لكن بتون شو ديدكارمزدن متحرك براس الحركانك اوتنه-
كيلدن هپسنة فائق اولدينى مسئله سى ده آچيقدن آچيغه ميدانه
چيقيشمش اوليور . كرچك ، اكر بوزق اولان تيمور يوللرني
على المعجله استفاده ايديله جك برحاله كتورمه نك يولنى بيليور
ايسه ك ، بز حركانمذك استقامت عموميه سنى ديكشديرمه يه قرار
ويرديكمز آنده بيله اس الحركانمزي تاسيس ايدر وديكر براراضى
اوزرنده عسكرك اعاشه واداره سنه لازم كلان هرشيئي كوتوره-
بياورز . شو نقطه نظردين كوريلان سربستى حركت قدر هيچ
برشى سردار اكرم اولان ذاتك فكر ايجادينه قوت وسرعت
ويرمه جكدر . يعنى اس الحركات وخطوط الحركات ايشارى نه
قدر سريع الجريان اولورسه باش قوماندان او قدر زياده سريع
الافكار وسربست قالور . وهيچ شهبه بوق ؛ كله جك زمانك
صنعت عسكريسي شو نقطه نظردين شيمدى يه قدر تاريخلرده
كورديكمزدن بك اعلا وبالا مثاللر كوسترمه جكدر .

طرق اتصاليه سى نه قدر چوق اولورسه براردونك حركانى
او درجه امين وكوزل اولور . اك ايو وبله كه اك چوق نظري
براصول ، اداره واعاشه سى مستقل اولان جزء تاملره آيرى
آيرى برر يول كوسترمه جكدر . حال حاضرده بيوك اردولرك

اکثریسنده بوجزه، تاملر قول اردولردن عبارتدر . (۱۸۷۰)
 حربی اثناسنده آلمانلر بلکه دائماً کندی تعرض اردولردن
 هربریسنه خصوصی برر یول ویرمهیه موفق اولمشلردی .

ستون حرکانک توجه ایلدیکی مقصده (هدف) دیرلر .
 حربیه مهم تشبیلرک هپسی، قوای عسکریه نك مشترك برحرکت
 باشنده بولملرینی ایجاب ایتدیکی ایچون یوروش خطاری بالطبع
 متقارب خطلردن تشکل ایتیش اولمیلدرلر . لکن شو تعریفدن
 اوتری صاقین هدف الحرکاتی یرنده ثابت برشی ظن ایتیمه لم! .
 بالعکس هدف الحرکات متحرک برشیدر . اونک ایچون خطوط
 الحرکانک یالکوز اولجه تقرر ایدن برنقطه اوزرنده براشمش
 اولملری لازم کلز . بالعکس خطوط الحرکات ایجه السیتی برشی
 اولمیلدیرکه ، دشمن بردن بره اوکمزه چیقیدینی زمان اونلری
 دیدیکمز نقطه دن برآز اول ویاخودینه ایجاب حاله کوره اولجه
 دوشوندیکمز نقطه نك برآز کیروسنده برلشدرمک ممکن اوله-
 بیلسون .

برآنده کچلمسی ناقابل بعض موانع طبیعیه ایله بربرندن
 آیرلش برچوق خطوط الحرکات قولالانمیه یی خوش کورمک ،
 خوش برشی دکلدرد . چونکه بوندن خاطره ، خیاله کلکدک
 مشکلات ظهور ایده بیلور . کرچک ، اولیه یاپلیدینی زمان اگر
 دشمن بزدن چابوق وبزدن بیوک قوتلر ایله ایش باشنه کچمش

بوانورسه، اردونك اقسامنى بر، برر محو ايتدرمك تهللكسى
 واردر. چونكه دشمن ديدىكمز كې بزدن قوتلى وبزدن
 چاپوق اولدېنى ايجون خطوط الحركادن بركره بريسنه، بركره-
 ده اوتە كيسنه يوكلنهرك اونلرى تىكر، تىكر اورە بيلور.

قوتجه كنديسەندن بيوك بر دشمن او كنده كېر دوغمه
 مجبور اولان بر اردونك تعقيب ايلدىكى خطوط الحركانه رجعت
 يوللرى ديرلر. اونلرك انتخابى قسماً خطوط الحركانك وضعيت
 واتخابندهكى شرطلردن فرقلى شرطلره نابعدر.

بهمه حال دشمنه قرشو قويقدن واز كچمه يه و يالكر اونك
 ضربه لرندن قورتلهمه يه مجبور اولان بوزلمش بر اردو هم اس الحركه-
 كاتى اورتمك هم ده كندى اعاشه و اداره سنى تا مېن ايلمك ايجون
 طرق اتصاليه دن بريسنى خط رجعت انتخاب ايله جكدرد [*].

[*] بواردو نه قدر زياده آغير اولورسه، آنك اعاشه سى او قدر
 زياده كوج و بناء عليه كندى طرق اتصاليه سنه اولان احتياجى او قدر
 چوق اولور. شمدىكى زمان تشكيلات عسكريه سنك وجوده كتوردىكى
 بيوك اردولر و مثلاً (۱۸۷۰-۱۸۷۱) سنه سى قيش موسمنده فرانسز
 اردولرى كې شمندوفر خطلرېنى بسبتون ترك ايتمش اوله منزل.

بالقان شبه جزيره سندهكى صوك حرب اشاسنده ترك اردوسنك
 اودرجه متانت كوسترمش اولمى، هب اورو پاجه بر مثالى دكل برخيالى
 بيله كوره مديكمز عسكركلر غيرتيله در.

بونكه برابر، جنرالرك اك چوق مشكلاته اوغرامش بولملىرېنه

لیکن بز شمدیکی حالده دشمن ضربه لرندن چکنمک ایچون
 کیزلنه جک یر آرایان و بردوزی یه کیرو چکیلان شویله براردودن
 زیاده ، رجعت ایلمکله برابر محاربه یه دوام ایدن و مملکتک
 مدافعه سی یولنه جان و یرن بر اردویه دائر سوز سویلمک
 ایستوروز . اوت ، بزم شو سویلمک ایستدیکمز اردو ، یالکز
 کندیسنک موقتاً خصم اردوسـندن آز بر قوتی حائز اولدیغنی
 بیلور . مقصد اصلیمی کیرویه قاجق و قورتلمق دکل ، بالعکس
 بر آز کیرویه چکلمش اولمقـله تزید قوت ایلمک و بر موازنت
 حصوله کتورمکدر . بوندن آکلاشـیلیور ، که رجعت ایچون
 قوللانیله جق یولار اردونک کندی قوای امدادیه سیله برلشمسـنه
 مساعد اولان یوللردر . رجعت ایدن براردو ، اکثربا اتصالات
 واس الحـرکاتـندن بشـقه برشی ایله تمجیز ایدلمش اولماق ایچون
 کمال جرانله خصمنه مقابله ایدرک اوسایه ده ایشلرک بردنبره یوز
 چویرمسنه خدمت ایلیه بیلور . بونک ایچون مثال ایسترسـه کز
 یالکز (بلوهر) ایله (کینازنه ناو) ی بردوشونکر !

کرچک ، (لینی) میدان محاربه سی غائب ایتـدکـدن صکره
 بویکی جنرال ، کندی خط اتصال طبعیعلری اولان (لی یژ) -

سبب ینه یوللرک درجه کفایه ده اولما مسیدر . چونکه اونلر بوندن اوتری
 هیچ بر حرکتی ایستدکاری کبی سریع و سربست یاه میورلردی . شو بیوک
 محذور اک چوق (لوم) وادیسنده کی عثمانلی اردوسـنه اجرای تاثیر
 ایش ایدی .

(مستریش) یولنی خط رجعت یرینه قویمدیلر. بالعکس انکلیز
ایله برلشمیرینه یاردم ایتمسی ممکن اولان (وایور) - (تیللی)
یولنی انتخاب ایلدیلر. واک صکره بودرلو یایدقلمیچون تام زمانده
(وانرلو) میدان محاربه سنه یتشمه یه، مصادمه یی قزانمه یه، بتون سفره
ایشیدلمک برنتیجه ویرمه یه و آب آنسزین برنجی ناپولیونک دور
تحکمنه کوزل برخاتمه چکمه یه موفق اولدیلر .

خط رجعت ایله خط اتصالک بربرندن آیری دوشملری
ایچه اوزون سورمه ملیدر . چونکه بوندن اوتری اردونک
یا کاملاً محو اولمسی ویا پک چوق احتیاجلره دوشمسی
کبی تهلیکلی حاللر چیقار. کرچک، دیدیکمز یولده امدادلریمزله
برلشمه یه موفقیت حاصل اولسه بیله یه کندی قوتلریمزله دشمن
قوتلری آره لرندنه تأسیس ایلمک ایستدیکمز موازنه یی بولمق
ممکنسزدر . بو نتیجه، بلکه بمض زمانلر ومثلاً رجعت ایدن
اردوی مستحکم یرلر اوزرینه چکدرک حاصل اوله بیلور . لکن
اگر شو حالده خط رجعت ، خط اتصالک عینی دکلسه، ظهور
ایده جک نتیجه لر اولکی حالده کیلردن زیاده مهلک اوله جقلردر.
کندی امدادلری اوزرینه چکیلان و آنلر ایله برلشان بر
اردو، اکثریا اوراده قطعات عسکرینه نک اداره سیچون لازم
کلان شیاره تصادف ایدر. حاصلی قوای امدادیه، هیچ اولمزه،
یکی براس الحراکاته ایستندلیکی کبی جابوق بر یولده ربط ایدیلر.

میه جک درجه ده فنا بر وضعیتده بولنش اولمز . یعنی اونلرک مالزمه سفریه لری البت یکی براس الحرکانه کچمه یه واورادن ایش کورمه یه مساعده ایده جک بر مکملیتده اولور .

اگر بو دیدیکمز یکی اس الحركات، رجعت ایدن اردونک کیروسننده دکل ، بالعکس یانلرنندن بریسننده بولنورسه ، شو خصوصی بر محذور اولمقـدن زیاده بیوک بر فائده در . یالکز بر شرط ایسترکه، اوده خصم اوزرینه بر تأثیر کوستره بیلماک ایچون قوای امدادیه ایچه بیوک ویاخود مواضع مستحکمه ایچه مهم اولمیلدرلر . چونکه دشمن بو وضعیتده ایکن یالکز یکیدن هجوم اتمه یه دکل، حتی یوریمکده اولدینی استقامتی دیکشدرمه یه بیلر . محبوریت کوره جکدر . مشهور بر فرانسه جزالی دیورکه، یانلره دوشن اس الحركاتلر ، دشمنی مملکت ایچرولرینه کیرمکدن منع ایچون اکثراً ک قطعی واک ایو تأثیرلر کوسترلر .

براس الحركات جنبی به کیدن ودشمن اردوسنی کندی هدفنه یوریمکده مربست بر اقان بو رجعت خطلری اصولاً (متباعد خط رجعتلر) نامنی آیلورلر .

اس الحركات متحرک یعنی تیموریول شبیکه سی، اوکا کرچکدن حاکم اولمق شرطیله ، علی العاده براس الحركات جنبیـدن زیاده ، متباعد خط رجعتلرک تدارک واستعمالنه مساعددرلر . حقیقت ! شمندوفرلر ، اولجه طریق اتصالزی تشکیل ایدن یولدن بشقه

برخط اوزرنده كىرويه چكلىدىكمز زمان اردونك اعاشه سنى پك
چوق تامين ايلدىكلى كى قواى امداديه نك برآن اول كوتورلمش
اولمىنى ده تسهيل ايدرلر. بوسويلدىكمزدن كى زياده مدافعين جهتى
فائده كوتورر. چونكه او، حر كات عسكريه سنى كى ندى طوپراغنده
ياپار .

اكر رجعت ايدن براردونك تزايد قوتجه اولان احتياجى
كرك بمض مواضى طوتمق وكرك قواى امداديه تقرب ايلمك
سايه سنده برطرف ايتك ممكن اولورسه اوزمان اك چوق تامين
موفقيته يارايان اس-تقامتده كى خط رجعت-لردن بريسنى انتخاب
ايلمك مسئله سى، باشلى باشنه برايش اوله جقدر. صحيح! بو نقطه
نظردن قواعد مثبتة وضع ايتك هيچ برزمان ممكن دكلدر .

۴ — تداركات سفرىه، سفر برلك زمانى، سوق الجىش تجمعى، سوق الجىش يايلمه سى

هيچ بر اردو، تداركات عسكريه سى نامنه هيچ بر شى
ياقمىزىن يالكر وقت حضر يده كى قوتيله سفره كيده مز. بونك
سببى شيمدىكى تشكىلات عسكريه مزدن ايلرى كلور. چونكه
تشكىلات مذكوره يه نظراً بر حرب وقوعه كله جكى زمان تشكيل

ایدیله جک قطعاتک یالکز چکیدکی یعنی اساسی وقت حصریده موجود اوله بیلور. حق سویلدیکمز قطعاتدن بمضیلرینک چکر-دکی، اساسی بیله یوق؛ اونلر بستیون لازم کلدیکی زمان تشکیل ایدیلورلر.

احتیاط ضابطلرینی، احتیاط نفرلرینی سلاح باشنه دعوت ایتمک، بارکیلر، عربلر وسائر بونک کبی وسائط نقلیهی بیوک بر مقیاسده حاضرلامق، بر حرب جسم ایچون ایجاب ایدن مالزمنک هپسنی بر آره به طویلامق لازمدر. بوندن اوتری سفر برلک حالنه کیرمک ایچون ایجه بر زمان صرف ایتمهیه احتیاج کوریله جکدر. سفر برلک حرکاتی هیچ بر زمان، بستیون اغیار نظرندن کیزلی طوتلمش اوله مز. بالعمکس دشمن طرف آنی پک چابوق اوکره نور و اوکرندیکی شیلره کوره حرکت ایتمهیه باشلار.

بیوک حکومتلر آره سنده کوردیکمز رقیبک وحسدجیلک افکاری، اورته ده هیچ بر حرب اثری فلان یوق ایکن ده، قطعات عسکریده دن بر چوغنک سفر بر حالنده اولسنی ایجاب ایلیور. اردو، سفر برلک حالنه کیره جکی زمان، هر نه کبی شیلره تجهیز و تسلیح ایدلمسی لازم کلیورسه، اوت او زمان یاپلمسی آرتق ممکن اوله میان او کبی شیلری بر آن اول یعنی وقت حضرده اکمال ایتمک شیمدیکی زمانک اصولیدر. کذلک شو

حرکاتك ايجاب ايتدرديكي بتون اداره ايشلری ده کاغداوزرینه
بك بيوك بر دقت ايله حساب ايديلورلر.

شیمدیکی فن حربی ایستدیکی تیشی ، سنجاق آلتیه
چاغریش اولان نفرلرک اڤوکنجیسی کلدیکی ثانیه ده همان بتون
اردو سرکت ایده جک بر اقتدارده اولمیدر. کرچه بودیدی کمز
بك نظری وخیالی کبی بر شیدر. فقط نه یاپلم ، زمان اويله
ایستیور!

حال حاضریدن حال سفری یه کچمک خصوصنده، اڤوچک
تفرعاتنه وارنجیه قدر اکمال ایدیش فرض اولمان شو مسئله یه
عسکرلر، سوق الجیش تجه می نامی ویرورلر.

سفر برلکی بیتدیکی کبی بر اردو، حال سفری یه کیرمشدر
صاییلور. لکن هنوز حربه کیرمه یه بسبتون حاضر دکلدرد. اکر
تجمع حرکاتی بك آغیر یاپیلورسه او زمان اردو کچ قالور
ودشمنه نظر آکندی قدمنی ضایع ایدر. اونک ایچون بو
خصوصده بتون تفرعاتیه له برابر ده اولجه حاضر ایدیش
اولمیدر. کرچه بوکا قرشو «تجمع حرکتلرینک یاپیه له جنی
منطقه اولجه بیلمیور.» کبی بر اعتراض ایدیه جکدر. لکن
بو اعتراضک هیچ بر اهمیتی یوقدر. نته کم بز اونک اويله
اولدیغنی آشاغیده کی فصلده برر، برر سویلیه جکر.

حرکات پلانی، غوغا ایتک احتمالی اولان هر دولته قرشو

تجمع حرکاتنک یاپیله جنی الک ابو منطقه یی کوسترمه به مجبوردر .
 اولجه یاپیلان بر حساب و ترکیب سایه سنده سفر پالانلری ،
 اردولرک تجمع ایده جککری منطقه اوزرینه کرک تیمور یولی
 و کرک میاه جاریه واسطه سیله ، هیچده زمان غائب ایتدکسزین ،
 کله بیلملرینی تأمین ایدرلر .

اکثریا بر مملکتده شمندو فرایله یاپیله حق حاصلات نقلیه نک
 یکونی، تجمع حرکاتنک نه یولده ونه قدر بر زمان ایچنده اکمال
 ایدلمش اولنه جغقی کوسترمه به خدمت ایلر . اگر بز، تجمع منطقه-
 سنه کیدن یوللرک هپسندن استفاده ایدر و هر کون اونلر نقل
 ایده بیله جککری درجه ده بر قوت ویرر ایسه ک یالکز او زمان
 تجمع حرکاتنک کوزل ترکیب و تنظیم ایدلمش اولدیغنه کرچکدن
 قناعت ایده بیلورزه .

حربه ایودن ایویه حاضر لانه بیلمک ایچون هر شیدن اول
 قطعات عسکریه نک وقت حضرده دهها بعض موقعلره تقسیم
 ایدلمش اولمسی لازمدر . چونکه او سایه ده عسکری کمیلره
 بیندرمک ، حدود بویلرینه قدر کوتورمک خصوصلری ایجه
 قولایلاشمش اولور . اوندن بشقه ، خطرک هر بریسی ، کندی
 حاصلات نقلیه لرینک حد اعظمیسنی چیقارمق یعنی الک چوق
 تره ن سوق ایده بیلمک ایچون نه قدر وسائط جریه و متحرکه
 ایله تجهیز ایدلمک ایجاب ایدرسه اونلرک هپسنی حاوی اولمی

و بتون تیمور یولی شبیکه سی ده سوق الجیش نقطه نظرندن اک
مکمل بر حاله کتورلمش بولمیدر. شو وجه ایله یاپلدیغنه کوره
هیچ بر زمان ایکی ویا ده ها زیاده خطک حاصلات نقلیه سی
حد اصغریده قالمش اولیه جقدر. زیرا بو دیدیکمز خطر ایچیه
واسع بر منطقه اوزرنده . سائر شمندوفرلره ، آنا خطلرینه
برلشه جکلردر .

اوندن بشقه ، جوار حکومتلر آره سنده رقیلک حسینی
او درجه ایلویه وارمشددرکه اونلر ، بر آز اول سویلدی کمز
مخدوری بر طرف ایتک ایچون یکی باشند بر خیلی شمندوفرلر
دها انشا ایتدیرلمشددر . حاصلی سوق الجیش تیمور یوللری
زمانم زده پک خصوصی بر حادثه تشکیل ایدور [*] .

اردولرک تجمع حرکاتی آرتق کون ایله دکل، بلکه ساعت
ایله حساب ایدیلور. بونک ایچون (۷۰) سفرنده اکر فرانسه ،
آلمان یادن اوچ کون اول کندی اردولرینک یایلمه حرکاتی
یتورمش اولسه ایدی ، هیچ شبهه یوقکه ، آلمانلر دها تمامیه
حاضر لغنی اکمال ایتمدن او (میچ) ایله (تیون ویلی) تضیق

[*] بو درلو شمندوفرلر، نسبتاً روسیه ده اک چوق یایلمشددر .
کرچک اهالیسی پک طاغلق اولان شو واسع مملکت ایچنده شمندوفرله
سیاحت ایدم جکلر پک مهم بر یکون تشکیل ایتدکلری ایچون یاپیلان
شمندوفرلرک بیوک بر قسمی یالکز تجمع سوق الجیشی نقطه نظرندن
یایلمشددر؛ دیه بیلورز .

ایتمش ، (استراسبورغ) ك طرق اتصالیه سنی كسمش و كندی
سواری فرقه لرینی (سار) وادیسنك اوته كنارلرینه كچورتش
اوله بیلوردی . بالعكس آلمان اردولری ، كندی تجمع حرکاتی
هان (۱۸۷۰) ده کی تجمع منطقه سی جوارینه قدر کوتورمه یه
مجبور قاله جقلردی .

لكن شو وجه ایله ارکن طاورانه نك حصوله كتوردجکی
فائده معنویه سی ، منافع مادیه سندن بك ایلری برشی اوله جقدی .
چونكه او سایه ده هیچ اولمزسه ، قطعات عسـكـریه نك امنیتنی
تزیید ایلمك ممكن ایدی . حتی یالکز بر کونلك بر تقدم بیله
ینه ایجه مهم بر فائده حصوله كتورمش اوله جقدی .
حاصلی بوندن شو چیقارکه ، كندی منافع ملیه سنی كوزهدن
هر حكومت كندی خصمندن اول ایشه باشلامق ، حدود
بونی كچمك ایچون هر نه یاپلمق لازم ایه اونلری بهمه حال
یایمه وودشمی كندی سندن اول میدان چیقارتمامیه چالیشه جقدر .
چونكه بو آنك ایلك ایشیدر .

۵ — سفر پلانی

شیمدیکی زمانده هرکس اعتراف ایلرکه ، بر حربك بتون
حرکانه شامل اوله جق یعنی مکمل بر سفر پلانی یایمق ممکنسزدر .

چونکه بويله بر شی يابه بيلمك ايجون خصمك تپه دن طيرناغه
 قدر بتون اسراريني ، بتون آمانی برر ، برر ميدانه چيقارمق
 لازم كليور . لکن شو ديه پکمزله برابر ينه ياپلمسی ايجاب ايدن
 شيلری اولجه ده کوسترمک ، تعيين ايتمکدن هيچ بر زمان
 قطعياً چکنمه ملي بز . حتی بر سفرک حرکات ابتدائيه سنی مقصد
 و مرامی کوسـتره جک بر حرکات عسکريه پلانی ترتيب ايلمک
 مطلق لازمدر ، ديه بيلورز . چونکه بر سفردن مقصد و مرام
 نهدر ، اوراسی بيلميه جک اولورسه ، ايش باشنه کچايدیکی آنده
 ينه يابه جغمزی شاشيرر و ويره جگمز امرلری اک چوق ياکلش
 ويرمش اولورز .

فکرلرده کی قرار سزلق ، امرلرده کی ياکلشلق سبيله ايسه
 قطعات عسکريه نك ايجـه کيوشک واکـهـيک بر يولده ايش
 کورمیری کي فنا نتيجه لر حصوله کلور . تعقيب ايديله جک هدف ،
 آچيقدن آچيغه بللی اولمينجه باشلانيلان حرب اکثريا پريشان
 وکيوشک بر يولده جريان ايدر . واک صکره بو قيلدن بر سفر ،
 هزيمت ايله نهايت بولور .

حرکات سفر به دوشونلديکی زمان ايشـک هانکی نقطه به
 قدر کوتوريله بيله جکني آکلاق ايجون ساده جه بر نظر امنيت
 واعتدال دم صاحی اولمق يتيشور .

هر حالده ، يابيله جق شيلرک بتون تفرعاتی برر ، برر صایمق

اورته به قومق هوسندن چکنمک لازمدر. مثلاً ایلک یاییله جق حرکاتک یالکز بر حساب قطعی به، بر فکر منطق به استناد ایلمش اولمیرنی بهانه ایدرک اولرک بهمه حال مظفریت چیچکلریله دونادلمش اوله جقلرینه اینانق تهلکه لی برشیدر. کرچک، بر آز یوقاریده سویلمش ایدک، که حربده بعضاً الکایو ترتیبات وسوقیات عسکریه، اکثریا یک فنا بر تصادفک ظهوریله بدبخت نتیجه لر ویره بیلور. بز بعض یاکلش حرکتلردن اوتری اوغرایه جغمز فنا نتیجه لره چاره بولمق واوندن صکره دشمنی محو ایتمک ایچون اکثریا یک نادراً قوتلی بر مالزمه سفریه به مالک اوله بیله جکز. اکر دائماً شویله بر حالده بولنه بیلمش اولسه ایدک، اوزمان سفر پلانمزی یک قولای بر صورتده یامش اولور و یک عالمانه و ماله هرهانه ترکیبات آرامق احتیاجندن قورتلمش بولنوردق.

ایلریده کی برسفرک، اک چوق تعقیب ایتسی محتمل اولان یورویش استقامتی ایودن ایویه تدقیق ایدرک، بزه تأمین موفقیت ایده جک فرض-یادن اک ایوسنی میدانه چیقارمق خصوصنده نظریاتجه بر اصول قطعی کوسترمک قولای برشی دکلدرد. بونک ایچون اک زیاده سرعت نظر وانتقال صاحبی اولمق لازم کلور. حال بو، که بر نیجه ایشلرک ایوسنی، کوتوسندن آیرمه به اک باشلیجه برواسطه اولان شوکوزل صفقی، شو علی الاعلی مزیتی برقچ حرف ایله، برقچ شکل ایله قطعاً تعریف ایلیمک ممکن.

دکدر. ایشته بزده اونك ایچون : « نظریاتجه بر اصول قطعی
 کوسترمک قولای برشی دکدر . « سوزینی قولانیوروز . شبهه
 یوقکه، اونی یعنی اوکوزل صفقی کرک تجربه وکرک مطالعه ایله
 بر درجه یه قدر بیوتمک قابلدرد. لیکن طبیعت اکر انسانه او یله
 بر صفقی، او یله بر مزیتی نصیب ایتمه مش ایسه ، نه قدر تجربه کو-
 ریلورسه کورلسون اونی اکتساب ایتمک ممکن دکدر .

معلومدرکه ناپولئون ، هیچ بر زمان سفر پلانی یاپمیدیغی
 ادعا ایلیوردی . لیکن بونکله برابر ، بزینه مشارالیهک بتون
 حرکات عسکریه سنک ایلک زمانلرده دهاک آچیق وپک بیوک
 هدفلر اوزرینه سوق ایدلمش اولدیغی کوریوروز . مثلاً بعضاً
 (۱۸۰۵) ده یاپدیغی کبی خصم اردوسنی طرق اتصالیه سندن
 آیرمق بعضاً (۱۸۰۶) ده یاپدیغی کبی دشمنک پایتختنی قورقتمق
 تشبثلرنده بولنوردی . حاصلی مشارالیه دائماً شوقیلدن بر بیوک
 هدف اوزرینه یورور و او وجه ایله سفره کیردی .

دیورلر، که اوزمانک مشهور عسکرلرندن بریمی، (۱۸۰۶)
 حربنده ایمپراطور سفره کیرمه دن اول، اونک یالکز هدف الحراتی
 دکل، خط الحراتی بیه کشف ایلمشدی . بونک اوزرینه آرتق
 ناپولئون ایستدیکی قدر : « بن هیچ بر زمان سفر پلانی یاپدم . « دیسون .
 اینجه فکرلی بر آدم ومثلاً دیدیکمز عسکر کبی مشهور بر راصد

واو سايه ده آلمان طوبراغنى چكنمك هوسلرى قراكلغه تفك صيقان بدلا آوجيلر كې قورى بر خيال اوردينه يوريمكـدن بشقه هيچ بر نتيجه يى حاصل ايده مزدي . هم شو حركتلر اويله بر خصمه قرشو يابلماق ايستىليوردى كه، او خصم ده . بر چوق زمان اول، كندى اردوسنى اك مكمل بر صورتده حاضرلامش ، تداركات سفر يه سنى يتورمش و حركت اداره عموميه سنى تيمور كې قوى بر قاچ الاك اداره عالمانه سنه ترك ايدرك او وجه ايله مبارزه ميداننه چيقمش بولنيوردى .

بالقان سفر نده صرب و قره طاغ عسكـرلرينه قرشو تعرض سوق الجيشى اجرا ايدن اردولرى ، موسقوفلره قرشو بالعكس مدافعه سوق الجيشيده سوق و اداره ايميه قرار و یرن عثمانلير بك اعلا حركت ايتملردى . بو وجه ايله حركت اونلر ايجون اك ابو واك منطقى بر حركت صايلور . چونكه روسيه اردوسنك تشكىلاتى، جسامتى ، تجمع سوق الجيشى حركاتى، حاصلى بتون تاثيرات حربه سى ترك اردوسنك بك زياده ايلرى كيتمه سنه ممانعت ايدنيوردى .

جنوب قوماندانلرى ، يالكز بر شیده قصور ايتديلر كه، اوده خصمك تجمع سوق الجيشى حركاتنه ايجه تاثيرلرى كوريله جك اولان اوفاق تفك تعرضلردن بسبتون واز كچرك عادتاً بر مدافعه مطلقه يه نظراً حركت ايميه قرار و یرملر يدر . كرچك ، اكر بو درلو

حرکت ایتمه‌ش اولسه‌لردی ، (باربوش) کوپر یسفی یا تمامیه
طوتارلر ویا بسبتون تخریب ایده‌یلورلردی .

عسکری تعلیم و تربیه‌دن ، قوماندانلری وقت صلحده یاییلان
مانورهلر و تجربه‌لردن محروم اولوبده ینه‌سرعتلی و شدتلی بر تعرض
سوق‌الچیشی حرکتی یایمه‌یه هوس ایدن طرف ، تملسز بر او
یایمق ایستیان آدمه‌ بکزر . هیج شبهه یوق‌که ، شو تملسز اوبرقاج
زمان صکره چوکر ، محو و پریشان اولور . واقعا تملسز بر اوک
ایچه بر زمان یشامش اولسی‌ده ممکندر . لکن بونک ایچون پک
مستئنا بدض شرطلرک وجودی لازم کلور . یوقسه ، پک آز
وقت صکره خرابه زاره دونمک طبیعیدر .

بالعکس ، عسکری پک‌زیاده تعلیم و تربیه‌کورمش ، قوماندانلری
تجربه‌لر و مانورهلر ایچنده بیومش ایکن ، ینه ، قیمت عسکریه‌سی
پک جزئی بر دشمن قرشوس‌منده حال تدافعیده ایش کورمه‌یه
قرار ویرن طرف پک صاغلام وقوی تمللر اوزرینه قولبه انشا
ایدن آدمه بکزر .

حقیقت! هیج بر کی‌مسه یوقدرکه ، شو دیدیکمز خطایی
بیله‌رک وقصداً یایمش اولسون . حتی پک فنا تجهیز و تسلیح
ایدلش اولان بر اردوده بیله قطعات عسکریه قوماندانلرینک
سویلدکارینه قولاق ویریلورسه ایشیدیلورکه ، اونلرک قونشدقلری
سوزلر اکثریا بیوک‌ایشلر یایمه‌یه قابیلیتی اولدقلرینی کوستریورلر .

فقط كرك تجربه سزلك و كرك غرور سيئه سيله او ضابطلر
منسوب اولدقلرى قطعات عسكريه به بعض بيوك بيوك صفتلر
اسناد ايتمكدن چكنميه رك بوسايه ده كندى پلانلرني، دوشونجه-
لرني ربط ايتمك ايچون قواعد اساسيه اولمديغنى كورنجه اك
صكره بعض بوش فكرلر اوزرينه استناد ايله جكدرد. بوكي
ضابطلر فكرينه كوره موجود اولان قصورلر، قواي معنويه
و بنحشايش طبعيت ايله مثلاً قهرمانجه بر جسارت، وطن پرورانه
بر غرور، ديانتكارانه بر اعتقاد سايه سنده بر طرف ايديله-
جكلردر [*].

بونك اوزرينه، هر شيدن اول انسان كنديني بيلملي،
نقصاتي، عرفاتي آكلاملي و صوكره اوكا كوره نتيجه حربه
واردق ايچون لازم كلان پلانلر يايهيه چالشملي در. بعضاً
حد ذاتنده يك ابو اولان بر تشبثدن واز كچمك لزومي كوريله-
جكدرد. چونكه وضعيتي معلوم بر تشبثك اجراسنه مأمور اولان
كيمسه اونى باشه چيقاره جق اهليتي حائز اوله مز. اكر سفر
پلانتي يابان بالذات سردار اكرم ايسه، مشاراليه كندى شخصنه

[*] انسان ماكنه سنه هيچ بر زمان اجراي تاثيردن بوش قالميان
بوكي شيله بزده اينانورز، اونلري هيچ بر وقت انكار ايتمز. لكن
اونلره استناداً بر اردونك بتون اكسيكلرني بر طرف ايتمك، هر شيئه
جواب ويرمك ممكن اوله جفننه اينانق المزدن كلز. عقلي فكري برنده
اولان هر انسان بوني بزم ايله برار اعتراف ايدر.

داثر هیچ بر فکر خیاله دوشمیه رك تكليف ايديلان بيوك ايشلری
ياپه بيلمك اقتدارى كنديسنده وارمى ، يوقى اوى حقيه
ميدانه چيقارمليدر .

سفر پلانك ايلك مهم نقطه سته ايشته بو وجه ايله برقرار
ويرمك ممكن اوله بيلور كه ، نقطه مذكوره صورت عموميه ده :
حرب نصل ياپيله جق ، تعرضه مى كچيله جـك ، يوقسه بولنيلان
وضعيت بزجه فائدملى بر تعديلاته اوغرايه جنى بر زمانه قدر
حال تدافعيده مى قالنه جق : ايشته بونلری حل ايتمكدن
عبارتدر .

اكر بر آنده بر چوق دشمنلره قرشو حركت ايتمك مجبوريتى
وارسه ، اك بيوك قوتك هانكى دشمنه قرشو سوق ايديله جكنى
واوته كيلرينه قرشو نصل جواب ويريله جـكنى ايودن ابويه
بر امتحان ايلمك لازمدر . صكره خصم طرفك ده نه وجه
ايله حركت ايده جكنى يعنى هر احتمالى موازنه ايدرك حال
تعرضيده مى ، يوقسه حال تدافعيده مى قاله جنى دوشونمك
لازم كلور .

شبهه سزدر كه ، صنعت حرب نظريانى ، خصمك ياپه جنى
قصورلرى اوزرينه تاسيس افكار ايدرك اووجه ايله بر حركت
پلانى ترتيب ايدلمش اولمىنى هيچ بر زمان صورت قطعيه ده منع

ایتمیور. لکن خصم طرفک بزی الکچوق زحمتلره دوشوره جک ترتیبات وتشبثات ایله ایشته باشلامش بولنه جنی فرضیه سنی دهینه هیچ بر زمان انکار ایده میورز.

برکره خصمک نه وجه ایله حرکت ایده جکنه دائر اساسلی وطوغری بر فکر ایدند کیدن صکره اونک سوق الجیش تجمع ویایلمه حرکتلرینک ده نه وجه ایله یاپلمش اوله جغنی دوشونه بیلورز. کرچک دشمن کندی قوای عسکریه سنی طوپلامق ویایمق خصوصنده بز نه کبی افکاره نظراً ایش کورپور ایسه ک اوده عیناً اوله حرکت ایده جکدر. دشمنک هدفی، مقصد الحركاتی اولمق اوزره بزم کشف وتعیین ایده بیله جکمز نقطه، اونک قوای عسکریه سنی طوپلانمش اوله جنی منطقہ یی یعنی اس الحركاتی بزه عیاناً، بیاناً کوستره جکدر. وقت صلحده خصم اردوسنی بزدن کیزی طوتلمسی ممکن اوله میان وضع الجیش ترتیبانی، عسکری اداره مرکز لرینک وضعیت وتشکیلاتی برسفرده قطعات عسکریه سنک یورویش حالنه کچمسی زماننده کی نقاط اساسیه سنی کوسترمه به خدمت ایدرلر. شو دیدیکمز اساس نقطه لرندن کچهرک اس الحركاته کیدن شمنندوفرلر، یولار وطرق انهاریه ایسه، دشمن اردوسنیکن هیکام سفرده تعقیب ایده جکی خطوط الحركاتی برر، برر کوسترلرلر. بو خطرلرک نهایت نقطه لرینه

کلنجـه، بز، مذکور خطار واسطه سیله سوق ایدیلان دشمن
 قطعات عسکریه سنک اک صکره نهیه بالغ اولدیفنی اوکرنش اوله-
 بیله جکز. اکر بتون شو دیدیکمز ایشلر اینجه بر حساب ایله
 تعقیب ایدلش اولورسه نتیجه نك بهمه حال طوغری چیقیمی
 طبعیدر. حاصلی بو مطالعه بز اک صکره خصم اردوسنک
 قولاره نصل آیرلدفنی واونلرک اشغال ایده جکلری منطقه لری ده
 برر، برر کوستره جکدر.

بونلر بیتدکدن صکره کمدی تجمع سوق الجیشی حرکاتیزی
 تنظیم ایلمک ایجاب ایدر. اکر بز تعرضه کچمهیه قرار ویرمش
 ایسه ک، مذکور تجمع سوق الجیشی هرشیدن اول بزم ایلرییه
 حرکت مزه یاردم ایتلیدر. یوق اکر، برمدافعهیه قرار ویرمش
 ایسه ک، اک برنجی وظیفه مز خصم اردوسنک کله جکی خط اصلی
 اوزرنده بتون قوتلر مزی طوبلامق اولماید. چونکه بشقه
 درلو یابار ایسه ک، دشمن ایله باشه چیقهمیز. بالعکس اوکاپک
 ارکن، پک چاقوق یکلمش اولورز. بونک ایچون ده ممکن
 اولدیفنی قدر خصمه یقین برنقطه یی انتخاب ایتک چوق خیرلیدر.
 چونکه بویله یامز ایسه ک اوزمان بزم تجمع سوق الجیشی حرکاتیز
 امنیتده قالمز. اکر مذکور نقطه یی بر آز دها کیروده انتخاب
 ایتش اولور ایسه ک اوزمان اوچ درلو ضرر کوریرز: اول،

یهوده یره اراضیمزك بر قسمی دشمنه ترك ایدرز . ثانیاً ، بر خیلی منابع عسکریه من الدن چیقار . ثالثاً ، ایچده وقت ضایع ایتمش اولورز .

اگر سفر پلانی ، تعرض نقطه نظرندن یابلمش ایسه ، مختلف قوللره ویرلمسی لازم کلان استقامتله ده تفصیلات ایله کوستریله بیلورلر . اوندن بشقه ، میدان محاربه می ایچون بتون قوللرك برلشه چکی منطقه کذلک ارانه ایدیلور و دشمن اردوسنك جناحلرندن بریسی ویا خود مرکزی کبی هجومك هدف مخصوص ده سویلنه بیلور .

بومعلومات قطعیه خارجنده ، حرکات عسکریه ایچون آنجق بعض اشارات عمومی ویریلور . یوقسه اونلرك هر بریسی آری ، آری کوسترمك ، تعیین ایتمک ممکن دکلدرد . علی الاصول ، دشمن اردوسنك کیرولر ایله اولان طرق اتصالیه سنی کسمك جهتی هر زمان توصیه اولنور . چونکه اونلر بر کره الدن کیدرسه آرتق خصم اردوسنك یشامسی ، بسلنه بیللمسی ممکن دکلدرد . کرچک ، دشمنی بسلبتون محو و پریشان ایتمک ایچون الک کسدرمه والک امین برواسطه شودیدیکمز کبی یایمقدرد .

خصوص مذکور ، کچمش وقتلردن زیاده شمیدیکی زمان

حر برلرنده دها کوچ جل ایدیلور بر مسئله در . بونک اصل سببی ایسه ، بر آز یوقاری سـ ویلدی کمز متجرك اس الحركاتك تعریفندن ایلری کلیور . چونکه بو چشمید اس الحركاتك چـوق مدافعه جهتی اسـ استفاده ایدرك اوندن بك زیاده منفعت کورور . بوندن تقریباً (۳۰) سنه اول یعنی آمریکا سفرلرنده بر اردونك سـلامتی ، یالکز بر شـمندوفر خطندن اوزاق طومتق فکرینه استناداً یابیلان حرکات عسـکریه دن برینه تابع قیلمق ممکن اوله بیلمش، ایدی . شمـدیکی حالد ایسه ، بو مسئله غربی اوروپا کی بردارالحربه ممکن دکل تطبیق ایدیله میه جکدر .

بوراده خصم جهتی اراضی ملیه نك بـتون بر قسمندن ، یعنی اردوسنك اداره واعاشه سنی تأمین ایده جك بیوك بر قسمندن آیرمق لازم کله جکدر . صاغلام بر نتیجه الده ایتك ایچون خصم اردوسنی ایودن ایویه بر صیقشدرمق ، اونی یابیطرف حدودلر اوزرینه ویاخود کندی دونمـاسنك حاکم اولدینی دکر ساحلارینه آتمق ایجاب ایده جکدر .

سفر پلانی اك صكره دشمنی یوله كتورمك ، عقد مصالحیه مجبور ایتك ایچـون لازم کلان وسائط عسـکریه و سیاسـیه نك ذکر یله نهایت بوله جقدر .

مدافعه ده قاله جق براردویه کوره ترتیب ایدی لان سفر پالانی
نسبه ده ها واضح و آجیق برلسان ایله استیلا اردوسنه قرشو
طوتیله جق ایلك موضعك هانکی موضع اوله جغنی کوستر دکن
بشقه ، اگر شو ایلك مقاومت جزئی بر زمان دوام ایده جك
ایسه ، قطعی مدافعه نك هانکی نقطه اوزرنده اجرا ایدیله جگنی ده
کوستریله جکدر . اگر سفر پالانی جدی بر زمین ، ریاضی
بر اساس اوزرینه قورلمش ایسه ، بونقطه وضعیت عمومیه ده
ظهور اتمسی مأمول اولان بر حالک ، (مدافعین ایچون فائده لی
بر حالک) تجلی ایده جکی نقطه دن عبارت اولور .

کوریل یورکه ، مدافعین رجعت حرکانه دوام ایتدیکی مدتجه
خصمی کندی هدف اصلیسندن آیره جق بر طرزده شویوقاریده
سویلدیکمز نقطه یه متوجهاً براسنقامت آلمسی يك فائده ومهم
بر مسئله در . دشمنك کیرو لر ایله اولان اتصالانی نه درجه کوچ
اولورسه ، بالعکس ، بری طرفك یعنی مدافعینك طرق اتصالیه سی
دها او قدر زیاده امین بر حالده بولنه جقدر . برمدافعه سفرینه
دائر یاییله جق سفر پالانی اك صکره حرکات عسکریده وقوعی
ملحوظ اولان عکس حالک نه زمان و هانکی نقطه ده ظهور
ایده بیله جگنی کوسترن بعض ملاحظات ایله نهایت بولور . اونک
ایچون مذکور سفر پالانی ، بر تعرض حربنه دائر یاییلان

سفر پلانی کې سفرک هیئت عمومیه سنی احاطه ایتش اولیه -
 جقدر . یعنی او ، بزى يالکز حربك ايکنجی دورینه قدر
 کوتورمش اوله جقدرکه ، مذکور دور ایچون یکی باشند بر
 تعرض پلانی یایمق لزومی کوريله جکدر .

آز چوق اهمیت و قیمتی حائز اولان بر سفر پلانی ترتیب
 ایده بیلیمک ایچون اک ایو چاره ، هر شیدن اول عقل وفکرک
 خارجه جیقمماق و اوکا کوره ایشه باشلامقدر . یوق ، اگر
 بالعکس ، زمان و مسافه اعتبارله پک چوق شی احاطه
 ایتک ، اکثریا تصادفک تأثیری آلتیده قالان بر چوق
 ایضاحات و تفرعاته کیریشمک ایستینلورسه او وقت
 پایله حق حرکات عسکریه سفر پلانسک عکسنه ، خلافته ظهور
 ایدر .

بونکله برابر ، ینه آز چوق تفرعاته کیریشمکده لازم
 کلور . از جمله سفر پلانی ایکنجی درجه دارالحربلرده اجرای
 حرکات ایده جک اولان اردولر ایچون بعض تعلیمات عمومیه
 کوستره بیلیملیدر . شو دیدیکمز تعلیمات ایه ، اک زیاده ایکنجی
 درجه دارالحربلرده وقوعه کله جک حرکانک ، اردوی اصلی
 محاربه قطعیه سنی ویرمش اوله جنی بر زمانه قدر ، اونک اوزرینه
 فنا بر تأثیر کوسترمه مسنه دأر اوله جقدر .

اگر حرکات عسکر به جه نظر دفته آلمنی ایجاب ایدن
 بعض مواقع مستحکمه وار ایسه ، سفر پلانی اونلره قرشو-
 نصل معامله ایدیه جکفی ده بیلدیرمیلدر . زبرا مذکور قلعه لره
 قرشو طوتیه جق مسلك حرکت ، اردونك تجمعی نقطه نظرندن
 ابو ، کونو بعض تأثیرلری حاویدر . بوکونکی تشکیلاتنه کوره
 بر محاصره پارق ، اولجه کندیسنه ویریلان استقامتی براقوبده
 یکی بر استقامت بونیجه حرکت اتمکده پك چوق مشکلات کوره-
 جکدر . وبلکه ده کوچ حرکت ایده بیه جکدر .

اونك ایچون دشمن مواقع مستحکمه سندن هانکیسی مح-
 صره اتمک ایستیلورسه ، اونی اولجه دها بیلیمك لازم کلور .
 عین وجه ایله سفر پلانی دشمن اردوی اصلیه-نه کیدن یولی
 سد ایلان توقیف قلعه لری خطنك هانکی نقطه سی اوزرنده اك
 چوق تضییق کوسترمك ایجاب ایده جکفی ده تمینه مجبوردر . کرچك
 بووظیفه یه مأمور ایدیه جك قطعات عسکر به خصوصی برمالزمه
 سفریه یه احتیاج کوسترلر .

اك صکرده قوای بحریه ایله اردوی بری آره-سنده بر
 ارتباط صحیح وجوده کتورمك جهتی دوشونمك لازم کلور .
 والحاصل سفر پلانی دنیلان شی وضعیت عسکر به و-سیاسیه
 اوزرینه وایکی دشمن حکومتك قوای عسکر به سی بیننده جدی

برمقایسه دائر ملاحظات عمومی نی جامع بردفتر ، بر مخطره
دیگدر . بو مقایسه ایله وضعیت عمومی مطالعه سندن ایسه
حربك اصول جریانی حقنـده عمومی بر مسـلك حرکت
چیقاریلور .

برده خصمك یایق اقدارینی حائر اولدینی شی کوزلجه
بر تدقیق ایدیله جکی کبی سوق الجیشی یایلمه لرینه مخصوص اراضی
منطقه سی ، اعلادن اعـلایه بر کوزدن کچوریله جك واوکا کوره
کندی قوای عسکریه مزك برلشه جکلری ، قول اردو ویا فرقه ،
فرقه طوپالانه جکلری یرلر تعیین اولنه جقدر .

واك صکره دشمن اردوسيله قطعی بر میدان محاربه سی
ویرمه یه مساعد اولان وایلك حرکات عسکریه نك تعقیب ایده .
جکی استقامت هانکیسی ایسه اونی بولوق واك ابو شرائطه کوره
سچمك ، آیرمق لازم کله جکدر . شو صره ده ، تعرضی سفر
پالانی ، مدافعه سفر پالاندن آیرلمش بولنور . برنجیسی تعقیب
ایدیله جك هدفلری بر طرز عمومیده کوستره ؛ لکن بر اوجی ده
عقد مصالحه یه قدر کیدر . ایکنجیسی هر ایکی جهتك مسلك
حرکتلرنده بر تحول عمومی کورلدیکی یعنی وقایع جاریه مدافعه نك
تعرضه ، بالعکس تعرضك مدافعه یه انقلابی ایجاب ایلدیکی زمانه
قدر سهـورر . وکندی کنندینه حاصل اولان سفر تعرضی یه

کوره ایش کورمک ایچون یالکز بریول، واستقامت کوسترمهیه
چالیشور .

صوک سوز : هرایکی سفر پلانی موفقیت اوزرینه اجرای
تأثیر ایده بیلان احوال فرعیه دن آز چوق بحث ایتیه مجبوردر.

طقوزنجی فصل

تعرض سوق الجیشی حرکاتی

۱ - هدف ، شرائط ، وسائل

اولجه کورمش ایدک، بیلورزکه، بتون تعرض سوق الجیشی حرکاتنک مقصد وهدفی بزجه اک مناسب اولان شرطلر ایچنده مصادمه قطعیه اجرا ایتمکدر . اکر بزدها بیوک قوتلر ایله خصمک اک ضعیف بر نقطه سی اوزرینه آتیلور ایسهک، بوهدف او قدر چابوق بر صورتده استحصال ایدلش اولور . اوندن بشقه اکر مصادمه قطعیه دن اول بتون قوای عسکریه - مزى طولیلامیه واونلری دشمن ایچون اک مهلاک ، اک مؤثر ضربهلر اجرا ایدوبیله جکمز براستقامتده ایلری کوتورمه یه موفق اولور ایسهک اوزمان هیج شبهه یوقکه، تعرض سوق الجیشینک بزدن ایستدیکی هر شیئی یامش ، یرینه کتورمشز دیمکدر . چونکه فن حربک غایه سی کالی اک قطعی بر نقطه اوزرنده اک قوتلی اولمقدن عبارتدر .

درجه کافیه ده منابعک وجودی اساس طوتیلررق بر حربده موفقیت استحصال ایتک ایچون بمض شرطلر واردر . برنجیسی

مقصدمزی کیزی طوتلی بز . بروجہ ایله که ، مصادمه قطعیه اجرا ایتمک ایچون بزم تعقیب ایده جکمز استقامت هانکی استقامت اولدیغنی دشمن فرق ایده مه ملیدر . بروجہ ایله که ، دشمن بزم تعقیب ایلدی کمز استقامتی آنجق ، محاربہ دن اول بتون قوای عسکر به سنی بر آرمه کتور و بده ، تهلیکلی نقطه اوزرنده بزه قرشو قویه بیلیمک ایچون ایجه کج قلمش اوله جنی بر زمانده آکلامش اولملیدر .

بناءً علیه حرکات عسکر به شویله بر نقطه یه تماس حاصل ایتدیکی آنده بزم اردومزک اک اوزاق اولان قسملری خصمک اوتیه بری به طاغیدلش بولنان قسملرندن زیاده مصادمه یرینه یقین اولیه مجبوردرلر . اگر حرکانه باشلامه دن اول دشمنه دائر اوکرندی کمز خبرلر طوضری ایسه ، مصادمه قطعیه اجرا ایدیله جک زمانی نسبتاً جدی وصحیح بر حساب ایله تعیین ایتمک ممکندر .

شبهه سز ، دشمندن دهـا سریع بر یورویش ایله یوریمک مظفریتک بر آن اول ظهور ایتسیچون بر نشاندر . اونک ایچون دشمن بزی کچمه جک وجه ایله چابوق بر یورویش ، جدی بر حرکت یایمه یه چالیشملی بز .

شدتلی بر حرکت ، چابوق بر یورویش هر نوع تردلری یوز اوستی چویرر .

بودیدیکمز شرطلر ، بزه او درجه ساده کورینورلرکه ، انسان بر آز غفلت ایدمه جک اولسه دنیاده اولردن قولای هیچ برشی یوق فکربنه دوشه جک کبی اولور . لیکن ایش اویله دکلدر . بالعکس پک قولای ظن ایلدیکمز بو شـیلرک پک زور اولیشی؛ شوندن ایلری کلیورکه ، حرکتیه باشلامه دن اول وضعیت عمومیه ده کوریلان ساده لک ، ایش باشنه کچلیدیکی آنده غائب اولور . هر ایکی اردو بربریه تماس ایتـدکلری زمان یالکیز بر نقطه اوزرینه دکل ، بالعکس برچوق نقطه لرده تماس ایدرلر . و تماس نقطه لری نه قدر چوق اولورسه ، بزی ایلک طوتدیفمز استقامتدن خارجه آتمق ایچون او قدر زیاده قوتلر ایش باشنه کچمش اوله جقدر .

شبهه سز بو محذور حرکات تدافیه ده اولدینی قدر حرکات تعرضیه ده مؤثر دکلدر . چونکه تهله که بر آنده حرکات تدافیه نیک هر جهته نده کندیسنی کوسترر . بونکله برابر ، خط مدافعه نیک هر جهتی ضعیف ، هر جهتی قوای امدادیه ورودینه منتظر کبی کورینورلر . حاصلی بو فکر مذکور خطی بویدن بویه استیلا ایدر . اوندن بشقه بتون شو فکرك خلافتده اوله رق ، بعض نقطه لرده کی قطعات عسکریه یی آلمق واولری مصادمه قطعیه اجرا ایدیه جک نقطه یه طـوغری کوتورمک احتیاجی کوریلور . ایشته او زمان قبول ایدلش اولان استقامتک انتخابی

اوزرینه زده بعض شہلر حاصل اوله . باشلار . صکره دشمن
 کند ی حرکتی کوسـتر و بو حرکت وضعیت عمـومیه ده بزم
 دوشوندی کمزدن بسـبتون بشقه بر منظره حصـوله کتورر .
 بوندن اوتری ایسه ، یورویشـک دوامی خصوصـمنده ینه بزم
 کشف ایدمـدی کمز ، بعض بیوک تهلـکلر حاصل اولور . سفر
 پلانی یابدیغمز وقت کوزمن اوکنـده یالکز بر هدف ، یالکز
 بر مقصد وار ایکن شیمدی بر سـوری هدفلر اوکنـده
 بولندیغمزی آکلارز .

ایشته بوزمان ، الک بحرانی برزماندر . اصل معرفت ، آجیق
 وطوغری برکوز ایله هدف قطعی اوتـکیلردن آرمق و یا خود
 هیچ اولمـزه ، مهم بر هدف تعیین ایتـک واک صکره اوکا نظراً
 ایش کورمکدر . و بر دفعه تعرض جهتی شـویلـه مهم بر نقطه
 اوزرنده موفق اولدقدن صکره ، اوتـکی نقطـلرده نتایج عسکریه
 نه اولورسه اولسـون ، اکثریا اونـک قرشوده کی دشمنه غلبه
 ایدـه جـکنـه قرار ویریلـه بیلور .

۲ - نقطه التصاق انتخابی

هدف تعیین ایدلدکدن واورایه کیدن استقامت قطعاً

عسکر به یه کوسترلد کدن صکره کیرویه قالان شی مذکور قطعه لرك برلشه جککاری یری یعنی التصاق نقطه سنی تعیین ایلمکدن عبارتدر . شویله بر نقطه نك انتخابی ایسه ، کرچکدن مهم وزور برشیدر . اگر ایستدیکمز هدفه یا قلاشمش اولدیغمز زمان قطعات عسکر به بر آنده اجرای تأثیر ایده میه جک بر حالدیه ایسه ، یاییله جق حرکت شبهه سز اکسیک قالور . چونکه عسکر مزك طاغق اولسنندن اوتری نر موفقیت ایچون لازم کلان تفوقی حائز اولمش بولنه .

بونک اوزرینه شو محذوردن قورتلماق ایچون ایلک اوکجه ده قطعات عسکر به یی طوبلی بولندیرمق اونلری ایشته اویله جه یعنی برلکده ایلری کوتورمک لازمدر . لیکن شو خصوص آنجق پک مستثنا زمانلرده ممکندر . کرچک ، بشقه بر شکله کیرمسی ، تعدیل ایدلمش اولمسی بزم الیمزده اولیان ایلک وضعیتی هر وقت نظر دفته آلمق ، دوشونمک ایجاب ایدر .

از جمله بعض جغرافیا تأثیرلری اولورکه ، بز تعرض حرکاتنه باشلامدن اول بیله قطعات عسکر به نك اجتماعه ، برلشمه سمنه مانع اولور . اونک ایچون وضعیت اولیه یی نظر دقتدن اوزاق طوتاملی ، دیورز .

(۱۸۶۶) سفرنده پروسیا اردوسنک باشندن طبق شونک کبی بر حال کچمش ایدی . اگر یوروش باشلامزدن اول

بتون قطعات عسکریه بی اس الحركات اصلیده جمع ایتمک
ایستیلورسه ، بوندن اوتری او قدر چوق زمان غائب ایدلمش
اولورکه، شو سبیله احتمال بتون وضعیت بیوک بر تعدیله اوغرار
و آرتق کندیلرینه استناداً ایش کورمک ایستدیکمز فرضیات
عمومیله یواش یواش ییقلمش بولنور .

ثانیاً، بیلورزکه، جسم قطعات عسکریه نك بریره طویلانیسی
اردو ایچون بر چوق فناقلرک و بر چوق مناسبتسز لکلرک
ظهورینه واسطه در . کرچه کیرو طرفلرده پک مکمل بر تیمور
یولی شبیکسی بولندیفی زمان قطعات عسکریه نك عموماً بر آره یه
کتورلمش اولمسنده بر بآس اولسه کرکدر . بویله بر زمانده اک
زور ، اک جتین اولان شی اردو ایچون ایچیله جک صوبولمقدرد .
لکن ینه هر حالده یورویشه باشلانیه جفی زمان، اردوینی بعض
قسملره آیرمق لزومی باشمزدن اکسیک اولیه جقدر . بونک
اک باشلیجه سببی ایسه الده موجود شمندوفرلر وکوزل کوزل
یولارک ممکن اولدینی قدر هپسندن استفاده ایتمک امیلدر .
ومادامکه، بویله یایمه یه لزوم کوریلور، او آندن اعتباراً قطعات
عسکریه نك هپسی ایچون بر نقطه التصاق کوسـترمک بهممه حال
ایجاب ایلر . شو التصاق نقطه سنک انتخابنه کلنجه بز بوراده
یکدیگرینه طبان طبانیه ضد ایکی بیوک مسلك اوکنده بولنیورز .
بر محاربه میداننک ایلروسـنده نقطه التصاق انتخاب ایتمک

نابولیونہ مخصوص برعادت ایدی، هر کس بیلورکه، شوقاعدهی
 الك چوق سوهن، تطبیقه الك چوق اوزهن مشارالیه اولمشدر.
 کرچک، نابولیون کندی خصمنه ضربۀ مهلكه وقطعیه سفی
 اجرا ایتمه دن اول، بر کره اردوسنک بتون پارچه لرینی بر آریه
 کتورر واوندن یکپاره بریغین تشکیل ایدردی. اوندن بشقه،
 باصقین ایتمک فائده سی غائب ایتمه مک ایچون مشارالیه کندی
 التصاقی دائما یا برطاغ سلسله سی ویا بر نهر مجراسیله دشمندن
 کیزلی طومایه چالیشوردی. حاصلی نابولیون کندی مسلکفی
 تعریف ابتدکی زمان «جسیم بریغین حالنده ایلری یه آتلمق.»
 سوزینی قولالیوردی.

(۱۸۰۵) ده آوس-تریالیرک کیرولرینه دوشمک ایچون
 طونه یی کچمه دن اول نابولیون اونلرک صاغ جناحی کیروسنده
 یعنی (طوناوورت) ایله (انگولشتاد) آره سنده اردوسنی ایشته
 بو وجه ایله طوپلامش، بر آریه کتورمشدی. ینه (۱۸۰۶)
 سنه سی تشرین اول بدایتلرنده مشارالیه کندی اردوسنی یوقاری
 (مین) جوارنده یعنی (به پروت)، (باهرک) و (ایشواین فورت)
 نقطه لرنده جمع ایدرک اوندن صکره ایلری کیتمه یه قرار
 ویرمشدی. ینه (۱۸۱۳) سنه سی نیشان آینه فرانسه ایچرو-
 لرندن کلان قوای جسیمه ایله ایلك اوکجه آلمانیا ده کی فرانسر
 اردوسنک کیرویه قالان اقسامیله برلکده (پرس اوژهن) ک

بولندينى (سال) واديسنه (مرسبورغ) و (وايسنفل) اوزرينه يوریدی . كندی قاعده سینه ، كندی مسلكنه دائما صادق اولديغيچون مشاراليه اوللا بتون قوای عسكریه سندن يالکیز بريغين ، جسيم بريغين تشكيل ايتمكدن ايشه باشلايهرق اوندن صكره ايلروملك ، (لابسيق) استقامتمنده يوريمك وباشليجه اردوسى بوموقعك جنوبنده بولنان متفقينك صاغ جناحنى قوشاقتى ايتيوردى .

ينه بوسفرده آغستوس آيى نهايتلرينه طوغرى ايمپراطور (درسد) ميدان محاربه سنى ويرمك ايجون (سيليزيا) دن تكرار (الب) واديسنه كلديكى زمان يينه عين منظره كوريلور ، عين مسلك تعقيب ايديلور . كرچك ناپوليون ، (الب) ايله (درسد) شهرينك ايلاريسنده يعنى (ايتولين) موقعنده ايلك اوكله بتون قطعات عسكریه سنه مخصوص برموعده تلاقى، عمومى بر(رانده وو) كوسنر . اوندن صكره جسيم بريغين ايله ايلرى به طوغرى يورويشنه دوام ايلر .

حقى مشاراليهك صوك (۱۸۱۵) سفرى بيله شمال حدودى بويجه (شارل رووا) استقامتمنده وضع وترتيب ايدلمش اولان بتون قطعات عسكریه نك على العجله بر صورتده اجتماع ايتمش اولملىله باشلامش ايدى . كرچك ، مشاراليه قطعات عسكریه نك هپسنى بر آره به كتوردكدن صكره ينه حيرته شايان بر سرعت

ایله کندی قرشوسنده کی پروسیا اردوگاهلری اوزرینه آتلمقدن کبرو طورمدی. ایشته قطعات عسکریه نك التصاقه دأثر ناپولیونك مسلكی واوگا دأثر سویلیه جكمز مثالارك اك كوزلاری بونلردن عبارتدر .

شیمدی، التصاق نقطه سـنك انتخابه مخصوص اولان ایکی قاعده دن، اولنرك مروجلرندن ومثالارندن بر آز بحث ایتك ایستیورز .

(۱۷۵۷) سفرینك بدایتنده ایکنجی فره دریقك، (۱۸۶۶) سفرنده (صادووا) میدان محاربه سندن اول پروسیا اردوسـنك تعقیب ایلدیکی مسلك ، ناپولیون قاعده سنك طبان طبانه ضدی بر مسلك در. بومسلكه نظراً دشمن علمنه کیدن قوای عسکریه، مختلف قولار تشکیل ایدرك اووجه ایله کیدر والتصاق نقطه لرینی دشمنك اشغال ایتدیکی منطقه نك ایجروسـنده انتخاب ایدرلر . (۱۸۷۰) سفرنده (وورت)، (اورلئان) و(مانس) محاربه لرنده پروسیا اردولری عین وجهه ایله حرکت ایدرك، عین مسلكی تعقیب ایتشلردی.

ناپولیون قاعده سنه طبان طبانه قرشو اولان شومسلكك، یعنی بربرندن متفرق حرکت ایدن قطعات عسکریه به مخصوص التصاق نقطه سنك محاربه میدانی اوزرنده انتخاب ایدلمسی اصولنك اك وفاكار دوستی ، اك صادق حامیسی فلد مارشال مولتکه در.

شو ایکی اصول ، شو ناپولیون و مولتکه مسلکری بر چوق بیوک بیوک نتیجه لک ظهورینه سبب اولمشلردر. ظاهرأ بر برینه بک طارغین باقار کبی کورینان بو ایکی مسلکک مقصدی ینه بر درر. یعنی ایکسینکده امل منتهاسی، بر حرکت مشترک ایچون میدان محاربه اوزرینه دشمنه فائق اوله جق وجهه ایله قوای عسکریه طوبلامقدر. اک مشهور عسکری محرر لر مزدن بریسی حق (۱۸۷۰) سفرندن صکره ، ماره شال مولتکه مسلککک برنجی ناپولیون مسلککدن آشاغی بر مسلک اولدینی فکرینی اورته یه چیقازمشدی.

بزه کلنجه، بز او ایکی مسلکک ایکسینده بر قیمت ویرمه یه مجبورز. چونکه اولاردن هر بریسی، اولجه قطعاً تعین ایدلش بر وضعیته جواب ویرر ، هر بریسی یالکز بر مقصده خدمت ایلر .

(۱۸۶۶) ده آوستریا حکومه تی سفر برلک نقطه نظرندن پروسیایه قرشو آز چوق تقدم ایلمش ایدی. باقیلورسه ، شو تقدم خصوصی پروسیانک هنوز سفر برلکفی بیتورمه مش ، تجمع ایتمه مش اولان اردوسنی شاشرتملی ایدی . اگر جنرال مولتکه، پروسیا قوای عسکریه سنی اولا، پروسیا طوبراغنک یالکز بر نقطه سنده جمع ایتمک ایستمش اولسه ایدی ، بوندن هیچ شبهه یوق که، یکی باشند وقت ضایع ایدیه جکدی . طبیعی نقطه

التصاق یعنی بتون قطعات عسکریه نك الك چابوق وارده بيله جكلىرى نقطه ، حدودك ايلروسنده : بوهمياده يوقارى (الب) جوارنده بولنيوردى . شبهه سز دشمن پروسيا اردوسندن اول اوراده موضع آلمهيه موفق اولدى . ليكن بتون اردوسيله برابر اورايه كمدى . اردونك بعض قوللارى ، هنوز (موراويا) نك جنوبنده (لوندنبورغ) ده بولنيوردى . پروسيا اردوسنك الك اوزاق اقسامى ايسه ، (درسد) و (نيز) دن كلهيه يعنى دشمندن آذرب مسافه قطع اتمهيه ، مجبور اولدقلرچون تام وقتده ايش باشنه يتشمش اولديلر . بتون قوللارك (زيچين) استقامتنده ايلرى يورويشلىرى ، اكثريا طالع وتصادفه براقيلان يورويشلىرى كې دكل ، بالعكس ، الك اساسلى فكرلر اوزرينه قورلمش اراضينك احوال جغرافياسنه كوره ترتيب ايدلمشدى .

بناءً عليه نقطة التصاق ، مولتكه نك ديدىكى ويايدىنى كې بك اعلا ، دشمن طرفندن اشغال ايديلان منطقه ايجروسنده انتخاب ايتك ممكندر . اما بر شرط ايله ، كه دشمن مذکور نقطهيه بزدن اول ، بزم قوتلر مذكور قوتنده قوتلر كوتورمك دن عاجز بولنسون .

ناپوليون مسلكى ، قطعى بر يورويشه باشلامزدن اول يكپاره بر ييغن تشكىل ايتك قاءدهسى ، باشلوجه شو بيوك قائده يي حائزدر كه ، مثلاً بر باصقين وقوعه كلهديكى زمان اكر

وضعیت عمومی به بزم دوشوندیگمز کې چیقمز ایسه قطعات
عسکر به نك هېڅی بر یرده اولدیغیچون پك بیوك بر تهلمک به
دوشولش اولمز .

(۱۸۰۶) سنه می تشرین اولنده ناپولیون ، پروسیالیلری
کندی اوکنده (لابسیق) دن برلینه کیدن بیوك یول اوزرنده
بولیوبده بالعکس، مأمول ایتکمیزین کندی صول جناحنده
یعنی (سال) کیروسنده کوردیکی زمان ، فرانسه اردوسی طبق
شو دیدیکمز حاله اوغرامشدی.

لکن یکپاره وکشیف بر یغین طرزنده ایلری یوروش
یایمق، اکثریا قطعانك بوزغون دوشمسنی و بعض اوراق تفك
ضایعاتك حصوله کلمستی موجب اولور. (۱۸۱۳) ده ناپولیون
اردوسی ، کشیف یغینلر طرزنده یاپیلان بر نیجه یوروشلر
ومقابل یوروشلردن اوتری بیاغی خراب اولمش، کیتمش ایدی.
(۱۸۵۹) و (۱۸۶۶) ده آوستریا اردولری کذلک بو وجه ایله
حرکت ایتمش اولدقلریچون پك چوق زحمت چکدیلر . اوندن
بشقه ، اگر دشمن کنديسنه اورلق ایستنیلان یومروقدن
چکینور و بوکاموفق اولورسه، کشیف بر یغین طرزنده ایلرولیان
اردو، یاقسماً دشمنی کندی حالنه براقمه و یاخود اونك قرشو-
سندده پارچه لره آیرلمه لزوم کورورکه ، شو ایکی مسئله نك
ایکیسی ده تهلمکلی برر وضعیت حصوله کتوردرلر . نته ایم ،

(۱۸۱۳) سفرنده (بلوهر) آغستوس ايله ايلول آبي بدايتلرنده ايکي دفعه کندی خصمنه قرشو ديدیکمز کي حرکت ايدرك دشمنك ضربه قطعيه سندن چکنمه يه موفق اوله بيلمش ایدی. اک صکره شونی ده سويليه لمکه، هدفك ايلريسند طویلانمق ایچون ایجه بریر پارچه سینه احتیاج واردر: اگر دشمن بزم جبهه مزك قرشوسنده ویتینده بولنورسه اوزمان مختلف قوللارک برلشمسی آنجق اس الحركات اصلیده اوله بيله جکدر.

بو حال، یعنی مختلف قوللارک اس الحركات اصلی اوزرنده یکدیگرینه التصاق ایلیمک مسئله سی ایسه بریجه یان یورویشلرک یا پلمسنى ایجاب ایدرکه، مذکور یورویشلر صنعت حربه دائر یازیلان اثرلرده کوردیکمز محذورلردن هیچ بریسنى کوسستر-مدکری زمان بيله، ینه دشمنه پک یقین اجرا ایدلکارچون-باصقین حرکتلرینه اوغرامق، منفرد محاربه لره سبب ویرمک وقاریشیقلى موجب اولمق کي، فکر مزده اولمیان بر چوق فنا القلر حصوله کتوره جکلردر. سويلدیکمزی ده-ا کوزل آکلاتمق، ده ا کوزل تصدیق ایتدیرمک ایچون آوروپای غربیده ظهور ایده جک بر سفری خاطره کتور یورز. حقیقت! هر بریسی یوز بیکلرجه انساندن ترکب ایتمش، اعلان حرب ایدلکی زمان حدود بوی اوزرنده یوز یوزه کلمش و بربرینه پک یقین بر مسافه ده یايلمش اولان دشمن اردولرینی بردوشونور

ایسه که، بوراده خصم طوپراغنه کیرمزدن اول قوای جسیه
 عسکریه نك بر قسمی ایچون درجه کافیه ده یر اولم دیغنی ،
 التصاق حرکتک حتی انهای حربده بيله اکمال ایدلمش اولمسی
 لازم کله جکفی هپمز تصدیق ایدرز.

آنچق دشمن طرفدن اشغال ایدیلان منطقه ایجروسنده
 وقوعه کله بیلان بر التصاق حرکتی اردولرک بالطبع صوک
 زمانه قدر آری آری قولار طرزنده ایلرولملرینه مساعده
 ایلر . اکر خصم کیرو چکیلورسه ، نقطه التصاقی بر آز ده
 ایلری کوتورمک ممکندر . شو حال قطعات عسکریه نك حرکت
 واعاشه سفی تسهیل ایدر . دیدیکمز قاعده نك کمندیسندن آریلر ،
 بر تهلیکسی وارکه ، اوده قوللردن بریسی ، دیگرلری اونک
 امدادینه یتشمک ایچون وقت بولمزدن اول ، آره یه کیرن دشمن
 طرفدن مغلوب ایديله بیلور . اکثریا قوللردن یالکز بریسنک
 بر عارضه یه دوشمسی ، ویاخود یاکلش بر استقامت آلمسی
 اوته کیلرینک ده کیرویه چکلمسنی موجب اولور . یوقاریده
 سولیدیکمز کی یالکز بر نقطه ده موفق اولق شرطيله اکثریا ،
 مظفر اولان تعرضک فائده لرندن بریسی وبلکه اک مهمی شو
 وجه ايله بیوک بر محذور یرینه کچر ویاکز بر نقطه ده مغلوب
 اولتی وسیله سیله تعرض حرکتی بسبتون بوزیلور کیدر .

اردونک وضع و تقسیم ایدلمش اولدیغنی یر نه قدر کنیش

اولورسه، باش قوماندانك حڪم و تأثيرى او قدر آزالمش بولنور؛
وبالعكس تعقيب ضابطلرينك استقلالى او قدر زياده چوغلالمش
اولور. برده اولنرك طرز حركتلرى، او آندن اعتباراً نتيجه
عموميه اوزرينه بيوك بر تأير كوسترميه باشلار. اكر بتون
جنراللر، وياخود اولنرك بيوك بر قسمى، تماميله باش قوماندانك
فكرينه كوره وسرعت وشـدـتـله حركت ايتميه جك اولورسه
او زمان قطعات عسـكـريـهـنـك التصاقي ابو بر نتيجهـيه ايصال
ايديله ميه جكـدر . واحتمال كه، سردار اكرم اولان ذات معيت
جنراللرينك يابه جقلى قصورلردن اوترى موفق اوله ميه جقدر.

(۱۸۶۶) سفرنده ايكنجى پروسيا اردوسى بوهميايه كيرديكى
زمان، قول اردولرك برينه قوماندا ايدن جنراللردن بريسى
كنديسنه ويريان وظيفه يي كوزلجه تعقيب ايدمهـدى؛ وكرچه
اردو بوندن اوترى يورويشندن كيرو قالمدى. ليكن اكر ديكر
جنراللردن برى شويله درايتسزلاك كوسترمش اولسيدي؛ مثلاً
اكر جنرال (ايشتاين مچ)، (ناشودا) موقعنده جنرال (بونن) ك
(طروتناو) ده يابدينى كېي حركت ايتسه ايدى، اردولك يورو-
يشى تعطيل ايدلمش بولنه جقدى. اونك ايچـون سردار اكرم
اولان ذات، كندى جنراللرينى ايودن ايويه طـانـيـلى واولره
قطعياً امنيت ايتمش اوله بيلمليدر.

كذلك، قطعات عسـكـريـهـده فنا وياخود ضعيفجه تشكيل

ایدلمش موادك بولغامسی ده لازمدر . چونكه اویله اولورسه
 علی العاده بر تصادف، جزئی بر عارضه قول اردو لردن بمضیسنك
 کمال سهولتله طاغلمسنی ایجاب ایده بیلور. نته کیم (۲۳) آغستوس
 (۱۸۱۳) سنه سنده (اودینو) اردوسنك باشندن بودیدیکمز فلاکت
 کچمش ایدی [*] .

تربیه و تعلیم عسکریمی یولنده اولمیان قطعات عسکریه
 طوبلی بولندقلری زمان، اکثریا کارلی چیقارلر. بناءً علیه کثیف
 یغینلر طرزنده ایلری یوروش یایمق مشئوم عارضه لره قرشو
 جدی بر تأمنیات یرینه کچر . وبوندن اوتری کندی قطعات
 عسکریه سندن امین اولمیان جهت بواصوله کوره حرکت ایدرسه
 يك ابو ایتمش اولور .

بالعکس آری، آری قولر طرزنده ایلری یوروش یایمق
 خصوصی ده اکثریا دها مکمل بر موفقیئتک حصولنی تأمین ایدر.
 چونکه بو وجه ايله حرکت ایدلدیکنه کوره دشمنی باصقین ايله
 بقالامق دها قولایدر . کرچک، دشمن کندیسنك عین زمانده
 بر قاج نقطه دن هجومه اوغرا دیغنی کورنجه کندیسی چون اک
 مهم نقطه هانکیسی اولدیغنی آرمقده ایجه زمان صرف ایده جک

[*] (غروبسن) میدان محاربه سنده (رینر) قطعات عسکریه سنك
 طاغلمش اولسی ، اوج قولده ایلرولمیان اردونك کاملاً رجعت ایتسنی
 انتاج ایلدی .

وبالطبع خصمنه نظراً بر آز کج طاورانش اوله جقدر .

یالکز بونکله قالسه ینه باس یوق ! لکن کندیسنی عین
زمانده بر قاج نقطه اوزرنده قورقیدان نه لکه ، عسکر آره سنده
برقاریش قلاق حصه وه کتوره جک وبوندن اوتری آله جق
ترتیباتک اکثریا خطالی اولسنی ایجاب ایلیه جکدر . اک صکره
بواصول التصاقه عائد شرطلردن بریسی ده وارکه ، اوده شو
وجه ایله اونی تطبیق ایدن اردو ، کندی خصمنی میدان
محاربه اوزرنده قوشاده جق صورتده چالیشمش اولمیلدر . چونکه
بویله یامق حال حاضر تعبیه سینه واسلحه تأثیرینه پک موافق
دوشر .

شیمدی هر بریسنک فائده و محذوری آ کلاشلد قدن صکره
عجبا قطعات جسیمه عسکر به نک التصاق نقطه سنی مواتکه مسلکینه ،
یوقسه نابولون قاعده سینه کوره می انتخاب ایتلیدر ؟ بو سؤاله
جواب ویرمک ، بزه قالورسه اردولرک باشنه کچه جک ذاتلرک
وظیفه سیدر . کرچک ، بوکی آدملر ، وضعیت عمومیه به کوره ،
ایکی مسلکدن هانکیسنی قبول ایتک کندیلرنجه ده الویریشلی
ایسه اونی اونه کندن آرمق ایچون حسن انتخاب وسرعت نظر
صاحبی اولمیلدرلر . چونکه بو مسلکلرک ایکیسی ده وضعیتک
حال وشانه کوره ، دکیشه بیلورلر . اونکله برابر ، باش قو -
ماندانلرک وظیفه سی اک چوق هانکی اصولی تطبیق ایتک لازم

کله یکنی دوشونمک دکل، بالعمکس موجود اولان قوای عسکریه یی دشمنه قرشو هپسی بر آنده اینس کوره چک وجه ایله ایلری یه کوتورمکدن عبارت اولدیغنی ده اصلا اونوتماولی بز .

۵ - موازی یورویشلر ، متلاقی یورویشلر ، متباعد یورویشلر ، کیجه یورویشلری ویان یورویشلری .

موازی یولار اوزرنده ایلری یورویش یایمه نک فائده سی ، قطعات عسکریه بربرندن مساوی آره لقلر ایله آیرلش اولدقلری ایچون حرکت زمانلرنده ، اعاشه واقامت خصوصلری دهه زیاده تههیل ایتمکدر .

کرچک ، شو وجه ایله حرکت ایلمسنه کوره ، قولاردن هر بریسنک کندینه مخصوص خط الحركانی ، وخط اتصالی وارددر . بویه اولدیغیچون موازی یولارک برفائده سی ده کیروندن کلان قافله لرك یکدیگرینه قاریشمسفی منع ایلمکدر . هیچ شبهه ایلمسـون که ، قطعات جسیمه نک ایلری یورویشلریچون اک اویغون اصول بوددر . لیکن شو اصول آنجق یولار بربرینه پک زیاده یقین اولدیغی زمان قطعات جسیمه نک میدان محاربه سنده برلشمسفی تأمین ایدر . بالعمکس یولار بربرندن ایجه اوزاق

ایسهلر ، مختلف قوللرک میدان محاربه اوزرنده التصاقی ممکن اوله مزکه ، یالکز بو محذور یوقاریده کی فائدهلرک هپسنی یوق ایتیمیه یتیشور . بناءً علیه موازی یوللر اوزرنده ایلری یورویش یایمق خصوصی ، بر محاربه ویرمک ایچون دکل ، بلکه بر مظفریت استحصالندن صکره خصمک تکرار بر مقاومتنه اوغرامق امید ایدلیورسه ، ضبط اولنان منطقیهی بویدن بویه آتلامق ، ایلری کچمک ایستلیدیکی زمان تطبیق ایدیلور .

مثلا بوکیدیش ، (۱۸۷۰) سنهسی آغستوس آینده (سال) ایله (موزل) آرهسنده آلمان اردولرینک باشندن کچمش ایدی . لکن فرانسهلر ، بردن بره (نیید) کیروسنده توقف ایلدکلری زمان ، اولنرده بیله بعض تعدیلات یایمق لازم گلش ایدی .

خصم اردوسنه یاقلاشلدقجه ، ایلری یورویشلرک متلاق اولمسی لازمدر . بونک ایله برابر وقتندن اول ، موازی یوللری ترک ایتمکدن پک زیاده چکناملیدر . زیرا بو درلو پاپیلورسه دشمن ، مطلوب اولان زماندن اول بزم هدفیزی کشف ایدر ؛ وبوندن اوتری پک صیق بر اجتماعک موجب اولهجنی محذور . لردن استفاده ایتیمیه قالدیشور ..

نقطه التصاق ثابت دکل ، بالعکس معین بر قوس اوزرنده متحرکدر . زیرا دشمن اردوسی ایجاب حاله کوره تبدیل موضع ایدر . اونک ایچون بزده التصاق نقطهسنی مذکور اردونک

حرکاتنه کوره انتخاب ایتمه یه مجبورز. ایش بویله اولنجه قوللارک متلاقی استقامتلرده یورویشلری کرچکدن یالکز برنقطه اوزرنده نهایت بولمش اوله میه جقدر. بالعکس (۱۸۶۶) ده پروسیا اردو- سنک باشندن کچدیکی کبی تعبیه نك هدف اصلیمی اورتیه چیقنجه یه قدر، مختلف یورویشلره نسبتاً محدود بر منطقه اوزرنده نهایت بوله حق واوندن صکره یالکز بر نقطه یه توجیه ایدلمش اوله جقدر.

برده بز شو التصاق تعبیری حریفی حرفنه آله رق بوندن قوای عسکریه نك یالکز برنقطه ده بربری اوزرینه یغیلورجه سنه طویلانش اوله جقلری معناسنی چیقارما می بز. براردو؛ حق اک اوزاقده کی قطعات عسکریه سی میدان محاربه کوننه یتشمش اولدینی زمان، تمامیه اجتماع ایش صاییلور. اگر بر اردونک بتون قوللری (کونیکره چ) میدان محاربه سندن اول، پروسیا اردو سنک پایدینی کبی مصادمه یرینک اطرافنده بر یارم دائره تشکیل ایدر لرسه او وقت اونلرک وضعیتی اک کوزل بر وضعیت اولور. وبو حاله نظراً آرتق کال امنیت ایله مختلف قوللارک تمامیه التصاقنی اکال ایتکم سزین ایش کورمک، مظفریت قزاق ممکن اولور. بونک اک پارلاق مثالی (صادووا) میدان محاربه سندن آیری آیری قوللار طرزنده یورویش یایمق، ایلری حرکت ایله یایلمه ترتیباتی ایچه تسهیل ایدر.

متباعد يوللا اوزرنده ايلري يورويش يايق مسئله سینه کلنجه، اگر بويورويش، هاجين ايچون ايوبرنتيجه نك حصواني تأمين ايدر وياخود بر مظفريتـدن صكره مملكتك بر قسمي اشغال ايتك لازم كلورسه او زمان فائده لي اولور. يوقسه، متباعد بر ايلري يورويش يايق ايچون قولاره آيرليق دشمن قرشوسنده يك تهلكلي بر شيدر. آز چوق اهميتي حازيكي بر محاربه يه انتظار اولنور وياخود شومصادمه يالكز ممكن الوقوع كورينورسه، او زمان يوقاريده سويلديكمز كي حركت ايتك اصلا جائز دكلدر.

(۱۸۱۴) سفری اثناسنده خصمی يکيدن قوشاته بيلمك ايچون بر اردونك ايكي دفعه ايكي بارچه يه آيرلش اولديني منظره سنی، بو غريب منظره يي كوريورز. لکن متفقين اردو- سنك شو وجه ايله حركت ايتش اولسني ايجاب ايدن بعض اسباب خفيه واردر. از جمله باش قوماندانلردن بر يسنك يعني (بلوهر) ك آرزوسي دها زياده بر استقلال قزاقق، دها سربست ودها مكمل بر دائره صلاحيت ايچنده حركت ايتك ایدی. چونكه مشاراليه اردوی اصلی يه اويله صيقيدن صيق يه باغلي طور دنجه بو ديديكمز شيلري قازانمش اوله ميه جفني يك اعلا بيلوردی.

(۱۸۷۶) سفرنده صربلير اوج نقطه يه متوجهاً حركت ايدن باشـليجه درت قولده متباعد بر تعرض ايله

ایشه باشلامش-لردی . لکن اونلرک شوو وجه ایله حرکتلری پولتیقه جه حس ایدیلان بعض ملاحظاته بناءً ترتیب اولمیشدی . چونکه اگر پولتیقه ملاحظاتی هیچ ده نظر دفته آلمیه رق ایشه کیریشلمش اولسیدی ، اوزمان بتون سفرك باشند صوکنه قدر غائب ایدلمش بولمنسی لازم کلوردی . فقط هر حالده شوکی شیلر بک نادر تصادف ایدیلان مستثنا حرکتلردن صاییلور .

بعضاً یورویش استقامتی دشمن جبهه-سینه مائل وحتى بعض کره مائل ده دکل ، موازی بولنیور . بر وجه ایله که ، یورویش حالنده کی قطعات عسکریه کندی یانلرینی دشمنه ویرمکه و بناءً علیه بریان یورویشی یانمغه مجبوریت کورورلر . بوکی یورویش-لر ، کرچه ، اک زیاده مدافعه ترتیباتنه عائددر . لکن بز هر حالده اونلردن بر پارچه بحث ایتلی بز . چونکه دارالحرکانک صاغ ویا صول طرفنده واقع بر نقطه یه دشمندن اول وارمق لازم کلدیکی زمان شوپله بر یورویش قوللانلمش اوله جقدر .

یاییلان یورویشک بریان یورویشی اولدینی بیلنمز ویا خود آب آنسزین دشمن باصقینه دوشلدیکی آکلاشیلورسه ، ایشه بو حالده یان یورویش-لرک محذورلری اک دهشتلی محذورلردن صاییلورلر . یورویش حالنده بولنان بر قول یان طرف استقا-

متنده قول باشی اوزرینه یایلمقدن زیاده برسرعتله یاییله بیلور .
چونکه یان طرف اوزرینه یایلدینی زمان قطع ایدیله جک مسافه
اوته کیندن پک آذرر .

بوندن آکلاش-یلورکه ، یان یورویش-لر دشمنه پک یقین
اوله جق بر صورتده اجرا ایدله ملیدر . بالعکس هیچ اولمزسه
قطعات عسکرینه پک یایلمسسه مساعد بر مسافه قدر اوزاقدن اجرا
ایدلملیدر . بر یان یورویشی ، خصم قرشوسسسه موضع آلان
خصوصی بر مفرزه ایله ستر وحمایه ایتمه پک ده محذوری واردر .
زیرا اگر بو مفرزه پک قوتی پک ضعیف ایسه ، دشمن ایله
چارپشمق ایستلمیان بر زمانده ، اونی هجومه دعوت
ایتمش اولورز . یوق ، اگر بو مفرزه پک قوتلی برشی ایسه ،
اونک دشمنه قرشو موضع آلمسی و صکره او موضعی ترک
ایتمسی ، اصل یان یورویش اجرا ایدن قسم کلی ایله برلشمسی
پک چوق زمان ایستر . وبلکه بوندن اوتری یان یورویشک
کچ قالمسی کبی بیوک بر محذوره حاصل اولور .

بر یان یورویشی هر درلو باصقینلردن امین بولندیرمق
ایچون بعض شیلره دقت ایتک ، آز چوق احتیاط اوزره بولنق
لازمدر . از جمله ، کمال جدیت ایله یاییلان استکشاف خدمتلی
یورویش نظامی تشکیل ایدن جزء تاملر آره سنده جزئی کلی
سواری بولنسی ، معیت قوماندانلرینه یانلردن بری اوزرینه

يايىله بيلمك ايچون حاضر طورملرينه دار بر دوزى يه خبرلر
كوندرلمسى، كرچك، بريان يورويش يابلدنغى زمان دقت ايديله جك
احتياطلردندر .

شبهه سزدركه ، بريان يورويشى هر نصل اولورسه اولسون
دشمنك ياپه جنى هجوملردن ينه متأثر اولور . چونكه يورويش
معين بر زمانده معين بر هدف اوزرينه توجيه ايدلمش
اولديغى چون البت خصمك ياپه جنى هجوم حركاني آنى پك
چوق ضرر وزياته اوغراتر. بناء عليه بريان يورويش انناسنده
وقوعه كله جك هر هانكى بر مصادمه ده او يورويشى يابان
قطعات عسكربه مظفريت قزائمش اولسه لر بيله اونلر ينه ضررلى
چيقارلر . زيرا بو موفقيت اونلرك كچ قالمسنى انتاج ايتمك-دن
بشقه خيرلى برشى حصوله كتورميه جكدردر .

اكر دشمن توقف ايتمش بولنورسه، اوزمان يان يورويشى
دها زياده بر افيت ايله اجرا ايديلور . چونكه دشمن تكرار
يورويشه باشلامق ايچون بر موضعك مختلف نقطه لرينه يامش
اولدنى قطعات عسكريه سنى طوبالامق خصوصه-نده هم چوق
زمان غائب ايدم جك هم ده چوق زورلق چكه جكدردر .

بالعكس ، اكر دشمن، ذاتاً، يورويش حالنده بولنورسه-
وبزده كندى قطعات عسكريه مزى بهمه حال اونك قول باشنه
تقدم ايتديرمك ايسدور ايسهك شو حال بزم ايچون ايجه زور

بر حال اولور . واكثيرا بعض منفرد مفروزه لر ايله اونك قول باشی اوزرينه هجوم ايتمك ، اونی طور دیرمق حرکاتی اجرا ایدلمزسه قسم کیمزك یان یوروشده موفق اولمیه جفی طبعیدر . لکن شو وجه ايله یامه نك ده کندیسنه مخصوص فناقلری واردر . از جمله دیدیکمز اوافق تئك ، محاربه لر ویریلورکن بعض کره بو منفرد محاربه لرک بیوک بر مصادمه شکلنه کیرمش اولسی کبی حالار ظهور ایدرکه . بز اوندن طولایی اصل هدفک خارجنده و بشقه بر هدفه قرشو بتون قطعات عسکریه مزنی یامیه مجبوریت کوریرز .

نه قدر چالیشسه یان یوروشلردن چکنمک ممکن اوله مز . آیری ، آیری ایلرولیان قولاری دشمن قرشوسنده برلشدیرمک لزومی قالمقدیچه یان یوروشلر یامق لزومی ده اصلا اکسیک اولیه جقدر .

حاصلی بو درلو یوروشلر ، بیوک بر دقت ايله اجرا ایدلملیدر . تردد و قرارسزلق اونلر ایچون اک بیوک بر دشمن اوله بیلور . بناء علیه بریان یوروشنی ايو بر نتیجه یه ایصال ایتک ایچون وضعیت ايله ، تعقیب اولنه جق هدفی پک آجیق بر صورتده بيلمک لازمدر .

اوندن بشقه ، برده کیجه یوروشلری دنیلان برنوع یورو-یشلر واردر . کرچه ، کیجه یوروشلری قطعات عسکریه نی

پك زياده يوردقلرچون ايجه بر زماندن برو اولنرى تطبيق ايتمكدن اجتناب اولنيور . فقط يان يورويش-لرى ، نصل سوق الجيش، تركيباتندن عد اتميه لزوم كورلمش ايسه اولنرى ده سوق الجيش اقسا-امندن عد اتميه مجبوريت كوريلور . كرك فرم دريق وكرك نابوليون سفرلرنده كورديكمز بر خيلى مشلاره باقيلورسه ، كيجه يورويشلى لايقي وجه ايله سوق واداره ايدللكلى زمان قطعات عسكريه اويله ظن اولندينى كې مشكلاته اوغرامش بولمزلر . ممالك جنوبيه نك صيچاق موسملرنده ، كيجه يورويشلى ، اكثريا تعقيب ايديلان بر اصولدر .

(۱۸۷۷) سنه سى تموز آينده عثمان پاشا حضرتلى ، (ودين) ايله (پلونه) آره سنده اوچ كيجه لك يورويش اجرا ايلدى . حال بوكه شو كيجه يورويش-لرندن صكره پايه-لان محاربه لر ، عثمان پاشا حضرتلرينك پك يورغون دوشمدكلرينى وبالعكس ، مصادمه ايدمك بر حالده اولدقلىنى پك ايو اثبات ايلديلر .

حق ديه بيلورزكه ، محاربه كونك ايلك كيجه سنده پايه-له حق يورويش-لر پك فائده لى اوله-بيه-لورلر : يعنى او سايله ده هجوم باشلامزدن اول ، دشمن موضعه پك يقين بر مسافه ده بر نيجه قطعات عسكريه بريكديرلمش اولور . برده اردولرك كوندن كونه آرتقمده اولان قوتلرينه باقيلورسه ، بو جنس يورويشله دائما لزوم كوريله جكنى تسليم ايتمك ضرورت حكمنه كچر .

حقیقت! اگر کیجه یورویشلرینه مراجعت ایدلمیه جک اولورسه،
مصادمه یرینه یتشمک ایچون بربری آرقه-سنده یوریان ایکی
قول اردویه یالکز بر یول تعیین ایتمک ، اولنری یالکز بو یول
اوزرنده یوریتمک اصلاً ممکن اوله مزدی .

اک چوق دوشونیه جک شی ، کیجه یورویشلریله عسکرک
اویقوسنی بسبتون محو ایتمکدر . بوکا چاره ایسه، ایرتمی کون
یایله جق حرکات ایچون لازم کلان امرلری مناسب زمانلرده
ویرمکدر .

۴ — تعرض سوق الجیشینک اشکال خصوصیه سی

اس الحركات وضعیتی، هدفك انتخابی ، خطوط الحركات
ایله طرق نقلیه نك استقامتی، اردونك ایلری یه طوغری اصول
حرکتی، التصاق و هجوم نقطه لرینک تعیینی شبهه منز برنجیه مختلف
شکل-لر حصوله کتوره جکلردرکه ، بز اولنرک هپسنی اوزون
اوزادی یه تعریف ایتیه جکز . بالعکس یالکز اولنر ایچمده اک
بسیط اولانلرینی وائسای سفرده اک چوق تطبیق ایدلمک لازم
کلانلرینی سویلمکله قناعت ایده جکز :

سوق الجیش جبهه هجومی

تعرض اردوسی قوتجه دشمنه فائق اولدینی زمان ، جبهه

هجومی ، سوق الجیشك قبول و تصدیق ایده جکی بر هجومدر .
 حقیقت ! کیم که ، خصمنی محو و پریشان ایده جک اقتداری
 حائزدر ؛ اونی هرزده بولورسه ، اوراده هجوم ایتک ایچون طوس
 طوغری بر یوروش تعقیب ایلیه جکدر . لکن بو درلو حرکت
 ایتمش اولدیییچون کندی قوتنک حصوله کتوره جکی نتیجه یی
 بسبتون اکال ایتک خصوصه صنده ده حرب صنعتنک کندیسنه
 ویره جکی بعض وسائلی قوللانمقدن واز کچه جکدر .

اوت ! قزانیلان نتیجه یی تزیید و اکال ایچون بیوک برشدله
 حرکت ایتک ، و باخصوص ایلک مظفر بتلردن صکره دشمنی
 تعقیب ایلک لازمدر . حال بوکه ، جبهه دن هجوم ایدلیدیکیچون
 دشمنک نه یانلری ، نه خط رجعتی ، و نه طرق اتصالیه سی تهدید
 اولنمشدر . هجوم یاپیلان استقامتک آپ آنسزین دیکشدر لمسیله
 دشمنی باصق و یقالامق ده ممکن دکلدر . بالعکس دشمنی یقالامق
 اولسه اولسه ، هجوم استقامتمنده و کال شدت ایله یوریمک ، ایلری
 کیتیمک ایله اوله جقدر .

بسیط بر جبهه هجومی بعض ترتیبات فرعیه ایله ترکیب
 ایتیمکده بر فایده یوقدر . چونکه بویله یامق ، هجومک قوتی
 آترمش اوله من ؛ بالعکس ، ترتیبات مذکوره ایچون بدایتده
 بعض قطعات عسکریه نک آیرلمسی ایجاب ایده جکندن هجومک
 قوتی آزالتمش اولور . کرچه بو درلو یانمقدن هیچده منفعت

کورلمز دکل؛ کوریلور فقط براز کچ؛ مثلاً سویلدی کمز مفرزه لر دشمنی باصقین ایدرک، اونی بعض قصورلر یا تمیه مجبور ایلدکلری زمان جبهه هجومی ترتیبات فرعیه ايله منج ایتدکدن آز چوق فائده کوريله بیلور.

بعض افکار خصوصیه ومثلاً اراضینک تشکلی، خصمک وضعیتی، یوللارک شکل وطبیعی بر سوق الجیش جبهه هجومی دیگر تشبثات ايله ترکیب اتمیه لزوم قطعی کوسترمدکجه اوندن واز کچملی ویا لکنز جبهه دن هجوم حرکتی اک ساده وطبیعی بر هجوم کورمکله برابر اونی آشاغی بر شی ظن اتمه ملیدر. اصل مقصد محاربه نی باشه چیقارمقدر. بو مقصد ایسه، دشمن اوزرینه طوس طوغری یورینلدیکی زمان دهـا جابوق الـه ایدیلور.

برده سوق الجیش حرکتی، خصمی بر طرفدن چویرمک ویا قوشاتقی خصوصنده تعبیه نسبتاً دهـا از سربست جریان ایده بیلور. با خصوص شیمدیکی زمان اردولرینک جسماتی بر دوشونیلورسه، بو اردولر، سوق الجیش یا یلمه سی هنگامنده کندی یا نلرینی دکر ساحلدرینه، بی طرف حدودلره و بعض خطوط مستحکمه یه استناد ایتدیرمک ایچون بر چاره آریهـ. جقلاری طبیعیدر.

لیکن تعبیه ده شو حال پک نادراً وقوعه کلور. بسیط

شکلر، اردولرک سوق واداره سنی دها زیاده قولایلاشدیرلرلر.
بو سایه ده بر چوق فناقلر وقصورلردن چکنمک ممکندر.

اوندن بشقه، سوق الجیش ترتیبائی محاربه قطعیه نک جاری
اوله جفی اصولی دها اولدن ومطلق بر صورتده تعبیه تطبیق
ایتمش اوله مز . مثلاً سوق الجیش جبهه هجومندن ، تعبیه ده بر
جویرمه هجومه کچمک پک اعلا ممکندر . اونک ایچون سوق
الجیش هجومی نصل ایسه ، تعبیه هجومنکده ینه او جنسندن
اولمی هیچ برزمان لازم کلز . وبوبله برشرط یوقدر .

دشمن جبهه سی اوزینه وهر نقطه ده مساوی قوت اولمق
شرطیه نهایت بولان موازی یورویشلر ، اک آز قطعی نتیجه
حاصل ایدن یورویشلردر. دشمن ضعیف اولورده اونک یالکز
طردی ، مدافعه ایتمدیکی اراضینک هر جهتدن اله کچمسنی
تأمین ایلدیکی زمان شو یوقاریده کی اصولی قوللانق ممکندر .
یاخود الده یتمز ، توکنمز منابع سفریه موجود اولورده
خصمی برکده دها تعمیر ایده میه جکی برخیلی ضایعانه دوشورمک
ایستیلورسه اوزمان ینه اصول مذکوره کوره حرکت ایتمک
قابلدیر .

لیکن بر قاج موازی خط اوزرنده حرکت ایدن مختلف
قوللرک قوتی اصولاً بربرینه مساوی اولمز . ازجمله یانلرده کی
قوللردن بریسنی ، راست کله جکی دشمن جناحنی محو ویریشان

ایده جک صورتده اونه کیلردن قوتلی بولندرمق لازم کلور .
 حاصلی ، سوق الجیش جبهه هجومی ، اکثریا دشمن مو -
 ضعنک یالکز بر نقطه سی اوزرینه توجیه ایدیلان یورویشلر ایله
 اجرا ایدیلور . بو متقارب یولار ، اساساً سوق الجیش جبهه
 هجومی ایچون اک ساده وخصوصی بر شکل حصوله کتوررلر :

سوق الجیش مرکز هجومی

دشمن خطنی یارمق ، هجوم ایدیلان اردویی آری ، آری
 دوکوبیلمک ایچون منفرد پارچه لره آرمق ، موفقیت حاصل
 اولدینی زمان اک بیوک واک کوزل نتیجه لر ویرن بر اصولدر .
 شو اصولک اک مهم فائده لرندن بریسی ده خصم اردوسندن
 آیرلمش اولان پارچه لره عین زمانده ، کندی خطوط رجیمه
 واتصالیه لرینی غائب ایتمش اولملریدر . زیرا دیدیکمز پارچه لر ،
 اک صکره یان طرفنده موجود خطرلردن بریسنه استناداً کیرویه
 چکلمه ناک چاره سی آریه جقلردر .

بوکا قرشو مرکز هجومنک بیوک بر محذوری وار . مثلاً
 اگر . دشمن خط حربنده کدیک آچان یعنی مرکز هجوم
 ایدن قوت ، ایجه بیوک بر شی دکل ایسه ، اوزمان ایش بشقه -

لشور . و آچیلان کدیک صاغدن ، صولدن قیائمه یه باشلارکه ،
 بو ، هاجین ایچون کرچک بیوک هم پک بی-وک بر تهلهکدر .
 سوق الجیش مرکز هجومی ، کندی طبیعی ایج-ابندن اوله رق
 برچوق تعیه جبهه هجوملرینی حاصل ایدر . فقط زمان حاضر
 س-لاحلرینک آتشی ، تأثیری بر دوشونیلورسه ، بو هجوملرک
 بر چ-وق مشکلات کوره جکلرینی تسلیم ایتمک لازم کلور .
 مشکلاتک اک بیوکی ایسه ، مرکز هجوم ایدلرکی آنده خصم
 اردوسی بتون اقسامنی بر یره طوبلامه یه موفق اولدینی زمان
 کوريله جکدر .

فی الحقیقه ، دشمن بتون اقسام عسکریه سنی بر یره جمع
 ایده بیلدک بیوکلرکی کوسترمش اولنجه ، هاجین طرفی ، خصم
 اردوسی کندی ایلروسنده وه رایکی جناحنه قرشو بروضعیتده
 بوله جقدرکه ، بوندن صکره اونک الندن قورتلمق ، بر موقع
 مستحکمدن طیشاری چیقمق کبی طبیعی پک زور برشی اوله -
 جقدر . آنک ایچون سوق الجیش مرکز هجومنه اک الیریشلی
 زمان ، دشمن کندی قوتلرینی کاملاً جمع ایتمدن اول ، هجوم
 ایتمکدر .

(۱۷۵۷) سنه-سنده بیوک فرهدریق ، صورت عمومیه ده
 (لایت مریچ) اوزرینه توجه ایدرک بو وجه ایله بوهمیایه کیرمیش
 ایدی . کرچک ، مشارالیه آوس-تریالیرک (کونیکراچ) ایله

(هغرا) پښنده کی اردو کاهلرندن هنوز چيقدقلرینی وویرله جک سفر ایچون حاضرلایله مشغول اولدقلرینی پک ایو بیلوردی. بناءً علیه اونلری کسمک، اردولرینی پارچه پارچه ایتک و صکره هپسینی برر، برر تپه لک خصوصنده بیوک برامید بسلامه یه یردن کوکه قدر حق واریدی. بونک ایله برابر بیسوک فرهدریقینه آنجق بعض اوافق تفک نتیجه لر استحصال ایده بیلدی. آوستریا- لیلر، (پراغ) شهرری اوکنده ویرله جک اولان بر میدان محاربه سی ایچون بتون قوای عسکریه لرینی بریره کتوره مدیلر؛ طوغری! لکن قرال اکر ایچه وقت، جنرال (دون) ی آبلوقه خطنی آچدره قدن منع ایتدردکدن صکره، (پراغ) شهرینه قباغش قالمش اولان ماره شال (نوره) ده بو وسیله ایله تسلیم سلاح ایتدیه بیلمش اولسه ایدی؛ ایشته آنجق اوزمان بیوک بر نتیجه قزانمش اوله جقدی.

بونک سببی ایسه پک ساده بر شیدر. چونکه فرهدریق، کندیسیده بوهمیایه کیرمه دن اول، قوای عسکریه سنی پک واسع بر منطقه اوزرینه تقسیم ایتمش واک صکره اونلری اده یرده (الب) نهری کبی عظیم بر مانع وارایکن، ایکی قولده ایلرییه سوق ایلمش ایدی. ایشته یالکیز بو وجه ایله یابدینی ایچون مشارالیه ایچه زمان غائب ایتمش وایسته دیکي شدت ایله خصم اوزرینه بر تأثیر قطعی کوستر مکدن عاجز قالمش ایدی.

اگر هجوم ایدیله جک اردونک مختلف پارچه لری کیرولر ایله اولان طرق اتصالیه جه شایان دقت بعض منافع مهمه به مربوط بولیورسه ، شو حال ، اونلرک اشغال ایلدکاری خطی یارمه به تشبث ایدن دشمن ایچون پک اویغون والویریشلی بر حالدرکه ، دشمن او سایه ده مذکور پارچه لری آز برزمان ایچنده بربرندن بستیون آیرمه به موفق اولور .

(۱۷۹۶) سنه سنده بوناپارت ، کندی اداره سنده بولسان ایلک سفرده شو مهم نقطه یی دوشونه رک او سایه ده کرچکدن سوق الجیش مرکز هجوملرینه دائر اک کوزل ، اک پارلاق بر مثال وجوده کتورمشدر . ینه بوسنه نک نیسان آیی بدایتلرنده مشارالیه (۳۶) بیک کیشیلک بر اردو ایله (ژهن) نهری اوزرینه یوری یرک صاغده ، (وولتی) ایله (صا صالتو) آره سنده (۳۰) بیک آوستربالی به و (سهر) اطرافنده (۲۲) بیک (پیه - مونت) لی به قرشو حرکت ایلیمشدر . آوستربالیلرک طرق اتصالیه سی شرق شمالی یعنی (بورمیدا) استقامتنه متوجه اوله رق (آلکساندری) و (میلان) ده نهایت بولیوردی .

بیومونتلیلرک کی ایسه غرب شمالی به متوجه و (تورهن) ده نهایت بولیوردی . بردن بره بوناپارت (صاوون) دن قالقه رق بتون قوای مجتمعه سیله اوکنده کی ایکی اردونک بربرینه ال ویردکاری نقطه اوزرینه ایلرولمه به قرار ویردی . مشارالیه

شو بيوك وظيفه يی کر چکدن شاشيله جق بر سهولت ايله باشه چيقاردی . قولاييلك ال بيوك بر قسمی شوندن ایلری کلیور ایدی که ، اوستریالیلرک صاغ جناحی ناپولیونک اوکنه چیقارق (۱۱) و (۱۲) نیشان کونلرنده و (میله زیمو) ده ناپولیونه مغلوب اولدیلر . مشارایه اوستریالیلرک بو جناحی (دهغو) اوزرینه سوردی ؛ و بر کون صکره ، اونلری اورادن ده چیقاردی . اوستریالیلر تکرار (آقکی) موقعنده برلشدیلر . حال بوکه ، (پیه مونت) لیلر (سهره) ده قالمش بولنیورلردی . بروجه ايله که ، بوناپارط اردوسی ، شو حرکت ائناسنده ایکی دشمن آره سینه کیرمش اولدی . بنساءً علیه متفقین ، بربرندن آری دوشدیلر ؛ و هر بریسی کندی حسابنه اولق اوزره ، اک چسوق ده سوق طبیعتله ، انتخاب ایلدیکی متباعد خط رجعتلر اوزرنده قالدیلر . بوندن صکره اونلرک برکره دهها برلشمالینه امکان یوق ایدی . بونک اوزرینه قوجه ناپولیون طوتدی ، اوله ، (پیه مونت) لیلر علیه یوردی : اونلری ایستدیگه کبی بردو کدی ؛ و کندیسمدن مصالحه طلبنه مجبور ایلدی . براز وقت صکره ده اوستریالیلر اوزرینه یوردی . بووجه ايله قزانديني ظفرلری بسبتون اکاله جالیشدی .

غریب تصادفلر دندر . ناپولیونک صوک سفری ، ایلک سفری کبی همان عین وجه ايله باشلادی . تأسف اولنورکه ،

يالكىز نتيجه لرى پك فرقى چىقىدى. (۱۵) حىران (۱۸۱۵) ده
 مشارايه كندى قوشوسىندە بولغان پروسيالىر ايله انكليزلىرى
 برىردن آيرىمق ايجون كال شىدتلە (شارل رووا) دن كچەرك
 (صە ۳۰۰ س) يوللارنىك دوگوم نطقە سىنە طوغرى ايلرولدى .
 چرىك بوراسى پروسىيە وانكليز اردولرىنىك برىرلە ارتىباط
 حاصل ايتەدكلىرى نطقە ايدى. پروسيالىرك طرق اتصاليه سى،
 شىمال شرقى استقامتندە (رىن) بويىچە كلىوردى. انكليزلىرك كىلرى
 ايسە ، شىمال غەربى استقامتندە دىكزە طوغرى اوزانوب
 كىدوردى .

حىران (۱۶) سىندە ايمپراطور پروسىا اردوسى (اينى) ده
 مغلوب ايتدى . لىكن بىخىطوط رجىيەنى ايدون ايويە بردوشو -
 نەرك، بو اردونك قوماندانلىرى پك آز وقت ايجىندە ناپوليونك
 مقصدىنى اوكرىدىلر . اوت، پك اعلا اوكرىدىلر، مشارالەك
 مقصدى پروسيالىرى انكليزلردن آيرىمق ايدى . لىكن شو
 حقيقت اشكار اولتىچە ديدىكمىز قوماندانلر كال جىرائلە ايش
 باشىنە كچەرك بوناپارطك فكرىنى ، املنى نتيجه سىز براقىدىلر .
 وھى شىئە رغماً (۱۸) حىرانندە انكليزلر ايله برلشمەكە موفق
 اولدىلر، بوموفقىت سايە سىندە ناپوليون سىنجاغىك آراتق بىستون
 يوزاوستى كىسە خىدمت ايلدىلر . شىبە سىز! بوناپارطك حركاتى اك
 اىچە حسابلر اوزرىنە قورلىش واك زىيادە منطقە تىرتىب

ایدلمشیدی . فقط نه چاره سی وارکه ، حرکات مذکوره بودفه
 کرچکدن بیوک برفلاکت ایله نهایت بولدی . زیرا ، بو دفعه
 ناپولیون طبعاً شدتلی و فکراً قوتلی بردشمن ایله اوغراشمش ایدی .
 ینه شهسز ، ناپولیون (۱۷) حزیران صباحی (لینی)
 مظفریتنی قزاندقدن صکره تردد ایتک ، قراکقده یوریمک کبی
 قصورلر یایدی .

اشته بو ترددلر ، بو کوری کورینه یوریمک کندی
 دشمنلرینک مظفر اولمسی الچوق تأمین ایدن شیراولمشلردی .
 بوندن اکلاشیلورکه ، هاجمین طرفی ، دشمن خطنی بر یردن
 یاردینگی کبی خصم جهتمده وقوعه کله جک ایلك قاریشیققدن
 ایلك بوزغئلقدن استفاده ایده بیلمک ایچون هان اک بیوک
 بر شدتده اک کسکین بر حرکت ایله ایشه دوام ایتلیدر .
 کرچک ، اکردشمنه کندیسی طیولامق ایچون زمان ویریلورسه
 ایکی یه بولنش اولان اردوسی تکرار برشدرمک ایچون اکثریا
 لازم کلان واسطه لر ویولاری بولقده یک چوق زحمت چکمی .
 جکدر .

آوروپای غربیده ظهور ایده جک سفرلر ، سوق الجیش
 مرکزی هجومنه دائر یک اعلا یکی یکی مثالار وجوده کتوره .
 بیله جکدر . شو یک مؤثر ، ویک ساده اصول ، یوز بیکلرجه
 کیشیدن ترکب ایدن اردولر بربرینک قرشوسنه کچمش ویک

طار برلرده طوبالانش اولدقلری زمان اڭ چوق کندینی کوستره.
جکدر . زیرا بو درجه بیوک اردولر ایله ایش کورن سفرلرده
یالکزر حربک سوق واداره سی نقصه نظرندن مذکور اردولری
اڭ قیصه یولاردن دشمن اوزرینه سوق ایتمک لزومی ، حس
ایدیله جکدر .

ایچه اول سوبلمش ایدک : هیچ اولمزه بیوک دولترلر
ایچون بوندن صکره اردولرک سفر برلکنی اڭال ایدوبده
حدود بویلیرینه کتورلمسی حقنده لازم کلان زمان ارتق کون
حسابیله ، بلکه ساعت حسابیله کوریه جکدر . بوندن اوتری
شیمدیکی زمان حربلرنده ، خصم اردوسی هنوز تجمعی یتور-
مهدن اول اڭ مناسب زمانده اڭ مناسب یرلره هجوم ایتمک اصولی
براز ، دکل ، ایچه مشکل و بلکه محال اوله جقدر . زیرا دشمنده
بزم کبی مملکتی احیا ایدن تیمور چیزکیلردن بو قوتلی طمار-
لردن استفاده ایدرک یا بزم ایله برابر ویاخود کیم بیلور بلکه
بزدن اول ، تجمعات عسکریمه سی اڭال ایدمک و بوندن اوتری
(۱۷۹۶) سفرنده اولدینی قدر بیوک بر سرعتله ایش باشنه
کچوبده مسئله یی حل ایتمک خصوصنه ارتق اعتماد کوستریله-
میه جکدر . سوزک کسیرمه سی بوندن صکره سوق الجیش مرکز
هجومی یایق ممکن اولیه جقدر ؛ واسلام ! چونکه هاجین طرفی
بک دهشتلی دشمن قوللری یارمق خصوصنده ایچه دوشونه جک ،

ایچه اورکه جکدر، کیتدکجه عمومیتیه کیرن شیمدیکی زمان مستحکم حدودلری یعنی هر کون بشقه بشقه استحکاملر وقلعه لوله ستر ومدافعه ایدلمک ایستنیلان حدود بویلری حاصلی شومسلکده کی سرحدلر، صحرا ومحاصره جنککیرینک برآنده یاپلمش اولملرینی ایجاب ایلیه جکدر.

آراق نابولیونک (۱۷۹۶) و (۱۸۱۵) ده یابه بیلدیکی کبی بربرینه ضد منفعتلر کوزه دن ایکی اردونک التصاق نقطه سنه کیرمک، اونلری یکدیگرینه باغلایان دوکومی چوزمک، آنجق پک مستثنا زمانلرده وقوعه کله جکدر. شیمدیکی زمان متفق اردولرینک حرکت ایده جکلری هر یرده، بالعکس کرک پولتیقه وکرک عسکرلک جه اونلرک حرکاتی، آمال وافکارینی یالکز برنقطه یه غلامق چاره لری دوشونیه جکدر. حال حاضرده ال اله ویرمش ومتفق کینمش اولان ملتلرک حال سفرده ده بویه یاملری تأمین ایدیه جکدر. زیرا شیمدیکی عصر اتفاقلری ایشک بویه اولسنی ایستیور. لکن بوندن، ایکی متفق اردونک تجریم منطقه لرینی برکوزدن کچوره رک هبچ اولمزه، ایکی مختلف دشمن اردوسنک ارتباط حاصل ایده جکلری نقطه یی تخمین برصورتده کشف ایتک وبرآز وقت صکره اکر تعرض طولنی کرچکدن پک آچیق کوزلی اولورسه، اراضی اوزرنده بو نقطه یی حقیقه تعیین ایلک پک اعلا ممکن اوله جقدر.

سفرده يالکړ باشنه حرکت ايدن برهاجين اردوسی، اداره سی
تقسیم ايدلمش، مختلف قوماندانلرک الله ویرلمش اولان بر اردو
قرشوسنده حرکت ايدلېکی زمان وحدت اداره اصولندن پک
چوق فائده کورور . زیرا ايکی سردارک اداره سنده ویریلان
برمتفقېن اردوسی، ایشه باشلانلمه دن اول، مذکور سردارلرک
يا شفاهاً وياخود بومکن دکلسه، تلغرافله کوروشملرینی متعاقب
آنجق حرکت ایده بيله چکیچون قرشوطرفده يالکړ بر قوماندایه
تابع اولان هاجين اردوسی البت شو حالدن پک چوق استفاده
ايدر .

هاجين طرف بويه زمانلرده نه قدر شدت کوسترر، نه قدر
آپ آنسزین طلب ایلرسه ، متفق اردوسی وقوماندانلری دها
او وقت زیاده شاشیررده غائب ایدرلر . اوزون سوزک قیصه سی:
سوق الجیش مرکز هجومنک هدفی ، ایلروده کی سوزلرده هر
بری کنندی استقلالنی محافظه ایتک شرطيله حرکت ایلان ايکی
متفق اردونک النصاق نقطه لرندن ترکب ایده جکدر . ایشه
بو قدر !

سوق الجیش جناح هجومی

دشمن خطی اوزرینه آچیه جق کدیک ، نه قدر بیوک

آچیلورسه، سوق الجیش مرکز هجومی یابارکن راست کلنه جک تهلکه لر ، دها او قدر آز اولور . واکر دشمن خطنک بر یاتی بسبتون محو ایتک ممکن اولورسه ، آرتق اوتهلکه لردن هیچ بر اثر بیله قالمز . چونکه هاجینک طیشاریده کی جناحی قطعیا سربست و آچیق بر حالده بولنه جغیه چون دشمن خط حربینه کوملمک تهلکه سی اورتهدن بسبتون قالمش اوله جقدر . بالعکس بو حالدن، ایلک موفقیت آردنجه یکی بر فائده حصوله کله جکدر . کرچک، دشمن اردوسنک بر جناحی اورلدقن صکره دیگر پارچه لری اوزرینه آتلمق ایچون بر چویرمه حرکتی یابلدینی زمان بو حرکت اونلری یکی بر جبهه آلفه و او آندن اعتباراً اس الحركات لریله اولان طرق اتصالیه نقطه نظرندن اکثریا فنا بروضعیتده قالمغه مجبور ایده جکدر .

(۱۸۷۰) حربنک ایلک زمانلرنده آلمانلر بوکا بکزر بر پلان تعقیب ایدیورلردی . ایلک اوکجه (آشاغی انساس) ده کی فرانسز اردوسنک صاغ جناحی محو ایتک، صکره (پارس) ایله اولان طرق اتصالیه سنی کسمک ایچون اردوی اصلی بی جنوبدن جویرمک وشماله طوغری سورمک ایستیلیوردی . فرانسز لری (مچ) بیشکاهنه چکلمکه مجبور ایدن (ایشپهرن) میدان محاربه سی دیدیکمز پلانی اولا بوزار کی اولدی . بر آز وقت صکره ایسه ،

(موزل) نهرينك صول ساحلنده مذکور پلان ازجوق فرقلی
برشکلده ینه ظهور ایتدی .

جناح اوزرینه سوق الجیش هجومی ، استقبال سفرلرنده ،
احتمال اک زیاده قوللانیشلی بر اصول اوله جقدر . چونکه بو
هجوم بر کره پک ساده بر هجومدر . ثانیاً ، قطعات جسیمه نك
حرکاتنه مساعد کنیش بر جبهه اوزرنده وقوعه کلور . سوق -
الجیش جناح هجومنك موفقیت قزائمی چون آشاغیده کی شرطلر
لازمدر : اولاً هجومه مأمور اولان جناح ، کندیسنه مقابل
اولان دشمن جناحی بوزدقدن صکره درحال خصمک دیگر
قوتلرینه ده هجوم ایده بیله جک قوتی حائز اولمیدر . ثانیاً ،
بو وجه ایله حرکت ایدیورکن ، کندی اس الحرکاتی ایله اولان
طرق اتصالیه سنی ترک ایتک مجبوریتنه دوشمه ملیدر . ثالثاً ،
دشمنك مقابل تعرضنه اوغرادینی زمان ، هجوم جناحی فصل
اولورسه اولسون اونی مغلوبیت حالنده بولندیره بیلملی ویا خود
اگر وضعیت قطعاً کیرو چکلمکی ایجاب ایدیورسه ، بو رجعت
حرکتی پک تهلهکلی نتیجه لر حاصل ایده میه جک صورته
مذکور جناحی کیرویه آلق ممکن اولمیدر .



سوق الجیش احاطه حرکتی

بز بو تعبیری ، خصمک اشغال ایتمش اولدینی دار الحربه

عين زمانده هم جبهه دن هم بر ياندن ويا ايكي ياندن هجوم ايتك
معناسنه آيورز. كندى كندينه آ كلاشيلوردكه، شوبله بر حركت
اثناسنده هجوم قولارينه تعيين ايدلمش اولان التصاق نقطه سى
دشمنك اشغال ايتديكي منطقه نك ايچروسنده بولنه جقدر. و براز
يوقا ريده بو التصاق نقطه س نك انتخابنه دائر سويلديكمز هر شى
بوراده عييله تطبيق ايديله جقدر. آره لرنده دشمن بولمق شرطيله
آرى آرى خطوط الحركات اوزرنده ياييلان ايلرى يورويش لرك
بتون تهلكه لرى ، بو مسئله ده كذاك الك بيوك بر وضوح ايله
نمايان اولور . اكر دشمن كندى علمنه يورويش ياپلمش
اوله جنى زمان حاضر بر حالده بولميورسه طبيعى كنديسى تهديد
ايدن تهلكه يه مقابل بر تعرض ايله جواب ويره جك وبو جوابه
چاره بولمق ايچون قوللاردن هر بى يه هيچ اولمزرسه ، ايجه
بر زمان مصادمه يي اداره ايدم جك درجه ده برتفوقى حائز
بولمليد لر .

اكر دشمن هنوز قورشوسنده كى هجومى تهلكه يه دوشو-
ره جك قدر حاضر دكل ايسه ، احاطه هجومنك بر آنده مختلف
استقامت لردن كنديسى كوس-تره جك اولان ايلرى يورويش
حركاتى اونى ايجه بيزار ايدم جك ، آد ينى ترتيباتى آز چوق
تعديله اوغراته جق ، مافعه ايچون انده بولنان قواى عسكريه سنى
طاغوتد بيره جق وشو وجه ايله تعرض اردوسنك موفقيتني تسهيل

ایتمش اوله جقدر . ایکنجی فره دریق ، (۱۷۵۷) سفری دار -
 الحربه دوت قولده بر احاطه حرکتیه کیرمش اولدیفیچون
 بوقیلدن بر موفقیت استحصال ایلدی . بر آوستریاقولی یعنی
 (سربالونی) اداره سنده کی قوه عسکریه (پراغ) مصادمه سی کوننده
 بسبتون ایشسر قالمش ایدی [*] .

عین دار الحرب اوزرنده وقوعه کلان (۱۸۶۶) سفری ،
 پروسیالیرک سوق الجیش احاطه هجومی سایه سنده استحصال
 ایتمش اولدقلری اک پارلاق بر موفقیتک اک پارلاق بر اورنکیدر .
 کرچک ، پروسیالیر دشمن اردوسنی ایودن ایویه تضییق ایتمک ،
 اوکا (کونیکراج) میدان محاربه سی اوزرنده بر هزیمت ویرمک
 موفق اولدیلر . بوراده سوق الجیش احاطه هجومی ، حریف
 حرفه تطبیق ایلدی .

اصول مذکورک باشلیجه ، علامت فارقه سی ، شودرک
 موفقیت حالنده اکثر زمانلر یا کز بر ضربه ایله بتون فائده -
 لرینی ، بتون نتیجه لرینی میدانه چیقارر . سوق الجیش مرکز
 هجومی ، موفقیت حاصل ایتدیکی زمان ینه پارلاق بر نتیجه

[*] ۱۷۵۷ سفرنده فره دریق مختلف استقامتلردن کلان قوللریله
 دار الحربه کیره رک مرکز هجومیه احاطه هجومی بربرینه مزج ایتمش
 ایدی . لکن بر آز وقت صکره مذکور قوللره ، دشمن طرفندن اشغال
 ایدیلان منطقه اوزرنده بر التصاق نقطه سی کوسترمش و بو مزج
 ترکیب اصولی اونکله محافظه ایتمش ایدی .

قزانش اوله من . چونکه بویه بر هجومده مظفرتی بسبتون
اکال ایتک ایچون اوندن بشقه یایله حق دها بشقه شیلر وار .
از جمله دشمنک بربرندن آیری دوشمش اولان یغینلری اوزرینه
هیچ وقت ضایع ایتکسزین آتلمق واونلری صوک درجهیه
قدر تعقیب ایلمک لازمدر . ایشته بونلرده یاپیلورسه اوزمان
سوق الجیش مرکز هجومک حاصل ایتدیکی موفقیت مکمل
بر موفقیت اولور . سوق الجیش احاطه هجوملری ایسه هیچده
اوله دکدر . بالعکس قسماً ویا کلیاً بو درلو هجوملره یاپیلان
بر محاربه دائماً دشمنی بوزمق، پریشان ایتک خاصه سنی جامعدر .
حق مذکور هجومک حصوله کتوره چکی طاتلی طاتلی میوملری
میدان محاربه اوزرنده بیه طویلامق واونلر ایله شیرین مذاق
اولمق ممکندر . اکثریا دشمن تعقیب اولنیه جقدر . کرچک، هپسی
یالکز بر نقطه اوزرینه متقارب یورویشلر ایله حرکت ایدن
قطعات عسکریه غلبه زمانده او درجه قاریشمش اوله جقدر .
درکه، اونلره بر آز چکی دوزن ویرمه دن اول ایشه باشلامق،
دشمنی تعقیب ایتک ناچار ممکن اوله میه جقدر . اوندن بشقه
طاق ظفرلر ایچنه کوملمش و بربرینه قاریشمش اولان قطعات
مذکوریه همان بیوک بیوک تشبیهات عسکریه ده قوللانمق ده
جائز دکل، بوندن صرف نظر قابل دکدر . (کونیکراچ) میدان

محاربه سندن صكره تعقيب حر كتنك ياپلاماسى، بزم شوسوزمىزى قسماً تصديق ايليان حقايق تاريخيه دندر.

موفقيتدن امين اولمق ايجون احاطه حر كتنك پك ده محدود اولماسى شرطدير. گرچه احاطه حر كتلى پك اوزون سوردىكى ايجون تهلكه لرده بر آز اوزونجه سورر. اوت ! اكر احاطه حر كتلىنىك وسعتى شايان اهميت بر حالده بولمىز ايسه، دشمن با خصوص كنديسنى كوزل اداره ايتك صنعتنه واقف اولدينى زمان، حر كات مذكورەنك صوك دورلرنده بر كيرو چكلمه ايله كنديسنى تهديد ايليان تهلكه دن كيزلنور وبونك اوزرينه هاجين طرفى، دشمن جبهه سنك ايلروسنده اويغون بروضعيتده قالغه لزوم كورر .

بوندن اوتري هر احاطه حر كتى اولدجه بيوك بر جرأت وجسارت فكري اوزرينه قورلمش اولمليدر . زمانمзде پرنس فرمدرىق شارلاك (۱۸۷۱) كانون ثاينسنده جنرال (شازى) عليهنه يامش اولدينى (مانس) هجومى ، احاطه هجوملىرىنىك اك مدھش واك جرأتكارانه بر صورتده ياپيلانلرندن بريسيدير . اوت ! شو ديدىكمز هجومده ، عددجه آز اولان بر اردو ، ينه عددجه كنديسندن بيوك بر اردو اوزرينه اونلر ايكي ياني احاطه ايدە جاك وجه ايله هجوم ايدىوردى . لکن بو اردو هر نه قدر بيوك فاصله لر ايله بر بريدن آبرى دوشن قوللارى يكدىكرينه

جزئی بر ارتباط حاصل ایدرک اوصورتده ایلرولمشلر وبربرینه یالکز طولایسیله یاردم ایده بیلیمشلسرده باشالانیلان حرکتی کمال موفقیت ایله باشه چیقارمشدور .

کرجک ! بو حرکتک حاصل ایلدیکی نتیجهده خصم اردوسی قارمه قاریشیق بر صورتده فرار ایده رک او وجه ایله بر چوق طوبلر وبر نیجه اسیرلر اله کچمش بولندی . شونکله برابر آلمان اردوسنک دیدیکمز یولده حرکت ایتمش اولمقله معروض بولندینی تهلمکله ری هیچ بر زمان انکار ایده میز . المزدن کلزکه انکار ایده لم! صحیح! اگر (۱۱) کانون ثانی محاربده سنی قبول ایده جک یرده (جنرال شانزی) (مانس)ک ایلرولسندده واسع بر یارم دائره اشغال ایدن اردوسیله تام زماننده کندی کیرولری اوزرینه آقان (سارت) نهرینی آتلامش و آنلار آتلامز اوراده بر موضع طوتمش اولسه ایدی ، پروسیا قطعاتی اونی تعقیباً ایجه بیوک اولان شهر ایچنه یاییلور وبو وجهه ایله فرانسلرک مرکزی قرشوسندده بولمش اولوردی .

بر جبهه هجومی یایمق ایچون پروسیا قطعات عسکریه سنی ایلری کوتورمک خصوصی ده آرتق بسبتون زور بر شی اولوردی . چونکه بو بیوک وزنکین شهر ، ذاتاً وقتیه (روش باقلن) اردوسنه مشئوم بر تأثیر کوسه ترمش اولدیفیچون ، شهه سز بو کرده ایجه زماندن بری کرک صغوق و کرک آخلق

ایله نیجه زحمتلر چکن قطعات اوزرینه کندی مشنوم جاذبه‌سنی
کوسترمش بولنه‌جقدی!

کمال شدت ایله سوق واداره اولندیفی زمان سوق‌الجیش
احاطه هجومی، کرجک، مصادمه قطعیه‌دن چکلمک ایستر کبی
تصور اولنان بر دشمنی طوردرمق ایچون اک صاغلام بر یول،
اک کوزل بر واسطه‌در.

اگر بردن بره خصمک جناح‌لرینه ویاخود یانلرینه
صوقلمغه موفقیت حاصل اولورسه، شه‌سز مرکزی‌ده اولدینی
کبی قالمغه مجبوریت کوره‌جکدر. جنرال مولتکه طبق بو یولده
یعنی دانیارقه‌لیرک ایکی یانلرینه صوقیلهرق، مشهور (دانوه‌رق)
موضعنده دانیارقه اردوسنه هجوم ایتمک فکرنده بولنیوردی.

مشار الیه شو حرکت ایله دانیارقه اردوسنی الدن چیقار-
مامق یعنی بر آنده یقلا‌لامق ایستیوردی. چونکه مذکور
اردونک سویلدیکمز ته‌لکه‌کی آتلا‌مش اولسی حالنه کوره،
حرب اوندن صکره ده‌ا ایچیه اوزون سورمش اوله‌جقدی.
کرجه، مولتکه‌نک (۱۸۶۲) سنه‌سی کانون اولنده ترتیب ایلمش
اولدینی پلان اجرا ایدلمدی؛ لکن اجرا ایدلمه‌مکله برابر فنا
برپلان دکلدی. سوزک قیصه‌سی: هرکیم دارالحربی ایکی طرفدن
قوشادر بر اس‌الحرکاته مالک اولورسه، بهمه حال سوق‌الجیش
احاطه هجومنه مراجعت ایتمیه مجبوردر.

بو حاله كوره ، اكثر يا ، قواى عسكر يه يالكز بر نقطه
اوزرينه طوپلامق ممکن اوله ميه جقدر . شو حرکت او زمان
بك زياده وقت ضايع ايدلمش اولمىنى ايجاب ايله جکدر .
نته کيم (۱۸۶۶) سفرنده پروسيا اردوسنك باشندن اوله بر شى
کچمش ايدى . بك طبعيدر ، قطعات عسكر يه ، اس الحركاتك
تشكيل ايدجكي زاويه نك ايكي ضلعى اوزرينه بولنه جق ، اونك
ايچون قطعات مذكوره ني انجق ايلروده جمع ايتمك لازم
كله جکدر . بوندن ايسه كندى كندينه بر احاطه حرکتي
جيقه جقدر .

بو قبيل بر وضعيته هاجمين اردوسى اکتريا ، اك قوتلى
اردو اولمق اوزره تصور ايديليور . اوله اولنجه بوتفوق دشمنه
اك چابوق حس ايتديرمك ايچون اك ابو واسطه نك سوق الجيش
احاطه هجومندن عبارت اولديغى ده تسليم ايتمك لازم كلور .

احتمال كه ، ايلروده ويالكز بو سببدن اوترى سوق الجيش
احاطه هجومى اك بيوك بر وظيفه ، اك مهم بر تأثير اجرا
ايدجکدر .

شو حرکتك كال موفقيت ايله اجرا ايديله بيلمسيچون ده
ايكي شرط وار ؛ اولرى ده سويليه لم : برنجيسى تعيه نقطه نظرندن
قطعات عسكر يه نك قوتى خصمك قوتندن زياده اولمى . ايكنجيسى ،
حرکتك اداره واستقامتى بر دوزيه كوزل وثابت اولمى در .

بو ایکی شرط عددجه تفوقدن دهها زیاده اهمیتی حائزدر .
 آب آنسزین وقوعه کله جک بوزغینلقلر ایله فلان ویافلان قطعه-
 لرك بکانه مسمی کبی شیر بو قیل بر حرکتک حسن اجراسنی
 بوزمق ایچون اکه ضرر اولان شیردر . حقیقت! بشقه هیچ برشی
 اولر قدر سوی تأثیر ایده من . چونکه دیدیکمز مغلوبیتلرك
 آجی اچی سسلری اوتکی قطعانه اکثریا بیوک بر مقیاسده
 عکس ایدر ، بوندن طولایی قوه مغنوبهده حصوله کله جک فنا
 تأثیر ایسه ، هر قطعه بولنیلان وضعیتک تهلهکسنی اکلایه حق
 استعدادی حائز اولدینی زمان بسبتون آرتش اوله جقدر . ایشته
 فنالغک بیوکی ده اصل بوراسیدر .

(۱۷۹۳) ده (واندن) لر علمنه اجرا ایدیلان بربری متعاقب
 هجوملرده کوردیکمز مغلوبیتلر آب آشکاره کوستربورکه ، یالکن
 عددجه تفوق اتمش اولمق مسئلهسی ، مرکز واحاطه هجوملرچون
 بر ضمان موفقیت اوله میور . بالعکس ، بعضاً کندیلرندن بیوک
 بر دشمنه قرشوبیون اکمهک ایچون قطعات عسکریه نك تربیه لی
 وثابت قدم اولملری ده لازمدر . مثلاً مدافعین الده موجود
 قوتک هدسیله هجوم قوللرندن بریسی اوزرینه آتمش اوله جنی
 زمان هاجینی تشکیل ایدن قطعات عسکریه اونک بو تعرضه
 قرشو جواب ویرمکدن اصلاً چکنمه ملیدر .



سوق الجیش چویرمه حرکتی

دشمنه هجوم ایدلدیکی زمان اکر یالکیز اوکا صوقلمق و تماس حاصل ایتمکه اکتفا اولنمزده احاطه حرکتنک دائره اجرایی ایجه بیوک اولور و بوندن اوتری خصمک طرق اتصالیه سنی تهدیده الیریشلی بولورسه احاطه حرکتی چویرمه حرکتنه تحول ایتش اولور. شهنسز! دشمن بویله بر حرکت قرشوسنده مغلوب دوشنجه بتون طرق اتصالیه سی ده الدن چیقار .

دشمن قرشوسنده اونک جهه سینه همان موازی بر خط اوزرینه یابلمش اولدینی زمان بر اردونک شوقیلدن بر حرکت یابمسی طبیعی پک زوردر. یانلردن برینه طوغری سوق ایدیلان بر یان حرکتی و دشمن جناحلرندن بریسنک بوزلمسی احتمال ، دشمنک چویرلمش اولمسنده مساعده ایلر. لیکن دشمن یانلری و باخصوص کبرولری اوزرینه دوشمک ایچون بزم کندی جهه سی اوکندن آریله رق بیوک بر قوس دائره تشکیل ایتدی کمزی کورنجه شهنسز الی باغلی و غیر متحرک بر حالد قلمز. بالعکس ، اوده بزی تعقیب ایده جک ، یولمزی قپایه جق واورته مزه هجوم ایده جکدر . حتی بوندن اوتری بز ، ایجه محاربهر ویردکدن صکره آنجق اونی چویرمه موفق اوله بیلر.

جکڑ . بناءً علیہ چویرمہ حرکتک یایلمہ ایله برابر باش-لامسی
ویایلمہ حرکتک ایسه ایلك اوکجه دها، دشمنک یانسه ویاخود
یانی کیروسنه قرشو اجرا ایدلمسی لازمدر.

ناپولیون یامش اولدینی اک پارلاق س-وقالجیش چویرمہ
حرکتلرینی هپ شو وجه ایله یاش ایدی . (۱۸۰۰) نیساننده
مظفر آوستریایلر ، (وار) اوزرنده و (ژن) اوکنده یعنی
فرانسزایتالیا اردوسنی آتمش اولدقلری پرده تأسیس ایتشلردی .
وکیورلرنده واقع مملکتی آنجق پک ضعیف بر صورتده اشغال
ایدیورلردی . اوراده هیچ بر تهلمکه اونلری قورقیده جق کبی
کورینبورلردی . واونلر الب سلسله سنی، اوستریا ایله اولان طرق
اتصالیهلرینی تأمین ایچون پک اعلا برمانع دیه دوشونیورلردی .
لکن برنجی قونسول اجتماع نقطه سی رسماً (جی یون) موقعی
اولان احتیاط اردوسنی چوقدن بری اسویچریه کوتورمش
وانی الب سلسله سنک شمال اتیکلرنده اجتماع ایتدیرمش ایدی .
اوندن صکره مشارالیه مایس آینده (بیوک سن برنار) کچیدینی
آتلادی . وهیچ طوردمقسزین سلسله نك جنوب اتکندن چیقهرق
خصم اردوسنك کیورلرنده برلشدی . وحرکانك ایلك زمانلرده
دها اوستریایلرک طرق اتصالیه سنی اشغال ایتمه که باشلادی .

(۱۸۰۵) سفرنده نه وقتکه، جنرال ماق اوستریا اردوسیهله

برلکده (ایلار) اوزرنده جه-سنی غربه متوجه اولق اوزره

قره اورمان کچیدلرینک شرق مخرجلرنده برلشهرك نابولونی
 بکلیوردی، وقوعات ینسه شو دیدیکمز کبی عیناً جاری اولمش
 ایدی. بو صرهدده ایمراطور کرچک، شاشیله جق بر سرعت ایله
 قسماً فرانسه نك شمالندن و قسماً سانوره دن کلان اردوسنی مؤخرأ
 (لودوویغسبورغ)، (هال)، (انکلفنکن) و (آنسباق) دن کچهرك
 طونه یه دوشمک ایچون برطرفدن (رین) اوزرنده (لایتربورغ)
 ایله (مانه ایم) آره سنده وبرطرفدن (ماین) اوزرنده (ووزبورغ)
 ده جمع ایدیوردی. اوت، مشارالیه بتون قطعات عسکریه سی
 صیقیدن صیقی به اجتماع ایتش اولدیغی حالده آوستریا اردوسنک
 صاغ جناحی کیروسنده و (طوناوورت) ایله (انکومشتاد) آره
 سنده ظهور ایلدی.

شو وقوعات انناسنده (استراسبورغ) دن حرکت ایدن
 بر قول، اوت یالکز بر قول بو اردونک قرشوسنده بعض
 نمایشلر یامش ایدی.

(۱۸۰۶) سنه سنده بو ناپارط همان ینسه بوکا بکزر بر یولده
 حرکت ایلدی. یوقاری (ماین) دن یعنی (بایروت)، (بامبرق)
 و (ایشواين فورت) دن کچهرك بتون اردوسیله آوستریا حدودی
 و (سال) کیروسنده طوپلانتق اوزره بولنان پروسیا اردوسی
 آره سندن طوغریجه (لایسیق) استقامتنه یوریدی. و بوجه ایله

مصادمة قطعيه دن اول پروسيا اردوسندن زياده (برلين) ه يقين بولندي .

سوق الجيش چويرمه حرکتي اکثريا، بر محاربه ايله نتيجه-
لنورکه ، اوراده ايکي دشمن اردوسي کندي عزيمت نقطه لري
استقامتمنده برر جبهه آلمغه مجبوريت کورورلر .
بونک اويله اولمسنی ايسه اک چوق اصول مذکورک و اوکا
تأثير ايدن شيلري طبعيت عموميه سی ايجاب ايدور . چويرمه
حرکتی يابه حق وشو وسيله ايله دشمنک طرق اتصاليه سنی
کسه جک اولان اردو کندی خطوط اتصاليه سنی ده آچيق براقغه
مجبوريت کوره جکدر [*] .

بناء عليه ، منازعة قطعيه ايکي جهتدن بريسنک هزيمت
کامله سيله نهايت بولش اوله جقدر . صحيح ! ناپوليونک دائماً تعقيب
ايلديکي هدف ايشته بو سويلديکمز نقطه دن عبارتدی .

ايلريده بعض حادثه لر کوريله جکدرکه ، اولر ناپوليون کاري
سوق الجيش چويرمه حرکتلري يايق خصوصی بسبتون اورته دن
قالديرمه لر بيله ، آني کرچک ، بک نادراً وقوعه کلور بر حاله

[*] ژوئینی ايستورکه ، بر سوق الجيش چويرمه حرکتی کندی
طرق اتصاليه سنی فدا ايتکيزين دشمن طرق اتصاليه سنی کسمش
بولنور . مشاراليهک حق يوق دکل وار ؛ لکن اونک ايستديکي شی
آنجق بک مستثنا زمانلرده ممکن الاجرادر .

ویه جقدر در . اول امرده سوق الجیش یا یلمه سی ، بالمجبوریه ،
 دود بولرینک قطعاً معلوم و معین اولان منطقه لرنده اجرا
 بدیله جکدر . حال بوکه ، شو منطقه لری کشف ایتک شبهه سز
 مرا یکی طرف ایچون یک قولای بر شی اوله جقدر . ثانیاً
 نمیدیکی اردولر ، او درجه بیومش ، او درجه کسب جسامت
 بلمش لدرکه ، اولکی زمان اردولرینه نسبتاً اونلرک دهها آز
 وللایشلی اولملری ، طبیعیدر . حاصلی کچش و قنلره نظراً
 بوارینک شیمیدیکی امنیت واستکشاف خدماتی یک زیاده
 بلرولش اولدیفیچون آرتق یا بلمه سی آرزو ایدیلان واک بیوک
 نرطی خصم اردوسنی باصقین ایتمکدن عبارت اولان چویرمه
 حرکاتنک کیزلی طوتلمه سی بالطبع کوچ و بلکه امکانسز اوله
 جقدر .

اوندن بشقه ، تلغراف حوادلرینی ، غزته مخابره لری
 هالینک وقوعات یومییه دائر معلومات ایدنمکه کی آرزولرینی
 خاطر دن چیفار ماملی ز . بونلرک همیسی ، نظر دقتنی جلبه شایان
 ولان وقوعات مهمه بی ایجه زمان کیزلی طوتلمه مساعده ایتیان
 نیلر در ، زما عزمده مدنیت یوزی کورمش اولان هر انسان ،
 کرمی درت ساعت ایچنده علی العاده وقوعات اوزرینه
 معلومات ایدینه بیلور . یا کندی دارالحرمزه برخصم اردوسنک
 کیرمش اولمسی خبرینی عجبا دهها نه قدر آز زمانده اوکره نه جکزا

غرب استقامت‌نده بر آز یورویشنه دوام ایدر . اوندن صکره
 کندی اردوسنی ینه (مچ) ه کتورور وجهه سی غربه یعنی یوزی
 فرانسه یه طوغری اولق اوزره (رونفور) ایله (پووان دوزور)
 یایلاسنده بر موضع آور .

(۱۸) آغستوس (غراولوط - سن پریوا - لامونتان) محاربه -
 سنده هر ایکی اردونك جهه سی بو کره بسبتون معکوس
 بر حالد بولنور . اوت ، ایکی اردونك ایکیسی ده بر دائره نك
 درتده اوچنی قطع ایتدیلر و شیمدی کندی اتصال یولارینه
 نسبة (۱۴) آغستوسده کی وضعیتك قطعاً عکسی بر استقامته
 کلدیلر: فرانسر ، فرانسه ایله اولان طرق اتصالیه یی غائب
 ایتدیلر . آلمانلر ایسه کندیلرینی (رین) وادیسنه باغلایان کوزل
 یوللارک هپسندن برر ، برر واز کچدیلر . مغلوب اردو ایچون
 حاضر ایدی لان فلاکتك بردن بره ظهور ایتمه سی و بالعکس
 آنجق (۲۷) ایلول اسارتیله برابر وقوعه کلسی اردوی مذکورک
 (مچ) طویلری قرشوسنده موقتاً حمایه کورمش اولمسنندن
 ایلری کلیوردی . لیکن (۱۸) آغستوس کونی بویوک مصیبتی ،
 بو مدهش فلاکتی ذاتاً خلاصی نا قابل بر حاله قویمش ایدی .
 کله جـك سفرلرده ، سوق الجیش چویرمه حرکترلرینک
 قیافتی اولسه اولسه ، ایشته بو دیدیکمز شکلده اوله جقدر .
 بو حرکترلر هر زمان کندی قیمتلرینی محافظه ایده جکلر وعین

نتیجه‌گیری ویره جکلردر . لکن آرتق بر سفرک دها ایلک زمانلرنده یاپلمش اوله میه جقلمر، بالهکس ، یالکز حرکات قطعیه زمانلرنده اجرا ایدیه بیه جکلردر .

دها اسکی وقتلرده بیه یواش یواش وترددایله سوق ایدیلان بر چویرمه حرکتی بیوک بر موفقیته نامزد اوله مزدی، زیرا چویرمک ایستیلان دشمن اکر دوشونمک و آتی متعاقب یکدن بر مقابل هجومه کچمک ایچون وقت بولورسه، او زمان هیچ شه یوقکه، چویرمه حرکتی یابان طرفک اتصال یولارینی کسر و بوندن اوتری کندیمی نائل موفقیته اولور .

(اوسترلیچ)ده متفق اردولر، یالکز بر چویرمه‌نک، سیدب سیوری بر چویرمه حرکتنک تأمین مظفریته کافی اولم-دیفنی پک آجی تجربهلر سایه‌سنده اوکرملردی . کرچه اونلرک حرکاتی بیوک بر جرأت ایله حاضر ایدلدی. (اولشاو) اردوک-هندن حرکت ایدرک (برون)ده جهه‌سی کندیلرینه قرشواولمق اوزره یرلشمش اولان دشمنک اک اوزاق جناحی جنوبدن چویرمک و صکره شماله طوغری ایلرولیه، ایلرولیه آنک اوزرینه هجوم ایتک ایستیورلردی . متفق اردولری ایشته بویه دوشو-نیورلردی . واکر دشمن اردوسی بوزیلورسه-آنی پروسیا حدودینه سوروب کوتوره جکلردی، چونکه تام شو زمانده،

مذکور حدود اوزرنده خصم اردوسی علیه یوریمک ایچون
بیوک بر اردو حاضر لانیوردی .

لکن شو دوشونیلان حرکت پک احتیاطسز و پک ده کوری
کورینه بریولده اجرا ایدلدی . میدان محاربه دن اوچ کون اول
نابولیون غربه طوغری یوری یه رک بردن بره آچیق صحرا ده
بر قولتی تشکیل ایدن خصملرینک فیکرومرافی کشف ایدلدی .
صکره ینه بو متفق اردولر ، میدان محاربه کونی بیله ایمپراطوره
قرشو اولان حرکتلرینی درجه کافیه ده کیزلمکه قصور ایتدیلر .
حال بوکه ، شو حرب قهرمانی اونلری بر طوزاغه چکمک ،
اوراده ایودن ایویه بر تپه لک ایچون اونلرک چویرمک
ایستدکلری جناحی یعنی کیندی صاغ جناحی اوپله جه براقدی .
صکره دشمن اردوسنک قسم کلیسی کندی جبهه سی اوکندن
کچمکه باشلاخجه آپ آنسزین اونک اوزرینه آتلدی و بر آنده
ایشی بیتورمش اولدی . پک نادر هجوملر وارکه ، بو هجوم کبی
دشمنی مغلوب ایتک ، حیره شایان بر مظفریت قزاق خصوص-
صنده آچیقندن آچیه بر امنیت ایله اجرا ایدلمش اولسون .

دیدیکمز متفقلر ، اک ایو بر سوق الجیش حرکتک بیله
میدان محاربه اوزرنده کرچکدن مسعودانه بر تعبیه نتیجه بیله
نهایت بولمادیفی زمان هیچ بر قیمتی اولیه جغفی اونو تملرادی .
سوق الجیش چویرمه حرکتک ده اصل مقصدی قطعات عسکریه به

الویریشلی بر استقامت ، خصمك امید ایتدیکی بر استقامت
ویرهرك اونلری سوق ایتمك وآپ آنسزین اونك اوزرینه
بوکلمکدن عبارتدر. حاصلی چویرمه حرکتی حدذاتنده بر هدف
دکل، لکن هدف الحرکانه وصول ایچون حدذاتنده بسیط وپك
امین بر واسطه در .

کیرولر ویانلر اوزرینه سوق الجیش هجومی

شیمیدیکی زمان حربلرنده کوزلجه باشه چیقارلمش اولان
بر سوق الجیش چویرمه حرکتک اک صوک نتیجه سنی تشکیل
ایده جک وجه ایله خصمك کیرولری اوزرینه مکمل هجوملر
یابیله بیله جکینی امید ایتمکه حقمز یوقدر . لکن بو هجوملر ،
ایلری یه یابیلاان حرکات قطامیه نك صوک بر قدمه سی طرزنده
اجرا ایدیلهرک هزیمه تدن هزیمه اوغرایان بر دشمنك طرق
اتصالیه سنی کسمکده ینه ایجه فائده لر حاصل ایده جکلردر .

بو چشمید هجوملرک طبیعت اصلیه سی پک آجیق وپك
صاغلام بر قرار، هیچ بر وجه ایله سکته یه دوشمز بر اجرا ،
بر شدت ایستر .

اوندن بشقه ، سردار اولان ذات خصم اردوسنك توقف

حالنده دكل، بالعكس يورويش حالنده اولديغنى بيلهرك او شرط ايله بوقيل هجوملر اجراسنه باشلاملير. انسان هر زمان كندى قوشوسنده بر (ماق) بوله مز .

بريان هجومنه كانجه، اونك طبيعت اصليه-سى بىستون بشقه درلو ياپلمسنى ايستر. كرجك، بو قيلدن اولان هجوملر، بمض يك مستحكيم موضيلر علينه ايلري كيدليكي وبالخاصه ايربلى، اوافاقلى استحكاملر ايله مدافعه ايدلمش بر حدود سلسله-سى اوكونده محاربه و برلديكي زمان اكثرته وقوعه كلور. شبهه-سز! دشمن قلعهلر ايچنه يرلشمش اولديغيچون ديديكمز موضعهلر جهه دن هجوم ايتك يالكز قوه عدييه ومعنويه مز كرچكدن يك بيوك بر درجه ده اولدينى زمان ممكندر. لكن ينه بو امكان بر اميددن بشقه بر شى دكلدر. اونك ايچون هاجين طرفى اكثر با كندى هجوم ايدمكي نقطه-يه دائر خصمنى آلدانغه و او وجه ايله آنك اك بيوك قوتلرني ياكلش بريره طوبلانغه وشو ائنده كندى ده باصقين حركتلريله بر ويا برقاج توقيف قلعه-سنى ضبط ايتمكه چايشه-جقدر. اكر موفق اولورسه، شبهه-سز كندى هجوم ايتديكي حدود سلسله-سنگ كيروسندن خصمك ياننه دوشمكه غيرت ايدمكي. لكن شيمديكي زمان حربلرنده حوادث فوق العاده، ظهور ايتدكلرى آنده ده، تلغراف، تلفون، و لوس-سپد و يك سريع الحركت سواريلر

واسطه سیله آز وقت اینجنده هر طرفه یاییلور لر . آنک ایچون بویله حرکتلر یاییلور کن، بردن بره دشمن قول باشلرینه تصادف ایتمکدن زیاده سیله چکنمک لازم کلور . هر شی بزم ایستدیکمز کبی اولمسی حالنه کوره، اک صکره ایلاک محاربه دشمنک اهمیتسز براقلمش و بلکه علی العجله تشکیل ایدلمش بر یانی اوزرنده وقوعه کله جکدر

شومصادمه بک حصوله کتوره جکی مظفریت ایسه، هانکی طرف درین قول نظامنده کی قطعات عسکریه سنی میدان قویمقدمه اک چوق لیاقت کوسه تر، دها ترکیه سی، هانکی طرف ارکان حربیه سی دها مقتدر ایسه، او طرفه عائد اوله جقدر . اوندن بشقه دشمن کرک کندی جهه سنک طبیعتی ایجابندن و کرک بزم عددجه نفوذدن اوتری بزه قرشو، بر مقابل هجوم یاهوزق تشبثاتمزی یوز اوستی براقه میه جغنی فرض ایلمک لازم کلور . زیرا، دشمنک بو مقابل هجومی، بزم حرکتمزی قطعاً طور دیرر، و بزی کندی یانی اوزرینه کیتمش اولمقدن منع ایده ییلور.

اوننجی فصل

تعرض تعبیه وی حرکانی

۱ — مقصد ، شرائط ، وسائط

بتون تعرض سوق الجیشی حرکانی آنجق کندیلرینه منسوب و مربوط اولان محاربه نك قیمتیه متناسباً بر قیمت آلورلر . فائده سز ویرامن تکررلردن چکنمك ایچون بز شو بختده یالکز محاربه ایله تعرض سوق الجیشی به دائر سویلدکلریمز آره سمنده برفرق کلی کوسترن نقطه لر اوزرینه براقچ سوز سویلیه جکز . اوته کیلره کلنجه ، اولر ، تعرض سوق الجیشی احکامندن بالاستدلال عیذله تعرض تعبیه وی به ده تطبیق اولنه بیله جکلردر . بتون تعرض تعبیه وی حرکتلرینك مقصدی ، میدان محاربه اوزرینه هجوم ایتمکدر . دشمن هنوز حرکت ایتمکده ایکن کندیسنه قاووشلمش ایسه بو دیدیکمز هجوم ، بالعکس دشمن بریده موضع آله رق [*] بزى بکلیمکده اولسی حالته کوره ،

[*] دشمن یوروش یا بمقده ایکن آتی محاربه به مجبور ایتمك بیوك ، بیوك فائده لرینی آکلامق ایچون (۱۸۷۰) سفرنده (۱۶ و ۱۸) آغستوس کونلرینی (ویون ویل) و (سن بریوا) محاربه لرینی بزریله مقایسه

دها قولای اولدیغیچون هاجمین یوروش حالنده ایکن [**] دشمنی مصادمه قطعیهی قبول ایتدرمهکه مجبور ایلماک ایچون لندن هر نه کلورسه ، هپسنی یاپمایدیر .

موفقیئتک ایلک شرطلردن بریسی ، تعبیهجه دشمنه تفوق ایتمش اولمقدیر . شویله بر تفوقک وجودی اوزرینه ترکیب ایدیلان بر هجوم حرکتی جراتکارانه یاپلسه ده ینه کورکورینه تعقیب ایدیلان بر هجوم حرکتیدن پک فرقلیدیر . بنهء علیه

ایتمک یتیشور . کرچک ، بو مصادمه لک برنجیسنده یالکز ایکی بچق پروسیا قول اردوسی ، ماره شال (بازهن) اردوسنی کمال مظفریت ایله طور دیره ییلش ایدی . لکن ایکنجیسنده قوجه (۸) پروسیا قول اردوسی ینه او ماره شال (بازهن) اردوسنی آنجق پک بیوک مساعی وضایعاته مقابل ، اشغال ایلدیکی موضعلردن چیقاره ییلمشلردی .

[**] هر نه قدر شو یایدیغیز ملاحظه قطعات مسکریه نك سوق واداره سنه عائد بختلردن ایسه ده بز اونی بسبتون سکوت ایله یکیشدیر . مکی بردرلو راضی اوله ندق . (۱۸۷۰) سفرنده آلمان اردولرینک ایکنجی ، اوچنجی درجه قوماندانلری طرفندن صرف اولنه رق بو کونلرده یکی باشندن تحدید ایدماک ایستیلان فوق الماده استقلال الک چوق لزومی وحقی کوسترن شی بزم بوراده سولدیگمز قاعده در . اکر برنجی خطده دشمن ایله تماسده اولان هر جنرال قوماندان ، احوالک کندیسنجه پک اویغون و مناسب کوستردیکی هجوم حرکتلرینه باشلامق ایچون اردونک ارکان حربیه عمومیه سه مراجعت ایله اورادن اذن آلمق مجبوریتنده اولسه ایدی ؛ شبهه سز دشمن او هجوملری کیرویه بوسکورتماک خصوصنده لازم کلان هر ترتیباتی یاپیلاوردی .

هر کیمکه، یارین دهها قوتلی اوله جغنی بیلود. وشونی بیلیمکه برابر
 بوکون ینه آزچوق دشمن اوزرینه هجوم ایتیمکدن چکنمز ؛
 شهسز بیسوک بر قصور ایتش اولور . اما ، اکر دشمنک
 او کیجه قاجسی مأمول ایسه ، او زمان هجوم ایتیمکه یردن
 کوکه قدر حق واردر . دیگر جهتمدن اک او یغون احوال
 و شرائطی جمع ایده جک بر زمانی بکلمک خصوصنده ایجه عناد
 ایتیمکده فائده سی یوقدر . شهسز ، مصادمه کونی بتون قطعات
 عسکریه نك بر یرده بولمسی ، مظفریت ایچون اک آجیق برهانلردن
 بر یسیدر . فقط شوخصوص پک نادراً وقوعه کله جک شرطلر-
 دندر ؛ اونیده اونوناملی یز .

اگر بتون قطعات عسکریه بر یره کله دن اول هیج بر جدی
 ایش کورمه مکه قرار ویرلش ایسه ، او زمان وضعیت عمومیه نك
 بالعکس بزم ایچون یواش یواش فنا لاشمغه یوز طوته جغنه امین
 اولملی یز . یالکز حربده دکل ، علی العاده حیات کونلرینک
 هپسنده فرصت بر کره الدن چیققدن صکره تکرار اله کچمسی
 بر آز کوچ اولور . اصل معرفت سسوق الجیش حرکاتی تعبیه
 هجومیه [*] اکال وتنویر ایلمه دن اول ، اونلرک بسبتون کماله

[*] اوسترلیج محاربه سندن اول متفقین اردوسنک بیلیمدیکی شیلردن
 بریسیده اشته بوایدی : پروسیا همان همان اونلر ایله بر اشته جگنی اعلان
 ایتک اوزره بولئوردی . زیرا ، کانون اولک یاریسنه طوغری بتون
 تسلیحات عسکریه سنی اکال ایده جکنه سوز و برپوردی .

ایرملرینی بکلمک و کاله ایردکری زمانی ، بی-لارک اوکا کوره ایش کورمکدر .

مطلوب زمانی یقالامق ، عسکرلنکده سرعت نظر صاحبی اولمغه باقار . شو دیدیکمز خاصه طبیعتک پک آز کیمسه-لره ویردیکی اک بیوک بر احسانیدرک ، علوم و تجارب عسکریه ایله ده زباده بیومک وایلرولمک شانیدر .

تعرض سوق الجیش-یده اولدینی کبی تعرض تعبیه ویدهده باشلانیلان ایش-ه موفقیت ایله نه-ایت ویرمک ایچ-ون شدت و سرعت حرکت ایله برابر آب آنسزین دشمنی یق-الامق یعنی باصقین ایتک لازمدر . هجوم ائناس-نده بیله ، شیمدیکی زمان محاربه لرنده تأمین مظفریت ایچون اک آنشلی بر دلیل کوسترن ، تفوق آتش مسئله سنی ، یوقاریده کی شرطلره علاوه ایتک ایجاب ایلر .

قوماندانک بتون صنعتی و قطعات عسکریه نک سوق و اداره-

(آرشیدوق شارل) اگر آدم عقلی ترتیبات آله بیلمش اولسه ایدی ، (موراویا) ایچورلرینه (۴۰ : ۵۰) بیک عسکر کوتورمک اقتدارینی حائز بولنه جقدی . بناءً علیه اوج هفته صکره متفقین ، تشرین ثانی نه-ایتلرینه طوغری مالک اولدقلری قوتلرک پک زیاده فوقنده بر قوت باشنده حرکت ایده جکاردی . حاصلی ، کوریلورک ، وضعیت صومیه اولنری انتظاره دعوت ایدوردی . لکن اونلر بوکا باقیدیلر ؛ بالعکس وقتسز بر هجوم یامغه قرار ویردیلر .

سنه دائر فن حربك بتون احكامى غوغا یرینه حرکت ایلان
صنوف مختلفه یی مظفریتك حصـوانه یاردم ایده جك وجه ايله
سوق ایلمك اصولنی بیلمکدن عبارتدر .

الک یاییله جق شی طویجی محاربه سنده تفوق حاصل
ایتمدر . اگر بو شرط یرینه کتورلمش ایسه ، پیاده هجومی
بك نادراً بخیار بر نتیجه استحصالنه کفایت ایلیه جکدر .

ایکنجی شرط ، اسکیدن اولدینی کبی ، ینه بر نقطه قطعیه
اوزرنده پیاده آتشریتك تفوقنی استحصال ایلمکدر . هر کیم که ،
بوسیل آتشینی کندی کیفنه کوره یوریده جك ، ایستدیک یره
دوکه جکدر ، شبهه سز قرشـوده کی دشمنه اکثریا تفوق ایش
بولنه جکدر . لکن دشمنه یاقلاشـمق وموضعنه کیرمکدن قطعیاً
واز کچمک ویالکـز اوزاقده کی آتش ايله اکتفا ایتـمکده صانکه
ایو بر شی دکلدر . زیرا یالـکـز* اوزاقدن ایدمـجکی آتش ايله
دشمنه موضع ترک ایتـدیرمک ایستیان ویالکـز بونـکله قناعت
ایلان جهت ، بالعکس بك آجی تجربـه لر ايله زهر لیمک تهلیکه سـنه
اوغـرایه بیلور .

شبهه یوق که ، مدافعین جهتی ، هـاجمین قوللریتك ایلری
حرکتنی طور دیره بیـلدیکی زمان بالطبع بر موفقیت اخیره نـك
حصوله کلمک احتمالی ده قبول وتصدیق ایلر . ایشته بو محذور -
لردن اوتری هاجمین طرفی ، کندیسنی استقبال ایدن قوروشون

ومرعى ياغم-ورلرى ايچنه لايىنقطع ايلرولىك واك-مكره قانلى
 س-ونكىلريله ايش كورمكه مجبوردر . حاصلى « غلبه ايتك ! »
 سوزىنى سويليان ، « ايلرودن بر قزاقق ! » سوزىنى ده سويلمش
 اولور . لكن سونكى سونكى به كلك وهر ايكى جهت عسكركلى
 بر ديكربنه قارشى اولمق كې ش-يلر آراتق بك نادراً وقوعه
 كله جك شيلردر . زيرا ، بوقاريشقاق اولمدهن ايجه اول ، مدافعين
 جهتى كندى اصول حربىك ، مدافعه اصولك ، كفائيتسزلىكنى
 آكلايه رق بالطبع آنى دشمنك س-ونكى اوجلرندن وتفك
 دىبجىكلربدن اوكرنمهك ايچون كىرو چكىله جكدور .

۲ — قوتلرك تربي

هجوم حاضرانى

قطعات عسكريه قوماندانلىرى ، خصم آنده-لرلىك تاثيرلى
 منطقه-سنة كىرنجه به قدر كندى قطعه-لرلىك الده بولديرر واونلىرى
 هجوم قطعاتىك اجرا ايدلمش اوله جنى مهم بر نقطه-يه كوتورمش
 اولورلر سه آنجق او زمان آنش-لرك معين بر اسنقامتده ، معين
 بر هدفه توجيهى وحركانك توحيدى ممكّن اوله بيلور . بالعكس
 قطعات عسكريه اوتوده برى ده خصم ايله محارب به كىرشمش

اولورسه ، شهسز اولنری مطلوب استقامتده سـوق ایتـمک وانضباط آتـش خصوصـی تأمین ایلمک پـك زور ارله جـقدر . شیمدیکی زمان محاربه لرنده آتـشك كـثافتی ، صیقانی تعبیه جه موجود اولان ارتباطلری پـك چابوق بوزار وعموم قوماندانلق وظیفه سی یواش یواش جزء تام قوماندانلری بیننده انقسام ایتـمکه باشلار .

آرتق نابولون زماننده اولدینی کبی ، ابو قوماندا ایدلمش قطعات عسکریه طرفندن اجرا اولنور ، مصادمه لركوريله ميه جـقدر . وحدت سـوق واداره نك شیمدیکی زمانه عائد قسمی ، باش قوماندان جانبندن كندی افكارینی اجرا ایتدیرمك ایچون باپلمش اولان حاضرالق ترتیباتی متعاقب هر نه آكلاشیلورسه ، یاییله جـق حرکت ایچـون هر نصل برفـکر عمومی وارسه ایشته هـدی اوندن عـسارتدر . ذاتاً ترتیبات مذکوره به براهیت مخصوصه ویردیرنده ینه هـپ شو خصوصدر . سوزك قیصه سی : ایوجه حاضرلامش اولان بر هجوم قطعی ، موفقیت ایله نتیجه لنور .

شهسز ، غوغا ایتـمک خصوصی ، اگر اولجه دهـا ایودن ایویه دوشـونلمش واوکا کوره حرکت ایدلمش اولورسه ، بو موفقیت بر آز دهـا قولای استحصال ایدیلور .

چونـمکه اوحالده ، موجود قوتلرك هـدی کـال حریت ایله قولالانیلور ، وشـوندن اوتری صدمه قطعیه اجرا ایده جـك

قطعات عسکریه بی نقطه اصلی قرشوسنده بولندرمقده ممکن
 اوله بیلور . بر تصادفی محاربه ده ایسه ایش بسبتون
 زور اولور . چونکه شویله بر محاربه ده نه یاییله جغه
 دائر آنجق مصادمه نك بربری آردنجه ظهور ایدن
 دورلری آره سنده بر قرار ویریله نیلور . اوندن بشقه صدمه
 قطعیه بی اجرا ایتمه ک الویریشلی اولان قطعات عسکریه احتمال
 شو تصادفی غوغا باشلار باشلامز صوک درجه یه قدر محاربه یه
 کیریشمش اولور .

بناء علیه آرتق اونلری ، اولدقلری یرلرده براقعه ونیجه
 قطعیه استحصالی ایچون دیگر بعض قطعات عسکریه طوبلامنه
 مجبوریت کوریله جکدر .

لیکن شوکی قطعائی بر آره یه کتورمک ، جمع ایتک
 خصوصنرنده پک چوق مشکلات چکیله جکدر . کرچه ناپولیون
 شو خصوصده کرچک ؛ شاشیله جق درجه ده بیوکلیکر کوستریور ،
 محاربه لرینک هر بریسی دیدیکمز ایچون برر قانلی شاهد
 حکمنده در . نه فائده سی وارکه ، هرکس ناپولیون وهر محاربه
 (اوسترایچ) دکدر .

بر امر شکنده یازیلان هجوم پلانی ، آنجق ایلك حرکانی ،
 هدفی واورایه کیدن یوللری کوستره بیله جکدر . غوغانک صورت
 جریاننه دائر تدابیر فرعیه ایسه ک چوق خصمک آله جفی

ترتيبانہ کورہ دیکشور . حال بوک، هجوم طرفی، خصمک شو
کبی ترتیبانی بنہ آنجق محاربہ نک مختلف دورلری آره سنده
آکلا به بیلہ جکدر .

اونک ایچون تداییر مذکورہ بی دھا اولدن بر صورت
قطعہ دہ کوسہ ترمک ممکن دکلدر . بالعکس دیدیکمز کبی اونلر
احوالہ تابع اولہ جقلر وبو احوالہ کورہ قطعات عسکرہ نک
سوق وادارہ سنہ عائد قواعد اساسیہ نظرآ تنظیم ایدلش اولہ
جقلدر .

۳ — موازی، متقارب ومتباعد ایلری یورویشلر [*].
هیچ شہہ ایدلمزکہ، براردونک موازی یولار اوزرندن مختلف
قوللر ایله دشمن علیہنہ ایلری یورویش یا بمسی آنجق مصادمہ
قطعہ ویرمک ایستمدیکی وبلکہ اوندن چکندیکی زمان وقوعہ
کلہ جکدر .

شیمدیکی زمان اسلحہ نارہ سنک تأثیری، جہہ دن ایلرولیان
قطعاتک صدمہ سیلہ دشمن خطنک کوکسنی یارہ رق پک قهرمانجہ
بر یورویش ایله اوتہ جہتہ کچمکہ آرتق پک مساعدہ ایتیمور .

[*] یان یورویشلر ایله کجہ یورویشلرینہ دائر بورادہ خصوصی
سویلیہ جک ہیچ بر شیشمز یوقدر . اولسہ، اولسہ آنجق کچن فصلدہ
سوق الجیش هجومندہ سویلدکارمزی بر تکرار ایدہ ییلورزکہ، بوتکرارہ
هیچ لزوم یوقدرہ یالکنز شونی سویلیہ لمکہ، خصمک پک یقین اولمسندن
طولانی مذکور یورویشلرک محذورلری دھا بیوک وتہاکہ لیدرہ .

وبونك ايچون شويله بر قورى اميد اوزرينه تاسيس افكار ايتمك، اوكا كوره ايلرى كيتمك آرتق ايو بر شى صاييلمز . خصم آتشي آتئنده اولوم وياره قورشونلريله سيركلشه جك اولان صره لرى بر دوزى يه طولديرمق ايچون كيروده كى ايشسز ، كوجسز آدملىرى ايلرى سورمك لازم كله جكدرد . اكر خصمك جبهه سى اوزرينه ، ايلك حركت آئنده كى قدر ، بيوك بر قوت ايله وارمق ايستنيلورسه ، اووقت هجوم آئنده كى جبهه نك ايكي مثلى بر جبهه طوتمق ايجاب ايلر . چونكه محاربه لرك عددى ، ينه عين نسبتده آزالمش اوله جقدرد .

بوندن حصوله كلان نتيجه شودر كه ، متقارب استقامتلى هجوم ايچون لازمدر . مذكور استقامتلىك تعيننه دائر قعطى سوز سويلمك ايجه زوردر . ايلك او كجه قطعات عسكريه موجود اولان بوللره ، شوسه لره باغلى قالورلر . بر آز وقت صكره ، كنديليرنى خصمك طولو آتشنندن وقايه ايتمك خصوصه ننده آز چوق فائده ورن زمين عارضه لرينه كوره حركت ايدرلر . زمين عارضه لرينك ايو سنى كوتوسندن آيرمق ايچون آچيق كوز وتجربه صاحبي اولمق واونلرى قطعات جسيمه يه كوسه ترمك ايچونده خريطه لرى ايو جه اوقوبه بيلمك لازمدر .

اوندن بشقه ، هدفك سيار ومتحرك اولسى جهتنده خاطرردن چيقارما مليدر . حتى اكر دشمن بزم هجومى

بکلیورسه بیله، اونک ترتیبات عسکریه سنده آزچوق بردرینلک بولنه-ه جق وشوندن اوتری، اونک خط اصلسی هانکیسی اولدیغنده ینه آز چوق خطایه دوشوله جک وکیم بیلور، احتمال دشمنک ایلک بولندیفی خط بو دیدیکمز خط یرینه قونیه-له- جق-در. لکن حقیقته، شو خط اصلی ظن ایتدیکمز خط او دکل، بالعکس خصمک برنجی خطندن بشقه بر شی اولمیه- جقدر. ایلری یورویش اناسنده، پک عجله هجوم قوللارینی بربرینه قاریشدیرمش اولمقدن صوک درجه چکمزک لازمدر. بر آز یوقاریده کورمش ایدککه، قوای عسکریه نک پارچه- لره آیرلمسی، وبو پارچه-لردن هر بریسی قوه موجوده نک ضعیف و دشمنی ایجاب ایدن سبیلر دندر. اونک ایچون بر تعبیه هجومنده متباعد استقامت لک قبولی فرضیه سی هیج بر زمان صوکتورور و اهمیت شایان بر فرضیه اوله مز. احتمالکه، بو قیلدن استقامت لک، یالکز دشمن اقسام عسکریه سی مصادمه یرینک ایجه اوزاق نقطه لرند طومق ایستندیکی زمان، اوت، یالکز او زمان قبول اولنورلر.

بو حالد اشتراک وتوحید حرکات مسئله سی، آنجق طولا- بیسیله حکمی کوس-ترمهک چالیشور وشو وجه ایل بر دشمنی نتیجه قطعی اوزرینه قوای امدادیه کورتورمکدن منع ایدرک ضعیف دوشورمش اولورز.

لكن بونك ايجون ده بز نسبة ضعيف قوتلر ايله خصمك
دها بيوك قوتلرينى مصادمه قطعيه به اشتراكدن منع ايتمه كمقدر
اولوق شرطدر .



۴ — تعرض تعبيه وينك اشكال خصوصيه سى

ميدان محاربه اوزرنده وقوعات پك چابوق بربرينى تعقيب
ايدر وپك چوق متنوع اولورلر. بوندن اوترى، قطعات عسكريه نك
قوة معنويه لرى اوزرنده كوستردكلرى تاثيرات، كذلك پك شدتلى
تاثيرلردن اولورلر. اوندن بشقه سويلديكمز وقوعاتك پك چابوق
بر صورتده يكدىكرينى تعقيب ايلمسندن تعرض تعبيه وى ايجون
ممكن اولان تركيبلر ك عددى، تعرض سوق الجيشى به لازم كلان
تركيبلردن دها زياده در. شونكله برابر اكر بعض اوافق تفك
انحرافلردن صرف نظر ايديلورسه، مذكور تركيبلر ك ينه تعرض
سوق الجيشى فصلنده كى تركيبلر ك عيني اولوق اوزره ظهور
ايتدكلرى كوريلور .



تعبيه جبهه هجومى و تعبيه كديكى

موازى خطلر اوزرنده تعبيه ايلرى پورويشنى ياقى خصوصه

دائر هر نه كه، سويلمش ايسهك اونلرك هپسى برر، برر جبهه هجومنده تطبيق اولنورلر.

بو درلو هجومك، مدافعين عالنه هاجين ايجون هيچ بر فائده طبعيه سي يوقدر. بالعكس ايلري آتلمق خصوصتك قطعات عسكر به اوزرنده كوسترديكى فائده معنويه استئنا ايديلنجه، جبهه هجومى فائدهلى اولمقدن زياده ضررلى بر هجومدر. زيرا هجومه اك بيوك قوت ورن شكل مركزى بوراده موجود دكلدر.

«حركتك كرك اصلنده ورك فروغنده آتشجه تفوق حاصل ايتك، بونى تايمين ايلمك ايسته حال واستقبالك اك اساسلى تعبيه قاعده سي بوندن عبارتدر.» اكر مدافعين كندى جبهه سنى درجه كافيه ده تحكيم ايتمش اولور وهاجين ده او كاقرشو آنجق مساوى بر قوت آرمش بوانورسه، او زمان آتشجه دشمنه نصل تفوق ايديله جاك بنده بيله ميورم! با خصوص هر ايكي جهت عسكرلرى عين وجه ايله تربيه و تجهيز ايدلمش ايسه، بو حقيقت شبهه سز دهه او قدر زياده يوكسلمش اولور.

مدافعينه آتشجه تفوق ايتك ايجون يالكر بر چاره واركه، اوده آتش خطنده حصوله كله جاك بوشلقلى بلا فاصله طولديره بيله جاك. وجه ايله هاجين انده بر چوق عسكر بولمق

چاره سیدر، که چه، مدافعین ایچون ایلک خطه ظهور ایدیه جک
 آجیق لری طول دیر مق، هاجین ایچون اولدینی کبی پک ده قولای
 بر شی اولمیه جقدر. لکن مدافعین قطعاتی سپر لر آرقه سنده
 اورتولی اولدقلر ایچون بالطبع هاجین عسکر لرندن آرتلفات
 کوره جکلر در. بو بیوک فائده ایسه یالکز اونلر مخصوصه در.
 بناء علیه هاجین، ایشنی موفقیتله اکال ایدیه بیامک ایچون،
 چاره سز، پک بیوک بر قوت ایله ایشه باشلامق مجبوریتنده در.
 دیدکلر مزدن شو چیقارکه، اگر بر جبهه هجومنده موفقیت
 قزاق ایستیلورسه، فعال و تربیه لی قطعات عسکر یه، معلوماتی
 آمرله، بیوک بیوک تجربه لر و ذکاره مالک اولمق لازمدر.
 بونلر بعض شرائط عمومیه درکه، صرف نظری اولان فن
 حرب درس لری اونلر ایله اوزون اوزادییه اوغراشمق
 ایستمز.

لکن شوبله اواقله برابر، بزینه حد ذاتنده یا کلش و خطالی
 بر اصول تشکیل ایتدیکه ایچون جبهه هجومی بسبتون کوزدن
 دوشورمه ملی یز. چونکه حربدر بو! باقارسکز، بعض زمانلر
 اولورکه، اوراده بو چشید هجومک ده پاره ایتدیکه هم ایجه
 پاره ایتدیکه آکلاشیلور. او زمان یایله حق بشقه بر شی یوق!
 یالکز قطعات عسکر یه نك قوه معنویه وعددییه سنده امنیت
 کوسترمک و اونلرک هر ایکسندیه آیری آیری استفاده ایتمه نك

یوانی بیلیمک لازمدر. اگر بر جبهه هجومی باشه چیقار، قده موفقیت کوریلورسه، او زمان ینه، موفقیت قزاقش، برا حاطه هجومندن دها کوزل و دها کوچ بر مسئله حریبه فصل ایدلمش اولور دیمکدر. مادامکه، بو سوزی سویلمش بولندق، شمدی جبهه هجومی برازدها تفصیل ایتمکه حقمز واردر؛ صانورم.

جبهه هجومنده بر حال طبیعی اکثریا هاجمینک امدادینه ینیشور؛ اوکا یاردم ایدر. عقل و ذکاسی اورته بر انسان بیله شو مشکل وظیفه قرشوسنده بولندینی زمان او سایهده قوه معنویه جه پک زیاده کارلی چیقار. وینه شوندن اوتری هرکسک اوندن اصلا بکلمیه جکی بر طاقم بیوک بیوک ایشلر کورمکه باشلار. اونک ایچون بعض اوصاف عالیه باش کوستره جک که، اونلرک ظهور ایتسی آنجق پک شدتلی بر تأثیردن طولای اوله بیلوردی. بر قطعه عسکریه ایچونده ینه بوبله، طبق طبقیسنه بوبله در.

بیوک ایشلر کورمک مجبوری ایلک اوکجه، قطعات عسکریه قوماندانلری اوزرنده بیوک بیوک شدتلر، کوزل کوزل تأثیرلر حاصل ایده جکدر. صکره بو تأثیرلر، بو شدتلر یواش یواش، قطعات عسکریه یه کچه جک، واونلری بسبتون احیا ایده جکلردر. امنیت حسیاتی اکثریا مدافعین ایچون تهلیکلی برشی اوله جقدر. زیرا حسیات مذکوره نك وجودی، و باخصوص افراطی مدافعینی

شاسرتر واکثریا مسامحه لر دوشوریر. یا ، بو امنیت حسیانک
 یالانچی اولدیغنی آکلادیغنی زمان ، مدافعین قوهٔ مغنویه سنده
 کوريله جک عکسی ضربه یی ، نه یایی ، اوکا نصل چاره
 بولمی ؟ اوت ! حسیات مذکورده نك یالانچیلکی میدانہ چیقدیغنی
 کبی مدافعین کرچکدن آجینه جق بر فلا کتسه اوغرامش
 بولنه جقدر .

ایلروده کذلک جهه هجوملرینه مراجعت مجبورتی کوريله جک
 و او زمان بو درلو هجوملر ، بلکه دهاکوزل نتیجه لر حاصل
 ایده جکدر .

شیمدی بیلنه جک بر شی ده وار : بو جهه هجوملری ،
 دشمنک خط حربنده آجیله جق اولان و تعیه کدیکی دینلان
 کچید آجیلنجیه قدر عجبا اوزایه بیله جکلر میدر، ایشته بیلنه جک
 شی بودر. شبهه سز پیاده و طوپچینک یکی سلاحلری، و اراضیدن
 استفاده ایتک خصوصنده قطعات عسکرینه نك اوکرن دکلری بونجه
 شیلر، مدافعین عسکرلرینک قیمت عسکریه سی آشاغی بر درجده
 اولسه بیله ، ینه حیرته شایان بر طرزده قطعاتک قوهٔ تدافیه -
 لرینی آرتر مشلردر. پیاده نك شیمدیکی سلاحی بسیط اولدیغنی
 نسبتده او قدر زیاده مدھش تأثیرلر حاصل ایدر. اونک ایچون
 بز دیمک ایستیورزکه ، بو سلاح ایله تجهیز ایدلمش، اعلا دن
 اعلایه مستحکم بریره یراشدیرلمش و آز چوق جسارته مالک

اولش بولنان بر قطعه عسکریه بی طوتمش اولدینی یردن، طیشاری
 چیقارمق بر آزدکل ایجه زوردر. حتی شو یردن خارجه
 آتمش اولسه بیله ینه هر زده بر زمین طالعسه، بر خندق،
 بر اورمان کناری کبی شیر کندی اوکنه چیقارسه، اوراده
 یکی باشند یرلشمکه چالیشه جقدر. شمیدیکی زمان آتشرینک
 مهلك منطقه لری اسکی زمانه نسبة کرچک پک زیاده بیومشدر.
 اونک ایچون محاربه لر آنجق یواش یواش آچلمش وینه پک
 یواش یواش بیومش اوله بیله جکلردر. دشمن جهتی مغلوب
 ایدلمش اولسه بیله ینه بردن بره مصادمه یرندن غائب اولیه جقدر.
 بالعکس، غالب طرفک حرکاتی طوردیرمغه چالیشه جقدر.

چونکه دشمن آتشی اوکنده اوله بویلی بویله چکلمک،
 هیچ طور ماق، مقاومت کوستر مکدن دها تهلمکلی بر شی
 اولدینی مدافعین پک اعلا بیلورلر. شمیدیکی زمانده تعبیه خطیه
 زمانلرنده اولدینی کبی محاربه خطی قیرلمسی ممکن اوله بیلان
 بر مانع دکلدر. بالعکس خط مذکور پک قوی بر رابطه واک
 جوق کندی مرکزینه طوغری تضیق ایدلدیکی زمان بزم
 یانلری می قوشاده جق وجه ایله اکیلور، بوکیلور یعنی پک
 السیتی بر واسطه در.

بتون شو دیدکاریمز، بر محاربه خطی یارمق خصوصه سنده
 کوریه جک مشکلاتی عیانا کوستریورلر. آتشرک تأثیری، پک

واسع اولان آجیق‌لری ، طولایسیله املا واکال ایدرک و قتیه
 بر اردونک کجه بیلیمسینه مساعد بر قپو تشکیل ایدن بر چوق
 کیلومتره‌لک بر مسافه، بوکون کنار آتشرینک تأثیرات مه‌لکه-
 سندن بر درلو قورتیله‌میور . (میچ) و (پارس) ده ودها تازه
 حوادلردن اولقی اوزره (بلونه) ده قیامش اولان اردولر ،
 ایچ‌رودن طیشاری چیقماق ایستدکلری زمان بوندن بالطبع
 محاصره خطرلنده برر کدیک آچق هوسیله برسوری مصادمه‌لر
 حصوله کلشدی. لکن شو محاربه‌لرک هر برنده، هاجینک بتون
 قهرمانلغی، بتون مساعیسی دائماً بر مغلوبیت ایله نهایت بولمشره.
 تعبیه کدیکی آرتق ایکی اردودن بریسی، یکدیگرینه پک
 یقین و موازی یوللر اوزرنده، پک‌طوبلی بروضعیتده ایلمولمکده
 ایکن پک واسع بر منطقه اوزرنده هنوز یایلمه حرکاتی بیتور-
 مه‌مش اولان دشمن قول باشلرینه تصادف ایستدیکنده حاصل
 اوله‌بیله‌جکدر. شویله بر باصقین حرکاتی بیله‌ینه کچمش زمانلرده
 کی قدر بیوک بر تأثیر کو سترمییه‌جکدر. شمدیکی زمانلرده آرتق
 (روسباخ) میدان محاربه‌سنده اولدیفی‌کی وقوعه کلان تصادفک
 نتیجه‌سنه ، بر قاج دقیقه ایچنده، قرار ویرمک و آتی متعاقب
 قوجه بردشمن اردوسنی محو و پریشان ایتمک اوله‌جق شیرلدن
 دکلدرد. آرتق اولسه ، اولسه دشمنی یواش یواش کیرویه
 بوسکورتک ممکن اوله‌جقدرکه، شواننده اک یقین اولان قطعات

عسکریه ، باش طرفده خصمک اک چوق تضییقنه اوغرامش
بولان قوللره یاردم ایتک ایچون بنه فرصت بولمقدن بر دم
خالی قالمیه جقلردر.

شمدیکی بیوک جزء ناملرک لازم غیر مفارقی حکمنده اولان
مقاومت قوتی ، اوکله زمانه طوغری ، ایکنجی برفر قه طرفندن
تقویه ایدلمش اوله بیلیمک شرطیله ، یالکاز برفر قه نک ایکی منلی قوتده
بر دشمن قول اردوسنه قرشو بلا تردد محاربه یه طو تشمسنه
مساعده ایدر . حتی شو دیدیکمز فرقه یواس یواش ، کیویه
چکلمکه بر مجبوریت کورسه بیله بونک ایچون او قدر زمان
کچه جکدرکه ، مذکور فرقه او ائنده بهمه حال کندیسنه کله جک
قوای امدادیه ایله برلشمش اوله جقدر [°] . اکر بر تصادفی

[*] ۱۸۹۴ سنه سی تشرین اول آئنده شرق پروسیاده یاپیلان
ماتوره لر ، بزم بو خصوصده او قدر کوزل بر مثال کوستریورکه ، حقیقه
اک زیاده یقین اولقی لازم کلان بر مثال وارسه ایشته اوندن عبارتدر .
بربری آردنجه کلان کچن ایکی کون ظرفنده برنجی قول اردونک ایکی
فرقه سی یکدیگرندن برکونلک یوروش قدر اوزاق بولنیورلردی .
لکن شویله اولقله برابر ، اولردن بریسی کندی اوزرینه پک صیق
وطویلی بروضعیتده ایلرولیان بتون (۱۷) نجی قول اردو علیه صباحلین
باشلامش اولدینی محاربه نی اوته کی فرقه کلجه یه قدر اوزاتمغه موفق
اولمشدر . بو ایکنجی فرقه نک یتشمسیله برنجی کون وقوعی ملحوظ اولان
هزیمت بر طرف اوله رق بالکس ایکنجی کون بیوک بر مظفریت
قرانلشدی .

محاربه ده خصم اردوسنك بر قسمی، هر هانگی برمانك ومثلاً بر نهر ك كپروسنه آتمغه واونی دیگر قسمی اوزرینه آتیلنجیه قدر اوراده طومغه موفقیت حاصل اولورسه، تعبیه کدیکی دینلان قپو احتمال بو سایه ده ینه آچیلمش اوله بیلور.

دینلمك احتمالی واركه، (۱۸۷۰) سنه سی کانون اولك (۳، ۴) نجی کونلری ویریلان (اورلنان) میدان محاربه سی تعبیه کدیکی آچیلمش اولان محاربه لردن بریسه سیدر، لکن حاجین طرفدن اوج بیوك پارچه یه بولمش اولان برفرانمز اردوسنك بك زیاده کشف اولمی، وایشی منفرد مصادمه لر طرزینه دوکن محاربه نك طبیعتی مذکور کدیك آچق عملیاتی تعبیه دن زیاده سوق الجیش حرکاته یاقلاشدرمق ایستور.

تعبیه احاطه حرکتی

هجومك اصل قوتی، متحدالمركز حرکادن ایلری کلدیکنه باقیلورسه، احاطه حرکتی هجوم ایچون اك ایو بر شکل اولدینی کندی کندیینه میدان چبقار. صوك سفرلرک برچوق مصادمه- لری بو حرکت سایه سنده نتیجه لشمش لردی. اوندن بشقه اوروپانك بتون دار الحرب لرنده، بتون مانوره لرنده قطعانك دائماً شو احاطه

حرکتلرینی تقلید ایلیمکده اولدقلری دؤریلیور. بوزلمش بردشمن قوشوسنده بیله جبهه هجوملرینک ینه پک چوق مشکلاتی وارددر. اونک ایچون احوال مساعده ایتدکجه هر زمان احاطه هجوملرینه مراجعت ایدیلور و او وجه ایله حرکاتک اکیلنه جایشیلور .

شمدیکی زمان سلاهلرینک بیوک منزللاری، احاطه حرکاتک اجرا ایدلدیکی مسافه بر قاق کیلومتره کنیشلکننده اولسه بیله ینه آنی آتش ایچنده بولندرمغه کفایت ایلدیکيچون شمدیکی احاطه حرکتلری اسکی زمان احاطه حرکتلرندن ده زور ودها دهشتلی اولورلر. بوراده اجرا آتک اوغرادینی مشکلات ینه اک چوق حاضرقلردن ایلری کلیور .

تجربه کوستریورکه، یوز احاطه حرکاتک سکسان دانه سی دشمن خط حربنک ده جبهه سی اوکنده ایکن، نهایت بولور. بو، شوندن ایلری کلورکه، انداخت منزللرینک پک زیاده بیوکلیکی سببیله احاطه حرکتی یابه جق اولان قطعات عسکریه بی پک اوزاق یرلردن حرکت ایتدرمک لازم کلیور. بناء علیه، دشمن مرکز اولمق شرطیله بر قوس دائره اوزرنده یورنیلدیکنه نظراً یایلمه حرکاتنده برنجی خط نسبهً بیوک اوله جقدر . بوندن طولایده اکر بر یرده طولانلمش و یا خود یالکز بر استقامتده و طولی بر وضعیتده ایلرولیورسه، هدف اوزرینه بر احاطه حرکتی یابه ییلمک ایچون اکثراً پارچه لره آیرلمق لازم کله .

جگدر . دشمن قرشوسنده بویله یارچه لره آیرلقی خصوصی،
 شبه سز، بر چوقلری طرفدن تهله کلی بر شی ظن ایدیلور؛ حق
 ینه بوندن اوتریدرکه، بر چوق تعیه احاطه حرکتلری پک
 محدود بر صورتده ترکیب اولنیورلر . هاجمین طرفندن اشغال
 ایدیلان قوس دائره نك ایچروسنه طوغری مدافعنك اصلا
 ایلرولمکه جسارت ایدوب ایدمه جکنی ده ایوجه بر دوشونمک
 لازمدر . اشغال ایدلمش بر موقع طرفندن یاپیله حق مقابل
 هجوملرک موجب اوله جغنی مشکلاتی ایسه بر ده یوقاریده
 اوزون اوزادییه سویلمش ایدک . بونک ایچون بر احاطه حرکتی
 یاپیلورکن، جسور بر دشمن طرفندن هجوم خطلرینک یارلمش
 اولدیغنی کورمک تهله کسی حقیقی بر شی اولمقدن زیاده خیالی
 بر تهله دره . بوخصوص سوق الجیش احاطه حرکتیه نسبتاً،
 تعیه احاطه حرکتی ایچون پک بیوک برفائده، کوزل بر کاردر.
 لکن بونک ده کندینه مخصوص وپک جدی بر محدودری
 وار : شبه سز جبهه هجومیله یان حرکتی توحید ایتدومک
 مسئله سی پک زور برشیدر . بوندن آکلاشیلورکه، جبهه هجومیله
 احاطه حرکتی ایکیسی بر آنده اجرا ایدلمک لازم کلور . اگر
 بویله یاپلمزسه، او زمان دشمن، تهدید ایدلمش جناحی اوزرنده
 قوتلی بر مدافعه قولتنی تشکیل ایتکه ویا کندی احتیاطلریله،
 هاجمین طرفندن احاطه حرکتیه مأور عسکرک یانلرینه دوشورلر

اونلری کیرو پوسکورتمکە موفق اولور.

شویله ده اوله ییلور : مثلا جبهه هجومی ایجه کج قالور ؛ دشمن اونی کیرو پوسکورتمش بولنور ؛ ویاخود بالعکس ، احاطه حرکتی کج قالور ؛ دشمن بوسه بیله کرک جبهه وکرک احاطه عسکرلری اوزرینه آری آری یوکلنهرک اونلری برر ، برر محو و پیریشان ایدر .

شیمدیکی زمان مصادمه برلرینک پک زیاده کنیش اولمسی ، توحید حرکات مسئله سنی کرچک پک بیوک مشکلاته دوشورور . (۱۸) آغستوس (۱۸۷۰) سنه سی وقوعه کلان (سن بریوا) میدان محاربه سی شو دیدیکمز ه اک آچیق بر برهاندر . احاطه کند ی تأثیرینی دشمن اوزرینه کوسترمکە باشلا دینی آنده جبهه هجومنک وقت ضایع ایتمکسزین هان اجراسی لازم کلور . اوندن بشقه احاطه حرکتنک بودیدیکمز تأثیری جبهه دن ایلرو . لیان قطعات کیرویه دونمک مجبوریتنه دوشمه دن اول یعنی چار چابوق حکم قطعیدینی کوسترملیدر . دشمن قرشوسنده آرزجوق ضایعات ویره رک قطعات عسکریه نک نسبتاً اوزون بر زمان بکلیه جکلیرینی و بوندن ایلری کلان محذوری انکار ایتمکە بردرلو مجال یوقدر .

احاطه حرکتی یابه جق اولان قطعات عسکریه کلنجه اونلرده کند ی خارجی یانلرینک دشمن طرفندن چویرلمش

اولماسنه صوك درجه دقت ايتمليدرلر . چونكه دشمن آنجق
مذكور جناح علينه مقابل هجوملر يابهجقدر . اونك ايچون
قطعات المذكوره ي قوتلى احتياطلر ايله تعقيب ايتديرمك لازم
كله جكدز .

اكر خصمك ايكي جناحي اوزرينه بردن براحاظه حركتي
ياپلمش اولورسه ، اوزمان هجوم كرچك پك قولايلاق ايچنده
اجرا ايديله بيلور . مركزدن ايكي يه بولنمش اولق تهلكه سندن
هان هان چكنلمش اولور . زيرا دشمنى محيط جناح آتشلرينى
مركزى حمايه ايدرلر . لكن عددجه دشمنده بيوك بر تفوق
كورلمدجه بوكي هجومى يعنى هر ايكي جناحدن دشمنى احاطه
ايدرك ياپيلان هجومى باشه چيقارمق ممكن اوله ميه جقدر .

(وورط) ميدان محاربه سنده آلمانلرك حركاتى بونك ايچون
موفق اوله بيلمشدى . شهبه سز ، شيمدنيكي زمان تاريخ عسكري سنده
ايكي جناحدن احاطه حركتى ياپلمش اولان محاربه لرك اك كوزلى
(وورط) ميدان محاربه سيدر [*] .

[*] مثلا (سدان) ده اولدينى كبي خصمى صيقتشدرمقدن عبارت بر
• مقصدى حاوى اولان ميدان محاربه لرى ايچون آلنه جق ترتيبات آچيقدن
آچيغه سوق الجيش علمنه داخلدر . بوندن اوترى (سدان) محاربه سى حقيق
احاطه حركتلىرينك ياپلمش اولدينى اك كوزل بر محاربه اولقله برابر اوى
بوراده ذكر ايتمكدن صرف نظر ايدبورز .

تعبیه چویرمه حرکتی

صلح زماننده یاپیلان مانوره لرده اکثریا تعبیه چویرمه حرکتلری علمنه نیجه فنا سوزلر سوبلندیکنی ایشیدیورز. لکن سفردنه قدر احتراز ایدلسه، ینه مذکور چویرمه حرکتلرینی قوللامقدن بردلر و از کچمک ممکن اوله میه جق! زیرا شیمیدیکی زمان آتشلرینک مهلك تاثیرلری جبهه هجوملرینک، باخصوص کچیدلر قرشوسننده، اکثریا موفقیت حاصل ایددمیه جکلرینی کوستریور: اونک ایچون ینه چاره سز، تعبیه چویرمه حرکتلرینه مراجعت ایده جکز. شبهه سز، بوغازلر، اکثریا آنجق چویرمه حرکتلری سایه سننده اله کچمش اوله بیله جکلردر. تاریخ عسکری شاهد اولسون! شو خصوصده (لئونیه اس) ک (ترموپیل) هزیمتدن (بلومه ناو) غوغاسنه و (غورقو) نک (خان بوغاز) یورویشنه قدر بزه برچوق مثاللر ویرن هپ اودر.

چویرمه حرکتنده بربرندن آریلان قوللر آره سننده کی فاصله برزمان صکره اوقدر بیورکه، اونی آرتق آتش تاثیرلری طولایسیله قیامقده ممکنسز اولور. وشوندن اوتری، خصمک آره یره کیرمسی، و مذکور قوللری یکدیگرندن کسمک تهلهکسی بالطبع ظهور ایدر.

ایجه آره لق ایله یاپیلان چویرمه حرکتی دشمنی بر مقابل

هجوم یا بمغه دعوت ایلر . اونك ایچون بویله برچویرمه حرکتی
 یا بمغه دن اول بر کره بعض احوال خصوصیه نی ومثلا مقابل هجوم
 یا بمق ایچون خصمك قطعات عسکریه سی الویریشلی میدر ،
 دکلیدر؟ اراضینك تشکلات طبیعیه سی بوکا مساعد میدر، دکلیدر؟
 ایشته بوکبی شیرلی برکوزدن کچورمك لازمدر .

اگر بز دشمنی بر نهر اوزرنده یرلشمش بولور وچویرمه
 حرکته مامور بر مفرزه سایه سنده نهردن کچمك چاره سی
 آرار ایسهك دشمن بزم شو مفرزه مزی کیویه آتمش اولمه دن
 اول ، مانعک بری یقه سینه کچمکه وبزم ارتبباطمزی قیرمغه
 محبوریت کوره جکدر . طاغلق یرلرده ، اکثریا مختلف بوغازلر
 آره سنده اتصالات عرضانیه موجود دکدر . بوندن اوتری
 مدافعین ، چویرمه حرکته مأمور واشغال ایدلمه مش برکچیده
 حاکم اولان برقولک اوکنه انجق کیرو طرفلردن بعض قطعات
 عسکریه سوق ایدرک چبقه بیله جکدرکه ، چویرمه قولی شوسایده
 بالطبع کندی اردوسندن آری دوشمش و آره سی کسلشمش
 اولیه جقدر .

بونك ایچون چویرمه حرکتلری اولیه بعضیلرینك دیدیکی
 کبی هر زمان فائده سز وتهلکه لی حرکتلردن دکدر . بالعکس
 وقت اولورکه ، اولردن پک زیاده استفاده ایدیلور . ومثلا
 دشمن طرفدن طوتلمش ومدافعه ایدلمش اولان برمانعی ضبط

ایتمک ایچون اونلر اکثریا برنجی درجه واسطه لردن صاییلورلر .
 طماغ سفرلری چویرمه حرکتلرینک اک چوق تطبیق ایدیله -
 جککاری برلردر . شویله اولمقله برابر ، احاطه حرکتلرنده
 اولدینی کبی چویرمه حرکتلرینک ده حد ذاتنده ویالکز باشنه
 بر اهمیت مخصوصه بی حائز ویک فائده لی شیلر اولدینی قبول
 ایتمکدن چکنمک لازمدر . ترکیه سی : بودرلو حرکتلر ، قطعی
 برلرلر کورلرکجه قوللانما ملیدرلر .

کیرولر ویانلر اوزرینه تعبیه هجومی

کیرولر اوزرینه تعبیه هجومی یایق آنجق موفقیت حاصل
 ایتمش بر احاطه حرکتلرین صکره اوله بیلور . دشمنی بردن بره
 یقلا مش وطرق اتصالیه ورجعیه سنی نه قدر چابوق کسمش
 اولورلر سه بو قبیل هجوملر ، ده ها اوقدر فائده لی و کسیرمه
 اولورلر . لیکن کیرولر اوزرینه تعبیه هجوملری یایق مسئله سی
 یک آز وقوعه کله جک شیلردر . زیرا کشف خدمتلی ، کرچک
 حیرت ایدیله جک بر یولده ایلرولمش واکال ایدلشدر . منفرد
 اقسام عسکریه ایچون بوجشید هجوملر ، بعض خطا لرو قاریشقلرلردن
 اوتری غوغا ائساننده ظهور ایده بیلورلر . بوجه ایله اردو
 قسم کلیمسندن آیرلش وبرکچیدی ضبط ایتمک هوسنه دوشمش

اولان بعض فرانسز مفرزه لری (مانس) ایلروسنده کیجه لین
آلمانلرک صاغ جناح لری و کیرولری اوزرینه هجوم ایتشلر در .
لکن بوراده منقطع بر محاربه دن زیاده بر باصقین حرکتی یامق
ایستنلمشدی .

بتون براردو ایچون شو کبی حالار ، امکانش اولسه بیه ،
پک نادر وقوعه کله جک حالدر . یان هجوملرینه کلنجه بوچشید
هجوملرده آراتق یالکز وضعیت عمومیه پک مساعد، و دشمن
غفلتده ، بولندیغی زمانلر ایچون قبول ایدبله جکلر در . اوندن
بشقه اراضی اولدجه کثیف برقار طبقه سیله اورتیلورده سوا -
رینک حرکتی ممکن دکلسه بویان هجوملری ینسه قوللانلمق
استعدادینی حائز اولورلر . (۱۰) کانون ثانی (۱۸۷۱) سنه سی
(یاریکه - له وهک) ده شو حال غینیه واقع اولمشدر .

اون برنجی فصل

مدافعه سوق الجیشی حرکاتی

۱ - مقصد ، شرائط و سائط

مدافعه سوق الجیشی حرکاتک مقصدی ، اکثریا دها کوزل شرائط واحوال ظهور ایدنجهیه قدر مصادمه ونتیجه حربی تأخیر ایلمکدن عبارت اولور . بونک ایچون هرشیدن اول دشمنک ضعیف دوشمسی بکنیلور ؛ بالخاصه دها فائده لی بر موضع طوتلمسی امید اولنور . ویاخود ایلک اوکجه حاضرده بولنان قوای معاونه نک کلمسه انتظار ایدیلور . بوقیل حرکاتی اینجه دن اینجهیه اوقومق ، تدقیق ایتک ایستیانلر ایچون اک ابو مکتب ناپولیونک (۱۸۱۳) سفریدر .

برده احتمال که ، دشمن بالخاصه مدافعهیه پک الویریشلی بر خطک اوکنه کلنجهیه قدر بکنیله جکدر . لکن شو حالده یاسیله حق حرکاتک ، حرکات عسکریه صره سینه کیرمکه دکری یوقدر . مدافعهجه زمان قزائمق هوسنی طاشیمق ، کندینی دشمندن کیزلمک معناسنه کلور . لکن بر شرط ایله که ، اراضینک کنیش بر منطقه سی دشمنه ترک ایدلش اولسون .

مدافعه ده موفقیت حاصل ایدہ بیلیمک ایچون ده بعض شرطلر وار . مثلاً مدافعه سوق الجیشی ده بولندلجہ کندی قوتلریزک تزیادی وبالعکس خصم قوتلرینک تناقصی مسئله لری بزم ایچون جداً پک بیوک فائده لر تأمین ایتلمیدر . یعنی مدافعه انناسنده مدافعین قوتلری بدرجہ ده بیوملی وهاجین قوتلری بدرجہ کوچلملی که ، شوندن حاصل اوله جق موازنه سزلیکدن بالاستفاده مدافعین اک صکره ایستدیکی کبی کندی ایشنی کورمنش اوله - بیلسون . حاصلی وسائط حربیه وقوای عسکریه خصوصنده هر شی یرلی یرنده اولملی ، هیچ برشی مبالغه وافرط اوجو - روملرینه دوشورلملیدر . زیرا ، کرک وسائط حربیه وکرک قوای معنویه دائر ایدیله جک یا کلش حسابلر ، اکثر بارجمت وانتظار کبی تهلیکلی نتیجه لره سبب ویرر ، یا خود اک صکره تشبثات عسکریه نک ایچہ زمان سور وکلنمسنی موجب اولور ، کیدزلر .

اگر بر مدافعه سوق الجیشی حرکتک صوک دورلرنده ، خصمه نظراً ، ایلک زمانلردن دها قوتلی بولنلمز ایسه ، بوندن طبیعی هیچ برشی قزانلمش اولیه جقدر . یالکز مصادمه قطعیه - نک کندی ضرر و زیاننه خدمت ایدہ بیله جکنی کورمک قوز - قوسندن بشقه هیچ بر سبب حقیقی اولقمیزین یاپیله جق تردد لره وکیرو چکلمه لره حرکات عسکریه اسمنی ویرمکدن اوتانیورز .

چونکه بوكى شيلرده روح الحركات اولان مقصد حقيقى بللى
 دكل وبلدكده هيچ يوقدر! اوندن بشقه، بو ترددلر وبو كير و
 چكلمه حركتلرندن آنجق بك چوق زمان و مسافه مالاك
 اولمق، بروجه ايله كه، وقوعات جاريه ائناسنده بيله اولجه خاطر
 كلمك بعض فواند ووسائط تدافعيه بولمق اميدنى بسليه بيله چكمز
 وقت برفانده كورمك ممكندر.

(۱۸۱۲) سفرنده روس اردولرينك باشندن طبق بيله
 برحال كچمش ايدى. كرچك، سفرك ابتدالرنده اونلر، مملكهتك
 ايجروسنه طوغرى چكيليورلردى. بو چكيلمهك باشليجه سببى
 ايسه، اونلر بربردن آرى اولدقلىچون دشمنه قفا طوته بيله-
 جكلرني اميد ايدمه ميورلردى. لكن ايشك صوكنده مذكور
 اردولرك قوماندانلرى، حركات عسكرينهك شويله جه اوزايوب
 كيتمسندن طولايي خصم اردوسنهك اوغرا ديفى ضايعاتى بينوك
 بر اهتمام ايله تقدير ايدرك يوقا ريدمه سويلديكمز اصولى حرفى
 حرفه تطبيق ايلمكدن اصلا چكنمديلر.

زمان و مسافه، مملكهتك استيلا اردوسنه قرشو مالاك اولدينى
 مواقع طبيعيه و مستحكم يرلر ايله قلمه لر كې موانع صنعيه
 هر مدافعه حركتك باشليجه منابعدن صايلورلر. وقوعات
 سفرينه كندى ايسه تكمز كوره يوريمك ايچون اك قوتلى

مانوله ، رجعت ایتمکده اولان بر اردونک دشمن اوزرینه
دائماً کوستردیکی جاذبه دن عبارتدر .

شو نقطه بی هرکس دن زیاده وانک آجیق بر لسان ایله تقدیر
ایدن (قلاوزویچ) در . مشارالیه بزه کوستریورکه ، (۱۸۱۲)
سفرنده روس اردوسی ، قوجه بر ایمپراطورلق آره سندن مملکتک
ایجروسنه طوغری بر کره رجعت ایتدکن صکره تکرار مرکز
ممالکدن حدود بونی اوزرینه ایکنجی بر رجعت حرکتی
یابرق اورایه پک ضعیف دوشمش اولان دشمن اردوسیله
برلکده واصل اوله بیلوردی . شبه یوقکه ، بودشمن اردوسی ده
اونی تعقیب ایچون بر مجبوریت قطعیه کوروردی .

آکلاشیلیرکه ، مدافعینک کوستردیکی قوه جاذبه
اثرلری ، دشمنک عددجه اولان تفوقی آز اولدقچه ده
زیاده ودها نفوذلیدر . اگر مدافعینک قوتی ، هاجینه نسبت
پک آشاغی بر شی دکلسه ، دارالحرب آز چوق کنیش اولق
شرطیله ، دشمنی دائماً ایستدیکی یرده کندی آرقه سندن کتورتمک
موفق اولور .

حتی بو قوه جاذبه بی الدن چیقارماق لزومی ، اکثریا
مدافعین جهتی موقتاً اولسون ، محاربه ایتمکدن واز کچمکه
مجبور ایدر .

دیدیکمز حال ، اک چوق بر اردونک اقسامندن بریمی

اوته کیلر یتیشنج-یه قدر خصمک بللی باشلی هدفلردن برینه وصولنی منع ایتمکه مأمور اولدینی زمان واقعدره بر مصادمه نك حصوله کتوره چکی بدبخت بر نتیجه مدافعه قطعاً تنده موجود اولان شو قوه جاذبه نی آزالتیر. بر هزیمت کلیه ایسه اونی هیچ اولمزسه موقتاً محو ویریشان ایدر.

۲ — مدافعه ده نقطه غایه نك انتخابی

سفر پلانی حقنده برقاج شی سویلدی کمز وقت ایو دوشو- نلمش بر پلانه کوره سوق ایدی لان هر مدافعه-نك اک صکره، بر نقطه غایه یه توجه ایده چکی و بوراده کندی منفعت و حسابنه خدمت ایده چک وجه ایله حرکات عسکریه نك ترسنه دونه چکی- ده بالمناصبه سویلشمش ایدک .

اگر بو عکس حالک ظهوری ، دشمنک اک چوق ضعیف دوشمش اولمسندن بکلنیورسه، هاجمین اردوسی قوتلی اولدینی نسبتده نقطه مذکورینی بالطبع مملکتک دها زیاده ایچروسنده آراق لازم کلور. شو حالده تعرض سوق الجیشینک نقطه غایه سی، زرده اوله جنی مسئله-سنی اولدن کمال امنیت ایله حساب ایتمک ممکن اوله میه جغندن طولای مدافعه-نك نقطه غایه سی ده آنچق بر صورت عمومیه ده کوسترمک ممکن اوله جقدر .

تعرض سوق الجیشینک نقطه غایه و صولی، هاجمینک حرکات
عسکریه انساننده محاربه لر، میدان محاربه لر، یورویشلر،
خسته افکار و احتیاجات سفریه دن طولای اوغرایه جقه لر
ضایعانه باغلیدر.

لکن مدافعه نقطه غایه سنی، اردو بیله کندیسنی اداره
ایتمکدن عاجز قاله جق صورتده مملکتک بسبتون کیرولرینه
آتمقدن چکنمک لازمدر. بوجه ایله حرکت ایتمک، ترکجه سی
مدافعه رجعیه ده بولمق، مسئله سی یالکز دارالحرب کرچکدن
پک واسع اولدینی زمان قبوله شایان کوریلور.

غرب حکومت مدنیه سندن هیچ بریسننده شو حالک
وقوعی ممکن دکلدر. زیرا کندی منابع سفریه وحیاتیه سنی
ترک ایدرکن اوغرائیه جق ضایعات، خصمک دوشه جکی
ضایعاندن قات قات زیاده اوله جقدر. شرق سفرنده بیله، بالقان
سلسله سنی الدن قاجردقدن صکره چتالجه قدر بتون مملکتی
اهالیسز برامق خصوصنده کرچک بیوک بر خطا یاپلمشدی.
خطوط الحركات پک اوزون، مملکت پک فقیر دکلدی. اگر
اوله اولسهیدی؛ بلکه هاجمین اردوسی، ایجه صیقندیلره،
ایجه ضایعانه اوغرایه رق نهایت یاری یولده توقفه مجبور اولوردی.
بر چوق فراریلرک آقین، آقین کللری، اک صکره فائده سز بر
مصالحه نك امضا ایدلمسنه يك بیوک بر تاثیر کوسزدی.

اگر رجعت ایدن اردو ، ایچیه اوزون بر خط الحركاتك اوتەكى اوجنده برقاج زماندن برى ضعيف دوشمش وپك زياده يورلمش اولان هاجيندن قوتلى بولنورسه اووقت ايشلرك يوزى ينه بشقه بررنكه بويانمش اولوردى . شهبه سز اوزمان بو مدافعه حرکاتى كندى تطيقاتى بشقه دارالحربلر اوزرنده بوله بيلوردى . فرض ايدى كركه ، (۱۸۷۰) حربنده (ماقاهون) اردوسى ، (سدان) ده يقايى اله ويرمه مش . . بالعكس بربرى آردنجه برخيلى محاربه . لردن اوترى ، ساده ضعيف دوشمش اولسون ! كركچك ، اكر بوسزك هر دوشونديككز كې اولسه ايدى ، عجبا ايشلر نه مركزده جريان ايدە جكدى ؟

شهبه سز ! ديرسكركه ، (ماقاهون اردوسى) چكيله ، چكيله اك صكره (پارس) ديوارلرينه قدر چكلمش اولوردى .

حقكز وار ! ينه تسليم ايدرسكركه ، او زمان (ماقاهون) اردوسى تمقيب ايدرك ، پارس ديوارلرينه كلنجهيه قدر اوجنجهي آلمان اردوسيله (موز) اردوسى (سدان) حرکات عسكريه سنك موجب اولمديغندن زياده ضايعاته اوغرامش بولنه جقلردى . هپسى بو قدر اولسه ايدى ، ينه باس يوق . . ليكن بونك دهـا اوتەسى واركه ، اصل جان صيقان ، ايشلرى بسبتون يوز اوستى چويرن ايشته هپ اودر .

كركچك ، پك زياده شهبه لره دوشمك سزىن ، ينه تسليم ايدر .

سکزکه، یارس دیوارلرینه قدر کتورمش اولدیغکز آلمان اردولری آرتق قوتلی محافظ مفرزمسیله محافظه ایدمبیلجک قوته مالک اولمقلریچون او زمان ایلك اوکجه دشمنه قانق اولان مذکور اردولرک احتمال شو تفوق عظیم خلافتنه اوله رق شمعدی بیوک، زنکین واهالیسی چوق بر مملکتته هجومدن عاجز قالدق-لرینی کوروردیکز.

بو تصور ایدیلان شی حقیقتمدن پک اوزاق بر شیدر؛ اونک ایچون تدقیق و امتحانه دکری یوقدر، دیمه ییکز. چونکه ماضی به طوغری یالکر برکوز اوجیله باقارسه کز اونک برچوق مثالرینی کورور، شاشارسکز!

(ولینغتون)ک (طوروس ودراس) ده کی حرکتی شومثالرک اک پارلاق واک کوزللرندن بریسیدر. (۱۸۱۰) سنه سی ایلك بهارنده فرانسزلر علینه غوغا ایدوب طوران اسپانیالیرک حالی پک یمان، پک پریشان بر حال ایدی. یالکز کوچک پورتکیز قرالغندن بشقه بتون (ایبریا) شبه جزیره سی فرانسزلرک الله دوشمش ایدی. شان وعظمت فیکرلری ایچنه کوملمش اولان قوجه نابولیون هنوز آوستریالیری ایودن ایویه بر تپه لمش وایستدیکی کی مغلوب ایلمش ایدی. اونک ایچون اسپانیانک ایشنی یتورمک خصوصنده هیچ برشی فرانسه به ممانعت ایتیه جک کی کورینوردی. نابولیون وقت ضایع ایتمکسزین و(ماسهنا)

پایه جفی بعض حرکاتنه قاپیله رق زمانی کله دن اول قطعی مصادمه لر
 ویرمه مجبور اولمقدر . شوته لکه یه دوشمه مک ، تعبیه یه نسبت
 سوق الجیش نقطه نظرندن دهها مشکلدر . چونکه سرداراکرم
 اولان ذات سوق الجیش حرکاتنده بتون اردوسنی کوز آلتنده
 بولندیره مز . برده معیت قوماندانلری طرفندن یاکلش بریولده
 اکلاشیلان بعض شیرلر وقتسز قاریشقلنی موجب اولورلر . لکن
 دیگر جهندن ، مقاومتسز اجرا ایدیلان بر رجعت حرکتی پک
 قولای فرار پک شکلنی آله ییلورکه . شوندن بالطبع عسکرک قوه
 معنویه سی پک بیوک بر فورتنه یه طوتلمش اولور . اوپله ایسه
 ترازینک کوزلرینی دائماً رجعت و محاربه جاذبه لری آره سنده
 و برتسویه ده بولندیره مک یولنی بیلمک لازم کلور . بونک ایچون
 (بلوهر) ک (۱۸۱۳) ده سیلیریا و (روبرتلو) نک برچوق کره لر
 (ویرژینی) نک شمالنده کی سفرلرده کوستردیکی سرعت نظر ،
 قوه نفوذ و مرام صاحبی اولمق ایجاب ایلر .

اگر یکیدن کلان امدادلرک و یاسفرک ایلک زمانلرنده حاضر
 اولمیان بر متفق اردونک برلشمسندن طولانی حرکات عسکریه ده
 بر انقلاب حصوله کله جک ایسه ، اوزمان بشقه درلو دوشونمک
 بشقه درلو یایمق لازم کلور . صحیح ! بویله زمانلرده یکدیگریله
 برلشه جک اولان قوللاردن هیچ بریسی برلشمه دن اول ، هیچ
 بر حرکت قطعی ده بولنماغنه مجبوردر . لکن شو حلالک ده مستثنا .

سی وار. اگر قوای امدادیه هنوز يك اوزاق بولنیورلر ویا خود هنوز حاضر دكلر ایسه واولدجه سوریه کلی بعض حرکات عسکریه اجراسنه باشلامق لازم کلیورسه اوزمان خصم قرشو - سنده یایلمش اولان قطعات ایله جسورانه بر مقاومتده ثبات ایتمک، رجعت ایلیمکدن یوزقات خیرلیدر. و بویله زماندرده بر آن اول ، قوای امدادیه يك بولندیفی یرلره یا قلاشمه نك چاره سنی آره مقیدن ایسه ، دشمنه يك چوق زمان، غائب ایتدیره جك وبرخیلی ضایعات ویردیره جك اولان قوتلی موضعلر طوتمق واوراده ثبات کوسترمک دها مهم ایشلردندر.

کرچک؛ دیدیکمز کبی یاپلیدیفی زمان هاجین ضرر وزیاننه اولمق اوزره حرکت ایدلمش دیمکدر. زیرا بتون اردو ، غیر معین بر زمان ایچون عین شدت و ثبات ایله سفر یورغینلقلرینه صبر ایده جك اقتداری کوسترمش اوله من. بالعکس بو اردونك باشلادیفی حرکات عسکریه موفقیت ایله نهایت بولمش اولسه بیلله ینه قوای معنویه و مادیه سی ایچه کیوشه مش ، ایچه آشینمش اوله جقدر. حرب زمانلری يك چوق اوزون سورونجه بوندن طولایی مظفر اردولر ایچون یوک یوک یورغینلقلر تولد ایدر. وبرملتک مدنیقی نه درجه بیولمش ، ایلری کیتمش اولورسه، بو خصوص یعنی برقاج زمان صکره یورلمق، ضعیف دوشمک خصوصی او قدر زیاده کندیسنی کوسترر. بر سفر

ييتدكن صكره ، ايكنجيسنه باشلامق ، يكي بردشمن عليهنه جواب ويرمك ، لازم اولدني زمان كرك قطعات عسكريه وكرك قوماندانلري اوزرنده اولره كيتمك ، عائله افرادينه قاوشمق اميدلرينك يكي باشدن سونمش اولمسي جهتييله ، ظهور ايدن كيوشكلكي تعريف ايتمك ، آره دن قالديرمق كركچك پك زور برشيدر .

ناپوليونك (۱۸۰۷) سنه سنده كي قيش سفرى ، شو سويلد- يكمزه دائرك كوزل بر بره اندر . پروسيا اردوسى عليهنه كركچكن پك شانلى موفقيتلىر استيصال ايتدكن صكره مشار- اليه (پولونيا) ده عددجه آز ، فقط پك تازه برموسقوف اردوسنه راست كلدى . بونك اوزرينه چاره سز ، فرانسز اردوسنك حركاىي توقيف ايتمكه مجبور اولدى . (۱۸۷۰) سفرنده امپرا- طورلق اردوسنه غلبه ساطوريني اوردقن صكره ، يكي باشدن جمهوريت عسكرلري اوزرينه پك جدى حركات عسكريه يانمغه لزوم كوردكلري زمان عين حادثه آلمانلرك ده باشندن كچمش ايدى .

(۱۸۰۶) صوك بهارينك ايكنجى نصفنده پروسيا جنراللرينك ايلك هوسلري حركات عسكريه يي اوزاندقجه اوزانه رق سفر تعطيلي تازه روس عسكرلرينك ياردميله كله جك بهار موسمنده يايىق ايچون ناپوليوني توقيفه چاليشمقن عبارتندى . باقيلورسه

اونلرك شو فمكرى فنا برفكر دكلدى . لىكن اونی بر آزدھا
 آز آجینه جق بر حالدہ موقع فعلہ كتورمش اولسہ لردى، پروسیا
 جنرالاری بر آزدھا آدم عقللی ایش كورمش اولوردى، سو-
 زینی سويلمكندن ده كندیمزی آله میورز .



۳ - مدافعه حالنه قونلمش موضع، مستقیم، متقارب ومتباعده رجعت حرکتلری .

حرکت رجعیه نك توقف ایدہ جکی نقطه، هر مدافعه سوق
 الجیشی عملیانه نك ایلک نقطه سنه پك یقین اوله بیلور. حتی نقطه
 مذکورہ نك اك ایلرولمش اولان خط اوزرنده انتخاب ایدلمی
 ومدافعین جهته نك یالکز دشمن تقریبنی بکلمسی ده ممکندر. شو
 دیدیکمز حال، کندیمزی هجوم ایدہ میه جك قدر ضعیف کوره نك
 محاربه ایتک ایستنیلیدیکی زمان دائما وقوعه کله جك بر شیدر .
 (اوسترلیج) میدان محاربه سندن اول ، ناپولیونك باشندن طبقی
 بویله بر حال کچمشدرد .

مشارالیه کندی اردوسنك وضعیتی پك آز مساعد والویر-
 یشلی اولمسنه دائر نشر ایلدیکی حوادث هپ شونیه، شوفکره
 بناء نشر ایدلمش ایدی . اك صکره ده شو دیدیکمز حوادثلرك

یایلمسـیله فکر و مرامنه واصل اولدی . متفقین اردولری ، ایلری یه آلدیلر و در حال ناپولیون اردوسـنه هجوم ایتمک کبی قوجه بریا ککشلانی کوری کورینه قبول ایتمکدن اصلا چکنمیدیلر . مستحکم بر حدود اوزرنده یرلشمش اولان هر هانکی بر اردو، ومثلاً آلمانلره قرشو فرانسمز قوای عسکریه سی ینه عین وجه ایله حرکت ایده بیله جک لردر .

مع هذا حدود بونی قلمه لرینک آره سندن ویا کیروسـندن هجوم ایدلدیکنی کورمک آرزو اولنه جق شیلردندر . زیرا هیچ شبهه یوق، که اورالرده هجوم ایتمک، آجیق صحرالرده کی هجومـ ملردن پک زور برشیدر . اوندن بشقه نیجه بیللردن بری نیجه ملیونلر صرف ایدرک وجوده کلان مستحکم حدود بویلرینه خصمک هجوم ایتمش اولمسی آرزو ایتمک طبیعی برشیدر . صنعت سایه سنده حاضر ایدمش اولان محاربه یرلرنده غوغا ایدلدیکنی کورمک قوه معنویه اوزرینه آز چوق تأثیر کوسترن حاللردندر . لکن بووجه ایله بر موضع مستحکم حصوله کتورـ مک آنجق دشمن بهمـه حال اورایه هجوم ایتمک مجبور اولدینی زمان جائزدر . ناپولیونک (اوسترایچ) ده کی دشمنلری کبی هر وقت خاطر نواز دشمنلر بولمق کوچدر !

اگر الله اییدن ابی یه تحکیم ایدمش بر سوق الجیش موضعی وارسه، اوزمان اک چوق نظر دفته آله جق شی خصمک موضع

مذکورى دلك ايچون انتخاب ايده جكى نقطه يه طوغرى كال
شدله قواى عسكريه كوندركدر .

بونك ايچون ده اك باشليجه شرطلر ، جبهه كيروسنده بر
چوق عرضانى يوللره مالك اولمق و قطعات عسكريه يي موجود
يوللره كوره تقسيم ايلمكدر .

تيمور يوللرى اك قطعى زمانلرده بيله مدافعين پياده سى طرفندن
استفاده اولنه بيلورلر . اكر ايلك طوبلانمه ائناسنده كيروده واقع
ديكر برخط اوزرينه دونمكه مجبوريت كوريلورسه بوندن ايلك
او كجه ياكلش بريولده ايشه باشلانلمش اولدينى حقيقتى ميدانه
چيقار [*] . لكن اونلر ، اكر پولنيقه افكار مجبره سى آلتنده
اشغال ايدلمش اولورسه او زمان ضرورت وار ، شو ديديكمز
حقيقت ظاهره چيقامز . كرچك اشغال ايدلمش اولان موضع
دشمن ياقلاشد يني زمان او كا قفا طرفتمغه اليره جك درجه ده
قوتلى دكل ايسه ، چاره يوق كيرويه چكلمك لازمدر . آلمان
حدودى اوزرنده كي يايلامه حركتلىنك ضعيف اولديغه دائر
فرانسزلى قاندرمق ايچون (وورط) و (ايشپهرن) محاربه لرينى
ويرمكه حاجت بيله يوق ايدى . چونكه فرانسزلى اكر حقيقتاً
هرايكى مملكتهك قواى عسكريه سنى كوريجى كوزيله تدقيق ايتمش

[*] دشمنى يورمق و ضعيف دوشورمك ايچون قصداً ياپيلان
متعاقب رجعت و مدافعه حركتلى مستنادر .

اولسه لر دی؛ ینه طوغری بدن طوغری به عین نتیجه بی الله ایدر لر
وناقله یره قان دوککسزین ایلك خطدن پک زیاده قوی اولان
(موزل) خطی اوزرینه چکیله بیلور لر دی. اوت، اکرفرانسزلر
اک باشلی قوتلری شو دیدیکمز خطده لازم کلان مدافع-ه بی
ترتیب ایلمک اوزره توقف ایدرک یالکز پیشدار مفرزه لرینی
حدود بوینه سورمش اولسه لر دی شبهه سز، کندی صندالاریتی
دها کوزل اداره ایتش بولنه جقلر دی.

مرکز لری متحد، رجعت حرکتلرندن مقصد اردولری،
خصمک خطا حرکتانی اوزرنده واقع واولجه انتخاب ایدلمش الو-
یریشلی بریرده، کوزل بر موضعه جمع ایلمکدر. لکن بوکا
قرشو بر اعتراض وار: ایلك اوکجه ده قوای عسکریه بی شو
کوزل موضعه جمع ایتسeler عجبا ده عملی برشی اولزمی؟ بو
سوز او یله پک ده یبانه آتیله جق سوزلردن دکل، فقط شووجه
ایله یایماق ایچون اکثریا بعض اسباب مجبره اوله بیلور. مثلاً
احتمالکه، بیوک اردویی ایجه بر زمان اوکوزل دیدیکمز موضعه
بسلمک، اداره ایتک کوچ اولورده اونک ایچون موضع
مذکورده ایلك اوکجه ده-ا قطعات عسکریه بی جمع ایلمکدن
صرف نظر اولنور. مثلاً احتمالکه، ینه اوکوزل دیدیکمز موضع
ایله حدود بوی آرهنده اراضی بی کندی المزه دشمنه براقغه
کوکلز راضی اولمیه جق. واونک ایچون دشمن کوریلنجه به قدر

اوراده بولمق و صـکره کیره چکلمـك اوزره بتون اردویی حدود بونی سلسله سنده یاقق مناسب کوريله جکدر .

برده ینه احتمال که، ایلری به کوندریلان پیدشار مفرزه لری یالکز باشنه دشمن قوای اصلیه سیله ایشه کیریشه رک پک آز وقت ایچنده اونلری کندیلریله برلکده بزم طوتدیغمز خط اوزرینه چکمش اولورلر .

اگر اردونک یاییلمه حرکاتی، خصمک یاییلمه حرکاتندن اول اکیال ایدیلوب ایدیه میه جکی لایقیله کسیدریله مز ایسه او زمان کیروده ایو بر اجتماع موضعی انتخاب ایتک بیوک بر احتیاط برینه کچر. پرنس (فره دریق شارل) ایکنجی اردونک طوپلانسی ایچون (پالانتینا) ده طبقی بونک کبی بر موضع انتخاب ایلیمش ایدی. آنسزین دشمن باصقین حرکتنه اوغراندینی زمان کیروده بر موضع اوزرینه متحدالمركز رجعت حرکتلرینی قوللانمق اک طبیعی واسطه لردن، اک ایو اصوللردندر. بر اجتماع نقطه سنک مرکزی وضعیتی شو حرکتی پک زیاده قولایلشدیرر. (۱۷۵۷) سفرنده ایکنجی فره دریقک هجومه اوغر اقلری زمان اوستریا لیلر طبقی بویه حرکت ایتمشلر و (پراغ) نقطه سنده برلشمشلر ایدی. اک صکره بعضاً واقع اولور، که حاضرلق محاربه لری اولجه یاییلان بر تعرض پلاننک قابل اجرا اولمیدیفی کوسترلر . بویه زمانلرده اوستریالیلرک (۱۸۶۶) سفرنده (بیستریج) کپروسنه

چکدکری کې، مرکزی بر نقطه اوزرینه چکلمک خصوصی، چاره‌سني تعرض ايله مدافعه آره‌سنده بر انقلاب حصوله کتو-ره جکدر.

کندی عجزنی، یوقمزلغنی طانیانلر ایچون متحدالمركز رجعت حرکاتی اځ عجله واک اول یایله جق حرکات عسکریه-دندر. ایشه-ته بوندن اوتری درکه، عسکرلک صنعتنجه کیروده اجتماع ایتک مسئله‌سی بیوک بر شهرت قزانماش-در. بو کیروده اجتماع ایتک حرکتک بیامم هانکی استقامتده ایلروماځ ایچون مساعده ایتدکاری سویلمان، لیکن حقیقت حالده هانکی طرفدن ایشه باشلامق لازم کله جکی بیلنه مدیکندن اوتری انتخاب اولمان مرکزی موضعلره پک چوق مناسبتی واردر. باصقین حالنده یان طرفلرده واقع بر موضعه طوغری رجعت حرکاتی، شوموضع بتون بتون خصوصی بر تشکلاته مالک اولمدنجه ودها اولدن طانامدنه آرتق اکثریا تطبیق ایدیه میه جکدر. خصمک بر باصقین حرکتی کورلدیکی زمان، اځ طبیعی واک ساده اولان واسطه لره مراجعت ایتک اصولدندر. حال بوکه، یان طرفلرده بر موضع اوزرینه چکلمک حرکتی، شودبدیکمز قولای واسطه-لردن هیج بریسنی جامع دکلددر. حاصلی بو قییلدن بر رجعت حرکتی اردونک بر درجه یه قدر اولدن دهه تجمع ایتش وکال شدتله باش قوماندانک النده بولنش اولسنی ایستر. (ماره شال

بازمن) ك (۴) آغستوسدن صكره فرانسز (نيه د) ی اوزرينه
چكلمسنى متباعد بر رجعت حركتى يرينه قويىق، اونی اويله جه
كوسترمك ممكند. زیرا بوجيه ايله يامش اولدينى ايجون
مشاراليه اردوسيله برابر، (موزل) استقامتمده ايلروليان آلمان
اردولرينك صاغ يانلرينه آتلمش اولوردی. اكر ماره شال بو
حركتك حصوله كتوره چكى تأثيرى بكلمك يولنى بيلمش
اولسه ایدی، متباعد رجعت حركتلرك موجب اولدينى منا-
فعدن بر، بر استفاده ایده چكدی .

منافع مذكوره ايسه دشمنك اوغرادينى باصقين حركتى،
ايلك آلدینى ترتيبانى آز چوق ديكشديرمك مجبوريتى، يوروش
امرى و برچوق زمان غائب ايتش اولمسی كې شيلدر.

ضعف متباعد بر رجعت حركتى يعنى، اردونى قسملره
آيره رق مختلف ايكي استقامته كوره ياپيله حق رجعت حركتى
مذكور اردونك بردها دشمنه مقابله ایده بيلمك اقتدارينى محو
ايدر. بوندن اوترى شوقبيل بر رجعت حركتنى قوللانق اصلا
جائز دكلدر. لکن حربده برچوق حالار وار، كه اوراده خصم
ايله تماس حاصل ايتمكدن چكمنه نك موقتاً اولسون پك بيوك
فائده لری كوريلور. غائب ايدلمش بر مصادمه دن صكره متباعد
رجعت حركتى يايىق، اكثر باه، غالبك تعقيبندن قورتلماق ايجون
اك كوزل برواسطه تشكيل ايدر .

اولا، بو چشید رجعت حرکتلری دها چابوق چکلمکه مساعددر. زیرا عین زمانده بر چوق بولار قوللانق ممکندر. ثانیاً، رجعت ایدن اردونک اک باشلیجه قسمی هانکی استقامته چکلمش اولدیغنه دائر بر فکر صحیح ایدنک، متباعد رجعت حرکتلرنده پک زور برشیدر.

(۴) کانون اول (۱۸۷۰) سفرنده وقوعه کلان (اورلئان) محاربه سندن صکره فرانسلرک رجعتی بونقطه نظر دن بزم ایچون اک ابو بر مثالدر. پرنس فرهدریق شارلک مظفر اردوسی دشمن موضعنک اورتہ سنده کی نهری ضبط ایتدیکی زمان صاغدن غرب، صولدن شرق، مرکز دن جنوب استقامتلرنده رجعت ایتمکه اولان برخصم قرشوسنده بولنیوردی. مصادمه برنده ظهوره کلان قاریشیقاقدن اوتری، رجعت استقامتلرنده مختلف قول اردولره منسوب آدمه لر کورلمش اولدیغیچون ایچنه بر زمان فرانسلر اردوسنک قسم کلیسی، هانکی استقامتمنده چکلدیکی تفریق ایتک ممکن اوله مامشدی.

بناء علیه، ایکی مختلف استقامتمده متباعد رجعت حرکتائی یایمق مسئله سی، بعض احوالده فائده لی اوله جق و بوندن اوتری اصول مذکورده آره صره مراجعت ایدیله جکدر. اوندن بشقه، اگر کیرو طرفده خصم قرشوسنده آتالنه جق بیوک بر مانع اولدینی زمان ینه چاره سز، اصول مذکورده مراجعت اولنه.

جقدر. مثلا بیوک برنهر، یکدیگرندن ایجه 'وزق ثابت کچید
نقطه لرینی بولمق خصوصنده رجعت ایلیان بر اردویی پارچه لره
آیرمغه و متباعد یولار اوزرنده کبرو چکلمکه مجبوراید جکدر.
کذلاک کبرودن کلان بر اردونک معاوتی بکلندیکی و محاربه
غائب ایداش اولمقدن اوتری هزیمتک طوغریدن طوغری به
نتایج مهلمکه سندن چکنمک ایستلیدیکی زمانینه بوجنسدن بر
رجعت حرکتنه مراجعت ایتمک ممکندر. شهبه یوق، که بویله
زمانلرده اردونک پارچه لره آیرلمی، آنجق موقت برشی اولمق
واپلاک فرصتلردن استفاده ایدرکینه او مختلف قوللری برلشدبرمک
لازمدر،

اردونک بر آریه طویلانه بیلمسی ایچون ایسه الده بر استناد
نقطه سی بولمق پک طبیعیدر. شو نقطه استناد، یا حدذاتنده پک
قوتلی بر موضع، یا آثار است حکامیه و یا خود قوای امدادی دن
عبارت اولور. متباعد رجعت حرکاتی، دشمنک کندی مقصدینی
آجیق بر صورتده آکلامق و تعیین ایتمک خصوصنه مانعدر.
بوندن اوتری تعقیب حرکاتی پک آز وقت ایچنده نهایت بولور؛
و بالعکس رجعت ایدن قولار، یکی باشند بریره طویلانش او-
لورلر. بو حالده دشمندو فرلر پک چوق خدمت کوره بیلورلر. (اورلئان)
مصادمه سندن صکره فرانسلر، قرشولرنده درحال آلمان قوای
عسکریه سنی کورمش اولمق سزین، بتون بر اردویی دیگر بر دار-

الحركات اوزرينه نقل ايتمکه موفق اوله مدیلر . لیکن وقتنده ایشه باشلامق واک کوزل ترتیبات آلمق شرطیه ، حاصلات یومیه سی مکمل اولان بر تیمور یول شبدیکه سی قطعات عسکریه یی بریره جمع ایتمک خصوصه نده کوریلان مشکلاته آرتق نهایت ویره بیلور .

۴ — مدافعه سوق الجیشینک اشکال خصوصیه سی

بز بونلرک اک فائده لیبی اولان یالکز اوج شکلدن بحث ایده جکره :
یان موشلر مسلکی

یان موضعه لرنه دیمک اولدیغنی یوقاریده سویلمش ایدک . شیمدی یالکز اونلرک نه وجهه ایله قوللانیله جقلرندن بحث ایده جکره . کیم که ، طوغریدن طوغریه خصمه قرشو قویق واونک یولنی قباتمق خصوصه نده کندیسینی پک زیاده قوی کورور ، مدافعه سوق الجیشی اشکالک اک بسیطلرندن اولان بو اصولی یعنی ، دشمنه جبهه دن مقاومت ایتمک اصولنی انتخاب ایدر . اصول مذکور پک ساده بر شی اولدقدن بشقه اک زیاده امین بر اصولدر . وخطالی ایشلرده بولنغده اک آز مساعد والویریشلیدر .

دشمن هیچ بروقت ، اوننی اهمیتسنز کورده منر ؛ اوکا بهمه

حال جواب ویرمکه مجبور در. برده جبهه موضع لری طوتلدینی
 مان اردو کندی خطوط اتصالیه ورجعیه سنه حاکم بولنور .
 اگر دشمنه کوستریلان مقاومت ایلک اوکجه موفقیت ایله نهایت بولمز
 یسه ، او زمان کیرو چکلمک بر ایکنجیسی ، بر او چنجیسی
 لوتیقینه ممکندر . یازیقکه ، بو اصولک بی-وک بر محذوری
 ار : کیرویه چکلدکجه دشمن متصل کلور و احتمالکه ، دشمن
 ی صکره کندی آرزو ایتدیکی استقامتمده ایجه ایلرولمش اولور .
 ی محذوره چاره بولمق ایچون ایسه ، دشمنی ، هدف الحراکتک
 بلروسنده واقع بر نقطه اوزرنده طور درمق و بوکا امین اولمق
 لزمدر .

شویله بر امنیت اولدینی زمان آرتق چاره سز ، برواسطه
 عاونه کی سوق الجیش یان موضع لرینه مراجعت ایدیه جکدر .
 ونلرک الک باشلیجه فائده لری ، دشمنی کندی هدفنه کوتورن
 خط مستقیمدن آیرمق ، بشقه طرفه چویره کدر . بو وجه ایله
 لموغریدن طوغرییه و در حال ستر و محافظه اولنه بیله جکی امید
 بدلیان شو هدف ، طولایسیله ستر و محافظه ایدلمش بولنه جقدر .
 آندن بشقه دشمنک تبدیل استقامت ایتمی ، ایجه کوجلمسکله
 ایله جق برشیدر .

لکن ینه یازیقکه ، مدافعینک شو وضعیتده کی حالی اکثریا
 نکلسه ده بعض کره لر ، پک مهلاک اوله جقدر . مثلاً یان موضع لردن

برخی طوتان هر هانکی برمدافعه اردوسنک، خطوط اتصالیه
 ورجعیه سی یانلردن برینه تصادف ایتش بولنورلر. اونک ایچون
 مدافعین اونلری پک قولایجه الدن چیقارمق تهلهکسه معروضدر.
 برده یان موضعک اوته کی یانی، دشمنه یقین و تهلهکسه معروض بولنور.
 اونک ایچون مذکور یانک ده چویرملک تهلهکسه واردر. برکره
 مغلوبیت حاصل اولورسه، آرتق ایکنجی بره موضعه برلشهرک
 ایکنجی برکره دشمن هدفه لکه دن اول اورایه کیدن یولی قباه.
 بیلیمک فرصتی ضایع اولور. حاصلی بویان موضعلر مسلهکی بعض
 تهلهکلی عارضه لرک وقوعه پک قولای، قولای خدمت ایدر. و مختلف
 قوماندانلرک پک زیاده معلومات و مهارت صاحبی اولمیری ایستر.
 سوزک قیصه سی: اصول مذکوره مراجعت ایده جک اولان
 اردو بعض خصوصی و پک زور شرائطی جامع اولمیدر. مثلاً
 ایلک اوکجه دشمن قوای عسکریه سنه بر جاذبه قطعه کوسترد.
 جک درجده قوی بولملی. چونکه اگر دشمن عددجه اوکا
 تفوق ایدرسه، اووقت یان موضعه برلشان مدافعینه قرشو
 ضعیف بر قوه عسکریه براقهرق اوته کی قسم کلیسیله تعقیب
 ایلدیکی خط مستقیم اوزرنده یولنه دوام ایدر. بونک ایچون
 هر سواقچیش یان موضعی، مدافعه یه اولان استعدادی ايله
 برابر، عین زمانده تعرض ایچونده الویریشلی بر نقطه تشکیل
 ایتلمیدر. هرکیمکه، درین وکنیش برنهرک کیروسنده برلشور

و آنک بتون کو پریلرینی بوزار، حقیقت، پک ابو بریان موضعی طوتمش اولور دیمکدر . لیکن عین زمانده اونک بتون فائده لرینی بتون کوزلاک لرینی غائب ایدر . چونکه دارالحرکاته یول ویرن قبولرک هپسینی کندی الیه کلیدله مش اولدیغیچون عادتاً نهرک بری کنارنده کندی کندیسینی حبس ایتمش دیمک اولور! بری یقه ده بریان موضعی طوتمش اولدیغنی دشمن پک ارکن اوکره نمه ملیدر . چونکه اگر او دیدیکمز یان موضعی پک ارکندن اوکره نمه مش اولورسه ، اونک اوزرینه یوریمک ایچون نام ایستدیکمز زمان کندی یوروشینی تعدیل ایتمه کوزوم کورورکه، بز بوندن هیچ اولمزسه بر آز وقت قزائمش بولنوروز. بریان موضعنده رجعت حرکتی یایمق امکان خارچنده اولماملی . بالعکس طبیعت اراضی ایجابنده کیرویه چکیله بیلیمک و دشمن چویرمه حرکتلرندن قورتلیمق ایچون لازم کلان شرائطی جامع بولنمیدر .

اگر رجعت حرکتی بر قاج استقامتده یایمق ممکن ایسه ، شوندن پک بیوک فائده کوریلور . زیرا بو حاله نظراً دشمنی یان موضعک اوکنه قدر کتوردکن صکره، یواش یواش کیرویه چکیله رک اونی کیده کیده استقامت اصلیه سندن آیرمق ده ازیاده قولای اولور . لکن بودرلو یابه بیلیمک ایچون اشغال ایدیلان رک ایجه بیوک اولمسيله برابر یولارک چوقلنی شرط اعظمدر .

چونکه سربست حرکت ایتک لازمدر . برسوق الجیش یان
موضی کندی کیروسنده کنیش بر منطقه مالک اولمیدر . اک
ایو یان موضعلری، شویرلردر هنوز اشغال ایدلمیه رک کندیسنه
استناداً اردونک قوای امدادیه کتورتیه بیلجکی یان طرفده کائن
بردارالحربی اورتمکه مساعد نقطه لر اوزرنده تأسیس اولنالر
در . کندی کندینه ظاهره چیقارکه شویله بر یان موضعنده
یالکر مدافعین جهتی کندی مملکتکننده بولنه یلور .

ایشی بر آزدها کوزل آکلائق ایچون بر قاچ، مال سویلیه لم:

(۱۸۱۲) سفرینه دائر یازدینی شرحده (قلاوزویج) شو

سوزلری سویلیور : « بورودینو ، ده (۱۲۰) بیک روس

قرشوسنده (۱۳۰) بیک فرانسر اولدینی دوشونلجکه ، اکر

موسقوف اردوسی کیرویه چکلدیکی زمان بشقه بر استقامت

ومثلاً (قلوغاو) دن کچن استقامتی آلمش اولسیدی، (موسقووه) نک

طوتلمش اوله میه جغنه دائر ممکن دکل هیج کیمسه هیج برشبهه-

ده قاله مزدی . کرچک، (قلوغاو) ه کلدیکی زمان روس اردوسی

کیرو طرفده کندیسنی ایجه زمان بسلمکه مساعد وحقی پک آز

وقت ایچنده تقویه ایدلمش اولمغه الویریشلی کنیش بر منطقه

مالک اوله جقدی . فرانسرلر ایسه ، کندی امنیتلری ایچون

طبیعی شو موسقوف اردوسنی تعقیب ایده جکلردی . زیرا بو

صره ده موسقووه بی ده کیدوب اشغال ایتکه قوتلری یوق

ایدی . یعنی فرانسز اردوسی عددجه روس اردوسنه يك فائق
برقوتی حائز دکلدی .

سوزك طوغریسی، (قلاوزویچ) مذکور استقامتك تعقیب
ایدلمه سندن طولایی عادتاً شكایت ایدیور . دیورکه ، فرانسز
اردوسنك بوقدر آز برزمان ایچنده ایریلوب کیده جکئی هیچ
کیمسه کشف ایده مزدی . اوندن بشقه روس اردوسی یان
براستقامتده یورپده بیلمك ایچون لازم کلان ترتیبات آلاماشدی .
بوترتیبات ایسه ، نسبةً آز مسکون اولان برعملکت ایچون
کرچکدن يك اساسلی ویک لزوملی برشی ایدی .

(قلاوزویچ) ۱۸۱۴ سنه سنده ، متفقینه قرشو فرانسه
طوپراغنك مدافعه سنه دائر سوز سوبلیدیکی زمان ، بوناپارت
پارسك جنوب طرفنده بریر طومش اولسیدی، يك اعلا ایده
جکدی دیور . لکن بوراده فرانسه پایتختنك ضبط ایدلمکدن
مصون قاله جق بر حاله قونلمسنى ده علاوه ایدیور . چونکه
یالکز (پارس) ك متفقین الله دوشمش اولمسی بعض پولیقه
اسبابندن اوتری بتون ایمپراطورنك زوالنی موجب اوله بیلور
دی . موفقیت حاصل ایده بیلمك ایچون بریان موضعی الكصوك
برشرطی ده جامع اولمیدر . اوت، اورتلمك ایستیلان هدف،
اكر يك اهمیتلی برشی ایسه، دائماً کنديسی دشمن الندن محفوظ
بولندیره بيله جك برمحافظ قوتنه مالک اولمیدر .

(۱۸۶۰) تاریخچه مولنکه ، پروسیا ایله آوستریا آده سنده
 بر حرب چیه جنی زمان (برلین) ی بریان موضع ایله اورتمکی
 تکلیف ایلمش . . بز بونی یکی چیه-ان بر ائرده ، (۱۸۹۵)
 سنه سی هفته لق عسکری غزته سنده کوردک . هر ایکی جهت
 اردولرینک جسم امتندن اوتری مش-ارالیه بوهمیادن کله جکی
 تصور ایلدیکی خصم اردوسنه قرشو (برلین) ی طوغریدن
 طوغری به جبهه دن مدافعه ایتک فائذلی بر شی اوله میه جنی
 حکم ایدیوردی . بر محاربه یی غائب ایتک پک اعلا ممکن اولان
 شیردندر . اونک ایچون مولنکه نك شو فرضیه سنی بیانه آتمق ،
 هیچه صایمق کیمسه نك الدن کلزدی . شه سز بردفعه محاربه یی
 غائب ایتدکن صکره دقیقه سنده (برلین) ده غائب اولور و مغلوب
 اردو اکر پک شدتلی تعقیب ایدیلورسه آز وقت ایچنده
 (ایشته تن) اوزرینه آتلمش بولنوردی . لکن ، اکر بالعکس
 پروسیا اردوسی ، (طورغاو) ایله (ویتن برغ) آده سنده (الب)
 اوزرنده برلشمش اولورسه ، بوموضع دن یاپیله جق بتون تعرض
 حرکتلرینک اک بارلاق نتیجه لر ایله نهایت بوله جنی طبیعی ایدی .
 چونکه بوموضع دشمن اردوسنی کنديسنه جبهه و برمه و بوهمیا
 ایله اولان طرق اتصالیه سندن واز کچمه که مجبور ایدردی .
 اوندن بشقه مظفریت حالنده اونی سیلیزیا ایچرولرینه آه جق
 ایدی . بالعکس بر مغلوبیت وقوعه کلدیکی زمان ایسه نهرک کیرو-

سندہ پروسیا اردوسیچون ایو بر النجا موضعی ویرر . و الہ
بولندیریلہ حق مواقع مستحکمہ سایہ سندہ آز وقت صکرہ خصم
اردوسنک تکرار اوکنہ چیقمق خصوصی تأمین ایلردی .

بونکله برابر ، ینہ (برلین) ی دشمن الہ دوش-مکدن
محافظہ ایچون اورایہ هیچ اولمزسہ ، براق کونلک برمحافظ قوتی
کوندرمک دہ ایجساب ایلردی . مولتک (۱۸۶۸) دہ یازیلان
مخطرہ لک بریسندہ ، فرانسه ایله آوستریا علیہ وقوعہ کلہ جک
برحر بی مناقشہ ایلدیکی زمان بویکی حکومتک ایکسینہ قرشو
ینہ عین وجہ ایله حرکت اولنسنی توصیه ایدیور . شو حالہ
نظراً ، (الب) اوزرندہ بریان موضعندہ یرلشمش اولان براردو ،
فرانسه حدود بوبندہ یرلشمش بولنان پروسیا اردوسییلہ پک
اعلا ارتباطدہ قالدور ؛ ولزوم کورلدیکی زمان ، ہر ایکی طرف
بربرینہ یاردم ایدہ بیلوردی . (برلین) اوزرینہ یوریان آوستریا-
لیلرک ، دیدیکمز یان موضعک اوکندن کچہرک یوروشینہ دوام
ایتمسی طبیعی پک زور برشی اولوردی .

سوق الجیش یان موضعلرینک تعرضہ اولان مناسباتی ،
(مولتک) ، (قلاوزویچ) دن دہا یارلاق س-وزلرلہ تقدیر
ایلمشدر . کرچک ، یان موضعلری ، مدافعہ تعرضی ایچون اک
الویریشلی اس الحركات وجودہ کتوررلر .

بر آزدہ رجعت حرکتی یاپان اردولرک طوتہ جنی یان

موضعلردن بحث ایدم. بوجشید یان موضعلر، هاجینک بریانی او-
 زرینه سوق ایدیلان تعرضلرک نتیجه سی اوله بیلورلر. غازی عثمان
 پاشا حضرتلرینک پلونه ده کی حرکتلری بوکا اک کوزل بر مثالدر.
 حقیقت! مشارالیهک پلونه اوزرنده یابدینی حرکات عسکریه سی،
 روس اردوسیچون اومولمدق بر تأثیر کوستردی [*].

کرچه یان موضعلر مدافعه سوق الجیشی ایچ-ون انکار
 ایدلمیه جک درجه ده بر خیلی فائده لری موجب اولیورلر. لیکن
 هر حالده بویان موضعلرینه مراجعت ایتمکی عادت یرینه قویمق
 ایو برشی اولسه کرکدر. بر یان موضعنده جداً کوزل ایشلر
 کوره بیلیمک ایچ-ون نه قدر شرطلرک برلشمسی لازم کلدیکنی
 دوشونور ایسهک، اوزمان بوسوزک قیمتی آکلایه بیلورلر.

[*] غازی عثمان پاشا حضرتلرینی بوراده ایکی نقطه نظرندن مؤاخذه
 ایدنلر اولدی. لیکن مؤاخذهلر پک حقسز و نافله سوزلردن عبارتدر.
 اولاً، مدافعه اثناسنده قزانیلان ایلیک موفقیتلردن بالاستفاده عثمان
 پاشانک تعرضه دوام ایتمه ش، ثانیاً برچوق زمان موضعنده قالوبده
 اک صکره آتی ترک ایدمه جک برحاله کلش بولنسنی مؤاخذه ایدیورلر.
 شواعتراضلرک برنجیسنه اولاً، عثمان پاشانک الی آلتنده پک چوق
 عسکر یوق ایدی؛ جوانی و پریرز. ایکنجیسنه کلنجه کندیسینک پلونه ده
 قالسی مافوقدن کلان اوامر قطعیه دن نشأت ایدیوردی. بر ترک پاشاسی،
 مافوقدن کلان بر امر خلافتنه ایش کوره میه جکی کبی شبهه سز بر آلمان،
 بر فرانسز حتی بر روس جنرالیه ده پنه اوله بر امرک خارجنده هیچ بر
 ایش کوره سز.

لكن يوقاریده سويلديكمز شرطلردن بشقه، بريان موضى
طوتيله جنى زمان، باش قوماندانك شخصى، دشمنك كندى
اردوسنه ويرديكى اهميتى وسائر بر خيلى شيلرى دها نظر دقت
وحسابه قاتمق لازمدر. (۶) كانون ثانى (۱۸۷۱) سنه سنده
جنرال (قورتن) كندى فرقه سيله جغرافيا نطفه نظرندن يك
چوق اهميتلى براسه مقامتده (واندوم) جوارنده (لووار) خطنه
هجوم ايدن پرنس فره دريق شارل اردوسنك صول يانى اوزرينه
يوروردى. لکن هبيج كيمسه اونك شويله بردن بره چيقمش
اولسندن طولايى توقف ايتمكى خاطره بيله كتورمدى. چونكه
نه بو جنرال دن ونه قطعات عسكريه سى طرفندن جدى بر تهلكه
وقوعه كله جكندن كيمسه قورقميوردى.

خط داخل اوزرنده حرکات

بوجنس حرکات، فن حرب نظرياتنك اك زياده قيل وقاله
اوغرامش بحثلرندن بريسنى تشكيل ايديور. چونكه بر چوق
كره لر، بتون عالمك حيرتتى جلب ايدمك درجه ده پارلاق
نتيجه لرك حصولنه ياردم ايتمشدر. مدافعين، هاجمين قطعات
عسكريه سندن تشكىل ايتمش بر قوس دائره نك ايجنده واقع بر

نقطه به استناد ایلدیک و هجوم طرفی برآنده بر جوق بردن و آری آری یولار تعقیباً هجوم ایتدیک زمان مدافعه جهتی خط داخلی اوزرنده بولنیور ، دیمکدر .

کذلک مدافعین ، بر موضع اشغال ایدرده ، هاجمین قطعات عسکریه سنک بر قسمنه اونک اوزرینه طوغریدن طوغری هجومه و دیگر قسمیه آنی چویرمهک چالشدینی زمان مدافعین ینه خط داخلی اوزرنده بولنیور . لکن شو فکر ، خصمک مختلف قوللری آره سنده قالان هاردو هاجمین طرفندن احاطه ایدلمش اولان منطقه ایچنده بتون قوای عسکریه سنی ، دشمن اونلره دهها بیوک قوتلرله هجوم ایتمه دن اول ، بر آریه کتورمهک مقتدر اولدینی زمان ینه موجوددر . یعنی بواققداره مالک اولان هر اردو ینه بر خط داخلی اوزرنده بولنیور ، دیمکدر .

بوجنس حرکاتک طبیعتته دهها زیاده آشنا اولمق ایچون (۱۸۱۴) سنه سنده کانون نانینک (۱۰ : ۱۴) کونلری آره سنده نابولیونک آلمش اولدینی ترتیباتی برکوزدن کچورملی یز . متفق اودولر اوکنده (پارس) اوزرینه رجعت ایدن (بوناپارط) کانون نانینک (۹) نجی کونی قوای عسکریه سنک قسم کلیسیله (سه زان) ده بولنیوردی . مشارالهدن ، (پوتی ، مورن) وادیسیله آیرلمش اولان (بلوهر) قومانداسنده کی (سیلیزیا) اردوسی شو اشناده پارس اوزرینه متوجهماً بر آزددها شمالدن کچیوردی . بواردو

برلشمش دكل ، فقط بریسی (مارق) بونجه كیدن ، اوتنه کی دها
قیصه سی یعنی (شامپور) دن کچن ایکی یول اوزرنده یوریور
ایدی . بوایکی یولك ایکیسندده قول اردولر بربرینی ایچه بیوک
مسافهلردن تعقیب ایدیلوردی . شهه سزا بوحال ، علی الخصوص ،
ناپولیون قرشوسنده بولمنسـنه کوره باصقین یامق ایچـون اك
الویریشلی برحال ایدی . ناپولیون ایلك اوکجه (پوتی مورهـن)
کچیدینی الله ایتدی . صکره اونك یاردميله (بلوهر) اردوسنك
تعقیب ایلدیکی اك جنوبده کی یول اوزرینه آتدی . (۱۰) کانون
ثانی کونی (شامپور) ده روس قول اردوسنی طاغندی . (۱۱)
کانون ثانیده بیوک بر سرعت ایله (ساقن) قولنی تعقیب ایدرك
اك صکره (مونت میرای) ده مغلوب ایلدی . (یورق) ادارهسندده
اولوق اوزره (مارهن) ك شمالنده کی یولدن (ساقن) ك یاردمنه
قوشان پروسیا قطعاتی كذلك آيك (۱۲) نجی کونی نهرك اوته
یقهسنه (شاتو - تیهـری) یه آتلمش بولندیلر . بوایشلر بیتدكدن
صکره امپراطور ، پروسیا وروسیه قوللری باشنده اولهـرق
(بلوهر) ك شرقدن ایلروملكدە بولندیفی جنوبده کی یوله دوزر .
کانون ثانینك (۱۴) نجی کونی (نطوژ) موقعنده (بلوهر) ی ده
بیوك برهزیمته دوشورور . وبونلری اكال ایتدیکی کبی حرکاتنه
دوام ایتهدن اول اردوسنی کیروده (شالون) جوارنده طوبلامغه
باشلار .

لکن شونی ده سویله لم که ، خط داخلی اوزرنده حرکت ایدن براردونک وضعیتی هر زمان فائده لی اوله مز . علی الخصوص شویله بروضعیتک قبولی ، دشمنک عددجه تفوقی آکلاشلدینی زمان جاریدر . لکن مدافعینک سلامتی ، هاجمین اردوسنک قوللانه جنی خطوط الحركات آره سنده بولمقله حاصل اوله جغنی ده اعتراف ایدرز . شویله بروضعیتده ایکن مدافعینک واسطه سلا متی برچوق کره لر ، عین قوتی ، مختلف دشمن قوللری علیه قوللانه بیلیمک امکانندن حصه و له کلور . (۳۰) بیک کیشیلک براردو ایله هر بریسی ، (۲۰) بیک کیشیلک اوچ قول اردویی برر ، برر اوردیق پک اعلا ممکندر . حال بوکه ، اگر شو اوچ قول بر آرده بولنسه یعنی (۶۰) بیک کیشی یه قرشو حرکت ایدلسه ایدی ، احتمال او (۳۰) بیک کیشیلک اردو ایله هیج برشی قزانلمش اوله مزدی .

داخلی خط استعمالی ممکن اوله بیلیمک ایچون قومانداهیتی اک بیوک برقرار ، اک متین بر فکر ایله حرکت ایتک وبرئانیلک بر زمان بیله فائب ایتهمک مجبوریتنده در . بتون دشمن قوتلری یوله بولنور وبو کون یارین هپسی بر آره بکلک ، برلشمک فکر نده در . اگر فی الحقیقه شو هدف لک هپسی بر آره بکلش اولور لرسه اوزمان ایشلر بتون بتونه دیکشور ، داخلی خط قوللانق اصولی یانار ، محو اولور .

ثانیاً ، داخلی خط اوزرنده حرکت ایده بیلیمک ایچون پک متین ، پک چویک عسکرلره مالک اولمق لازمدر . زیرا بوچشید حرکتلر ، عسکرلی فنا حالدیه یورار ، قوتدن دوش-ورور . یورویشلر ، مقابل یورویشلر داخلی حرکتلرده نیجه مشکللرک ، نیجه یورغینلقلرک حصوله خدمت ایدرلر .

اونک ایچون داخلی خطک استعمالی صورت عمومیهده یالکزر کندی طوراغنده حرکت ایدن مدافعین حقنده فائدهلی اولور وکوزل کوزل موفقیتلر حاصل ایدر .

دها بیتمدی ! سویلیدیگمز شرطلردن بشقه داخلی خطلرده قطع ایدیله جک مسافهلرک الویریشلی وقوة موجوده ایله متناسب اولمسیده شرطدر . کرچک ، اگر مسافهلر پک اوافق ایسه ، مدافعین دشمن قوللارندن بریسیله دوکوشدیکی زمان دیکر قوللارک کندیسینی قوشاتمش وچویرمش اولمق تهلیکهسنه معروض قالور . اگر پک بیوک ایسه ، ینه دشمن قوللارندن بریسیله اوغراشدینی زمان ، دیکرلرینی ایجه بروقت کوزدن غائب ایتمهک مجبوریت کوریلورکه ، شوخالدن اوتری مدافعین اوزاق دوشمش اولان دشمن قوللارینی ایستدکلری کبی حرکت ایتمکدن اصلاً منع ایتمش اولیه جقدر . بونک ایچون نه پک بیوک ، نه پک اوافق بالعکس اورته بویلی مسافهلره احتیاج واردر .

اگر دشمن متحد المرکز یعنی متقارب یوللر اوزرنده

حرکت ایدیورسه، او زمان شو دیدیکمز اورتیه مسافله آنجق
 يك آز وقت ایچون کندیلرینی کوسترمش اوله بیله جکلردر.
 آکلاشیلورکه، سفرده، هر شی حقنده حکمی کوسترن بیوک
 شهله وقرارسزلقلردن اوتری داخلی خطله استعمالنده اک
 الویشلی زمانی بولق يك زوردر.

اک صکره داخلی حرکتلرده موفقیت حاصل ایتک ایچون
 هاجین قوللری آده سنده بویلی، بوسلی بر اتفاق اولمیدیغی ده
 فرض ایتک لازم کلور. کرچک، اگر هاجین قوللری،
 (۱۸۱۳) متفق اردولرینک، خط داخلی اوزرنده حرکت ایدن
 (بوناپارط) علیه یابدقلری کی، مکمل براتفاق ایچنده بولنور-
 سه او زمان شهه سز ایمپراطورک اک بیوک حیرتله شایان اولان
 او بیوک حرکتی سقوط ایلدکن صکره، آرتق بشقلرینک
 یابه جفی داخلی حرکتلر صفردن بشقه بر درجه کوستره مز
 سانورز [*].

شمیدیکی زمان اردولرینک یکونی، جسماتی حربرک

[*] کندی خصملرینی یا کلتیق واونلرک حرکاتی صیقم ایچون
 مدافعین اکثریا، قسم کلیسیله اوزرلرینه یوریمک نیتنده اولمیدیغی دشمن
 قوللرینه قرشو آنلری کوزتمک خصوصنده حتی اک آز قوتده بعض
 مفرزله ترک ایتکه مجبور اوله جقدر. ناپولیون (مونت میرای)
 و (شاتوتیه ری) اوزرینه یوروش یامغه باشلادیغی زمان (بلوهری)
 کوزتمک ایچون بو وجه ایله (فارمون) ی کیروده براقشدی.

بدايتـلرئندە بوقئبلدن اولان حرڪتلرك موفقيت حاصل ائتمسئە برر مانعدر. كانون ئائينـك شرفلى كونلرئندە ئاپوليونك كئندى قطعائئە يادرمئش اولدينى كئى بو كونكى اردولرە داخلى خطالر اوزرئندە مكىك آندرمق هيىچ كيمسەنك ئئندن كله مز.

بر زمانلر، موفقيتك حصولئە اك چوق ياردم ايدن باصقين حرڪتلىرىنى آرتق كورهـمىە جكز. زيرا تلغراف ماكنەلرى هجوم ايدلمئش اولان منطقئەنك ايجروسئندە حرڪت ايدن مدافعئين ايجون لازم كلان حواءئى ويرمكە بك اعلا كفائيت ايدە جكلردر.

حاصلى ايلرودەكى حربلردە بو حرڪاتك كوزل نئيجـەلر حاصل ائتمئش اولدقلىرىنى كورهـمىە جكز. يالكز اودرلو حرڪتلر، اولسە اولسە، ائيجـە اوزون بر غوغا دورئدن طولانى مختلف قوللر ايودن ايويە اريمش، دو كولمئش اولدينى ايجون هر ايكى طرف آرتق بتون يكيئلـكنى، بتون شدتى صرف ايدەمىە جك بر حالە، بر بوقمزلغە كلديكى زمان واقع اولە جقلردر.

وضعيت عمومىەسى سوق الجيئشـدن زيادە پولئيـقـەيە مائل بر طئيـعئە بولئان دارالحركاتلر اوزرئندە غوغا ايديلە جكى زمان يئە داخلى خطالر قوللاقمق امكانى قبول ايدە بيلورز. بو وجـە ايلە آلمانىا حكومتى برى شرق، اوتەكى غربدن كلان ايكى دشمن ايلە بر آندە غوغا ائتمك مجبور يئندە قالدئنى زمان داخلى خطالر اوزرئندە حرڪت ايدە جكـدر. وبويلە ياقمق لازم كلور.

چونکه او سایه ده آلمایانك قوه مقاومتی ایجه آرتمش اولور .
 کرجک اکر ، آلمایا اردوسی حدودلرک برنده خصمک
 حرکاتی طوردرمغه موفقیت حاصل ایدرسه ، پک مکمل اولان
 تیمور یولاری سایه سنده اوجهته کی قطعات عسکر به نک برچوغنی
 آز بر وقت ایچنده اونه کی حدوده کتوره رک اوراده ده خصمنی
 طوردرمش، اوله بیله جکدر .

لکن بونک ایچون لازم کلان قراری اک بیوک بر سرعت
 ایله ویرمک وایشی بر آن اول باشه چیقارمه نک یولنی بیلیمک
 ایجاب ایدر . چونکه شویله بر تشبث هیج شبهه یوق که ، پک
 اوزون بر زمان دشمندن کیزی طوتیه له مز . ایر کج دشمن
 اونی اوکره نور . صکره مانع قویق ، نتیجه سز براقق ایچون
 هر نه لازم ایسه بر آن اول یانمغه چالیشور .

یدی ییل سفرنده بیوک (فره دریق) روسیه ، فرانسه
 و آوستریایه قرشو طبق بویله بر اصول قوللائمش ایدی . اونک
 عصرنده کرچه اردولر ، پک یواش یواش تبدیل موضع ایده -
 بیلورلردی .

لکن عین وجه ایله حوادثک بر قولاقیدن دیگر قولاغه
 یایلمسیده ایجه اوزون سورردی . شیمدیکی کبی او زمان
 حوادث طاشیمق ایچون تلغراف ، تلفون خطلری وسائر وسائط
 مدنیه یوق ایدی . او سویلدی کمز عصرده اک چوق زمان غائب

اولسنة سبب اولان شى ايسه . متفق حكومتلر بيننده ياييله جق
حرکات مشترکه ايجون برقرار صحيح ويرمك، اتفاق آرا وجوده
كتورمك خصوصنده اوزون ارزادى يه ايديلان مؤاخذهلر
مناقشه لر، ترددلر وشبهلردن عبارتدى .



حرکات مرکبه

مدافعین بر آنده هم تعرض وهم مدافعه حرکاتنه مرا-
جمعت ایلدیکی، پك او قدر تهلیکلی نتیجه لر یوق ایکن قوای
عسکریه سی کیرویه چکلدیکی ویاخود آره لقمده بر موفقیّت حصوله
کله جکنى حس ایدرک ایلری یه آتلدینى زمان یابدینى حرکانه ،
حرکات مرکبه دیرلر . (۱۸۱۳) سنه سی متارکه سندن صکره
متفقین بو مسلکده حرکت ایتشلردی . بو خصوصده سویلمك
ایجاب ایدن شیلری بزدها یوقاریده یعنی مناوبه تعرض ومدافعه
حرکاتی قوللانقدن بحث ایدن فصلده سویلمش ایدك .

حرکات مرکبه اصولنى قوللانمیسلمك ايجون پك چوق
کنیش بر دارالحربه مالک اولمق لازمدر . اوندن بشقه بو کبی
حرکتلرده مدافعین اراضینك تشکلات طبیعیه سنده وهیچ اولمز-
سه، بو اراضینك یالکیز بر پارچه سنده کندیسى چون براستناد

بولقده شرطدر . (۱۸۱۳) ده (بلوهر) ك فرانسلر علمنه
قزاندینی موفقیتهلر قسماً درین وادیلرده آقان بر نیجه صولر
ایله پارچهلره بولنش اولان سیلنریا طوپراغنك شكل طبیعیسنندن
ایلر رکنش ایدی .

مواضع و مواقع مستحکمهده حرکات مرکبه اجرایی نقطه
نظرندن ایجه یاردم ایده بیلورلر . مثلاً بو کبی قوتلی و مستحکم
یرلر سایه سنده سوق الجیش جناحدرندن بریسنی تخلیه ایدرک
اوته کینده بك شدتلی بر مقابل هجوم یایمق ایچون ایستنیلان
قوتی حاضر لاق بك اعلا ممکندر .

اون ایکنجی فصل

مدافعه تعبیه وی حرکاتی

۱ — مقصد، وسائط

بوقیل حرکات اوزرینه تفصیلات ویرمک بر تعبیه کتابنک
وظیفه سیدر . بز بوراده اونلرک یالکز اوصاف عمومیه سنه دائر
بر قاچ سوز سویلیه جکز. تعرض تعبیه وی حرکاتنک عکسنه
اوله رق مدافعه تعبیه وی حرکاتی میدان محاربه اوزرنده خصمی
کیروه آتق وزمان قزاتق کبی بر مقصد مضاعف تعقیب
ایده بیلور .

مدافعه نک اوصاف عمومیه سنی کوزدن کورمش ، ایودن
ایویه تدقیق ایلمش اولدیغمز وقت کورمش ایدک که ، زمان
دنیلان شی اونک ایچون بر متفق ، یکانه بر آرقداش ایدی .
بوندن اوتری مدافعین ایجه وقت کچمش ایکن هنوز بر مغلوبیه
اوغرامامش بولمنسی بر موفقیت کبی تلقی ایده جکدر . بر میدان
محاربه سنی غائب ایتدکدن صکره بر اردو ، پک یقیندن دشمن
ایله تضییق ایلمش اولدیغنی کوردیکی وایکنجی بر مدافعه
موضعنه کیدنجه یه قدر کیروسنده اوکا قرشو برمدار مفرزه سی

ترك ايلديكي زمان شو مفرزه اكرتيا دشمن ايله يالكر بر قاج
 ساعت قفا طوتمغه موفق اولورسه، كنديسنه ويريلان وظيفه يي
 حقيه كورمش، ايفا ايتمش بولور. اكر ديديكمز مفرزه، آقشام
 اوزرى بر يرده توقف ايتمش ايسه قراكلق باصنجه يه قدر
 دشمنه مقاومت كوسترمك، اونك ايجون يك اعلا كفائت ايلر.
 ورجعت ايدن اردو، كندى هدفنه وارمق ايجون بتون بر كيجه-
 لك زمانه مالك اولور.

اوله اولنجه ديه بيلورزكه، وقت قزانق خصوصى، محاربه
 ايدرك استحصال اولنه جق موفقيت يرينه يك اعلا كچه بيلور.
 بالعكس تعرضده ايش بويله دكل ؛ اوراده بو موفقيت ايجه-
 بهالى، ايجه آخر اولور.

مدافعه تعبيه وى اصولى ايله تعقيب ايديلان بر مقصدك
 ايسه، يك آخر ضايعاته مقابل دوشميه جكي طبيعى بر شيدر.
 يوقسه مثلاً، حرركات عسكريه ده حصولنى كورمك ايسد يكمز
 توقف، محاربه نك عقببنده استحصال اولنور وياخود كنديسنه ايجه
 اهميت ويريلان موضعه ثبات ايتك ده يك اعلا ممكن اوله بيلور.
 لكن بو صره ده اوغرائيلان ضايعات، اردوبى يك فنا تخريب
 ايتمش اوله جنى ايجون احتمال بوندن صكره آرتق حربه دوام
 ايدميه جك بر حاله دوشولمش اولور. اصول مدافعه نك مالك
 اولدني وسائط يعنى آتشك تاثيرى، اراضى، استحكام عملياتى،

خصمك پك چوق ضايعات كورمسی كې شيلر او زمانه قدر
عددجه فائق اولان دشمن قواى عسكربه سيله بر موازنت حصوله
كتيورمك ايچون بيوك بر يكون تشكيل ايده بيله جكلردر.

آشلك تأثيرى، اراضى واستحكام عملياتى نيچون مدافعينه
وسائط حربيه تشكيل ايتدكارى، هيچ بشقه بر تعريفه حاجت
براقسرين، كندى كندينه آكلاشيلور. لكن دشمنك يورغون
دوشمش و ضايعات كورمش اولمى خصوصى عجب، نيچون وسائط
مذكوره دن صاييلور. ايسته بونى ايوچه بر تدقيق ايتك لازم
كلور. بيلورزكه، بر هجوم ايو بر نتيجه ايله نهايت بولمى ايچون
هر شيدن اول، اونك پك ماهرانه حاضر ايدلمش و قطعات
عسكريه نك مقصده كوره ياپلمش اولمى شرطدر. اكر رجعت
ايدن مدافعين كيرويه چكلمكده اولدينى يول اوزرنده طورورسه
هاجين طرفى، شهبه سز اوبله دليجه سنه اونك اوزرينه آلمقدن
چكينور. بالعكس، ايلك اوچه بيوك بر درينك تشكيل ايدن
قوللارنى برررر، يايق لازمدر. اكر مدافعين جهتك طوردينى
پرايجه واسع بولور و مدافعين عسكركلى اراضيدن لايى وجه ايله
استفاده ايتمش اولورسه، دشمن اولا بو موضعى كشف ايتك
مجبوريته دوشر. صكره دشمن موضعه صوقلمق ايچون يوللر
تدارك ايدر؛ قطعات عسكريه سنى بو يوللره كوره آيرير ويواش
يواش محاربه ايچون لازم كلان ترتيباتى آلمغه باشلار. بتون شو

دیدکاریمز، طوبچی آتشنک مؤثر منطقه‌سی خارجنده یعنی شیمدیکی زمان آتشنلرینه کوره (۳۵۰۰) متره‌لک بر مسافه‌ده یاییلور.

بویله اولنجه، یایلمه خطی شه‌سز دشمن موضعندن دها بیوک، دهاکنیش اولور. وقطعات عسکریه‌نک شوموضع کیرمک ویا قلاشمق ایچون یایه‌جنی یورویشلر، ینه شه‌سز، ترلالر ایچنده اجرا ایدیله جکدر. لکن یاغموورکی آتشلر اوکنده ا کین ترلارینی یوزه‌رک دشمنک یقه‌سینه یایشنجه‌یه قدر ایلرو کیتمک قولای برشی دکدر. بالعکس بوجنس یورویشلر، عسکرک جاتی صیقار، آنی قوتدن دوشورور. دشمن موضعنه آتیه‌لق عسکرک یکونی، نه قدر چوق اولورسه، یایلمه حرکانی او قدر اوزون سورور. و یورغینلق‌ده ینه او قدر زیاده اولور. بوندن بشقه اکر طوبراغک اوستی صولاق ویا قار ایله اورتیلی بولنورسه، او زمان ایشلر بتون کوچلشور.

اوت؛ اوزمان ایلری کیتمک، اودرجه زور برشی اولورکه، بوندن حصوله کله‌جک یورغینلق عسکر آره‌سنده ایمان برطورغینلق ظهوره کتورور. شو حاله کوره محاربه ایتمک اصولی‌ده بشقه رنک پیدا ایدر؛ بلکه بسبتون دیکشور. زیرا سواری بویله بر طوبراق اوزرنده شه‌سز، هیچ یوری‌یه‌مز، بوش قالور. طوبچینک تأثیری، حرکتی کذلک بک محدود برحاله اینر. یوکک

اك آغير، اك طاشينلمز پارچه سی ایسه، ینه زواللی پیاده نك
صرتنه یوكلنور:

اكر بو قنالغه، قیش كونلرینك قیصه لئافی ده قاتار ایسه ك
باشه چیقارلمه دن کیجه باصمش و نتیجه سز قالمش محاربه لرك شو
كهی حالارده كئرتله وقوعه كله چكنی آچیقدن آچیغه كورمه ك،
تصدیق ایتمه كه مجبورز. بوكا دها زیاده اینانق ایچون یالكز
(مانس) میدان محاربه سنك تمقیب ایدلمش اولدینی كونلری برر،
برر كوزدن كچورمك یتیشور؛ بشقه هیچ برشی، هیچ بر دلیل
ایستمز.

محاربه دن صكره، قطعات عسكریه تکرار یوله كیده جكلی
زمان، یایلمه اتناسنده حصوله كلان منظره نك یكیدن ظهور
ایتدیكى كوريله جكدر. یورویش قوللارینك درینلکی تدقیق
ایدیلنجه بر قول اردونك محاربه ایچون كونده یالكز بر دفعه
كاملاً یایلمش اوله بیله جکی آكلاشیلور.

بر فرقه، كورلمك غیرتار سایه سنده، بلكه بردفعه یایلدقن
صكره تکرار یورویش قولنه كیرر وینه ایكنجی بر دفعه محاربه
تشکیلاتی آله بیلور. لکن فرقه نك شوایكنجی تشبئی حقیقه بك
بوشنه غیرندر زیرا كونش باتمه دن اول، اونی باشه چیقارمق،
ایو بر نتیجه قزاقق اصلاً ممكن دكلدر.

بتون شودیدیکمز حالره، هپ مدافعه تعبیه وی ایچون جداً

الویریشلی، جداً فائده‌لی حالدر. اگر مدافعه‌ تعبیه‌وی، بعض
 یایمه حرکتلر سایه‌سنده خصمک بیوک بر جزء تامنی محاربه
 نظامنه کچورتیمکه و صکره بیوک ضایعاته اوغرامقسزین اونک
 اوکندن چکلمکه موفقیت حاصل ایدرسه، قبوله بر کون
 قزاعش اولور. شو خصوص اکثریا کوندوز اوزاق طوتیلور.
 یعنی اکثریا شو دیدیکمز یوله حرکت ایدلمز. لکن دوشو-
 نلمیورکه، بو وجه‌ایله یاپلادیغی اچون ینه اکثریا جدی و پک
 قوتلی برواسطه حریبه‌دن استفاده ایدلمه‌مش اولور.

آکلاش-یلورکه، بو اصولی موفقیت ایله قوللانق اچون
 باش قوماندانک پک ماهر بر آدم اولسی و قطعات عسکریه
 بیننده کرجک قیرلمسی ناقابل، بر انضباطک حکم سورمه‌سی
 لازمدر. زیرا، اگر بویله اولمزسه، اکثریا وقت قزاعق
 اچون باشلانیلان بر محاربه‌ده مقصدک خلافتنه اوله‌رق، چکنمک
 استتیلان محاربه‌یه اک جدی و آتشی بر حرکت ایله کیریشلیدیکی
 کوریلور. بو تهلیکه‌یه دوشمه‌مک اچون هر شیدن اول بیوک
 منزلی طوپلری قوللانق، آنلر واسطه‌سیله اوزون اوزادی‌یه
 ایش کورمک لازمدر. طوغریسنی سویلیه‌لم: بو طوپ آتشلری
 دشمن اوزرنده پک بیوک تأثیر حاصل ایتیه‌جک، بالعکس آتشک
 تأثیری پک آز اوله‌جقدر. لکن، ذاتاً ایستتیلان شی دشمن

اوزرنده بك مهم بر تأثیر کوسترمك دكل، اونی یاكلش بر یوله
دوشورمك وشاشرتمقدن عبارتدر.

بو مقصدی الله ایتك ایچون بك مشروع بر حیلله سرا-
جعت ایتك، یعنی بطریقه لرك عددینی دشمنه بك چوق کوسترمك
فكریله اونلری پارچه لره آبرمق لازمدر. حتی وقت صالح
مانوره لرنده بیله كه، اوراده فصل اولورسه اولسون، ایشی بر
درجه یه قدر كشف ایتك، میداننه چیقارمق دها قولایدر،
بو دیدیكمز حیلله اوت، او مانوره لرده بیله بیوك، بیوك
تأثیرلر کوسترمكده در. كذلك ینه او مقصدك حصولی
تأمین ایچون حقیقته اولمديغندن زیاده بیوك جهه لر
طوتمق، كریده ضعیف احتیاطلر بر اقق شرطیله برنجی خطی
بك قوتلی بولندرمق ده اوله بیلور. والحاصل بتون شودیدیكمز
شیلر، مدافعه ده اكثریا موفقیت ایله قوللانیله جق كوزل كوزل
واسطه لردر. ایشك اك كوچ طرفی، یالكر وسائط مذكوره
قوللاندیغی زمان مقصدك حصوله كلدیكى آنی تفریق ایلمكدر.
اكر بو، آنك، بر آز اوتنه سنه كچیلورسه آرتق بلالر مبارکی
دیكدن بشقه چاره قالمز. چونكه در حال نتایج مشئومه برر،
برر كنندیرنجی کوسترمك باشلار. بر یامه جقدن عبارت اولان
شی، بردن بره حقیقت اثوابی كییر واو یوله حاضرلا-
نلمدیغیچون مدافعین بوندن اوتري بك چوق فلاكت كورور.

صورت عمومیه ده سویلیه لم: اگر بوکبی محاربه لرده مدافعین پیاده سی جداً ایشه باشلامش بولنورسه، آرتق ایشدن ال چکمه کلز . بالعکس، محاربه یی صوکنه قدر یوریتک لازمدر . چونکه پک بیوک ضایعاته اوغرائتمسزین پیاده صنفی کیرویه چکمه اصلاً ممکن اولمیان شیلردندر . ایشه بزده اونک ایچون دیورزکه، پیاده صیقیدن ضیقیه ایشه کیریشمش اولمدن اول غوغایی کسمک، تعطیل ایتک لازم کلور . لکن بوده اوله ظن ایدلدیکی کبی قولای برشی دکل . زیرا ، وضعیت عمومیه یی ، مدافعینک قوت و مرانی اعلا دن اعلا یه اوکر نمش اولدیغیچون هاجین طرفی شبهه سز ، پک شدتلی یومروقلر ایندیره، ایندیره مدافعینی تهقیب ایتک وایلرو کیتمکدن بردم خالی قالمیه جقدر .

۲— مدافعه تعیه ویده مختلف اصوللارک استعمالی

وقت قزانق ، خصمی یورغون دوشورمک ، مصادمه قطعییه مراجعت ایتک خصوصلری عجبا نه زمان آرانیه جقدر؟ مدافعه حرکاننک هیئت عمومیه سنه عائد صوک استقامتی کوسترمک . تعیین ایتک مصادمه قطعییه نک وظیفه سیدر . اونک ایچون قوه مقاومت اعتباریه الک یوکسک بر مرتبه یه وارلدیغنه

حکم ایدلدیکی کبی، همان مصداقه قطعیه قبول ایتک لازم کلور . بوقوه مقاومت دیدیکمزشی قطعانک یکونی و بولندقلری حال ایله موضعک متاتی وعسکرك قوه معنوبه سندن تشکل ایدر . قوه مقاومت مطلق برطرزده حساب ایدلمک لازم کلز . بالعکس دشمنک حائز اولدینی درجه مقاومت کوره حساب ایدلمش اولمیدر .

اگر برخیلی قوای امدادیه بکلنور وهماحتماله نظراً اونلرک یکونی محاربه یرینه کلنجهیه قدر ظهوره کلان ضایعاتک فوقده برشی اولدینی آ کلاشیلورسه، اونلر کلنجهیه قدر محاربه یی او- زانمق لازم کلور وشو حالده باشلیجه هدفک زمان قزائمقدن عبارت اوله جنی پک طبیعیدر .

حرکات تدافیه صورت عمومیهده نه زمان بر نهایت ایره- جکفی اولدن کشف ایتک، ممکن اولیان احوالده ایسه، دشمنی ایودن ایویه ازمک، وضعیف دوشوره بیلمک ایچون مدافعینک اک قوتلی سلاحی، مدافعه حرکاتنک اک برنجی مقصد واملی اونی یورمقدن عبارت اوله جقدر .

ایلمک باقیشده بوسویلدیکمز فرقلر حد ذاتنده پک ساده، پک آجیق بعض شیلر کبی کورینه جکلردر . لکن اونلری نظریات کتا بلرندن عملیات مکتبنه کچورمک ظن ایدلدیکی کبی قولای برشی دکل . چونکه سفرده کوزمن اوکنه طوران

منظره کتاب صحیفه لری و درس‌خانه تحته لری کبی پروژسز دکل،
 بالعکس پک اگری بوکری، پک داللی بوداقلی بر منظره در .
 اونک ایچون شویله بر نابویه دیکیلان کوزلر بر آنده هر شی
 کورمک، هرشینک کمانی اوکرنمک قوتی حائز اوله منزلر . مثلاً
 قوای امدادیه نک کله جکلری آن ایله ، آله جکلری یری بر
 درجه یه قدر کشف ایتک ممکن اولسه بیله اکثریا دشمنک ده
 شویله بر حالدیه بولندیغنی واونک قوای امدادیه سی بزمکیلره
 تفوق ایتمش اوله بیله جکفی آکلامق ممکنسزدر . حتی وقوعی
 محتمل اولان ضایعالمک یکونه دائر بر فکر صحیح ایدنمک ده
 قولای بر شی دکل .

دشمنک بولندیغنی وضعیتی تقدیر ایدرکن بیله احتمال بمض
 خط‌الره ، هم پک دهشتلی خط‌الره دوشلمش اوله جقه در .
 (اوستریچ) مصادمه سندن اول متفقین اردولرینک شوخصوصه
 نه قدر چوق یاکلش اولدقلرینی پک اعلا بیلورز . (۱۸۱۲)
 سـفرنده فرانسر اردوسـنک روسیه ده کچوردیکی بوزغینلقدن
 روسلر پک چوق زمان صکره خبر آله بیللمشلردی . حتی فرانسر
 اردوسی ، (قلوغاو) ده موضع آلمش اولدینی زمان بیله ،
 (کوتوزوف) هنوز مذکور اردونک دوشـدیکی ضعف حالی
 آکلایه مامش ایدی . شو نقطه نظر دن ، هاجمین مدافعیندن
 زیاده کارلیدر . هاجمین طرف ایلرولدکجه ، محاربه میدانلری

ودشمن اردو کاهلری اوزرندن کچر واکثر با عین یوللری تمقیب ایلر . بوزغینلق نشانهلری وعدم انتظام کی شیلر آنجق پک کوچلک ایله اونک کوزندن صاقلی طوتیله بیلورلر . اوندن بشقه هاجمین ، اسیر طونمق خصوصاً صنده ده مدافعیندن زیاده فرصتله مالکدر .

اوت ! رجعت ایتمکه اولان مدافعین بوکی واسطه لر ، خصمه دائر معلومات آله حق بوکی شیلر الله ایده من . واکر شو رجعت حرکتی یبـانجی بریده یاپیلورسه ، اهالی شبهه سز مدافینه لازم کلان حوادثی پک اکسیک بریولده تدارک ایده ـ جکدر . کرچه مدافعین وقوعه کله جک مصـادمه لرده هاجمینک کوسـتره جکی مقاومت وشدتن استدلال ایدرک خصمک قوه مادیه ومعنویه سنی ابودن ایویه تقدیر ایده بیلور . طوغری ! لکن شونی ده اونوتمایلدیرکه ، محاربه جیلرک کیدیشی ، کورینشی اکثر با ، قوماندانلرک کندی مقصدلرینی میدان چیقارته بیلیمک ایچون اولنره ویرمش اولدقلری آز ، چوق بیوک اهمیتـلره کوره دکیشور .

بوندن اوتری اکر نظریاتجه ، خصمک قوای مادیه ومعنویه ـ سنه دائر بر فکر صحیح ایدیمک ایچون یاردم ایدن بعض نقطه لری کوسـترمک ، ممکن اولسه بیه شو نقطه لر واولنره استناداً یاییله حق تقدیرلر عملیات مکتبلرنده ، سفر اوجاقلرنده ظن

ایدلدیکی کی طوغری جیقمیه جقلر . بالعکس اولنلرک بر نیجه
یا کلشلی کوریله جکدر. اولنلرک ایچون تشخیص مرض مسئله سنی
احوال عمومیه کوره یوریتک ، خصمک وجودینی ونبضی
ایودن ایویه بر یوقلامق ایله تاسیس ایلملیدر.

سوزک قیصه سی: حرب اوزرینه بر چوق تجربه کورمش،
طبیعت انسانی تدقیق وموازنه ایتمکه ایجه مهارت کوسترمش
اولانلر بو خصوصده پک چوق سهولت کورورلر.

۳ — ترتیبات

هر جنس محاربه ایچون مدافعین کندی قوای عسکریه سنه
مخصوص بر ترتیبات انتخاب ایلیه جکدر. اگر مدافعین یوروش
حالنده ایکن دشمنک کندیسیله تماس حاصل ایتسنه برشی دیمز
وکندی قطعات عسکریه سنک بولندیغی یرده احواله کوره
حرکت ایدرک دشمنه مدافعه ایتک ایله قناعت کوستررسه
محاربه نك سوق واداره سنی الدن چیقارمش اولور ؛ دیمکدر .
بو کی چارپشمه لر ، اکثریا اولنلری فنا تدقیق ایدنلر ایچون
پک فائده سز وقاعده وضعنه پک غیر مساعد شیلردر.
اگر حرب کانک صوکنده جمدی بر مقاومت کوسترمک

ایستنبیلپورسه ، آله حق ترتیبانک اتخابنده اک باشلیجه نقطه
آتشک ممکن اولدینی قدر زیاده تأثیر کوسترمنی تأمین ایلمکدر .
زیرا دشمنک اوکنه اک اساسلی واک قوی بر مانع تشکیل
ایده جک ایشته بو آتشدور ، یوقسه اراضینک موجب اوله جنی
مشکلات دکل . .

حقا کر ، مدافعین ، طومش اولدینی برده مصادمه وقوعه کلسنی
آرزو ایدیورسه ، موضعک ایلروسنده کر چکدن پک بیوک بر
مانع بولنسی اونک ایچون فائده لی بر شی اوله مز . چسونکه
بومانعک وجودی ، احتمال دشمنی بعض مانورلر یامغه مجبور
ایدرکه ، مدافعین اونلرک تأثیرندن اوتری ، موضعک اهمیتنی
غائب ایدر واک صکره اونی بوشالمغه لزوم کورور .

مثلاً (اوستریچ) وقعه سنده ناپولیونک صاغ جناحی کبی
ظاهرده ضعیف کورینان بر نقطه ، بعضاً فائده لی اوله بیلور .
چونکه اونقطه خصمی ، تفریق ممکن بر استقامتده ایلری کلمکه
یاردم ایدر . طوغریسنی سویلیه لم : اکر جبهه نک بر قسمی طبعاً
قوتنی بولنورسه ، بو ، مدافعین ایچون بیوک بر فائده یی موجب
اولور . زیرا ایشک هیئت عمومیه سی اعتباریله ، مدافعین ، دائماً
ایکی دشمنک اک ضعیفی اولماق اوزره تلقی ایدلمکه مجبوردر .
وبونک ایچون اکر مدافعین هیچ اولمزسه ، میدان مصادمه نک
بالکز بر قسمنده خصمنه تفوق ایتش اولمقدن امین قالمق ایستیورسه

وېو چشيد سائر بعض شيلر بولمىزسه هيچ شېه يوق كه باغچه
 ديوارلرى ، تيمور چوققلردن اورلمش چيتلر بويدن بويه درين
 اولوقلر ايله چيزلمش ترلار ، خندقلر وسائر بونلر طوبراغك
 قازلمىسندن ايلرى كله ياريقلر واوجاقلر بولمىز جقدر . ايلرولره
 ويانلره طوغرى كلان مواصله يوللارينك ده چوق اولمى
 شرطدر . چونكه اموال قطعياً مجبور ايدرسه ، چاره سز ، بعضاً
 جبهه دكيشدرمك خصوصى ده كوزه آلديرمق ودوشونك لازم
 كلور . اونك ايچون ديديكمز يوللارك عددى چوق اولمليدر .

اكر دشمن اورايه ياقلاشه بيلمك ايچون يالكر بعض
 نقطه لرده كچيد ورن برمانع ومثلاً يالكر موجود كوپرلرندن
 كچلمك ممكن اولان برنهر آرقه سنده بر موضع طوتمق امكانى
 وارسه مدافعين شويله بر موضعه اولجه دها اونك اك چوق
 تاثيرى هانكى نقطه لر اوزرينه ييغمق لازم كله جكنى تامين ايدى .
 بيلمك فائده سنه مالك اولور . برده شو حالده هاجينك حركانى
 ايجه تمديد ايدلمش بولنور . واونك ايچون مدافعين ، خصمك
 اك چوق هانكى مانوره سندن چككنمك لازم كلديكى پك اعلا
 تقدير ايدى بيلور .

اولجه كورمش ايدك كه . جبهه هجوملى ، اصولاً پك آز
 موفقيت شرائطى حاويدرلر . اويله اولنجه مدافعين ، بالطبع اك
 چوق كندى يانلرني اورتمكه دقت ايدى جكدر . كرچه ، مدافعه

تعبیه ویده موضع لک یا نلرینی ایچون اراضی اوزرنده حقیقی برر نقطه استناد بولوق حتی مدافعه س-وق الجیشی موضع لرنده اولمدیفندن زیاده کوچدر. لکن هیچ اولمزسه، ینه جناح لردن بریسی، علی الخصر ص، اراضینک اصول تش-کلندن طولایی اک کوتلی اوله رق و بناء علیه اک آز عسکره محتاج بولنان جناحی استناد ایتدیرمه نك چاره سنه باقیله جقدر. قوای عسکریه نك اک بیوک قسمی، دیگر جناحده طولیانه جق وعدداً اونه کی به تفوق حاصل ایدن بوجناح طبیعی اوجهته ده کی یانی محافظه به پك اعلا مساعده ایده جقدر.

شو محافظه مسئله سنك نه درلو ترتیب ایدلمش اولمسی لازم كله جگنی ایسه مصادمه برینك تشکلات طبیعی سی کوس-ستر. هاجین کندی احاطه حرکتی یاغنه باشلا دقدن صکره، مدافعین ایچون خصمك شو احاطه حرکتی جبهه اوکنده ایکن دهها نهایته ایردیرمش اوله جق وجه ایله جبهه خطنی اوزاتمه مخصوص پك بسیط برواسطه در. بونك ایچون ده احاطه حرکتی یاییلان جناحک کیروس-سنده کوتلی احتیاط لره مالک اولمق لازم کلور. لکن ایجه اوزادلمش اولان بر جناح پك چابوق ضعیف دوشر. دشمن اونی صیقه س-دیرر. و (۱۸۷۰) سنه سی آغستوسك (۱۸) نجی کونی (رونقور) ده فرانسه جناحنک باشندن کچدیکی کی مدافعینی کیرویه پوسکور تور. و جناح لردن بریسنده شووجه

ایله بر هریمت وقوعی ، اردو اوزرینه بلکه بر احاطه حرکتی قدر مشوم تأثیر لر کوستر .

برمدافعه قولتی تشکیل ایتک صورت عمومیه ده جناح لر دن بریسی اوزانمقدن زیاده ایشه یرار . باخصه -وص اکر دشمن مذکور قولتی ایچه اوزاقدن کوره مز و تفریق ایده مزسه اونک فائده سی ایکی قات اولور . جناح لرك کیرولریله طیشاریلرنده قطعات عسکریه بولندیرلینی زمان یانلرك حمایه سی اک ایو بر صورتده تأمین ایدلش اولور . اصولاً اورالرده احتیاطك اك بیوك قسمنی قویق ممکندر . جبهه ده پك بیوك احتیاطلر قویغنه اکثراً لزوم یوقدر . یر اوزرنده کندیسنه بر استناد نقطه سی بوله جق اولان جناحه کلنجه اورایه آنجق پك جزئی قطعات کوندرمك لازمدر . ایلك اوکجه کیروده قاله جق اولان شو قطعات عسکریه بردن بره دشمنك احاطه حرکتیه قرشو یورییه . بيله جك واونی طور دیرمغه چالیشه جقلردر . دیدیکمز حرکتی هان یایق اوزره اولان هاجمین ایسه ، اکثراً مدافعینك شو احتیاطلری باش کوسترمه دن اول مقصدك حاصل اولدینی ظن ایده جکدر . لکن دشمنك کیده کی قطعانك ایلرویه آتدقلرینی کورنجه بوندن پك چوق متأثیر اوله جقدر . اکر احتیاط عمو -مینك دیکر بر منطقه ده بولمسنه لزوم کورلش اولدینی آکلا -

شیلورسه اوزمان اونك بر قسمی آیرله رق خصمك احاطه حرکته
قرشو الده حاضر طوتيله جقدر .

بودیدیکمز مفرزه . دشمن قولنی پوسکورتهمزسه بيله هیچ
اولمزسه ، اونی محاربته نك زمان قطعیسندنه نتیجه مصادمه
اشترک ایدهمیه جك وجه ايله طوردرمنه موفقیت حاصل ایدر .
(۱۸۷۱) سنه سی کانون ثانیك (۱۷) کونی جنرال (کلالر)
کندی اوفاجق مفرزه سيله احاطه حرکتی یایق اوزره اولان
فرانمز لوك (قره مر) و (یانهوت) فرقه لرینه قرشو دیدیکمز
نتیجه نی استحصال ایلشمیدی . برده جناح لرك کریسندنه قالد جق
اولان بواحتیا طر مدافعه نك صوك زمانلرنده دشمنه مقابل
هجوم یایق ایچون صورت عمومیه ده پك ایو بروضعیتده بولنش
اوله جقدر .

اگر ایکی جناحدن هیچ بریسی زمین اوزرنده طوته جق ،
استناد ایدهمیه جك بر نقطه بوله مزسه او وقت اك زیاده قورقیلی
اولان جناحی محافظه ایتک ایچون دها زیاده قوت استعمالی
لازم کلور . اصولاً ، جناح لردن هانکیسی اوراده بر مغلوبیت
وقوعه کلدیکی زمان اك تهلیکلی سوق الجیش نتایجی حصولنه
سبب اولور ، هانکیسی طرق اتصالیه ورجعیه مزه اك یقین
بولنور ، یاخود هانکیسی بزه کله جك قوای امدادیه طرفنده
قالورسه دشمنك اک زیاده کوزدیکه جکی یرشبه سز اوراسی اولور .

یالکز وقت قزانق هوسیه موضع طوتلدینی زمان ایسه
 بسبتون بشقه بر نقطه نظردن حرکت ایلمک لازم کلور چونکه
 بوجنسدن اولان مدافعه تعبیه وی حرکتیچون ذاتاً بشقه درلو یایمق
 لازم کله جکی یوقاریده سوبلمش ایدک. یناشلمسی ناقابل برجهه،
 هیچ شبهه یوقکه، اوجشید حرکات ایچون پک بیوک فائده لر حاصل
 ایدر. زیرا اکر طوغریدن طوغری یه هجوم ایدرک خصمک
 اوموضعی الده ایتمش اولمق امیددی محو ایدیلور دشمن اکر صکره
 بر چویرمه حرکتی یایمغه چالیشورسه ایشته قزانلمسی ایجاب
 ایدن زمان بو سایه ده پک اعلا قزانلمش دیمکدر.

بر مدافعه مواضعنده، جناحلری همه حال برر قوتلی
 نقطه یه استناد ایتدیره بیلیمک هر زمان ایجاب ایتمز. زیرا خصمک
 یایه جنی احاطه حرکتلری اونک ایچون ایجه بر زمان غائب
 ایتدیرمش اوله جقدرکه، بوخصوص مدافعین حقنده البت بیوک
 بر کاردر. آتالانلمسی کوچ نهرلر، بطاقلی ودرین وادیلر،
 کنارلری دیک و بوکسک تپه لرله چویرلمش دربندلر و بوغازلر
 نتیجه حاصل ایتمک مجبوریتنده اولان مدافعه میدان محاربه لریچون
 الوری شلی یرلر دکلدلر.

لیکن شویله یالکزجه بر وقت قزانق فکریله یایه جحق
 مدافعه محاربه لریچون اولردن کوزل یرلر بولنه مز. اکر دشمنی
 یالکز یورغون دوشورمک ایچون محاربه ایدیلورسه، اوزمانده

ایشلرینه بشقه درلو جریان ایدرلر. اووقت، شبهه سزا ایشلری بویلی بوینه اوزاتاق، دشمنه بو یولده بر مقاومت کوسه ترمک غیر کافیدر.

بالعکس، قطعات مصادمه لره کیریشمه جک وجه ایله جدی محاربه لر بایمق لازم کله جکدر. اکر زمین مساعد، مهم الویریشلی، قطعات عسکرینه نك سلاحی وقوة مغنویه سی او یغون ایسه بو جنس محاربه لر دن بیوک بیوک موفقیتلر چیقماق ده مأمولدر. اوزمان (پارچه، پارچه مدافعه) دنیلان مسلك قوللانیلور. واکثریا بو وجهه ایله محاربه ایدیلور. هجومک اک باشلی مزیتی شدت اولدینی کبی شو اصولک اک باشلی فضیلتی متانتدر.

قیالی، کسک واورمانلق بریر، بو درلو محاربه لر ایچون اک الویریشلیدر. چونکه دشمن اوراده کندیسنک عددجه تفوقدن هیچ استفاده ایدهمیه جک، بیوک قوتلر یابهمیه جق، حاصلی آتشک تاثیرى بلکه هیچه اینه جکدر.

اوندن بشقه بوکبی یرلر، مغلوب اولان طرفک بتون بتونه بوزغینلغنه دوشمسنه مانع اولور. ورجعت ایدن طرفک پک آز وقیصه بر یورویشدن صکره تکرر مدافعه یه کجه بیلیمسفی تأمین ایدر. (الب) دوقه لقلری، (بریتانیا)، (وانده) اراضیسی بوجنس یرلردندر. (وانده) یرلیلری ایله (شوان) اهالیسنک ایلك

جمهوریت اردو لرینه کوسنرمش اولدقلری حیرنه شایان مقاومتلر،
قسماً مملکتک طبیعتندن ایلری گلشدر.

ایشته کور بورزکه، بر مدافعه تعیهوی موضعنک، احواله
کوره انتخابی کرچک اهمیت شایان بر مسئله در. هرشیدن چوق
ترتیباتک وضعیت و طبیعتی یایله حق حرکات عکریه ایل، تعقیب
اولسان مقصوده جواب ویرمیدر. هر موضع زورله کوزل
اوله مز. چونکه او، طبعاً قوتلیدر. ینه بونک کبی هر ترتیبات
زورله کوزل اوله مز. چونکه اوزمینک تشکلاتنه کوره ماهرانه
بر صورتده تطبیق ایدیلور.



مدافعه تعیهوینک اشکال حصوصیهی

پوصو مدافعهی

بوراده هرشیدن اول، شیمدیک زمانده استعمالی اک چوق
نوصیه ایدیلان برجنس مدافعه دن بحث ایدلم. تعرض تعیهوی
محباتی اک صکره هر شیئه غلبه ایدن آتشلرک تأثیرینی، بو قوه
ناریه بی انکار ایده مزلر.

مدافعه تعیهوی دوستلری ده شبهه سز، بسدلی بر هدف
اوزرینه ایلری به کیتمه نک قوه مغنوبه ده حصوله کثوردیکی

سلطونی اصلاً انکار ایده منظره . اونک ایچون اک صکره شو
یکدیگرینه معارض اولان دوستلر، مدافعه تعیه ویدن استفاده
ایتمکله برابر تعرض تعیه ویدن واز کچلمه مک فکرینه
قرار ویردیلر، بوراده برلشیدیلر . کرچک ؛ اکر یک جدی
ضایعاته اوغرایه رق دشمنک کوزل بر موضع انکلیینه قدر
صوقلمسینه مساعده ایدیلور و آرتق تاب و توانی کسلدیکی کی
هان اونلر اوزرینه آتلمق شرطیله موضعدن طیشاری چیقیلور-
سه بو دیدیکمز یک اعلا ممکندر .

(بلوم) ده وقوعه کله رک اک صکره تعیه حدودینه کیرن
مدافعه تعرضیه آرزوق فرق ایله یوقاریده سویلدیکمز منظره مک
بر مثالی اوله بیلور .

لکن بر مدافعه موضعدن طیشاری چیقلدینی زمان، ایلاک
اوکجه اوراده وضع و تعیه ایدیلان عین قوتله چیقلمش
اوله من .

شویله بر حرکتک نه قدر کوچ بر شی اولدینی دوشو-
نیلورسه بونی تسلیم ایتمک مجبورز . بناء علیه، مدافعه دن هجومه
کچمک ایچون دشمنک کوره میه جکی وجه ایله بعض قوای عسکریه
کریده بولمیدیرمق وایشک اک بیوک قسمی بو هجوم حرکتی
کوره جکیچون قوای مذکوره الده موجود عسکرک اک بیوک
برقسمندن ترکیب ایتمش اولمیدر . دیدیکمز کی، آبروجه برقوة

عسکره یی کیرولرده کیزلمک شرطله یاییله حق حرکت بیسای
بر نوع بوصو ترتیبی دیمکدر . بوندن اوتری اوکی حرکتلرک
هپسینه بردن (بوصو مدافعه سی) نامی وبرمک بک ابو اولور .

اوسترلیچ میدان محاربه سی بو چشید بر مدافعه ایچون اک
کوزل بر منالدر . اوت، اوپله بر مثال که ، شمدی به قدر هیچ
بر مثال اونک کی مکمل ونیجه لی اوله مامشدر . لکن اونوئما
ملی یز: ناپولیون ده بو مثال کی نادر وبک اقرانسز بر قوماندان
ایدی . اکر بوصو مدافعه سی، اجراسی قولای بر شی اولسه
ایدی ، ایلروده بلکه هر زمان بو چشید مدافعه لرک قبول
ایدلیکی کوریلوردی .

لکن آکلاشیلورکه ، هاجین قوللربی کری پوسکورئمکه
مأمور وقوتلری مذکور قوتلردن ایجه آشانی اولان قطعات
عسکره بک آز وقت ایچنده صیقندی به دوشمش اوله جقلردر .
ذاتاً بوجنس برمانوره نک هیئت عمومیه سنجه موفقیت امیدلری
بک آز بر شیدن عسارت اولدیفیچون اکر دشمن دیدیکمز
قوتلری بک جابوق مغلوب ایتش بولنورسه ، او وقت آنلری
حایه ایتکه وموضعدن چیقماق اوزره اولان قطعاتک بر قسمی
اصلی کندی وظیفه لرندن آییره رق اوته جهته کوندرمکه لزوم
کورپله جکدر . او حالده شبهه سز، بری طرفده قاله حق خروج
قطعاتی ده بک ضعیف بر درجه به دوشمش اوله جقلردر .

احتياط اولمق اوزره طوپلو طوران قونى جناحلك كرىسنه
 براقق اكابودر. چونكه بويله ياپيلورسه قوه مذكوره نك ايلريسى
 آچيق اولدينيچون ايستديكى كې حركت ايدر. لكن بونك ده
 بر محذوري وار: دشمن اونك اوراده اولدينى بك قولاي
 كشف ايدر و آنى ده محاربه يه كله بيلوركه، بوندن اوترى موضعدن
 چيقمق خصوصى بر مدافعه تشكيلى ايچون جبهه نك تبديل
 ايدلمش اولمى حاله كيرمش بولنور.

اكر صدمه قطعيه اجراسنه مخصوص قواى عسكريه محاربه
 يرينه آنجق زمان قطعده چيقمش اولورسه شوديديكمز مدافعه
 اصولى دها قولاي تطبيق ايديله بيلور. (واترلو) ده (بلوهر)
 اردوسى، (كونيكراج) ده ايكنجى روسيا اردوسى طبقى بويله
 ياشمى.

ايلريده كى سفرلرده اردولر، كوچك كوچك مسافه لردن
 يكديكرىني تعقيب ايتمش اوله جقلى زمان بوصو مدافعه سى
 اصوللرى ينه بو شكلده جريان ايدجكدر. اكر اولجه دها
 برلشمش اولان دشمن، اردولردن بريسى اوزرينه دها بيوك
 قوتلر ايله آتلمش اولورسه بووجه ايله هجومه اوغرايان اردونك
 وظيفه سى ماهرانه بر مقاومت ايله اونى طورديرمتنه، ديكر اردولر
 محاربه خطنه كيروب، مقابل هجوم يانجه يه قدر ضعيف دوشورمكه
 چالشمقدن عبارت اوله جقدر. اكر الده كى قوت بك ضعيف

بر شی ایسه ، اراضی او یغون والو بریشلی اولوق شرطیله
ینه آز چوق فرقلی بر شکلده بوسو مدافعه اصولنه
مراجعت اولنه بیلور . اکر طوتیلان موضعک جبهه سی پک
قوی ، لکن، الده کی عسکره نسبتاً پک واسع بولنورسه دشمنه
کندی هجوم استقامتی وبتون قوای عسکره سنی میدان جیهه اار-
ده جق موقت برمدافعه ایچون اوندن پک اعلا استفاده ایتک
ممکندر . بو جبهه خطنک کیروسنده و دشمنک کوره میه جکی
صورته تعیه ایدیلان باشلیجه قوتلر ابله ده مذکور هجومک
مدافعن ایچون کفائده لی کورینان بر نقطه سی اوزرینه آنلش
اولنه جقدر .

تعیه یان موضعلری [*]

تعیه یان موضعلرینه، سوق الجیش یان موضعلری حقدنه

[*] ماره شال مواتکه (تعیه مسئله لری) نام اثرنده مدافعه یان
موضعلرنی اکوزل بر تعریف اولوق اوزره آشاغیده کی وجه ایل
تعریف ایدیور : « بریان موضعی دشمن حرکاتنک تعیب ایلدیکی استقا-
متنک یاننده واکا موازی اوله رق انتخاب ایدیلان موضدر . اوله بر
موضع که دشمن بتون طرق اتصالیه سندن واز لجه دن اونک اوکندن
کجه منزه اوله بر موضع که دشمنک بر مظفریت و تعیب حالنده اون یمنی دشمنی
کندی هدفندن طیشاری آتمه مساعددر . هیچ شبهه بوق که مدافعن بیله

سویلدیکمز عین قاعده لر تطبیق اولنه بیلورلر . یالکز بوراده
مذکور قاعده لرک حدودی اوته کیلرندن قیسه وطار اولمق
طبیعیدر . شبهه سز بر تعیه یان موضعی دهـا چابوق کوریلور
ودها چابوق کشف ایدیله بیلور . اونک ایچون اولرک ده خصم
طرفه متوجه اولان کنارلرندن چویرلمسی ممکندر .

هرشیدن اوله بریان موضعک دشمنه متوجه اولان اوچی
قوی بریره استناد ایتش اولمق لازم کلور . اگر دشمنی بوجه
ایله قوریلان طوزاغه دوشورمک ایستیلورسه اونی طوغریدن
طوغرییه هدفه کوتورن یولی ده بسبتون عسکردن خالی
براقماق ایجاب ایدر . بالعکس بو استقامت اوزرنده ده بر قوه
عسکریه برمدار مفرزه سی بولندرمق لازم کلورکه بوراده کی
مفرزه کیرویه چکلدکجه بالطبع دشمن عسکری ده اونی تعقیب
ایلمش اولسون .

اوندن بشقه بریان موضعی بر طوپ منزلدن اوزاق بولماـ

شویله بر موضع آلدینی زمان کندی خط رجعتندن واز کچمکه مجبور
در . اونک ایچون علی الاصول بریان موضعی طوتمق، کندی اراضیمز
ده حرکت ایتدیکمز زمان ممکن اولور . دشمن مملکتنده بویله بر موضعه
بر اشملک پک زوردر . اوندن بشقه بریان موضعک دیگر بر محدودری
دها وار : بزم بر جناحز دشمنه متوجه بولنور . اونک ایچون بو جناح
اراضیده قوتلی برقطه یه استناد ایتلیدر . بویله یابیزسه دشمن قولایچه
ایلرودن اونک آرقه سنی آله بیلور . »

ملیدر . چونکه اویله اولورسه، دشمن تبدیل استقامت ایتک، یایلمق و محاربه کیریشمک خصوصاً لرندە پک سربست بر اقلمش اولور . بریان موضعی، مقابل هجومه کچمک ایچـون لازم کلان بتون شرطری ده برر، برر جامع اولمیدر . حقیقت بوشر طرل وارسه، اووقت یان موضعنه اصلاً اهمیت ویرمکسزین کندی استقامتنی تعقیباً یولنه دوام ایدن دشمن اردوسنک اوزرینه ویا آرقه سنه آتلمق ممکن اولور. برده، اصل جاده یی، اصل رجعت خطنی بسبتون ترک ایدرکدن اونک خارجنده وپک اوزاغنده بریان موضعی طوتمق ایو برشی دکدر . بالعکس بریان موضعنک دائماً خط رجعتی امین اولمیدر . ایشته پک اعلا کوریلپورکه، بریان موضعی کوزل بر موضع اولمق ایچون بر چوق شرطری حاوی بولمق لازم کلور. تعیه یان موضعلری باخصوص دشمن اونلرک کندی اوکنده کیرویه چکیلان قطعات عسکریه طرفندن می یوقسه، بالعکس کندی علیه یوریان قوللرک تازه پیشدار مفرزه لری طرفندن می طوتمش اولدقلرینه دائر شبه حاصل ایدرسه اوزمان اک چوق فائده لی و تأثیرلی اولورلر .

اگر بریان موضعنک کیروسنده مدافعه اردوسندن بعضی قطعات عسکریه نک چیقوب کلکی محتمل اولان بعض کچیدلر ویا خود قوای امدادیه نک ایندیربله جکی بر شمندوفر استاسیونی وارایسه واوندن بشقه اگر شویان موضعی ایله مذکور استاء

سیون و کچید نقطه لری آره سنده کی مسافه اورتولی اولورسه او زمان هاجینک دیدیکمز تردد لری آرتدجه آرتمش اولور . اکر بتون بوشر طرلر، بریان موضعنده برلشمش اولورسه ، مدافمین اوراده پک آز قوتلر بولندیرمش اولسه بیله ینه اوندن پک چوق فائده لر کورور .

بونک اک کوزل مثالی، بزه فلد ماره شال مولتکه طرفندن لکن حربده دکل، بالعکس برآمییه مسئله سنده کوسترلشدر : ضعیف بر مفرزه (مچ) ک غریبنده (غراولوط) ده برلشمش بولتیور . مقصدی ، پیشدار مفرزه لری (ویون ویل) و اصل اوله یق موقفی محاصره ایتک فکریله ایلرولیان دشمن اردوسی هیج اولمزه، برکون یعنی (مچ) محافظ مفرزه سی قوه سفریه سی اکل ایدنجه یه قدر توقیف ایتکدر . خصمک طوغریدن طوغری یه یولنی سد ایدن دیگر بر موضعه یرلشدیکنه کوره بووظیفه یی باشه چیقارمق اصلا ممکن دکدر . زیرا، دشمن شبهه سز عددجه پک زیاده قوی اوله جفندن اونی توقیف ایتک اوله بر مفرزه ایچون طبیعی محال اولوردی . ایشته بوندن اوتری ، مذکور مفرزه ، جنوبده (ویون ویل) دن (مچ) و کیدن یول جوارنده (اون یون) اورمانی کنارنده موضع آلفه مجبوردر . اوراده شبهه سز دشمن اونک قوتی لابق وجه ایله حساب ایده من، آکلایه من . اوندن بشقه اورای طوتلیدیغه

کوره مفرزه نك کيروسنده اوله ، کشف بر اورمان بولنور .
 ثانياً ، بونك بر آزار اوته سنده (موزمل) اوزرنده ايکي کوپري يي
 ويوك بر شمندوفر استاسيوني حاوی اولان کوچك (آرس)
 قصبه سی وارد ر . اونك ايچون نه زمان اولسه ، بو موقفدن
 مفرزه يه لازم کلدیکی قدر امداد کوندرمك ممکندر .

هاجين اوکا راست کلنجه عجيا موقفك محافظ عسکرندن
 کوندرلش اوفاق بر مفرزه يه می يوقسه ، بالعکس کنديسيله بو-
 ايشمق ايچون ايلروليان بيوك بر قولك پيشدار عسکرينه می
 راست کلشدر . شهبه سزه ، بونی ايودن ايويه تفريق ايتمش اوله میه-
 جقدر . چاره يوق ! بو مفرزه نك طبيعتی ، وظیفه سی آ کلامق
 ايچون هاجين اوراده بر محاربه ويره جك . يوقسه اوغراديغي
 شهبه يي حل ايتمه دن يورويش نه دوام ايدرسه ده ا صکره پك
 قاريشيق بر معمايه ، پك درين بر کردابه دوشمك احتمالی وار .
 حتی يالکز کنديسیچون ايجه زمان غائب ايتديره جك اولان
 اورمان کنارينك ضبطی بيله هاچيني بوشبه دن ، بوبلاي ناکها-
 نیدن قورتارمش اوليه جقدر . زیرا هيچ کيمسه او صيق
 آغاچلرک کيروسنده نه وار ، نه يوق ممکن دکل بيله مز . بوسری
 ميدانه قومق ، شو کوچك معمايی حل ايتمک ايچون (آرس)
 قصبه سنه قواي امداديه گلده دن اوله ، اورمانی بسه بتون ضبط
 ايلمک ، قصبه يه قدر يوريمک لازمدر . لکن مدافعين (آرس)

صبه سی اوزرینه کیویه سورلمش اولسه لر بیله بواشلر اولنجه یه
در لازم کلان زمان قزانلمش اولوردی .

اگر بریان موضعی طوته رق مدافعین دشمن هجومی کیو
پوسکورتکه موفق اولورسه ، بوندن مدافعین ایچون دیگر بر
فائده دها حصوله کلورکه ، اوده هاجمین کیویه چکلمک خصو-
صنده شهسز بک الویریشلی اولمیان بر طاقم بولاری تعقیبه
مجبوریت کورور . ایشته مدافعین ایچون حاصل اوله جغنی
سویلدیکمز ایکنجی فائده بودر . چونکه هاجمین آرتق تبدیل
استقامت ایتهدن کندی استقامت طبعیه سنه کچمکه بردرلو موفق
اوله مز . اگر مدافعین اشغال ایلدیکی یان موضعندن جیقه رق
هاجمین اوزرینه هجوم ایدرسه ، اوزمان هیچ شهه یوقکه ، اونی
خط رجعتندن بسبتون طیشاری آتمش اوله جقدر .

بر کچید قرشوسنده ومثلاً بیوک برنهر اوزرنده واقع بر
کوپری اوکنده بولنه رق دشمن اورادن چیقار ، چیقمز اوکا
قطعی تأثیرلر کوسترمکه مساعدا اولان یان موضعلر ، اک ایو
موضعلردن صاییلورلر . بویله بر یان موضعی قرشوسنده مغلوباً
کری چکلمکه مجبوریت کورن هاجمین تشییع ایچون د الله سلامت
ویرسون ! دیمکدن بشقه دیلمزدن نه کلورکه ، سویلیه لم ! زیرا بویله
طار بر کچید اوزرنده خصمک مظفر آتشلرینه قرشو رسمی کچید
یایمق ، کری چکلمک عسکرلک عالمنک بک یمان حرکتلرندن بریسیدر .

اون اوچنجی فصل

شرائط خصوصیه داخلنده یا پیلان حرکات

دارالحربك شكل وطبیعی ایجابندن اوله رق هر درلو حرکات
عسکریه ده آرزوق تعدیلات ظهوره کلور. اولاری دارالحربك
تشکلات عمومیه سنه حدندن آش-وری بر اهمیت بیله ویریلور.
دی. بوندن اوتری اوکا کوره حرب ایتمك ایچ-ون بعض
خصوصی طرز لر، قاعده لر واردی. مثلا طاغلق یرلرده یا بیله.
جق حرب لر بستیون بشقه درلو تلق ای دیلور، ومطلق کن دیلرینه
مخصوص قاعده لر واسا ملر بولنوردی. ینه بونك کبی خطوط
نهریه وسائر نك هجوم ومدافعه لری ایچون ده آروجه بر نظریاتی
وار ایدی.

لکن شم دیلك ایش-لر بو مرکز ده جریان ایده من. هیچ
اولمز سه، حربك سوق و اداره سنه مخصوص قواعدك بر صورت
مطلقه ده تحدیدی لازم دکلدر. حتی کر چکدن بك خصوصی
دارالحربلرده بیله حربك سوق و اداره سی عمومی قانونلره
کوره تنظیم ای دلشدر. یالکز حرکت اولنان اراضیده اونلرک
دستور لرینی تطبیق ایتمك وشو خصوصه ده یا کلامق ایجاب ایدر.
حرکته الویریش-لی اولیان یرلر، طاغ سلسله لری، صو

ایده مزلر. تهدید اولنان نقطه اوزرینه مقابل بر هجوم یایمق آنجق
 کریدن کوندریله جک قطعات عسکریه ایله ممکن اولورکه، شبهه سز
 هاجین طاغ سلسله سنه کیرمک ایچون هر نه کبی مشکلاته اوغرا-
 مش ایسه اولرده جبهه اوزرینه ایلرولرکن عین مشکلاته
 راست کله جکلر در .

بو بللی اولنجه ، مدافعین قطعات عسکریه سی طرفدن
 طوتلمش بر طاغ سلسله سنه راست کلدیکی زمان هاجین!، بو
 سلسله یی جبهه دن اشغال ایدرک آنک یا بر ویا ایکی جناحنی
 بردن چویرمه نك چاره سنی آرایه جقه-در. اگر مدافعین شو
 تهلکینی منع ایتک ایچون کیتدکجه، ده ا زیاده بوغازلر طوته رق
 س-سلسله اوزرنده عرضاً یا یلتمه چالیشور شه، بوندن، بشقه بر
 مخدور چی-قارکه، اوده مدافعه خطنك هاجین طرفدن ده ا
 قولایجه یارلمش اولمق احتمالی در . اوت، هاجین خط مذکوری
 یارمق ایچون مدافعه پوسته لرندن بریسی ضبط ایده جک واوته-
 کیلری اوزرینه ده ا آز شدتله هجوم ایدرک اولری یرلرنده
 طوتتمه چالیشه جقه در. اک ص-کره ایش بر حاله کله جکلرکه،
 مدافعین، جبهه خطنك بمض نقطه لری ضبط ایدلدیکنی کوردیکی
 صکی پوسته لرك هبسی بر برینی چکنرجه سنه رجعت ایتدکه
 باشلايه جکلر در .

مدافعین ایشلرک ذاتاً بو یولده جریان ایده جکنه واقف

اوله جقه در. اونك ايچون بعض احوال كنديسني بر مدافعه قطعيه به مجبور ايتدكجه، طاع سلسله لرني و اونلرك بوغازلريني يالكز هاجمينك وضعيت وقوتني آكلامق فكريله يعني ضعيف بر صورتده اشغال ايدم جكدر. بوندن طولاني قوتلرينك قسم كليسنه دشمن، كچيدلردن باش كوستره چكي صرمده همان اوزرينه آتلمق ايچون طاعك كيرو سنده و كيزلي بر يرده بولنديره جقدر. بعضاً شو خصوص، عادي بر پوصو مدافعه سي طرزنده بيله اجرا ايدلمش اوله جقدر.

آراتق بويله اولنجه شبهه يوقه، اوكي يرلرده حرك سوق و اداره سنه دائر يكي، يكي قاعده لر قويمغه حاجت بوقدر. بالعكس ذاتاً موجود اولان قاعده لري خصوصي بروضعته كوره تطبيق ايتك، دهالستيق بر طرزده يوريتك لازمدر. قاعده نك فضله سي فضله در. بزه اوكي شيلرك اصلا لزومي يوق.

بر اوجندن اونه كينه قدر بر ترصدلاينقطع ايچنده بولنديرلمسي كوچ اولان بيوك نهرلرك هجوم و مدافعه سي ده ينه طبق سلسله لره دائر سويلديكمز كيدير. مدافعين شو خطالر اوزرنده كذلك يالكز دشمنك وضعيت وقوتني ميدانه چيقارته بيله جك اولان بر قسمك مدافعه سني، بويدن بويه مدافعه ايتك خصوصنه ترجيح ايدر. و بونك ايچون هاجمين اردوسي نهر ي كچوبده هنوز يايلمه ترتيباتي الكال ايتمدهن و كيرو طرفده بيوك بر مانع موجود

ایکن اونک اوزرینه آتلمق ومصادمه نی قبول ایتدیرمک فکریله
مدافعین، کندی قسم کلیسی ساحلک ایجه کیرو سنده بولندیرر.
صنی مدافعه ایشلرینه کلنجه اولرده اساساً قواعد
حربییه نی دیکشدرمز لر. یالکز اجرا آت نقطه نظرندن بعض
خصوصی ترتیباتک وجودینه لزوم کوستر لر. صنی مدافعه
ایشلرینی اوج صنفه آیره بیلورز: مستحکم موضعلر، مستحکم
اردوگاهلر و قلعه لر. مستحکم موضعلردن مقصد، مدافعین ایچون
یانلری ده مستور اولمق شرطیله بک قوی برجیه حاضر لامقدردر.
بویله بر موضع، بویله برجیه عددجه فائق اولان بر اردویه قرشو
ضیف بر اردونک قطعی بر صورتده مقاومت کوسترمنه
الویریشلی و بک او یغون اولور. یاخود شوکی موضعلر، طوتیلان
جبهه نک یالکز بر قسمی تقویه ایدرک جزئی بر قوتک اون نقطه
وضع ایدلمسنی و دیکر لرینک الده حاضر بولنسنی تأمینه خدمت
ایدر لر.

بولردن برنجیلری زمین اوزرنده قوتلی بر استناد نقطه سی
بولغه احتیاج کوستر لر؛ وظیفه لری اک چوق سوق الجیشیدر.
(طورهس ودراس) خطی، کذلک شمال دکرندن بالطق دکرینه
قدر سورن و شمالی (شیله زویق) ایله (ژونلاند) ی اورتمکه مخصوص
اولان (دانه ورق) موضعی بوسو یلدی کمزک اک کوزل مثالرندردر.
اوندن بشقه چتالجه خطیله فرانمز لک آلمانلره قرشو

تحکم ایدیلان و بر بی طرف حکومتدن دیگر بی طرف بر حکومت
اراضیسنه قدر اوزایان حدود سلسله سی کذلک مدافعه نك اوکی
صنی ایشلریچون اك یارلاق مثالاردندر .

مواضع مستحکمه دن ایکنجی صنفه داخل اولانلرک وظیفه-
سی ایسه ، اك چوق تعبیه یه عائددر . بودرلو موضعلرک جناحلری
آنجق پك نادراً اراضی اوزرنده محکم نقطه لره استناد ایتش
اولورلر . و بوراده خط مستحکم دنی-لان شی جبهه نك یالکز
ضعیف بر قوت ایله طوتامق ایستیلان قسمندن عبارتدر . یوقسه
جبهه خطی بویدن بویه مستحکم دکلدر ، واوله مز . بوبله یرلر
طوتیلورکن دشمن طرفندن چویرلش اولق احتماللری کندی
کندیلرینی کوستره جکلردر . وشونك ایچون ایلك اوکجه موضعك
یاننده اصل قوتلرک چارپشمسنه بر نتیجه قطعیه استحصالنه الویریشلی
بر مصادمه یری انتخاب ایدیلور .

مستحکم اردوگاهلره کلنجه ، اولنر موضعك حتی کیرولرینی
بیله اورترلر . هر یانی قبالی و مدافعه لی اولان بوجشید یرلر ،
عادتا بررقلمه نظامی آکدیررلر . لکن بونلر بر آزاوول سوبلیدیکم
مواضع مستحکمه یه بکزرلر . چونکه اهمیتلرینی ضایع ایتمهك
ایچون اردولره ، بیوک بیوک یغینلره احتیاج کوسترلر . اوت
مستحکم اردوگاهلر ، بی-وک اردولردن محروم قالنجه درحال
کندی قیمتلی غائب اولور ، بش پاره ایتزلر . (۱۸۷۱) ده

(مانس) جوارنده کی (قونلی) مستحکم اردوگاهی کی .

مستحکم اردوگاهلر ، براردونك استناد ویا النجا نقطه سی خدمتی کورمك ایچون تاسیس ایدیلورلر . شوکی یرلره استناد ویا النجا ایدن اردو ایسه ، شه سز ایجه بر زمان کندی خط رجعتیله خط اتصالدن واز چکمك مجبوریتنده در . لیکن براردو ، یالاکز آچیق صحرا ده خصمه ، مقاومت ایدمه جهك قوته ایندیکی حس ایلدیکی زمان شودیدیکمز مستحکم اردوگاهلره چکیلور . ینه بوندن آکلاشیلورکه ، اویله براردو ، استناد ویا النجا نقطه سی اولان بر مستحکم اردوگاهی دشمن قرشوسنده براقق یعنی محاصره ایدلمش اولدینی زمان کندی کندیسنه اوراسنی ترك ایدوب جیقمق خصوصه ندهده لازم کلان اقتدار وقوتی حائز اولمه جهقدر .

بونك ایچون ایلرولمکده اولان دیگر براردونك اورایه امداد ایدمه جکنه قطعاً امنیت کوسترلدیجه بر مستحکم اردوگاهه چکلمك اصلاً جائز دکدر . بر مستحکم اردوگاه ، یوقاریده سولیدیکمز کی ، بر نقطه استناد برینهده کچه بیلور ، آتی اووجه ایله قوللانق ده ممکندر . مثلاً بر اردونك جناحلرندن بریسی مانوره یابه جنی ائنده اوتنه کی جناحنی استناد ایتدیرمك ویا خود اردونك قسم کلیسی براقچ کون اوزاقلاشمش اولدینی زمان بر مهم نقطه دن ومثلاً بیوک برنهر کچیدندن خارجه آتلمامق ایچون

مستحکم اردو کاہلری برر نقطۂ استناد کی قولاً لائق لازم کلور۔
 لکن شو حالہ مستحکم اردو کاہ موقی ویا معاون بر موقع
 مستحکم طبیعتندہ بولنورکہ ، اونک عملیات استحقامیہ سی شہہ -
 سز، حقیقی بر موقع مستحکم کیلری قدر متین و مکمل اولہ من۔
 (۱۸۱۳) و (۱۸۶۶) سفر لرنده (درسد) موقی شو دیدیکمز
 وظیفہ بی حقیقہ ایفا ایلمشدر۔

بر موقع مستحکم ، بر مستحکم اردو کاہدن زیادہ مستقل
 و سربستدر ؛ اوندن زیادہ مکمل و صا غلام یا پلمشدر ۔ حاجین
 اولہ بر موضی ، یالکز صحرا محاربہ لربنہ مخصوص و سائط ایلہ
 ضبط ایلیہ من۔ چونکہ اوراسی کندی محافظہ مفرزہ سنہ کړک
 محاربہ و کړک اعاشہ نقطۂ نظرندن ہر نہ لازم ایسہ ہپسنی
 جامعدر۔ اونک ایچون براردو قرشوسندہ بیلہ کنندیسنی و اہمیتنی
 یک اعلا کوسترہ بیلور ۔

بوندن آکلا شیلیورکہ ، مواقع مستحکمہ آنجق دارالحربک
 اوزاق برلرنده الدن چیقارہ ق ایستمدیکمز منطقہ لری، خصوصی
 بر اردو کوندر مکمزین ، مدافعہ ایدہ جک صورتدہ تأسیس
 ایدلکلری زمان کرچکدن کوزل تأسیس ایدلش صاییلورلر ۔

اگر بمض ولایتلر ، مرکز مملکتدن ایچہ اوزاق بولنور
 واوندن بشقہ آرہ یردہ مکمل طرق اتہالیہ موجود اولمزسہ
 ویا خود اکر اونلرک وضعیتلری ایجابندن اولہرق شویلہ بر منطقۂ

اراضیه بیه بر اردونك وضع و تخشیدی ممکن دكلسه ،
 اوزمان چاره سز، كوچك بر محافظه مفرزه سیله مدافعه ایدیه جك
 و محاصره سی ایچه اوزون سوره جك صورتده الكهم شهرلردن
 بریسی محكم ایتك لازم كلور .

حق شویله یا بدینسه کوره ، دیدیکمز موقع مستحکمی
 احاطه ایدن آچیق اراضی دشمن استیلاسنه معروض قالسه بیله
 ینه مصالحه عقد ایدلیدی کبی اونك حقوق تملکنی اعاده ایلیمك
 و بناء علیه اوزاق بر ولایتی خصم الندن قورتارمق بك اعلا
 ممکن اولور. سلطنت عثمانیه نك باشلیجه ایکی ولایتی : بریسی
 یونان حدودینه قرشو یانیه ولایتی ، اوته کی قره طاغ بکلکنه
 قرشو آرناتودلق حوضه سی بو شمدی سوبلیدی کمز ته دیدلره
 معروضدر .

اگر اجنبی فیلولری دکره حاکم بولنورلرسه ، بو ولایتلره
 بالکتر طرق بریه واسطه سیله و آنجق بیک مشکلات ایله عسکر
 کوندرمك ممکن اوله جقدردر . و مذکور قطعات بر کره اورایه
 کیردکن صکره ، آرتق بر کره دها ، چیقیمی محال حکمنه
 بکجه جکدر . حاصلی شو ایکی ولایت سلطنت سینه نك مدافعه
 عمومیه سنه بك آز یاردم ایتمش اوله بیله جکدر . اونك ایچون
 باب عالی دیدیکمز ولایتلرک مرکز اداره لری اولان (اشقودره)
 و (یانیه) قصبه لرینی یرلی عسکرلر ایله مدافعه ایدیه جك وجه

ایله تحکیم ایتمکده یردن کوکه قدر حقیدرلر . آلمانیا حکومتی سورده کلی و معضدانه بر محاربه یابه بیلیمک ایچون کندی قوای عسکریه سنی مختلف دارالحرکاتلر اوزرنده قولانغنه مجبوریت کوردیکی زمان شرقی پروسیاده کائن (کونیکسبرگ) موقعی، بر مغلویت حالنده طبق بوکا بکزر بر وظیفه کوره بیله جکدر . لکن بوجنس مواقع مستحکمه تأسیس ایلمک ایستندیکی زمان احکام سیاسیه نک اکثریا مطالعات عسکریه بی تضیق آلتنده بولندیره جنی قولایجه آکلایشیلور . ذاتاً عقد مصالح ایدلدیکی آنده بز، اساساً کندی مطلوباتمزی امنیتده بولندیره حق تأمینات آرایورز . آنک ایچون بوراده حق بسبتون ثابت بر مقاومت یعنی برمدافعه مطلقه ایشلرک حسن صورتله جریاننه پک اعلا کفایت ایدر . حال بوکه شوپله بر مقاومت بورادن بشقه هیچ بر یرده مقصدک حصولنه کفایت ایده مز .

احتمالکه؛ دیدیکمز یرلری بسبتون بزم تصرفزده براقغه یاردم ایده جک وجه ایله مملکتک اوته سنه، بریسنه بعض قلمه لر یایمق ایجه فائده لی اوله جقدر . لکن بویله یاپیلنجه مذکور قلمه لر ییننده بر ارتباط صحیح وجوده کتوره بیلیمک ایچون قوتی جزئی بر سیار مدافعه قولی تشکیل ایتمک لازم کلور . حتی بو قول ، اگر قوتی صحیحاً پک چوق بر شی دکلسه مستقل بر اردونک وظیفه سنی کوره جک صورتده بیله حرکت ایدر . دیگر حاللرک

هېښنده، اکر احتیاج کوریلورسه، یالکز بر مستحکم اردوگاه ویا
 بر موضع مستحکم ایله اکتفا ایدیلور . برده سیار اردو حاضر
 بولندی ویاخود محافظه سی لازم کلان نقطه لری طولایسیله
 محافظه ایلدیکی وقت مذکور نقطه لری آرتق بسبتون مستقل
 برافهده لزوم کورلوز . لکن اردو ایله بومهم نقطه لک برندن
 ویا دیکرندن ایچه بر زمان آیری دوشمک مجبوریتی واقع اولنجه
 او وقت ینه حرکات عسکریه بر نقطه استناد اولقی ایچون
 چاره سز بعض مستحکم موقعلر تشکیلی لازم کله جکدر . (۱۸۱۳) ده
 نابولون آشاغی (الب) خطنی غائب ایتمه مک ایچون (هامبورغ) ی
 شووجه ایله حقیقی بر موقع مستحکم حالنه قویمقی ایستیوردی .
 (الب) خطنک وسطی حوضه سنده، اردوسنک بولندی ویا یرده ،
 بر آز اول سویل دیکمز کی مشارالیه (درسد) ی مستحکم اردو-
 گاه یایمق ایله اکتفا ایلدی .

مدافعین شونی بیلملیدرکه، مملکتک ایچروسندن کلان بتون
 قوتلرینی حدود اوزرنده کائن مهم بر نقطه اوزرینه طولایوبده
 آندن تام استفاده ایتمک ایستدیکی وقت یعنی ایلک زمانلرده
 ده، آنی ترک ایتمه مجبوریت کوره جکدر . (۱۸۷۷) حربنک
 ایلک زمانلرنده ، آسیا دارالحرکاتنده کائن (قرص) بلده سی
 حقنده بویه اولمشدی .

سیار اردو ایله مواقع مستحکم آره سنده اشتراک حرکت

فکری، دائماً مذکور قصه‌ی مفرز است حکام لرله قوشاده رق اک
صکره بر مستحکم اردوگاه شکنه قویغه سبب اولمشدی [*].
سیار اردولرک حرکانه اشتراک ایدن مواقع مستحکمه
آئیده کی وظیفه‌ی کورمه مجبور درلر :

قوتلی بردشمن اوکنیده رجعت ایدن هر هانکی براردو،
مواقع مستحکمه دن بریسی، طبقی بر کوبری آياغنگ یوقاریدن
چوزیلوب کلان بوز پارچه لرینک ایلک صدمه سنی قبوله معروض
دیرسک نقطه سی کی، هاجین ایله کنددی آره سنده براقه بیله.
جکدر . دشمن بو موقعی یا محاصره ایده جک و یا خود آتی

[*] بواسطه حکام لر عین زمانده هاجینک بیوک منزلی طوبلرینه قرشو
موقعک کندیسینده سترایتمک تخصیص اولندیلر . بونلارایسه لابنقطع
تزايد ایتدکار یچون قلعه لرک موقعدن ایجه اوزاق مسافه لرده یانلری
لازم کلوددی . بو حال شهسز آنلری منفرد بر اقدقن بشقه کیتدکه
بیوک بیوک تهلکه لر معروض بولندیلروردی .

بناء علیه صوک زمانلرده محیط خارجی بی بر آردها تقویه ایتدکه
باشلانلدی . بووجه ایله کیده، کیده ایلک اوکجه هیچ کیمسه نک ایستمدیکی
برش یعنی بربری ایچنه موضوع ایکی قلعه و جرده کلش ایدی . آکلا
شیلیورکه ، محافظ مفرزه لریده عین یولی تعقیب ایتدیلر یعنی اولنرده
کیده کیده بیودیلر : اک صکره اودرجه تزايد ایلدیلرکه، اولنرک هیئت
عمومیه سی، اگر سیار براردو طرزنده قوللانلش اولسه ایدی، استحکام
فلان یاقه سزین یالکیز آنک ایله مقصدک حصولی بک اعلا ممکن اوله.
جقدی . آرتق بووجه ایله حرکت ایتدک، بر چوق عسکرلری بریره
قیامه نک زمانی چوقدن بری کچمشدر . آتی هیچ کیمسه انکار ایده سزه،

ترصد ایچون اوراده بیوک بر قوه عسکریه ترك ایلیه جکدر، واک
 صکره، مدافعین اوکا قرشو طور مق ایچون اشغال ایتمش اوله -
 جفی یکی موضع لر اوکنه آز قوتلرایله کلمکه مجبوریت کوره جکدر.
 شبهه سزا طالع بو یکی موضع لرده مدافعین جهته یوز
 کوستره جکدر. (۱۸۷۷) سنه سی حزیران آینک (۲۱) نجی کونی
 روسلر (قرص) محاصره سیله ایجه ضعیف دوشد کدن صکره
 ایلک دفعه هجومه چکدکری زمان احمد مختار پاشا حضرتلری،
 (زیون) ده اونلری بو وجه ایله کری پوسه کورتیمکه، موافق
 اولمشدی . .

حاصلی دشمن، بر موقع مستحکمه بولنان عسکرک قوتی
 تمامیه تقدیر ایده بیله جکی ایچون اوکا هیچ ده اهمیت ویر مکسزین
 ایلری کچمکه بردرلو جسارت ایده میه جکدر. لیکن هاجمین اوکا
 اهمیت ویرمش اوله بیلیمک ایچون موقعک ایجه بیوک وقوتلی
 بر عسکرایله طوتلمش اولسی ده لازم کلور. برده محاربه ویرمک
 ایچون مدافعینک انتخاب ایده جکی موضع، موقع مستحکمه یک
 یقین بولناملیدر. چونکه اگر او یله اولمزده، بالعکس یک یقین
 بولنورسه، او زمان هاجمین طرفی محاصره اردوسی صحرا محاذ
 ره سنه اشتراک ایتدیرر و محاربه بیتد کدن صکره آنی ینه موقعک
 اوکنه کوندرر.

بر موقع مستحکم، آندن بشقه، یانلر ایچون برر نقطه استناد

وظیفه سنی ده کوره بیلور . زیرا بیوک منزلی طویلری و خارجی استحکاملری سایه سنده اوموقعك بر قاج یورویشلک وسعتنده بر منطقه به حکم ایده بیله جکئی اونتومالی بز . بونک ایچون شوبله بر موقع مستحکم عین زمانده جبهه نك کوزل بر پارچه سی یرینه کچر . اردونك موقع مستحکمه طوغریدن طوغری به باغلی اولسی ده لازم گلز . بالعکس اردو بیوک اولدیغی نسبتده کندی موضعيله بوموقع آره سنده بر بوشلق ترك ایده بیلور .

(۱۸۷۰) حربنده (سن کنتن) استحکامنك مر میلری ، (میچ) دن (۷۵۰۰) متره اوزاقد و (موزهل) اوزرنده کی (آرس) موقعنه پك اعلا یتیشیورلردی . اگر (رین) اردوسی رجعت ایدرکن (موزهل) ك کیروسنده (بونت آموسون) ایله (نووه آن) آره سنده موضع آلمش اولسیدی ، کندی صول جناحی موقع مستحکم طرفندن ستر ایدلمش بولنه جقدی . قلعه لره محکوم اولیان و (آرس) ایله (نووه آن) آره سنده بولسان طار اراضی آلمان اردولری ایچون نه ایلری کیتمه که ، نه ده ، یر اولدیغندن اوتری ، بیوک قوتلر ایله احاطه حرکتی یاغمه مساعده ایده جکدی . (میچ) ك بوراده کی وضعیتی ایکی قات فائده لی اولوردی .

زیرا ، موقع ، مدافعه خطنك ایلروسنده بولنیور و هاجینك صاغ جناحی . تهیدد ایلوردی . بوجهه اوزرنده کندیلرینه لزوم قالمه جق اولان (رین) اردوسنك بعضی اقسامی ، محاربه اثنا -

سندہ (میچ) دن کچھوک آلمانلرک صاغ یانلری علیهنه شدتلی بر مقابل تعرض حرکتته تشبث ایدہ بیلورلردی .

بوخصوص ، عین زمانده بزه ، برنهر اوزرنده واقع او -
لهرق بر ساحلدن اونه کینه کچید حرکتنی قطعياً تأمین ایلین
بر موقعک شو وضعیتدن ط-ولایی نه قدر اهمیت قزاندیغنی
کوسترر . اگر شویله بر موقع ، مهم بر چوق ص-و یوللرینک
ملنقاسنه حاکم اولورسه ، بوندن اوتری دهه بستیون کسب
اهمیت ایدر .

(کوسترین) بوقیلدن بر موقعدر . برنجی ناپولیون (۱۸۱۳)
سنه سی شباط آینده کی رجعت حرکتنی اثناسنده آندن استفاده
ایتمدیکی ایچون پرنس (ویس دووا) یه ایجه طارلمشدی . مشار -
ایله یازدینی بر مکتوبده « (برلین) ی اورتک ایچ-ون بوندن
تمام یکریمی کون قزانش اوله جقدی ، دیور . کرچک ، پرنس
اوژن ایلک اوکجه (کوسترین) ایلروسنده بر موقعده ومثلاً
(دروسن) ه پک اعلا یرلشور وبوجه ایله دشمنک (اودر) اوزرینه
کچمسنه مانع اوله بیلیر ایدی . صکره دشمن دهه بیوک قوتلر
ایله کندی علیهنه آتلنجه اوده صو مجرالرینک تشکیل ایلدیکی
مختلف منطقه لره آتیه رق برر ، برر آنلری طوته بیلورلردی .

اگر بر اوچنچی ، بر دردنجی نهرک ویاخود علی العاده بر
ایرماغک مرکز مشترکه طوغری بطاقلقلی بروادی ایچروسندن

آقديني تصور ايديلورسه ، بوديديكمز اويوني كمال موفقيت ايله
تكرار ايتك ممكن اولوردى . وبوجه ايله موقى براسناد نقطه-
سى يرينه قوللانا اردو ، آنك اطرافنده ، روزكار كلنك
كوسترديكى هر اسنقامتده ايستديكى كى قونوشور ايستديكى كى
حركت ايدردى . بويله ياپلديني انساد اردو ايچون يالكر بر
تهلكه يعنى موقع ايچنه آنيلهرق اوراده هر طرفدن صيقشمش
اولق تهلكهسى واردر . بوندن ط-ولايى خارجى جناحك اك
قوتلى اولمى لازم كلور . بو يك بسيط برقاعدهدر . هر كس
آنك اهميتنى آكلار . لكن بويله اولقله برابر ، ماره شال بازن
كى تجربه كورمش بر قوماندان (۱۸۷۰) س-نه سى آغس-توس
آينك (۱۶) و (۱۸) نجى كونلرى ايچون آندن استفاده ايتك
يولنى بيله مدى . موقع ايله آره سى كسلمش اولق تهلكهسى ،
يك بوشنه برقورقو ، مشاراليه بتون احتياط عسكرلرني داخلى
جناحك كيروسنه قويدردى .

بركره موقعه قبانقدن ص-كره ، مدافعين ايچون اكر
طيشارى چيقمق ايسترسه ، كوزلجه تحكيم ايدلمش بر موضعه
قرشو-و، برتعيه كديكى آچقدن بش-قه سلامت قپوسى يوقدره
شويله بر كديك آچق مسئله سنك نه درجه کوچ برشى اولديغنى
يوقاریده سويلمش ايدك. بوشيمديكى حاله يعنى ماره شال بازه نك
دوش-ديكى طوزاغه كوره ايسه كديك آچق خصوصى دهـا

بستون زور ، بستون کوچ برشیدر . زیرا ، محاصره خطنندن
 جلب ایدیه جک امداد قوتلری ، هیچ شبهه یوق که ، دشمنك
 صاغی وصولی اوزرینه یعنی موقعدن چیقماق تشبته بولنه جق
 اولان قطعات عسکر بهك یانلرینی اك مؤثر بر صورتده دوکمه به
 مساعد بر استقامتده واصل اوله جقلردر . تاریخ عسکری ، بردفه
 محاصره ایدلدکن صکره ، یالکز باشنه طیشاری چیقماش ،
 دشمن تضیقندن قورتلمش اولان اردولره دائر يك آز مثال
 ویره بیسلور . تهلهکلی زمانلرده ، بر موقع مستحکمك اردویه
 مجاور و یقین اولسی ، آنك اوزرنده بالطبع يك بیوک جاذبه لر
 کوستریمکه خدمت ایدر . و بر اردویی شویله بر موقعك سپرلری
 کیروسنه و طولیلری آلتنه کوتورمك ، بالعکس ینه اویله بر موقعه
 کیردکن صکره تکرار طیشاری به چیقارده بیلمك خصوصندن
 يك قولایدرد [°] .

[°] اوزمان هر نفر اردونك آچیق صحراده آرتق دشمنه مقابله دن
 عاجز و چار ناچار بر موقع مستحکمك سپرلرینه انجایه مجبور اولدیغی
 حس ایدر . لکن بوحس قطعات عسکر بهك قوه مغنویه سنی بوزدقندن
 بشقه امنیت و موفقیت امیدلرینه محو و پریشان ایلر . یالکز بوقدر
 اولسه ینه بآس یوق . لکن ، بر موقع مستحکمکه قبانان براردو آرتق
 تکرر قورشون و کرک خسته لك یوزندن وقوعه که جک بوشلقلری قیانه مزه ،
 آنلر داغما بوش قالور . اکثر زمانلر ، عسکر ، حتی فنا کیمش ، فنا
 بسلنش ، فنا یاتمش اوله جقدر . کرچک یقیندن باقلدیفته کوره ، بر
 موقع مستحکمده بولنسی امید اولنان و سائط ماده بهك حقیقتده هیچ
 بریسی بولق ممکن اوله میه جفنی تسلیم ایتك لازم کلور .

برموقع مستحکمی ، نقطه استناد و با محور الحركات یربته
قولالانق اردونی بعض فنا یرلره ، کیزی تهلمکله تصادف
ایتدیررکه ، بونلردن اصلاخبری اولیان قوماندا هیئتک اوتلمکله
اوکنده چاره سز قالمق احتمالی واردر . آنک ایچون : برموقع
مستحکم ، یولنی بیلیمیان کسه بی پارچه پارچه ایدن بر بوالهول در! ،
دیان محررک بو تشبیهنده یردن کؤکه قدر حق واردر .

بوسوز بزه ، بیوک مواقع مستحکمه دن بکلنان صوک وظیفه یه
دائر دهانه کی برشی سویله مکه مجبور اولدیغیزی پک اءاخلاصه
ایدیور . اوت ، برروایتده کوره بویوک موقعلر ، مغلوب دوشمش
ویا دشمن طرفندن پک چوق صیقیشدیرلمش اولان اردولره
ملجألاک خدمتی کوره جکلردر . مذکور اردولر بورالرده
کندیلرینه ایودن ایویه بر چکی دوزن ویره رک هر درلو
مالزمه سفریه لرینی تجدید و اکال ایتدکدن صکره تکرار
آچیق صحرا ده دشمن ایله محاربه یه چیقه جکلردر . بوفکر ،
تپه دن طرناغه قدر هب نظریات قوقوسیله بورونمشدر .
عملیات جهتی دوشونیلورسه ، بویله شیرل حربه پک آز
تصادف ایدیلان و بلکه هیچ کورلیان شیرلدندر . ایشته کوزمن
اوکنده قوجه بر (مچ) منالی وارکه ، یاکلش یوله دوشماک
ایچون انسانه بوندن کوزل برهان اوله من صانورم . ذاتاً تجربه
ایدلمش بر شیء تکرار تجربه ایتمه نک صوکی پشیمانلق در [*] .

[*] «من جرب المجرب حلت به الندامه» .

استحکام را بایله محافظه ایدیلور منطقه لر، جنرال (بریا المون) ک
تحکیم ایدلمش مملکتلری دها کوزل ایشه یرارلر. بو کبی اثرلر،
اردونک یشامغه مجبور اولدینی یرلری یعنی مملکت واستحکاملرک
اقسام داخلیه سنی محافظه ایتمکله برابر دشمنی کندیلرینی محاصره
ایتمکدن منع ایدرلر.

بر آزده پایتختلرک محافظه سی مقصدیله یاپیلان استحکاملردن
بحث ایدلم. بونلرکده بعض طوقنیه حق، ایلشیله جک یرلری
وار. از جمله اعتراض ایدنلر دیورلرک، بر حکومتک اردولرینی
پایتخت قبولرینه قدر سورو کلیوب کوتورن بر تعرض اردوسی،
استحکامات موجوده سی اک چوق زمان قزاقق فیکریله یاپیلان
پایتختنی ضبط ایتمک خصوصنده کذلک عاجز قالمز؛ بر مدت
صکره آنی ده اله کچوره بیلور. مع هذا؛ اگر مدافعین، کندی
متفقرلندن معاونت کورمک امیدنی طاشیورسه، او وقت،
التجا ایلمش اولدینی پایتختک ایجه بیوک بر اهمیت کوریلور؛
بونیده اونوتاملی یز.

بوندن بشقه دیگر بعض مستثنا حاللر وارک، اوراده
بو خصوصک یک موافق بر تدبیر اولدینی میدان چیقار. نته کم
بعض اسباب مهمه دن طولای، خارجه و داخله یک بیوک
تأثیرلر کوسترن بعض پایتختلر وضعیتلری ایجابندن اوله رق هجومه
یک ده معروض قالمقه برابر، ینه تحکیم ایدلمش اولملری

لازم کليور . قوينهاق و ليزبون بو جنس پايختلردندر .
 دونماسي دکره حاکم اولان بر دشمن ، آنلري آپ آنسزبن
 الله ايدم بيلور . وبو وجهله ايلک حمليه قوجه بر حکومتک
 النی آياغنی باغلايه رق آکا ايسنديکی کبی حکمفی کچورور .
 چونکه پايختنی غائب ايتمش اولان بر حکومت ، بتون قواي
 عسکريه سنی ميدانه چيقارمقدن عاجز قالور . شويله بر حاله
 افکار اساسيه هر شيئک فوقنه کچر . و آرتق آنک امريله
 يورپمکه محبورييت کوريلور . اکر بر مملکتک پايختنی ايودن ايويه
 تحکيم ايدلمش بولنورسه ، بعضاً اصول وقواعدينه کوره حاضر-
 لانان بر مدافعه مليه ايچون بر نقطه مرکزیه تشکيل ايدم بيلور .
 لکن بونک احترازی نا قابل بر محذوري وار: شهسز بودرجه
 واسع ، بو درجه بيوک اولان بر حرب موقعی سيار اردويني
 تشکيل ايدم جک قواي عسکريه اوزرنده زورله وبک بيوک
 جاذبه لر کوستره جکدر . گرچه آنلر ايچون بر نقطه استناد
 خدمتنی ايفا ايدم جک ، بلکه عين زمانده آنلري کنديسنه
 باغلايه جق وبک مهم بر قسمنی محافظ عسکري ناميله ياننده
 بوانديره جق در .

بو حال ايسه ، شهسز پک ارکن دشمن طرفدن محاصره
 ايديله رک ، آزوقت صکره ده سلاح تسليم ايتمش اولق تهليکه سنی
 دعوت ايدر . باخصوص پايخت ، سيار اردونک يکونی ايله نسبت

قبول ايتمه جك درجده بيوك بر شى ايسه او وقت او محذورلر
دها شدتله كنديلرينى كوسترمنى اوله جقلردر .

(پارس)ك فرانسه ايجون بر سبب فلاكت اولمسندن زياده
(بكرش) رومانيا ايجون دها قولاي ودها چابوق بر منبع فلاكت
اوله بيله جكلدر . اكر ، بتون مواقع مهمه يني ، شمديكي زمان
اصولنه كوره ومدافمه مليه نقطه نظرندن بر مستحكم اردوكاه
شكلنه قويق ايستيلورسه ، بك چابوق ، ايجندن چيقلمسى ويا
اوزرندن آسلمسى ناقابل مصرف يكونلرينه دوشولمش اوله جغنه هيچ
شبهه ايدلمسون . بونكله برابر ، ايجه بر حساب ياپيلورسه ،
كوريلوركه ، صحرايه وقوعه كلان حركات سفره بكنمديك بر
طرزه كلديكي زمان بوبهالي مستحكم اردوكاهلر ، تماميله كنديلرينه
لزوم كوريلان يرلرده موجود اوليورلر .

(۱۸۷۰) سفرنده فرانسه نك مواقع مستحكمه سى بك چوق
ايدى . بونكله برابر ، سفره ايكنجى دورى اناسنده مواقع
مستحكمه نك اك زياده قيمت كسب ايدجكلرى ايكي نقطه ده
(اورلئان) و (آمين) ده بولناملرى تمجبه شايندر . وبو مثال
يوقاريده كي سوزمى تصديق ايجون شبهه سز اك پارلاق بر دليل ،
اك كوزل بر برهاندر . اكر مستحكم اردوكاه ، بك مهم
بر اردويه خدمت ايدم بيله جك صورتده ياپلمش ايسه وسعت
وامتدادى بك زياده اولق لازم كلور . ليكن آنك بو قدر
بيوك اولمى قوه مقامت مطلقه سنى آزالدير . بناء عليه محافظ

عسکرینی يك چوق تزیید ایتك لازم كلور. و بو وجهله مملكتك مدافعهسی یولنه كرك یاره و كرك انسانجه ایدیلان فدا كارلقلر، ایکی قاننه چیقمش اولور.

آنك ایچون مستحکم اردوگاهى بردرجه یه قدر متحرک برحاله قویه جق بر چاره آرامق، آنی بر وجهله تشکیل ایتك لازم كلورکه، دشمن باصقینندن آمین بولندرمق ایچون یالکز کوچك بر محافظ مفرزهسی کفایت ایتمش اوله بیلسون. کرچك، بو خصوصده اك چوق ایشه یارایه جق شیلر زرهل قله لردن عبارتدر. اوت، شو دیدیکمز فکری، یعنی طوپلر ایله محفظه یی برلکده، قابل النقل برحاله صوqq فکری ده ا زیاده ایلری کوتو- رلدکجه، بر آوچ عسکر طرفندن ویالکز برقاق آلت ایله اك بیوک موقعلری ستر و تحکیم ایلمک، یعنی کله جك حربلره مخصوص قلعه لر و مستحکم اردوگاهلرک اتیکلری قورومق پك آعلا ممکن اوله جقدر. هم بوکی شیلر، اولدن دکل بالعکس حرکاتک کیدیشی آنلرک نرم لرده اجراسی اك مناسب اولدیغی آچیقدن آچیفه کوستر- مش اوله جنی زمان یاییله جقدر. بو وجهله، بر حکومتک سفرده یالکز بر ویا ایکیسندن استفاده ایده بیلمسی ایچون، محافظه مفر- زه لری قوجه قوجه اردو لردن عبارت اولق اوزره صورت دائمه ده اون، اون ایکی مستحکم اردوگاه ویا موقع تشکیل ایلمک بلاسندن قور تیلنمش اولور.

اون دردبجی فصل

حرکات بحریه نك اداره حرب اوزربنه اولان تأئیدی

اردولر طوبلانیغه باشلادینی زمان ، قطعات عسکریه یی نقل ایتمک خصوصنده فیلولر پک بیوک خدمت کوره بیلور. (۱۸۷۷) سفرنده کیلرندن هاونت کورماش اولسیدی، جنوب حکومتی، اردولرینی جمع ایتمک مقتدر اوله میه جقدی. حتی انهای حربده بيله، بالقان شبهه جزیره سنده کی ایشلرینی بینه اکثریا بو فیلو سایه سنده یولنه قویه بیلیمشدی ؛ زیرا قوجه بر اردوبی آرنای دلق ساحلندن تراکیا ساحلنه کتورن ایشه هپ اودر. حرکات بریه، بر ساحله تماس ایتمدیکی زمان اس الحرکاتی بر آز دها ایلری سورمک و یا خود یکی طرق اتصالیه وجوده کتورمک خصوصنده قوای بحریه نك حرکانه اشتراکندن اوتری نه بیوک قائده حصوله کلیدیکی (چین-ژاپون) سفری بزه کوستر-مشدی. دکر اوزربنه حاکم اولمق مسئله سی قره ده کی اردونک استناد ایلمسینه، لیانلردن پک چوق قائده کورمسینه یاردم ایدر. خصوص مذکور هاجمین ایچون اولدینی قدر، مدافعین ایچونده عین قیمته، عین درجه ده فائده لر حصوله کتورر. آلمانیا، حکومتی شرقاً و غرباً، بر حرب ایله مشغول اوله جنی زمان

بالطریق دکرینه حاکم اولمقده نه بیوک فائده لر کوره جکفی آکلامق ایچون خریطه یه یالکز برکوز کزدرمک یتیشور. پولونیا ده کی دار الحرکاته نسبتاً سویلیورز : اکر بر احتیاج حالنده، المان اردولری غرب استقامتنده (اودر) اوزرینه کیده جکلری یره، ایستدکلری کبی (دانسیق) ویا (کونیکسبرق) موقعلرینه چکلمکه موفق اولورلرسه، بوندن حرکات عسکریه لرنده پک سربست قالمق ایچون بیوک بیوک استفاده لر ایده جکلردر. دکره حاکم اولمق مسئله سی آندن بشقه پک، بهالی وپک بیوک استحقاملر انشاسی خصوصه نده اکثریا بیوک بیوک تصرفلری وجوده کتورر. انکلتزه دکرلره حاکم اولمسیدی، شهه سز، لوندره نی آچیق بر شهر حالنده براتق ممکن اوله مزدی. ایکی محاصمدن دکرده تفوق ایتیش اولان طرف، کرولرنده سربستی حرکات خصوصنی اعلا دن اعلا یه تأمین ایدر؛ وداثما کنسیدی اعلا شهه سی ایچون لازم کلان هر درلو شیلری دنیانک اوته کی قسمندن ایستدیکی کبی کتوردر. قوای عسکریه سی تجهیز و تسلیح ایچون ده ییانیجی مملکتلره مراجعت ایده بیلور.

اگر دشمن فیلولری کنسیدی سواحلی آبلوقه ایتیش اولسه. لردی (۱۸۷۰) ده امپراطورلق سقوط ایتدکدن صکره، فرانسه ایچون هر درلو مالزمه سفریه و حربیه سی یولنده یکی یکی اردولر تشکیل ایتک اصلاً ممکن اوله جق شیلردن دکلدی. آمریقا

سفری بك اعلا كوسـئربور، كه، حاصلاتی یرلی اهالی به كفیات ایتیهـك درجهـده آز اولان بیوك بر مملكتی آبلوقه دنیلان شی آچلقدن اولدیرر واك صكره اردوی برینك فدا قزانمش اولدینی نیجه مظفریتلرینی یوز اوستی براقه بیلور .

قوتلری همان بربرینه مساوی ایکی مخاصمدن هانکیسی دكزه حاكم اولورسه ، اك صكره مظفریتی او قزانور . چونكه او سایهـده اوته كینك تجارتی محو ایدرك و طرق اتصالیه سنی كسهرك آنك نهایت قوه عسكریه سنی ضعیف دوشوره جكدرك . بتون شو فائده اك چوق طولایسیله حصوله كلهرك یسه اك چوق سوق الجیش حركانته منسوبدرلر . لکن دار الحربك تشكلات طبعیه سی مساعده ایتدیکی زمانلر اردوی برینك حرکات عسكریه سی بر فیلونك حركانته طوغریدن طوغری بهـده استناد ایتمش اوله بیلور . بر ساحل بونجه ایلرولیان بر اردو یانلرندن بریسی قطعی بر صورتده فیلونك حركانته اویدیره رق یالکز اوته کی یانیله اشتغال ایده بیلور .

آدن بشقه قوای بحریه، بری اردونك یانلری ایلریسه نه كچهرك ساحل بونجه بعض یرلر ضبط ایتدكجه آنك یورویشنی تسهیل ایده جكدرك . ساحل اوزرنده كائن مواضع ویا مواقع مستحکمه هجوم ایتك، اكر بوهجومه، فیلوده اشتراك ایتیهـك اولورسه ، اکثریا نتیجه سز قالور ؛ قالسه بيله میدانه كلهـك

نتیجه لر ، علی العاده شیلردن اولور . زیرا اکر مدافعین طرق بحریه سنی هنوز الده بولندیریورسه شبهه سز ، کندی مقاومتی غیر معین بر زمانه قدر اوزاتوب کوتورمک ایچون جبخانه ، بیه جک ، کییه جک ، طوب ، تفک و قوای امدادیه کبی حاصلی مالزمه سفریه نامنه هرشی کتورده بیله جکدر .

طرق جسیمه نهریه ایسه ، بری اردونک دارالحرب اوزرنده ایلری یوروشنی تسهیل وتأمین ایلمک ایچون بک مستتنا حاللرده فیلونک حرکاته الویریشلی اوله بیله جکلردر . بونکله برابر . آمریقا سفری او یولده یاپلمش اک کوزل بر مثال کوسه تر : جنوب حکومتلرینک بوزلمسنه تأثیرایدن سبیلردن اک باشلیجه سی هیئت متحده نک فیلوری ، بر آنده هم مرکزدن وهم (میسی سیپی) نهرینک یوقاری مجراسندن ایلرولیه رک اک صکره نهرک هپسنی ضبط ایلمش اولمسندن عبارتدی . بروجه ایله که ، دیدیکمز فیلور ، جنوبلیلرک اراضیسنی ایکی پارچه به آردیلر وبو آریلینی دائمی بر صورتده محافظه یه موفق اولدیلر .

مدافینه کلنجه قوای بحریه آنک بک یقین معاونلردن بریسیدر . چونکه ساحلده کائن مواقع مستحکمه نک سترینه یاردم ایدرلر ؛ آبلوقه فیلورینه قرشو بعض خروج حرکتی یاپارلر . اردونک اوزاقده کی قسملریله اولان طرق اتصالیه بحریه یی آجیق طومغه چالیشورلر . اوندن بشقه ده بری اردولرک یانلرینی وکیولرینی محافظه ایدرلر .

فیلورک شو استنادی اگر احوال گرچه کدن الوریث
اولورسه، قطعی نتیجه لر استحصالنه بیله کفایت ایلر. ینه بواسطه
خصوص مدافینه کندی مدافعه سوق الجیشی نقطه غایبه سو
کرولرده ایجه اوزاقده، مثلاً اراضیسنک اوتنه کی اوجنده کاز
بر شبه جزیره ده بولندیرمغه پک اعلا مساعدده ایلر.

شبه سز! اونقطه به کلنجه به قدر مدافعین قوتلری، پک زیاده
بیور؛ کسب اهمیت ایلر. حال بوکه، هاجین قوتلری بالعکس،
اوزون بر خط الحركات اوزرنده یوریدیکچون پک زیاده
کوچلیور وضعیف دوشر. اگر شونقطه ده ایشلر بر یوز اوستی
قباتور یعنی تعرض مدافعه به، مدافعه تعرضه کچرسه هاجین
شبه سز، پک فنا براوچورمه دوشمش اولور؛ ایکی قات زبانی چیقار.
اگر کری طرفلرک امنیتی فیلو واسطه سیله ایودن ایوبه
محافظه ایدلمه مش اولسیدی، (طوره س وه دراس) خطلرنده
دیکیش طوتدرمق، چتالجه خطوط استحکامیه سنی مدافعه ایتک
امکالسز قالوردی،

آرتق کیلر واسطه سیله قره به عسکر چیقارمه نیک طبیعت و اهمیتنه
دائر بر قاج سوز سویلمکدن بشقه پایه جق بر ایشمز قالمایور.
بودرلو حرکتلرک علامت فارقه سی شودرکه، ایلاک اوکجه
هدف اتخاذا ایتدکلری نقطه به استناداً اونلر مستقلاً جریان
ایدرلر. اردونک اوتنه کی قسملریله اتصال پیدا ایتمکدن اکثریا

مستغنی بولنورلر . اوندن بشقه ، بو حرکتلر ، بعض دشمنك
هجری یرلربنه ، کنار مملکتلربنه صوقيله رق بردن بره حربی
اورالره کوتورهبیلورلر . وبالخاصه دشمنك یانلربنی وکریلربنی
تهدید ایتمکک الویریشایدلرلر . (۷۷) سفربنك صوك زمانلربنه
طوغری چتالجه خطوط استحکامیه سنك مدافعه سنه دائر دو-
شونیلان پلانده قرهیه عسکر دوکمك خصوصی پك اعلا خاطر-
لرمزه کلنشدی . جنوب حکومتی قلاع اربمهیه حاکم واوراده
هنوز ایجه بیوک قوتلره مالک اولدیغیچون خصوص مذکور
شه سز، دها مؤثر ودها کسکین اولوردی .

هاجین طرفك قرهیه عسکر دوکمکدن دها زیاده استفاده
ایده بیلرسی ، مدافعین جهتك اکثریا فضله قوای بحریه سی
اولماقدن ایلری کلیور . اکر بویله اولسیدی ، اوچشید حرکتلر
قرهده هاجیندن ضعیف اولان برمدافعینه ، ساحله عسکر دوکمك
واسطه سیله خصمك کریلربنی وطرق اتصالیه سفی تهدید ایلمك
ایچون کوزل کوزل فرصتلر ویرمش بولنه جقدی .

قرهیه عسکر دوکمکك الك ضعیف جهتی شودرکه ، دکرلرده
عسکر نقل ایتمك زور برشی اولدیغندن قرهیه چیقاریله جق
عسکرک یکونی پك آز برشمیدن عبارت بولنور ، هله سواری
وطوبجی عسکرلری ، هیچ یرنده قاور . شومحدور شبهه یوککه ،

عسکرک ایلرولمسنه ، دشمن طور اراغنده یر قازانمسنه اک زیاده مانع اولان برشیدر .

بک مدنی و مسکون یرلرده قرهیه عسکر دوکمک عملیاتی اصلا بیوک نتیجه لر استحصال ایدهمیه جکدر . زیرا بوکی یرلرده حکومتلرک تشکیلات عسکریه سی ، و طرق اتصالیه شیکلری ، حال حاضرده حیرته شایان بر صورتده بیومشدر . آنک ایچون ایلک اوکجه اولسه اولسه ، (۴۰ : ۵۰) بیک کیشیدن عبارت بولنان بردشمن عسکرینه ، قرهیه چیقمش بردشمن قولنه ، عددآ تفوق ایدمجهک و آتی برقاچ زمان صکره ، محو و پریشان ایلیمجهک درجهده قوتلی قطعات عسکریه نک بر آربه کتورولسی امکانش برشی دکل ، بالعکس بک اولاغان شیلردندر .

ساحله چیقان دشمن قولی ، اوراده کی اهالی بی ، آیاقلاندر . مدقجه ممکن دکل ، شو دیدیکمز وضعیت یعنی مدافعینک اوکا تفوق ایدمبیلیمجهک بر قوت ایلیمه مقابله ایدمبیلیمسی خصوصی اصلا دیکشمش اولهمیه جقدر . کذلک متفق بر حکومتک اشتهرائیده قرهیه عسکر دوکمک عملیاتی بعضاً کوزل ، کوزل نتیجه لره ایصال ایدمجهک تاثیر لر کوستره بیلور . آلمانیا ایلیمه وقوعه کله جک برسفرده فرانسلرک قرهیه عسکر دوکمسی آنجق دانیمارقه ایلیم برلشه جکلری زمان ممکن اوله جقدر . بو درلو حرکتلر ایچون اک الویریشلی وقت ، محاصراتک ایلک زمانلرنده سپار اردونک

بتون قطعات عسکر به سی حدود بوبنه کوتورملک اوزره اولدینی وهرنوع صیقندیلر اک چوق باش کوستردیکی زمانلردر . یاخود برسفرک صوک دملربنه طوغری، پک ضعیف قالمش بر دشمن علیهنه کذلک حرکات مذکوره اجرا ایدیلورسه، کوزل نتیجه لر حصوله کلمک پک طبیعیدر .

ساحل اوزرنده واقع ویا ساحله پک یقین اولان بیوک بر موقعک اشغالی، سفرک جریان عمومیسنه بهمه حال قطعی برتائیر حاصل ایده جکی آ کلاشلدینی زمان مستئنا قیلندن اولمق اوزره بو هدفه قرشوده ینه قرهیه عسکر دوکمک عملیاته مراجعت ایدیله بیله جکدر .

بایخنلری دکر کنارنده اولان مملکتلر ایچون پولتیقه ملا-حظائی اکثریا، قرهیه عسکر دوکمک خصوصلربنه حدندن آشوری اهمیتلر ویردیرر . چونکه اورالری ضبط ایدلکجه قرارسز بر حکومتک یا اتفاقی یاخود بیطرفلغنی جلب ایتک پک اعلا ممکن اولور .

قریم سفرنده، متفقین ، روسیه حکومتک قره دکرده کی قوه بحریه سنک بشیکنی سیواستوپولده محو وپریشان ایتک تشبثنده بولندیلر . بوسبدن طولایی حدذاتنده پک فوق العاده براهیتی اولیان سیواستوپول موقعی بر قیمت خصوصیه قزاقش اولدی .

بيوك حڪومتلر ايله وقوعه كله جك مستملكات سفرلرى ،
صورت خصوصيه ده قره يه عسكر چيقارمه عملياتك اك زياده
تطبيق ايديله جكلرى يرلردر . او كى يرلرده كوچك ، لكن بك
منتظم براور ويا قول اردوسى ، بتون پولتيقه منازعاتى بر آنده
حل وفصل ايده جك درجه ده اقتدار كوستره بيله جكلدر . لكن
ديديكمز يرلر ، بين الملل تجارت معاملاتنه ، اور ويا مدنيتنه
كيريش دجه قره يه عسكر دوكمك خصوصلرينك اورالرجه ده
ايجه كسب مشكلات ايده جكى محققدر .

(چين - ژاپون) سفرى ، بوسوزمزه اك پارلاق بر مثالدر .
حقيقت سفره مذكور ، آرتق بر آوج فرانمز و بانكليز عسكرينك
برقاج حرب كيمسنه استناد آچين كى اوجى بوجاغى بولمىز قوجه
بر مملكتنه ايستدكلرى يولده حكم ونفوذ كوسترمك زمانك
آرتق چوقدن برى كچمش اولديغنى ميدانه چيقاردى .

۲۳ كانون ثانى ۱۳۱۴ ، بوغاز ايجى - بىك

ادبیات عسکریه

جداً عسکر اولانلر شو بیوک صنعته دأر بر نایه بیله مطا-
لعه دن کری قالمزلر . برنجی ناپولیون کبی بر یوزنده ایکنجی بر
مثانی کورمک ممکن اولمیان بر قهرمان عسکری آناسنک قورندن
بشیکه اینرکن دها باش، قوماندانلق صفتیه اینمش ایکن ینه «بیوک
عسکر اولمق ایستیانلر بیوک عسکرلرک اثرلرینی اوقومغه مجبور-
درلر . ، سوزینی وردزبان ایلمشدر .

یوقاریده کی سرنامه هر هفته نشر ایدیله جک اولان جدی
ویک مهم بر مجموعه اسمیدر . بو کوچو جک رساله ده صنوف
ثلثیه منسوب ضابطانک هربری عسکرلک صنعتیجه نه کورمک،
نه اوکر نمک ایسترسه هپسفی کوره جک واوکر نه جکدر . حقیقت!
ادبیات عسکریه ده یازیله جق آثار عمومیه نک قیمت ادبیه
وعسکریه سنه باقیلورسه شو مجموعه، هر کسک وعلی الخصوص هر
عسکرک حرزجان ایده جکی بر مجموعه نفیسه در .

(ادبیات عسکریه) بر قاج هفته صکره حجمی بیولته جک
یعنی هر هفته پنجشنبه کونلری (۸۰) صحیفه اولمق اوزره نشر
ایدیله جکدر . بونکله برابر ، ده ایلروده هر جزئی (۱۰۰)
صحیفه جیقاریله جق اولان بو مجموعه نک فینائی اصلا دیکشمیه-
جکدر .

(ادبیات عسکریه) نك عموم وطنداش لریمزدن کوردیکی
 رغبت والتفات قوشو نصل تشکر ایده جکمزى بیله میورز . بز
 شوبیوک التفاتلری لاینقطع جالشق وادبیات عسکریه یی اورو-
 یاده کی امثالی درجه سنه جیقارمق ایله اوده مکّه غیرت ایلیه جکز .
 بو گونه قدر نشر ایدلش اولان جزء لرك مندرجانی (ادبیات
 عسکریه) نك هر زمان تمقیب ایلیه جکی پروغرامه اك ایو برغونه
 اوله جنی ایچون بروجّه آنی درج ایدبورز؛

برنجی جزء

میرآلای عزتلو طاهر یوسف بکه مکتوب .
 آلمانیا امپراطوری ویلهم ثانی حضر تلرینك یاورلرندن
 برنس (هوئلوتّه) نك زمان حاضر سوارسی حقنّده اوزون
 برمحطالعه سی ؛ عسکر مکتوبلری .

ایکنجی جزء

یونان سفرنده عثمانلی طوپیسینك مظفریاتی ؛
 آلمانیا امپراطوری ایکنجی ویلهم حضر تلرینك ترجمه حالی ؛
 عسکر مکتوبلری .

اوچنجی جزء

آلمانیا امپراطوری ایکنجی ویلهم حضر تلرینك ترجمه حالی .
 پلونه محاصره سی ودولتو غازی عثمان پاشا حضر تلی .

عثمانلی طوبجیلرینک یونان سفرینده کی مظفریاتی .
 روسیه مکاتب عسکریه سی : برسنده یتیشان ارکان حرب
 ضابطلریله علی العموم روس ضابطلری .
 صرب ضابطلریله چاوشلر ونفرلرک ازدواجی .

دردنجی جزء

ترك سلاح ممکنمی ، دکلمی ؟
 پلونه محاصره سی : روسیه اردوسی باش قوماندانی غراندوق
 نیقولانک دولتلو غازی عثمان پاشا حضرتلرینه مکتوبی ؛ عثمان
 پاشا حضرتلرینک جوابی ؛ محاصره نک صوک کونلرنده پلونه
 قرشو رکز ایدیلان ساخته لوحه لر وبونلرک یازیلری ؛ تایمس
 ودایلی نوز غزته سندن برقاج سطر . .
 یونان سفری حدود بوی غوغالرنده عثمانلی طوبجیسینک
 صرفیات و ضایعاتی .
 عسکر مکتوبلری .

بشنجی جزء

غازی عثمان پاشا حضرتلرینک پلونه دن خروجی .
 آلمانیا امپراطوری ایکنجی ویلهم حضرتلرینک ترجمه حالی ؛
 آلاصونیه حدود بوی طوبجی محاربه سنه دائر بر ملاحظه ؛

اردوی هایونک میلونه دن تجاوزی ، قایناقلر طوبچی محاربه سیله
دایلر قریه سنه هجوم .

عسکر مکتوبلری .

برپاده طابورینک دیکر برطابورینه قرشو اصول محاربه سی،
(لوسیت نیاتروسندن برپارچه، غوغانک مختلف دورلری قروکیلر
ایله کوسترلشدن) .

دومکه میدان محاربه سی

اردوی هایونک تسالیاده کی مظفریاتی برر برر کوستره رک
یونان سفرینه دائر اک صحیح واک کوزل بر صورتده یازیلان
بر اثر مهمدر . عسکر اولیانلر، بر سفرک هیئت عمومیه سنه
دائر لازم کلان معلوماتی غزته صحیفه لرندن اوکرش اولمق-له
اکتفا ایده بیلورلر . لکن عسکر اولانلر وباخصوص جـداً
عسکرلکی سونلر هیچ بر وقتده یالکز غزته ستونلرنده کوره-
جککری یالان یا کلش حوادث ایله بر سفری تعقیب ایتمزلر .

اولنر بالعکس، برسفرده کچن وقوعات سیاسی و عسکریه نک
هر نقطه سی نظر تدقیق و میزاندن کچورمک، و او سایه ده ایشک
ایچ یوزینی یعنی حقیقتی اوکرتمک ایستلر . سوکیلی نمالکتمزک
نور دیده افتخاری اولان معلوماتلی ضابطلرمن، یالکز کندی
اردومزک مظفریاتی دکل، یر یوزنده وقوعه کله جک هر سفرک

حرکات عمومیه سنی تدقیق ایتمک ایچون کندیلرنده بر مجبوریت صحیحہ کورورلر.

چونکہ جدی ویوک عسکر اولمق ایچون اک کوزل مکتب وقوعات سفریه واو وقوعاتی صحیح وسلم بر صورتده نقل وحکایه ایدن تاریخ عسکر یلردر.

فرانسه، آلمانیا سفرینه دائر بایک یوزدن زیاده اتریازلمشدر. بونک سببی ایسه یالکز صحیفه طولوسی یازی یازمق، عالمی مصالح ایله اشغال ایتمک دکل، بالعکس وقوعات مهمه بی ضابطانه حرفی حرفنه اوکرتہ رک آنلری مستقبلمده کی سفرلر ایچون حاضر لامقدر. اونک ایچون کندیسنی بیلان، عسکرلکنی جـداً سون بر ضابط، دیکرلرندن صرف نظر هیچ اولمزسه کندی اردوسنک مظفریاتی و آنلرک اسبابی برر برر تعقیب ایدرک بو وجه ایله فن حربک تطبیقاتی اوکرتمکه وجـداناً مجبوردر. یوقسه یالکز تحتہ باشنه تباشیرله چیزیلان بر قاج مانوره نظامی نظریات کتابلرنده کی بر قاج قاعده ایله جدی، وعملی بر عسکر اولمق ممکن دکلدرد.

(دومکه میدان محاربه سی) عنوانیله یونان سفرینی تپـهـدن طیرناغه احتوا ایتمک اوزره یازیلان اثرک قیمت عسکریه وادیه سنی کوسترمک ایچون بر چوق برهانلر وارسه ده بوراده یالکز مندرجاتی سویلمکله اکثفا ایلرز.

برنجی جلد

بیان معذرت.

برنجی فصل — تاریخ حرب فصل یازیلور ؟
ایکنجی فصل — عثمانلی ، یونان اردولری ؛ اردوی هایون
ضابطلرینک منشائی ؛ یونان ضابطلرینک منشائی .

اوچنجی فصل — حربک اسباب ظهوری .

دردنجی فصل — دارالحرب .

بشنجی فصل — دارالحرب حقده اوزون بر مطالعه .

آلتنجی فصل — سفر برلك زمانی .

یدنجی فصل — سفر بالانی (رسمی در) .

سکزنجی فصل — سفر برلك حرکاتی اوزربنه مطالعات ؛ یانیه

قول اردوسی ، آلاصونیه اردوی هایونی ، یانیه دارالحرکاتی ،

آلاصونیه دارالحرکاتی ، ویونان قوه عسکریه سنک (۳۰۱) ده کی

تجمع وانقسامی .

طقوزنجی فصل — سوق الجیش تجمعنه دائر ملاحظات .

اوتنجی فصل — عثمانلی ویونان شمندوفرلری .

اون برنجی فصل — اعلان حربدن اول یونان تجاوزی ،

(کویریوز) ده یونانیلرک ایلک تجاوزی ، واعلان حرب .

ایکینجی جلد

برنجی فصل — اعلان حرب اٹانسنده آلاصونیه اردوسنک
وضعیت ونظام حربی.

ایکینجی فصل — تسالیا اردوسنک وضعیت ونظام حربی.

اوچنچی فصل — میلونا کچید محاربہ سی.

دردنچی فصل — (۶) نیسان وقوعانی.

بشنجی فصل — (۷) نیسان وقوعانی.

آلتنجی فصل — (۸) نیسان وقوعانی.

یدنجی فصل — (۹) نیسان وقوعانی.

سکزنجی فصل — (۱۰: ۱۳) نیسان وقوعانی.

طاقوزنجی فصل — (۱۳) نیسان وقوعانی.

اونجی فصل — یکیشمردن صکرہ کی حرکات.

اون برنجی فصل — (ولستین) اوزرینہ کشف تعرضی.

اون ایکینجی فصل — (ولستین) محاربہ سی.

اون اوچنچی فصل — (ولستین) هجومی اوزرینہ برمطالعہ.

اوچنچی جلد

برنجی فصل — یکی ارکان حرب ضابطلری.

ایکینجی فصل — (چتالجه) اوزرینہ حرکت.

اوچنچی فصل — (۱۹-۱۳) نیسان وقوعانی.

دردنجی فصل — (۲۳) نيسان وقوعاتی وچتالجه محاربه سی.

بشنجی فصل — (۲۴) نيسان وقوعاتی.

آلتنجی فصل — اوچنجی (ولستين) محاربه سی.

يدنجی فصل — دومکه محاربه سندن اول يونان اردوسنك حرکاتی.

سکزنجی فصل — دومکه محاربه سندن اول شمال اردوسنك حرکاتی.

طقوزنجی فصل — تکه مجلس عالیء عسکریسی و دومکه میدان

محاربه سی ایچون یابیلان حرکات حربیه لایحه سی.

اوتنجی فصل — دومکه میدان محاربه سی.

اون برنجی فصل — دومکه قصبه سی وفورقه بوغازینك ضبطی.

اون ایکنجی فصل — بشنجی فرقه نك ارمیه اوزرینه حرکتی [*].

سَنَفِیْرَ تَطْبِیْقَاتِی

سابق آلمانیا حربیه ناظرلرندن جنرال (وردی) نك اك

مشهور اثریدر. بوائز، بر ملازمندن باشلايه رق برفریقه، برجنرال

کلنجهیه قدر فن حرب تطبیقاتی اك کوزل واک عملی بر صورتده

[*] یانیه جهتنده وقوعه کلان محاربه لر (ادیات عسکریه) ده برره،

بر یازیله حق وهر بریسنك مختصر قروکیلری نشر ایديله جکدره.

اوکره در. هر صنف تعلیمنامه سنه کوره ترتیب ایدلمش اولان بو
 مهم اثری بر کره فقط جدی بر نظرله اوقویانلر، محاربه ده بولنش
 قدر تجارب عسکریه صاحبی اولورلر. (خدمت سفریه) کبی
 حرب حاضرک اساسی و روحی دیمک اولان برفی ذهنلردن
 اصلا سیلینمیه جک وجه ایله پک حیرته شایان بر یولده یازمغه
 موفق اولدیغیچون جنرال (وردی) اک بیوک آلفیشلره لایق
 بر عسکر در. شو بیوک اثر حتی اک آشاغی بر نفرک آکلایه جفی
 یولده یعنی پک آجیق برلسان ایله ترجمه ایدلمشدر. اثرک حدذا
 تنده یدی سکز پارچه خریطه سی و قروکیلری واردر. طبع
 و نشرینه موفق اوله بیلور ایسه م بوندن طولانی کنیدی اک زیاده
 بختیار عد ایده جکم.

غیرت بزدن، توفیق اللمدن

نمونه کتابت عسکری

نقریباً (۴۰۰) صحیفه دن مرکب اولان بو اثرده اوج
 هفته یه قدر طبع و نشر ایدلمک اوزره در.

دردنجی فصل — (۲۳) نیشان وقوعاتی و چتالجه محاربه سی.

بشنجی فصل — (۲۴) نیشان وقوعاتی.

آلتنجی فصل — اوچنجی (ولستین) محاربه سی.

یدنجی فصل — دومکه محاربه سندن اول یونان اردوسنک حرکاتی.

سکزنجی فصل — دومکه محاربه سندن اول شمال اردوسنک حرکاتی.

طقوزنجی فصل — تکه مجلس عالی عسکریسی و دومکه میدان محاربه سی ایچون یاییلان حرکات حربیه لایحه سی.

اوتنجی فصل — دومکه میدان محاربه سی.

اون برنجی فصل — دومکه قصبه سی و فورقه بوغازینک ضبطی.

اون ایکنجی فصل — بشنجی فرقه نک ارمیه اوزرینه حرکتی [*].

سِفَرِ تَطْبِیْعِی

سابق آلمانیا حربیه ناظرلرندن جنرال (وردی) نک اک مشهور اثریدر. بوازه بر ملازمدن باشلایه رق برفریقه، برجنزاله کلنجهیه قدر فن حرب تطبیقاتی اک کوزل واک عملی بر صورتده

[*] یانیه جهتنده وقوعه کلان محاربه لر (ادبیات عسکریه) ده برر، برر یازیله حق وهر بریسنک مختصر قروکیلری نشر ایدیله جکدره.

اوکره در. هر صنف تعلیمنامه سنه کوره ترتیب ایدلش اولان بو
 مهم اثری بر کره فقط جدی بر نظرله اوقویانلر، محاربه ده بولنش
 قدر تجارب عسکریه صاحبی اولورلر. (خدمت سفر به) کبی
 حرب حاضرک اساسی و روحی دیمک اولان برفی ذهنلردن
 اصلاً سیلینمیه جک وجه ایله پک حیرته شایان بر یولده یازمه
 موفق اولدیغیچون جنرال (وردی) اک بیوک آلفیشلره لایق
 بر عسکر در. شو بیوک اثر حق اک آشاغی بر نفرك آکلایه جنی
 یولده یعنی پک آجیق بر لسان ایله ترجمه ایدلشد. اثرک حدذا
 تنده یدی سکز پارچه خریطه سی و قروکیلری وارد. طبع
 و نشرینه موفق اوله بیلور ایسم بوندن طولای کنیدی اک زیاده
 بختیار عد ایده حکم.

غیرت بزدن، توفیق اللمدن

نمونه کتابت عسکری

تقریباً (۴۰۰) صحیفه دن مرکب اولان بو اثرده اوج
 هفته به قدر طبع و نشر ایدلمک اوزره در.

فهرس مندرجات

صحنه

۳	مکاتب عسکریه نظارت جلیله سنه استدعا .
۴	تدقیق مؤلفات قومیدسیونک راپوری .
۵	مجلس معارف عسکریه نک اعلامی .
۶	میر آلاى عزتو طاهر بکه مکتاب .
۱۳	مدخل .
۲۳	برنجی فصل: حربك حیات فعل اوزرنده کی وظیفه سی .
۲۸	ایکنجی فصل: شمديکی حربلرک طبیعت خصوصیه سی .
۳۳	اوچنجی فصل: شمديکی زمان حربنک طبیعت اساسیه سی .
۵۴	دردنجی فصل: حربك اشکال اصلیه سی .
۷۲	بشنجی فصل: تعرض سوق الجیشی (تعرض تعبییه وی) .
۹۸	آلتنجی فصل: مدافعه سوق الجیشی ومدافعه تعبییه وی .
۱۲۳	یدنجی فصل: تعرض ومدافعه نک بالمناوبه استعمالی .
۱۳۰	سکزنجی فصل: حرکات .
۲۰۱	طقوزنجی فصل: تعرض سوق الجیشی حرکاتی .
۲۶۳	اونجی فصل: تعرض تعبییه وی حرکاتی .
۲۹۲	اون برنجی فصل: مدافعه سوق الجیشی حرکاتی .
۳۳۳	اون ایکنجی فصل: مدافعه تعبییه وی حرکاتی .
	اون اوچنجی فصل: شرائط خصوصیه داخلنده یاییلان
۳۶۳	حرکات .
	اون دردنجی فصل: حرکات بحریه نک اداره حرب
۳۸۶	اوزرنه اولان تأثیری .

: اجزاسى ۱۲ : اعلا مجلدى ۱۵ غروشدور .
طشره ايچون ۳ غروش ضم اولنور .

کتابخانه عسکرىنک چيقان جزؤلى :

سوق الجیش (رنجى جلد)
سوق الجیش (ايکنجى جلد)
نمونه کتابت عثمانى
تاريخ حرب (رنجى جلد)
تاريخ حرب (ايکنجى جلد)
تاريخ حرب (اوچنجى جلد)
دومک ميدان محاربه سى (رنجى جلد)
دومک ميدان محاربه سى (ايکنجى جلد)
دومک ميدان محاربه سى (اوچنجى جلد)
مختصات اصول تعبيه
تبيه وسفره تطيقاتى
حربك سوق واداره سى

نشر ايديله جك جزؤلى :

نمونه کتابت عسکرى .
سفره تطيقاتى « آلمانياك سابق حريه ناظرى جنرال
وردى نك ائرى » .

مهرسز نسجه لر ساخته در .

